

## 新唐書

宋 歐陽修 宋 祁 撰

中華書局

卷一五三至卷一七〇(傳)第 一 六 册

# 唐書卷一百五十三

## 列傳第七十八

# 段秀實 伯倫 鼻 文楚 珂 劉海賓 顏眞卿

常清逐北, 請秀實爲判官。 責曰:「憚敵而奔,非勇也;免己陷衆,非仁也。」嗣業慚,乃與秀實收散卒,復成軍,還安西 仙芝討大食,圍怛邏斯城。會虜救至,仙芝兵卻,士相失。秀實夜聞副 經,其友易之,秀實曰:「搜章擿句,不足以立功。」乃棄去。 母疾病,不勻飲至七日,病間乃肯食,時號「孝童」。 段秀實字成公,本姑臧人,曾祖師濬,仕爲隴州刺史,留不歸,更爲汧陽 天寶四載,從安西節度使馬靈詧討護蜜有功, 秀實曰:「賊出 遷隴州大堆府果毅。 羸 師, 餌我也,請大索。」悉得其廋伏,虜師熸。 後從封常清討大勃律,次賀薩勞城, 授安西府別將。 及長,沈厚能斷,慨然有濟世意。 將李嗣業聲, 靈詧罷, 改經德府折衝都 與虜戰, 又事高仙芝。 秀實六歲 識之,因 勝之

列

傳

第七十

八

段

秀

實

四八四七

尉。

秀實聞之, 鄴,嗣業與諸將圍之,以輜重委河內, 責謂曰:「天子方急,臣下乃欲晏然,公常自稱大丈夫,今誠兒女耳。」|嗣業因 不敢害,更推白孝德爲節度使。 義,奏擢試光祿 |秀實督餽係道,募士市馬以助軍 師,以秀實爲副。 肅宗 在 即遺白孝德書, 靈武,詔嗣業以安西兵五千走行在,節度使梁宰欲逗留觀變,嗣業陰然可, 少卿。 嗣業爲節度使,而秀實方居父喪,表起爲義王友,充節度判官。 俄而 使發卒護喪送河內, 元禮爲麾下所殺,將佐多死,惟秀實以恩信爲士卒所服,皆羅 秀實凡佐三府、益知名。 諸軍戰愁思岡,嗣業中流矢卒,衆推荔非元禮 署秀實兼懷州長史, 親與將吏迎諸境, 知州事 ٠, 傾私 兼留後。 財葬之。 固 時 請宰, 師 代將其軍。 元禮 安慶緒奔 老 )財悪, 秀實 高其 遂

能制 中畏戢。 是邠寧乏食,乃請屯奉天,仰給畿內。時公廩竭,縣吏不 時 一吐蕃襲京師,代宗幸陝,勸孝德即日鼓行 秀實日:「使我爲軍候,豈至是邪?」司馬王稷言之,遂知奉天行營事。 兵還,孝德薦爲涇州刺史,封張掖郡王 入援。 知所出,皆逃去,軍輒散剽,孝德不 孝德徙邠寧,署支度營田 號令嚴壹, 副 使。 於

嗜惡者,納賄竄名伍中,因肆志,吏不得問。 時郭子儀以副元帥居蒲,子晞以檢校尙書領行營節度使,屯邠州,士放縱不法,邠人之 白晝羣行丐頡於市,有不赚,輒擊傷市人,惟釜

籍中 始終。 若 出 寇 郭氏 「敢讙 層 屬邪 暴 市 付 獲 ,秀實笑且入, 曰:「殺一老卒, 召秀實 - ,殺害人,藉藉 公治 取 盎 ,戒候卒擊柝衞之。 功名,其與存者有幾 死 者死 副 盈道, 酒 今尚書恣卒爲暴 ,公見人被暴害,恬然,且大亂,若何? 元 天子 刺酒 日:「奈何?」秀實日:「請辭於軍。」乃解 」秀實曰:「吾未晡食,請設具。」已食,曰:「吾疾作, 帥固負若屬 至撞害孕婦。 邊 翁 壞 事 如是,幾日不大亂? 釀器,秀實 公誠以爲都虞候,能爲公已亂。」孝德即檄署付軍。 ,使亂天子邊,欲誰歸罪?罪且及副元帥。 () | | | | | | | | | | 邪? 旦,與俱至孝德所,謝不能。 孝德不敢劾, 奈何欲以亂敗郭氏 再拜曰:「公幸教晞, 列卒取之,斷首置 何甲也! 亂由尙書出。 秀實自州以狀白府, 吾戴 」孝德日:「願奉教。」因請 頭 ...」除出,秀實日:「副元帥功塞 樂上, 佩 來矣。」甲爲愕眙。 願奉軍以從。」卽 力, 洲由 人皆曰尚書以副元帥故不戢士,然則 選老躄一人持馬,至晞門下。 植市門外。 足安。 願計 願宿門下。」遂臥 今 | | | | | | 事,至則曰:「天子以生 叱左右 一營大課 因曉之日:「尙書固負 曰:「秀實 惡子弟以貨竄名 俄 皆 而 解 晞 天地, 甲, 示 軍 士十 甲, 忍 令 日 當務 甲 無

無入,令諶 遜 諭令諶 曰:「我知入,不知旱也。」責之急,農無以償 令諶 召農責日:「我畏段秀實邪?」以牒置背上, 取 人人田 自占,給與農, 往訴秀實。 約熟歸 大杖擊二十, 其 秀實署牒死之, 半。 是歲 《大旱, 輿致廷中。 因 |使人 農告

列

令諶曰:「汝誠人乎! 秀實 馬,賣而市穀入汝,汝取之不恥。 、泣曰:「乃我困 一汝。」卽自裂裳裹瘡注藥, 涇州 野如赭 凡爲人傲天災,犯大人, ,人飢死,而 賣己馬以代償。 爾必得穀,擊無罪者。 擊無罪者,尚不愧奴隸邪 准 西將尹少榮 段公, 仁信· 頗 剛 :大人, 鯁 惟

聞

大愧流汗,曰:「吾終不可以見段公。」一夕,自恨

死

以勞 鄭 嚴警備。夜中果火發,令軍中曰:「敢救者斬! 知 人斬以徇,曰:「後徙者族!」軍途遷涇州。 「每籌盡當報。」因 與出怨言。 兵馬使 、潁二州 《加御史中丞。|大曆三年,遂徙|涇州。 馬璘代孝德,每所咨逮。 以佐軍,命秀實爲留後。 別將王童之謀作亂,約日:「聞警鼓而縱。」秀實知之,召鼓人,陽怒失節,戒曰: |延數刻,盡四鼓而曙。 隣處決不當,固爭之,不從不止。 軍不乏資,二州以治。 明日,復有告者曰:「夜焚稟積,約救火則亂。」秀實 是軍自四鎮、北庭赴難 于時, 」童之居外,請入,不許。明日,捕之,丼其黨八 倉無久儲, 郛無居人, 朝廷患之, 韶; | 隣嘉其績,奏爲行軍司馬, 始,璘城涇州 ( ) 征伐數有功,旣驟徙,相 ,秀實爲留後 兼 領

將 麾下 吐蕃 斬。 寇 邊、戰 公等忘 鹽倉,師不利。 死 而 欲 安其家邪 」乃悉城中士,使銳將統之,依東原列奇兵,示賊將 失

戰。

虜望之,不敢逼。

俄

而璘得歸

朝夕臨,三日止。 賓客,家人位於堂,宗族位於廷,賓將位於牙內,尉吏士卒位於營次, 久之,璘有疾,請秀實攝節度副使。 有族談離立者,皆捕囚之。 秀實按甲備變,磷卒,命愿將馬頔主喪,李漢惠主 都虞候史廷幹、裨將崔珍張景華欲謀亂,秀實 非其親,不得居喪側。

狀,秀實言:「方春不可興土功,請須農隙。」炎謂沮己,遂召爲司農卿。 蓬萊殿,代宗問所以安邊者,畫地以對,件別條陳。 戶。還之鎭。德宗立,加檢校禮部尙書。 送廷幹京師,徙珍、景華宇外,一軍遂安。 非公會不舉樂飲酒,室無妓媵, 卽 ;拜四鎭北庭行軍、涇原鄭潁節度使。 無贏 。建中初,宰相楊炎追元載議,欲城原州,詔中使問 財, 數年,吐蕃不敢犯塞。又按格令,官使二料取其 賓佐至,議軍政,不及私。 帝悅,慰賚良渥,又賜第一區,實封 十三年來朝 当對

陽與合,陰結將軍劉海賓、姚令言判官岐靈岳、都虞候何明禮,欲圖泚(1)。三人者,皆秀實 天下,今變起蒼卒,當論衆以禍福,掃淸宮室,迎乘輿,公之職也。」泚默然。 「公來,吾事成矣。」秀實曰:「將士東征,宴賜不豐,有司過耳,人主何與知?公本以忠義聞 乃遣人諭大吏岐靈岳竊取令言印,不獲,乃倒用司農印追其兵。旻至駱驛, 朱泚反,以秀實失兵,必恨憤,且素有人望,使騎往迎。 會源休教泚僞迎天子,遣將韓旻領銳師三千疾馳奉天。秀實以爲宗社之危不容 。 秀實與子弟訣而入,泚喜曰: 秀實知不可,乃

賊害 從 並 實 汝 秀實 謂 語 應 反 於 海 帝 邪 至 大 賓日:「晏之來, 在 憯 奉天, 逐 位 呼曰:「我 一勃然: 翌日 擊之。 恨用秀實不 起,執休腕, 泚 不同反, 泚 召 舉臂 1秀實計 吾等 [捍笏, 胡不 極才 無 奪其象笏,奮 事 流遺類。 - 殺我! 中顙, 垂 源休、姚令言、李忠臣、李子平皆在 河 我當直搏殺賊, 悔 逐 流 悵 血 遇 而 蠖面 害, 前,唾 年六十五。 匍 泚 匐 面 不然則死。」乃約 走。 大罵 賊 日:「狂 海賓、 衆未敢動, 明禮 賊 坐, 事 可磔 一急爲 而 秀實戎服 靈 岳 海 萬段, 等皆 賓等 我豈 繼 無 與 而

泚, 白 泚 初 家 取 人拒, 秀實 視 其 自 不 封 涇州 帕完 遂 被召, 至 新 都 戒其家曰:「若 秀實怒 曰:「吾終不 過 岐, 朱泚 以汙吾 心致贈遺, 第。」 」以置 愼毋納。」至岐, 司 農治堂之梁間。 泚 吏 固 後 致 以 大 綾

待之? 卒亂, 乘, 풆 秀實 以大制 召神策 且猛 賞 虎所 以 小, 禁 軍 以 以 兵 寡 無 百 + 一 人 獸畏者, 制 弱 ---<del>-</del> 不 至 -足備: 者 今外有不 爲爪 ,世多其謀 非常, 牙 也, 廷之虜,內有梗 言於帝曰:「古者天子日 若去之, 則 犬彘馬 命之臣, 牛, 萬 而 禁兵寡 皆能 乘,諸! 爲 侯日 敵 少 。」帝 千乘, 卒 ·有 不 患 甪。 大夫 難 及 何 巫 以

正 員官。 興元 元 帝還都, 年 詔 贈 义韶致祭,旌其門閭,親銘其碑云。 太 尉 諡 日 忠 烈。 賜 封 戶 五 百 莊、 大和中, 第各 子伯倫始立廟, 區 ; 長子 品 諸 有韶給 子 五 鹵 品 並

賜度支綾絹五百,以少牢致祭。

伯倫累官福建觀察使, 終太僕卿。 時宰相李石請文宗加賻襚, 鄭覃曰:「自古殺身利

社稷,未有如秀實者。」帝惻然,爲罷朝,可其請。

孫嶷、文楚、珂知名。

嶷自鄭滑節度使入爲右金吾衞大將軍, 封西平郡公。 甘露之變, 嶷當誅,裴度奏忠臣

後, 宜冤死, 貶循州司馬。

文楚, 咸通末爲雲州防禦使。 時李國昌鎭振武, 國昌子克用欲得雲中, 引兵攻之, 殺

於鬭鷄臺下,沙陀之亂自此 始。

珂, 僖宗時居潁州, **黄巢**圍潁, 刺史欲以城降,阿募少年拒戰,衆裹糧請從, 賊遂潰,

州 司 馬。

文喜獻闕下,拜左驍衞大將軍,封五原郡王; 文喜據涇州叛,海賓與其子光國給以奏請。 劉海賓者,彭城人, 以義俠聞。 爲涇原兵馬將, 海賓樂平郡王,贈太子太保,實封百戶。 及入對, ,因言姦慝可誅狀。 與秀實友善。 累戰 功 既還, 兼御史中丞。

劉

顔 卿字清臣 ,秘書監師古五世從孫。 少孤,母殷躬加訓導。 旣長, 博學,

親孝。

眞卿 年, 决, 官。 天且旱, 有詔終身不齒, 開元 再轉 日:「奈何以 武 中,舉進士,又擢制科。 部 真卿辨獄 員 <u>د</u> 外 時 鄓。 聞者聳然。 念, 而 雨, 國忠終欲去之,乃出爲平原太守。 欲危宋璟後乎? 郡 人呼「御史雨」。復使河東, 遷 調體泉尉。 是殿中侍公 」宰相楊國忠惡之, 御 史。 再遷監察御史,使河、隴。 時御史吉温 劾奏朔方令鄭延 以 調中丞蔣洌奏爲東都 私怨構中丞宋渾, 時五原有冤獄久不 祚 母 死 不葬三十 謫賀州 採訪 判

酒, 日:「股不識 軍 李平馳奏。 以紓祿山 安祿 Щ 眞 逆狀牙孽,眞卿度必反,陽託霖雨,增陴濬隍, 之疑。 卿 玄宗始聞亂, 何 如如 果以爲書生,不虞也。 人,所 爲乃若此! 歎曰:「河北二十四郡, 禄山 反, 無一忠臣邪? 河朔盡 料才 陷, 壯、儲廥 獨 」及平至,帝大喜, 平原城守具備, 廩。 日與賓 客泛舟飲 使 謂 司 兵 參

徐浩、 盧全誠、 時 馬 平 相 濟南太守李隨、 原 如 有靜塞兵三千, 高抗期等爲將,分總部 清河長史王懷忠、 乃益募士,得萬人, 伍。 大饗士城 景城司馬李暐、 遣錄 酒門, 事參軍李擇交統之, 慷慨 鄴郡太守王燾各以衆歸, 泣 下, 衆 以刁萬 感 勵 饒陽 和 有韶

河 北 海 ·,眞卿畏衆懼,紿諸將曰:「吾素識<u>憕</u>等, 太守賀蘭進明 率精鋭 五千濟河爲助。 賊破東都, 其首皆非是。」乃斬子光,藏三首。它日,結 遣段子光傳李燈、 盧奕、 蔣清首 徇

體,斂而祭,爲位哭之。

賈載、沈震爲判官。

俄加河北招討採訪

使。

盟主,兵二十萬,絕濕、趙。詔卽拜戶部侍郞, 是時,從父兄杲卿爲常山太守,斬賊將李欽凑等,清上門。 佐李光朔討賊。 真卿以李暉 十七郡同日自歸, 自副 而用李銑 推眞卿爲

公因 以教我?」崿日:「朝家使程千里統衆十萬,自太行而東,將出啷口,限賊不得前。 也, 將 犀 魏 李擇交、 ·銳制其衝。 郡,斬賊守袁知泰,以勁兵披螂口,出官師使討鄴、幽陵,平原、淸河合十萬衆徇洛陽, [而撫有,以爲腹心,它城運之如臂之指耳。] |眞卿爲出兵六千,謂曰:「吾兵已出,子將何 有江淮租布備北軍,號『天下北庫』, 清河太守使郡人李崿來乞師,崿曰:「聞公首奮裾唱大順, 副將范多馥和琳徐浩與淸河、博平士五千屯堂邑。 戰,賊敗,斬首萬級,知泰走汲郡 公堅壁勿與戰,不數十日,賊必潰,相圖死。」眞卿然之。 計其積,足以三平原之有,士卒可以二平原之衆。 河朔恃公爲金城。 袁知泰遣將白嗣深、乙舒蒙 乃檄淸河等郡,遣大 清河, 西鄰 公若先伐

史 定期 童 饒陽, 遣游弈兵絕平原救軍,眞卿懼不敵,以書招賀蘭進明,以河北招討使讓 等兵二萬拒

萬,

以子頗爲質。

頗甫

十歲,

軍中固請留之,不從。

後

必得其法

以

軍

甪

饒

雄

明 觙 於信都 會平 ·盧將劉正臣以漁陽歸, 眞 卿欲堅其意, 遣賈載越海遺軍資十餘

計 使。 肅 宗 時 軍 即位 費 (困竭, 靈武,眞卿數遣使以蠟 李崿勸眞卿收景城鹽,使諸 丸裹書陳事 郡相輸,用度遂不乏。 0 拜 工部尚書兼御史大夫,復爲河北招 第五琦方參進明軍

敗 不 ·復 軍 罪 振 酿 П 吾死 眞 乘 卿 虚 不恨。」至德元載十月, 遣思明 謀 於衆日:「賊 尹子奇急攻河北, 銳 甚,不可抗。 棄郡度 諸郡復陷,獨平原、 河 若 委命辱國 間關 至 鳳翔謁 「非計 也,不 博平、清河固守。 帝 詔 如徑 授 憲部 赴行 尚書, 在 亨朝 然人心危, 延若誅 遷 御 史

降。 太廟爲賊毁,請築壇於野,皇帝東向哭,然後遣使。」不從。 「上皇在蜀, 而 騎 百官 真真 廣平 方 朝 卿 肅 王總兵二十萬平 廷 草味不 可乎 然。 ,5 兩京復, 帝還奏, - 暇給, 器 遽奏改之,帝以爲達 帝遣 慰答曰:「股子 長 而 安 眞 左司 卿繩治 了, 辭 郎中李選 日 當闕 如平 每 出 日。 識 不 告宗廟, 敢 諄諄 叉 乘, 武部侍郎崔漪、 建 教 趨出 言:「 祝 戒, 署 T 梐 杠 春秋 嗣 故不敢失。 宰相厭其言,出爲馮翊太守。 皇帝」, 乃 ,新宮災, 乘。王 諫議大夫李何忌皆被 眞 府都虞候管崇嗣 崇嗣 卿謂 魯成 老而 禮 公 儀 躄, 使 日 崔器 哭。 卿 姑容 劾斥 先 轉

蒲州刺史,封丹楊縣子。 爲御史唐旻誣劾,貶饒州刺史。

乾元二年,拜浙西節度使。 劉展將反,眞卿豫飭戰備,都統李峘以爲生事,非短眞卿,

因召爲刑部侍郎。展卒舉兵度准,而峘奔江西。

不拜,再遷吏部侍郎。除荆南節度使,未行,改尚書右丞。 李輔國遷上皇西宮,眞卿率百官問起居,輔國惡之,貶蓬州長史。 代宗立,起爲利州刺

留知 罪?然朝廷事豈堪公再破壞邪!」載銜之。俄以檢校刑部尚書爲朔方行營宣慰使, 每論事,皆先白長官,長官以白宰相,宰相詳可否以聞。」眞卿上疏曰: 省 帝自陝還,眞卿請先謁陵廟而卽宮,宰相元載以爲迂,眞卿怒曰:「用捨在公,言者何 事,更封魯郡公。時藏多引私黨,畏羣臣論奏,乃紿帝曰:「羣臣奏事,多挾讒毀。

北 能 目 使 1,使不 。」昔夏之伯明,楚之無極,漢之江充,皆讒人也。 (天下,事無細大得失,皆俾訪察,還以聞。 虚 諸 爲黑, 誣 司長官者,達官也,皆得專達於天子。郎官、御史,陛下腹心耳目之臣也,故出 ·聰明,則天下 則讒人也,宜誅殛之;其言不誣,則正人也,宜獎勵之。 變黑爲白也。 ·何望焉?詩曰:「營營青蠅,止于棘;讒言罔極,交亂四國。」以其 詩人疾之,故曰:「取彼讒人,投畀豺虎;豺虎不食,投畀有 此古明四目、達四聰也。今陛下欲自屛耳 陛下惡之,宜矣。 捨此不爲, 使衆人 胡 不回神省祭?

列

傳

第

七

-|-

八

顏

阗

卿

謂陛下不能省察而倦聽覽,以是爲辭,臣竊惜之。

心骨。 更相 之敝皆萃陛下, 日宣 礙。」防擁蔽 李輔國當權,宰相用事 路以目。 臣不先咨宰相輒奏事者,託以他故中傷之,猶不敢明約百司,使先關白。時閹人袁思藝 T驚恐, 昔太宗 詔至 中書,天子動靜,必告林甫,林甫得以先意奏請,帝驚喜若神,故權寵日甚,道 上意不下宣,下情不上達,此權臣蔽主,不遵太宗之法也。 也。 思明危懼, 勤勞庶政,其司門式曰:「無門籍者有急奏,令監司與仗家引對, 置立仗馬二,須乘者聽。 其所從來漸矣。 ,遞爲姑息。 相挻而反, 自艱難之初, 開三司,誅反側,使餘賊潰將北走党項,哀嘯不逞, 東都陷沒, 此其平治天下也。天寶後,李林甫得君,羣 先帝由是憂勤損壽。 百姓尙未凋竭,太平之治猶可致,而 陵夷至于今,天下 臣每思之, 不得關

事矣。 不諱之路,獨恐不言,況懷厭怠,令宰相宣進止,御史臺作條目,不得直進,從此 下在陝時,奏事者不限貴賤,羣臣以爲太宗之治可跂而待。 而 不敢進,即林甫、國忠復起矣。 今天下瘡痏未平,干戈日滋,陛下豈得不博聞讜言,以廣視聽,而塞絕忠諫乎?陛 陛下聞見,止於數人耳目,天下之士,方鉗 臣謂今日之事,曠古未有,雖林甫、國忠獨不敢公爲 口結舌, 陛下便謂無事 且君子難進易退 可論 朝廷開 豈 不 知 懼 奏

之。陛下不早覺悟,漸成孤立,後悔無及矣。

於是中人等騰布 中 外。 後攝 事太廟,言祭器不飭,載以爲誹謗, 貶峽州別駕。 改吉州司馬,

遷撫、湖二州刺史。

定, 載誅 袁傪固排之, 罷不報。 ,楊綰薦之,擢刑 部尙書,進吏部。 時喪亂後,典法湮放,眞卿雖博識今古,屢建議釐正,爲權臣沮 帝崩,以爲禮儀使,因奏列聖諡繁,請從初議

抑,多中格云。

之,數遣人問方鎭所便,將出之。 眞卿往見祀,辭曰:「先中丞傳首平原, 衣拭、親舌舐之、公忍不見容乎!」把矍然下拜、而銜恨切骨。 楊炎當國,以直 不容,換太子少師, 然猶領使。 及盧起, 益不喜, 改太子太師, 面流血, 吾不敢以 井使罷

行,答曰:「君命可避乎?」旣見添烈,宣詔旨,添烈養子千餘拔刃爭進,諸將皆慢駡,將食 色。 眞卿色不變。 希烈以身扞, 兄子峴與從吏數輩繼請,德宗不報。眞卿每與諸子書,但戒嚴奉家廟,恤諸孤,訖無它 希烈遣李元平說之,眞卿叱曰:「爾受國委任,不能致命,顧吾無兵戮汝, 李勉以爲失一元老,貽朝廷羞,密表固留。 李希烈陷汝州,杞乃建遣眞卿:「四方所信,若往踰之,可不勞師而定。」詔可,公卿皆失 麾其衆退, 乃就館。逼使上疏雪己,眞卿不從。乃詐遣 至河南,河南尹鄭叔則以希烈反狀明,勸不 **尚說我邪**?」

列傳

第七

+

八

額眞

⑩

大慚。 師,後雖被執,詬賊不絕于口。吾年且八十,官太師,吾守吾節,死而後已,豈受若等脅邪!」 希烈大會其黨,召眞 而太師至 賊失色。 時朱滔 ,求宰相孰先太師者?」眞卿叱曰:「若等聞顏常山否?吾兄也,祿山 、王武俊、田悦、李納使者皆在坐,謂希烈曰:「聞太師名德久矣,公欲建大號 卿 ,使倡優斥侮朝廷,眞卿怒曰:「公,人臣,奈何 如是?」拂 衣去。 反, 首舉義 希烈

諸

朝覲耳 爲 室西壁下日:「此吾殯所也。」希烈僭稱帝,使問儀式,對日:「老夫耄矣,曾掌國禮,所記諸侯 |希烈,奉||興爲帥,事洩,||曾死,乃拘送||真卿||蔡州。 」張伯儀 |希烈乃拘||阗卿,守以甲士,掘方丈坎於廷,傳將阬之,||眞卿見帝烈曰:「死生分矣,何多 敗,希烈令齎旌節首級示眞卿,眞卿慟哭投地。 眞卿度必死,乃作遺表、墓誌、祭文,指寢 會其黨周曾、康秀林等謀襲

下,三軍皆慟,因表其大節。淮、蔡平,子顒、碩護喪還,帝廢朝五日,贈司徒,諡文忠,賻布 奴曰:「從大梁來。」罵曰:「乃逆賊耳,何詔云!」遂縊殺之,年七十六。|嗣曹王|皋聞之,泣 日:「有韶。」眞卿再拜。 。」「眞卿起赴火,景臻等遽止之。「希烈弟」希倩坐朱泚誅,希烈因發怒,使閹奴等害眞卿 興元後,王師復振,賊慮變,遣將辛景臻、安華至其所,積薪于廷曰:「不能屈節,當焚 奴曰:「宜賜卿死。」曰:「老臣無狀,罪當死,然使人何日長安來?」

帛米粟加等。

婉,世寶傳之。」貞元六年赦書,授願五品正員官。 李正己、田神功、董秦、侯希逸、王玄志等,皆眞卿始招起之,後皆有功。善正、草書,筆力遒 |眞卿立朝正色,剛而有禮,非公言直道,不萌於心。 天下不以姓名稱,而獨曰魯公。 開成初,又以曾孫弘式爲同州參軍。 如

貳色,何耶?彼忠臣誼士,寧以未見信望于人,要返諸己得其正,而後慊於中而行之也。 嗚 呼,雖千五百歲,其英烈言言,如嚴霜烈日,可畏而仰哉! 毅然之氣,折而不沮,可謂忠矣。詳觀二子行事,當時亦不能盡信於君,及臨大節,蹈之無 志,決非偶然者。」宗元不妄許人,諒其然邪,非孔子所謂仁者必有勇乎?當祿山反,哮噬 爲人姁姁,常低首拱手行步,言氣卑弱,未嘗以色待物,人視之,儒者也。遇不可,必達其 無前,魯公獨以烏合嬰其鋒,功雖不成,其志有足稱者。晚節偃蹇,爲姦臣所擠,見殞賊手。 贊曰:唐人柳宗元稱:「世言段太尉,大抵以爲武人,一時奮不慮死以取名,非也。 太尉

列

#### 校勘記

陰結將軍劉海賓姚令言判官岐靈岳都虞候何明禮欲圖泚 各本原無「判官岐靈 岳」五 字。 按

之, 非令言而爲令言之判官岐靈岳。 姚令言爲朱泚忠實黨羽, 陰說大將劉海賓、何明禮、姚令言判官岐靈 段秀實 豈得與合謀 觀本卷下文「乃遣人諭大吏岐靈岳竊取合言印, 晑 泚? 岳同謀殺泚。」通鑑卷二二八略同。 查舊書卷一二八段秀實傳 云:「秀實 不獲」, 是秀實 初 亦明 詐從 所 結

| 令言實不與謀,而舊書所記可信。今據補。

## **唐書卷一百五十四**

## 列傳第七十九

李晟愿 憲 愬 聽 琢 王佖

於高當川, 矢殪之, 年十八, |李晟字良器,|洮州||臨潭人。 往事河西王忠嗣, 三軍讙奮。 又擊連狂羌於罕山,破之。累遷左羽林大將軍。 忠嗣撫其背曰:「萬人敵也。」鳳翔節度使高昇召署列將。 從擊吐蕃。 世以武力仕,然位不過裨將。 悍 雪 乘 城 , 殺 傷 士 甚 衆 , 廣德初,擊党項有功,授特進, 晟幼孤 忠嗣怒, 募射者, 晟挾一 一、奉母 孝。 擊疊州叛羌 身長六尺。

試太常卿。

府儀 以 謀 則多。」乃請千人。繇大震關趨臨洮,屠定秦堡,執其帥慕容谷鍾,虜乃解靈州去。 同三司,以右金吾衞大將軍爲涇原、四鎭、北庭兵馬使。 大曆初,李抱玉署晟右軍將。 吐蕃寇靈州,抱玉授以兵五千擊之,辭曰:「以衆則不足, 馬璘與吐蕃戰鹽倉,敗績,

四八六三

列

傳

第

七十

九

李晟

率 劍 游 南 兵 拔 崔 璘 寧未 以歸, ·還,蜀土大震,詔晟將神策兵救之。 封合 川 和王 璘內忌晟威略,歸之朝 踰漏天, 3,爲右: 拔飛越等三城, 神策都將。 德宗 絕大渡 始立 吐蕃

千級,虜遁去

晟 乘冰度 建 一二年 洛 水 破悅 魏 博 田悅反,晟爲神策先鋒,與河東馬燧、 又戰洹水,悅 大 敗,遂進攻 |魏 加檢 校左散騎常侍,兼魏府左 昭義李抱眞合兵攻之。 斬楊朝光 司

范陽 遽引 者、一 救, 之。悦、武俊 而 北 吾三帥也 朱滔 去 武俊 則 武 燧悟 王 果 俊 引兵戰 晟內攻 武 等當捨 解 去。 邢、 俊 釋然 圍 台樓 |趙 趙 人景濟 康 晟留趙三日 比 』。」帝壯· 日知于趙州 壤 卽 孝忠兵管, ,而外抗滔等, 造 今賊以 抱眞 之, 與孝 壘 授御 兵 也 晟 ,抱眞分兵二千 加趙,是那 引 忠 與交歡。 史大夫, 自正 步騎 連 兵, 月至 擊 北 破 叉 晟 有 五 略 之, (俾神 畫 建言:「以兵趨定州, 一月不 恆 夜 戍 州 淸 策三將軍 ·憂,<u>李公</u>分衆守之,不爲過, 邢 解。 苑 , 燧怒, 重 益 會晟疾 朱滔 急。 莫仁擢等隸之。 欲班 將鄭景濟 滔 甚 師, 武 與張孝忠合, 不 俊 晟日:「奉韶 能 大 於清 懼 興 苑 軍 悉 晟自 公奈 中 起 决 東討 以 兵 水 魏 何

晟 無 疾 间 晟語衆曰:「天子播越,人臣當百舍一 將 復 進 會帝 出 奉 ·天 有 詔 召晟 卽 日 息。 治 嚴。 養武欲止吾,吾當以子爲質。」乃以憑約 而 孝 忠 以軍 介二 盜 間 倚晟 爲 數

引

還定州

而

賊

獝

不

· 致逼

拜神策行營節 南 并遺良馬。 軍囂 無制。 度使。 孝忠 德信入謁晟, 有親將謁晟, 進 **海**渭北 晟責所以敗, 壁東渭 晟 解 玉帶遺之, 橋 所 斬之, 過 巡樵蘇 使喻孝忠。 以數騎入壁勞其軍 無 犯。 時劉 乃得踰 德 信自 飛狐 ||扈澗 次 無敢動。 敗歸 代州 亦 詔 次

丼兵,

則軍

振

豈宜 公先 延 光 有 聯 自 腽 於是朔方李懷光方軍咸陽, 異志。 死 表 壘。 裸 且不悔。」懷光 晟每與賊戰,必錦裘 ,爲賊餌哉! !」晟曰:「昔在涇原 不納 繡帽自表, 不欲晟當一面, 指顧陣前。 ,土頗 請與混合。 《相畏伏,欲令見之,奪其心爾。」懷光 懐光望 公宜速進兵。 有韶徙屯, 見,惡之,戒曰:「將務持重, 乃引趨陳濤斜 雖晟 不肖 , 不 願爲 悅,

謀沮 晟 贍 臣 一,顧 一無以 遭 撓 每 刻 日:「公,元帥 翰林學士陸贄 其軍 兵至 解 削稟賜事 惟陛 都 , 卽 城下 | 奏言: 下裁處。 出己 軍 ·,而懷光軍多 臨 一,乃止。 政 「神策兵給賜 詔 得專之。 懐光 」懷光欲晟自 令與晟 /鹵掠, |晟將一軍, 比 近方鎭 計 削 **晟軍** 所宜 其 獨 軍 上整戢。 者。 厚, 唯所命, 則 今桀逆未平, |懐光 士怨易撓。 懷光使分所獲遺之, 其增損費調 日:--稟賜不 帝議 軍 不 均, ,敢不聽? 諸軍 可 以異。 軍 又辭 與神策等, ·何以 」懷光默然計 不敢受。 戰 且衆以爲言, ! 」實 力且 懐光 數

列

傳

益急。 以通蜀 所 并,上言:「當先變制備,請假裨佐趙光銑、唐良臣、張彧爲洋、利、劍 晟與李建徽、 、漢衿喉。」未報。 屯咸 後數日,懷光幷建徽、惠元兵,惠元死之。 陽 凡八 陽惠元皆聯屯, 旬,帝數促戰,以伺賊隙爲言,卒不出兵,陰通失泚,反 會吐蕃欲佐誅泚 適有使者到晟軍, ,帝議幸咸陽督戰,懷光大駭,疑帝奪其軍 晟乃令日:「有詔徙屯。」 **三州** 迹寖露。 刺 史, 即結陣趨 各勒兵 晟懼 圖 反

章事。 奪。 坐有也。」顧渾瑊曰:「渭橋在賊腹中,兵孤絕,晟能辦勝邪?」」瑊曰:「晟秉義挺忠,崒然不 圖 收復 臣策之,必破賊。」帝乃安。 是日,帝進狩梁州。駱谷道隘,儲供 展受命,拜且泣曰:「京師,天下本,若皆執羈靮,誰將復之!」乃繕甲兵,治陴隍,以 自行 在遣晟將張少弘口詔進晟尚書左僕射、同中書門下 不豫,從官乏食、帝歎曰:「早用晟言,三蜀之利 一; 平 可

覂,乃使張彧假京兆少尹,多署吏,調畿內賦,不淹旬, 獨米告具。乃陳兵下令曰:「國 衆守潼關, 難 尾 ~",乘 了,吾欲與公戮力一心,建不世之功,可乎?」士皆雪泣曰:「惟公命。」於是<u>駱元光以華州</u>之 是時 奧播遷,見危死節,自吾之分。公等此時不誅元凶,取富貴,非豪英也。 展提孤軍橫當寇鋒,恐二盜合以軋之,則卑詞厚幣,偽致誠於懷光者。 尚可孤以神策兵保七盤,皆受晟節度,戴休顏舉奉天, 韓游瓌悉邪寧軍從晟 渭橋斷賊首 時敖廥單 家多

懷 光 始懼。 晟乃移書顯讓之,使破賊自贖。 懷光不聽,然其下益攜落,畏爲晟襲,乃奔河中。

其將孟涉、段威勇以兵數千自拔歸,晟皆表以要官。

帝欲 使晟 崔宣諜者,晟命釋縛,飯飲之,遣還,敕曰:「爲我謝令言等,善爲賊守,勿不忠于]泚。」 不屬,盛夏,士有衣裘者,晟能與下同其苦,以忠誼感發士心,終無攜怨。邏士得姚令言、 口 `錄參軍|李敬仲自賊中來,乃署節度府判官,以諫議大夫鄭雲逵爲行軍司馬,擢張彧自副 益 帝遣 神策軍及晟家皆爲賊質,左右有言者,晟涕數行下,曰:「陛下安在,而欲恤家乎?」泚 西幸,晟請駐梁、漢以繋天下望。 使者間道韶晟兼河中、晉絳慈隰節度使,又兼京畿、渭北、鄜坊、丹延節度招討使。 又進京畿、渭北、鄜坊、商華兵馬副元帥。 時京兆

將張庭芝、李希倩求戰,晟顧曰:「賊不出,是吾憂也。 是披其心腹,將圖走不暇。」諸將曰:「善。」乃自東渭橋移壁光泰門,以薄都城,連溝栅。而賊 展日:「外城有里閈之隘,若設伏格戰,居人囂潰,非計也。 尸相藉 兵鏖擊。 乃引兵叩都門,賊不敢出,振旅而還。明日,會諸將圖所向,衆對先拔外城,然後淸宮。 ,餘衆走白華,賊大哭,終夜不息。 賊攻華 師急,晟以精騎馳救,中軍譟而從,大破之,乘勝入光泰門,再戰 翌日,將復戰。 今乃冒死來,天誘之矣。」勒吳詵等縱 或請待西師 賊重兵精甲聚苑中,今直擊之, ·晟曰:「賊旣敗,當乘 ,敗卻,僵

列

傳

第

七十

九

李晟

機撲 驚潰,禽馘略盡。泚率殘卒萬人西走,田子奇追之,餘黨悉降。 將步,抵 遇皆不勝,贼入白華。 賊伏千騎出官軍背,晟以麾下百騎自馳之,左右呼曰:「相公來!」 賊 縱賊?今先斬公矣!」萬頃懼,先登,拔栅以入,佖督騎繼之,賊崩潰,執其將段誠諫,大兵 分道進,雷噪震地。一合言、庭芝、希倩等殊死鬭,晟令唐良臣等步騎奔突,賊陣成輒北,十餘 苑北。 苟俟 西軍 晟先夜隤苑垣爲道二百步,比兵至,賊已伐木塞以拒戰。 晟叱諸將曰:「安得 ,是容其爲計,豈吾利邪?」乃悉軍軍光泰門,使王佖、李演將騎,史萬頃

省官,以俟乘輿。條脅汙于賊者,請以不死。 駱元光屯章敬寺,晟屯安國寺。斬賊用事者及臣賊宦豎于市,表著節不屈者,擇文武攝臺 二,卽斬以徇。坊人之遠者,宿昔乃知王師之入也。明日,孟涉屯白華,倘可孤屯望仙門, 尹李齊運部長安、萬年令,分慰居人,秋毫無所擾。 展引軍屯含元外廷,舍右金吾次,令軍中曰:「五日內不得輒通家問,違者斬。」遣京兆 別將高明曜取賊妓一,司馬伷取賊馬

中書令,實封千戶 不 旗鼓,雖三代用師,不能加之。」帝曰:「天生晟,爲社稷萬人,豈獨朕哉!」拜晟司徒,兼 露 ·布至梁,帝感泣,羣臣上壽,且言:「晟蕩夷兇憝,而市不易廛,宗廟不震,長安之人

展遣大將吳詵以兵三千到寶鷄清道,自請迎扈,不許。 帝至自梁,晟以戎服見三橋,帝

徙,二也。 足, 罪。 皆曰:「非所 也。 相送之。帝紀 賜第永崇里、涇陽 亦將治殺張 曰:「天子暴露, 翔 興 馬勞之。 忽驚東偏,何以待之? (再狩 且人 時官 、隨右、涇原節度使,兼行營副元帥 涇州 始 又言:「赦 晟 乃乃臣 倚 可用 者尹元貞持節到 屯渭橋 兵力未窮,忽宥反逆,四夷聞之,謂陛下兵屈而自罷耳, 邊 及 **| 鎰罪,帝方務安反側,不許。** 晟再拜頓首,賀克殄大盜,廟朝安復, 其功 也。」 懐光 \_, 而 .不任職之咎,敢請死。」伏道左,帝爲掩涕,命給事 數戕其帥, 人臣當力死 不可使之知也。 也,熒惑守歲,久乃退,府中皆賀曰:「熒惑退,國家之利,速用兵者昌。」艮 ,自文于碑,敕皇太子書,立于東渭橋,以示後世云。 上田、延平門之林園、女樂一 有五不 ·可 : 一也。今赦 同、華,擅入河中諭慰李懷光,晟劾元貞矯使, 晟請治不龔命者, 動難 河中抵京師三百里,同州 夫惟五 ٠, 安知天道邪? 懷光, , 徙王 晟至 一緯盈縮不常, 則必以晉、絳、慈、隰還之,渾瑊、康日知又且遷 鳳翔 西平郡,實封千五百戶。 因以訓耕積粟實塞下,羈制 列。 已即 」至是乃曰:「前士大夫勸晟出 ,亂將王斌等十餘人以次伏 晟入第,京兆 晟懼復守歲, 跪陳:「備爪牙臣, 制其 (衝) 兵多則示未信, 少則 供帳 中齊映起之,使就 今回紇拒北, 則我軍不戰自屈矣! ,教坊鼓 晟請與李楚琳俱行 又令太子錄 欲洗宥元惡, 不能 西 戎。 吹迎 指 兵, 吐蕃梗西 日 帝乃拜晟 破賊, 導 副 位 非敢 ',詔將 有有 以賜。 分不 請治 詔 致

鳳

七

十

九

李

晟

四八六九

駐

乘

窮 言必起,五 廩,今府庫 希烈僭准 且 潰 ,願無養腹心疾爲後憂。 空殫, 也。 ,若棄彊 今河中 物不酬滿 示弱,以招窺覬,三也。 米 半 一是激 五百 「,獨稿 其叛,四 臣請選精兵五千,約十日糧,可以破賊。」帝方以賊委馬燧 且罄,人餓死牆壁間,其大將殺戮幾盡 也。 旣 懷光旣赦,則朔方將土悉復敍勳 解 河 中,諸道還屯,當有賜賚 了,賞 圍之旬 行賞,追還練 典不舉,怨 時,力

城,故不許

使。 浪息囊, 表以王號。 自 棄之爾。 晟常日:「河 晟至涇, 且土無繪絮, 而田希鑒迎謁,執之,幷其黨石奇等悉伏誅。 雕之陷, 每虜使至,必召息囊於坐,衣大錦袍,金帶,夸異之,虜皆指目 ,人苦役擾,思唐之心豈有旣乎?」因悉家貲懷輯降附, 非吐蕃能取之,皆將臣沓貪, 暴其種落,不得 表右 龍武將軍李觀爲涇原 耕稼, 日 歆豔 益 得大酋 一東徙, 節 度

汧陽旁,擊其中軍,幾獲結贊。 岐,無所掠,陽怒曰:「召吾來,乃不牛酒犒軍。」徐引去,以是間晟。 將臣生事,亦會滉卒,而張延賞當國,故與晟有隊,後雖詔講解,而陰不與也,密言晟不可久 之,必爲吾患。」卽遣使委辭,因燧請和,且求盟,因盟謀執城以賣燧,於是結贊大興兵踰隴 師,奏言:「戎狄無信,不可許。」宰相韓滉與晟合,因請調軍食以給西師。 然天子內厭兵,疑 吐蕃君臣大懼,相與議。尚結贊者善計,乃曰:「唐名將特李晟與馬燧、渾瑊爾,不去 晟又遣野詩良輔等攻摧沙堡,拔之。 晟選兵三千, 使王佖伏 結贊屢乞和,會晟朝京

持兵, 更薦劉玄佐、李抱眞經略西北,俾立功以間晟。 帝惑其言。

柄,夫惟位高者難全,盍蚤圖之?」晟曰:「君安得不祥之言?」執以聞。 視 [如|結鸞計云。|通王府長史|丁瓊者,嘗爲|延賞擠抑,內怨望,乃見|晟曰:「以公功,乃奪兵 事 ,尙書省,賜良馬、錦綵千計。是歲,瑊與吐蕃盟平涼,虜劫之,瑊挺身免,詔罷燧 貞元三年,帝坐宣政殿引見晟,備册禮,進拜太尉、中書令,罷其兵。 韶晟乘輅謁太廟, 河東,

晟等 時並 戴之績; 遺 功紀德, 朝 見 上 有熊羆 像 夕 |延英,帝嘉其勳,下詔曰:「昔我烈祖,乘乾坤盪滌,掃隋季荒茀,體元御極,作人父母,則 保保 颗 ´, 永 明年 ,付畀四方。王業旣成,太階旣平,乃圖厥容,列于凌煙閣,懋昭績効,表式儀形 之士,不二心之臣,左右經綸,參翊締構,昭文德,恢武功,威不若,康不义,用端命于 文祖 寧股 垂 然 與世生 在玄宗時,有如劉 ·,詔爲<br />
晟立五廟,追賁高祖芝以下祔其主,給牲器牀幄,禮官相事。 肅 乎來裔。 然,和 所爲也, 躬,咸宣力肆勤,光復宗 ,苟藴其才,遇其時,尊主庇人,何代蔑有? 敬在色。 君臣之義,厚莫重焉。 在予其曷敢怠?有司宜敍先後,各圖其象于舊臣之次。」命皇太子書 幽求等,申弼翼之勳; 想雲龍之協期,感致業之艱難,覩往思今,取類非遠。 丽 ,訂之前烈,夫豈多謝。 歲在己巳秋九月,我行西宮, 在肅宗時,有 在中宗時, 闕 如 m 郭 子儀 未 有如 錄 瞻望崇構, 清掃除 孰 桓彥範等 旌 它日, 與馬燧 気酸。 厥 賢? ,以弗忘 見老臣 且 況念 功 今顧 著輔 與

列

傳

唐

其文以賜晟,晟刻石于門。

臨送, 廷。 僖宗狩蜀,倉部員外郎袁皓采晟功烈,爲興元聖功錄,偏賜諸將,表勵之。 比大斂,帝手詔,誓以存保世嗣, 七 遣謁者宣詔于柩車,百官拜哭于道。 年,以 臨洮 未復,請 附貫萬年,詔 申告柩 可。 憲宗 前。 九年、薨、年六十七。 完和· 册贈 中, 太 師 韶其家與屬籍,以晟配饗德宗廟 謚日 忠武。 帝聞流涕,詔百官就第進 及葬, 叉 御 望春門

對 , 禮 歲,崔氏女歸寧,讓曰:「爾有家,而姑在堂,婦當治酒食,且以待賓客。」卽卻之,不得進。 展幸得備將相,荷容身不言,豈可謂有犯無隱邪?是非惟上所擇爾。」
」」
思要傳稿將相,荷容身不言,豈可謂有犯無隱邪?是非惟上所擇爾。」
」」 也。 爲朋黨者。 元澄寧州刺史,晟撫其二子,爲成就之。 在鳳翔,嘗曰:「魏徵以直言致太宗于堯舜上 敦 謇謇盡大臣節,未嘗露于外。治家以嚴,子姪非晨昏不輒見,所與言未嘗及公事。 教類若此 我誠慕焉。」行軍司馬李叔度曰:「彼搢紳儒者事, 展性疾惡,臨下明。每治軍,必曰:「某有勞,某長于是。」雖廝養小善,必記姓名,尤 篇分義,隆於故舊。<u>嵐州刺史譚元澄</u>嘗有德於<u>晟,後貶死,</u>晟旣貴,直其枉,詔贈 公勳德何希是哉?」晟曰:「君失辭 故晟每進 一,忠臣 IE.

使 (者至,必日:「今日何不舉樂?」既薨,城鹽州,復故池,以新鹽賜宰相, 與馬燧皆在朝,每宴樂恩賜,使者相銜于道。兩家日出無鍾鼓聲,則金吾以聞, 帝思晟,乃致鹽靈 少選

座。其眷遇終始,無與比者。

有十五子,其聞者愿、憲、愬、聽云。

愿 少謙謹。晟立功時,諸子未官,宰相以聞,即日召授太子賓客、上柱國。 故事、柱國門

列戟,遂父子皆賜。

內肅 書左僕射 失馬抖良馬一繫署下,且曰:「逸而至,不告,罪當死,謹以良馬贖。」愿歸失馬,而縱其良。境 然。 元 和 , 節度鳳翔, 自是邇聲色而政衰矣。 徙節武寧軍。 初,領夏綏銀宥節度使。 會伐青、鄮,數有功,以久疾,用懲代之。 政簡而嚴。部有失馬者,愿署牒于道,以金購之。三日 召爲刑部尚書, 俄檢校尚

滿人怨, 河中、晉、絳等節度使。 因大掠, 聞變,不及巾,與左右數人縋而逸,奪野人乘,馳以免。 以威刑操下,用婚家竇緩典帳中兵,驕驁怠沓,牙將李臣則等因衆不忍,夜斬緩首。 長 慶中,徙宣武。 且亂。 推李介主後務, 會卒,贈 始、張弘靖給其軍頗厚、愿至,府庫殫匱、賞賚不及弘靖時,而侈費過 雖嘗以荒侈敗,不能自悛,軍政愈弛,結納權近, 司 請諸朝。 徒。 時責愿不職,貶隨州 其家死於兵,三子匿而免。 刺史。 入爲 左金吾衞大將軍,復拜 官貲隨路遺輒盡。 兵旣亂,

襄 陽 ,辟署於府。 憲與愬於諸子號最仁孝。 時吳少誠張淮西,獨憚頔威彊,時謂憲爲之助。 長喜儒,以禮法自矜制。 調太原府參 又辟魏博田弘正幕府, 軍 事 、體泉尉。 于頔 鎭 遷

衛州刺史,以治行稱。

糴常: 宗 萬 江 正 請留 西觀察使遷嶺南 徙絳 數 少 卿 十萬石 垣 州 。, 副 一縣粟糶 金吾大將軍胡証爲送太和公主使。 上海有幻人忧民以亂,<br/>憲執誅之。 故敖保 河南 節 渡使。 ,以錢還糴絳粟,旣免負載勞, 山爲固, 民之輸者,十牛不勝一車。 河中兵本仰食于絳,而汾可輸河、 還 ,獻四鶻道里記,遷太府卿。 又權其贏以完新倉, 憲濱汾相地治新倉,當費二百 絳人賴利。 、渭,歲租 大和初,繇 與

憲 勳伐家子 ,所歷皆以吏能顯,政績暴著。 善治律令,性明恕,詳正大獄,活無罪者數

百人。

所 鞠 贈字 王 卒,晟以 元直 有籌略, 少非嫡 敕 善 諸 騎 子 射。 服 總親, 以蔭 服除,授太子右庶子。 ||惣獨 補協律郎,遷 號 慟 不 忍, 累衞尉 晟 乃許服 少卿。 出爲坊、晉二州刺史,以治異等, 緀 旣 早 練,晟薨 喪所生,爲晉國王 與憲廬 墓 一夫人 侧,

加金紫光祿大夫,進詹事。

能 王人也,無棄親戚。」衆願爲|愬死,故山川險易與賊情僞,一能曉之。 故能張其卑弱而用之。 爲營護。 候部伍。 亦以愬可用,遂檢校左散騎常侍,爲隨唐鄧節度使。 認恥, 憲宗 故委以撫養。 討吳元濟,唐鄧節度使高霞寓旣敗,以袁滋代將,復無功。 |蔡人以嘗敗辱||霞寓等,又||愬名非夙所畏者,易之,不爲備。 或有言者,愬曰:「賊方安」袁公之寬,吾不欲使震而備我。」乃令于軍曰:「天子知愬 戰,非吾事也。」衆信而安之。乃斥倡優,未嘗嬉樂。士傷夷病疾,親 賊來降,輒聽其便,或父母與孤未葬者,給粟帛遣還,勞之曰:「而亦 | 懲以其軍初傷夷, 士氣未完, 乃不爲斥 愬求自試,宰相李逢吉 愬沈鷙, 務推誠待士,

騎尾擊 之, 愬日:「不可。 殘外垣。 青陵城,禽票將丁士良,異其才,不殺,署捉生將。 陳光洽爲之謀也。 拔道口栅 居半歲, 7,愬下馬據胡牀,令軍曰:「退者斬。」衆決死戰, 始出攻,吏曰:「往亡日,法當避。」懲曰:「彼謂吾不來,此 知士 ,戰嵖岈山, 吳房拔,則賊力專,不若留之以分其力。」 可用, 我能爲公取之。」乃禽以獻。 乃請濟師;詔益河中、鄭坊二千騎。 以取鑪冶城,入白狗、 於是秀琳舉文城栅降。 汝港栅,披楚城, 士良謝曰:「吳秀琳以數千兵不可破 射殺其將,賊乃走。 。於是繕鎧厲兵,攻馬鞍山,下 可擊也。」旣 襲朗山 遂以其衆攻吳房, 或勸遂取吳房 再執守將。 引還,賊以精 平

六院兵 諸將 殺祐 邪 ? 効 客。 與 可近 百 以情 伏 成 心之罰, 待間 其 乃 初 一則 に馬 、旁,見嬴卒若 不 愬 械 秀琳降,愬單騎抵栅下與語 敢言, 使。 益厚。 召酤及李忠義屛人語,至夜艾。 益悉賊 而 將吏雜然不解。 [送之朝,表言必殺|肺,無與共誅|察者。 ,賊健將也,守興橋 六院者,隨、唐兵也,凡三千人,皆山南 ·由是始定襲察之謀矣。 虚實 乃募死士三千人爲突將,自敎之。 (將燔聚者, | 愬力不能獨完帖, 祐 栅 果輕出,用誠禽而還。 ,其戰嘗易官軍。 ,親釋縛,署以爲將。秀琳爲<br />
熟策曰:「必破賊,非李祐 舊令,敢舍諜者族。 忠義,亦賊將 乃持以泣曰:"天不欲平賊乎? 詔釋以還愬。 奇材銳士,故委祐統之。 會雨,自五月至七月不止,軍 | 惣候|| 施護穫于野, 遣史|| 一誠以壯騎 ,所謂李憲者。 諸將素苦賦,請殺之,懲不聽,以爲 惣刊其令,一 愬乃令佩刀出 軍中多諫此二人不 切撫之,故諜者反 酤 何見奪者衆 捧檄 入帳下,署 中以爲 (嗚咽) 無

休, 告 師 益治 期 張柴之東,陂澤阻奧,衆未嘗蹈也, 時 田 ,于時元和 李光顔 鞍鎧, 進 誠 以 下 發 戦數勝 刃 十 一 軍 殿。 年 元濟悉銳卒屯洄曲以抗光顏。 十月己 出文城栅 會大 雨 卯。 雪 一、天晦 令曰:"「引而東。」六十 師夜起,酤以突將三千爲前 皆謂投不測。 , 凛風偃旗裂膚,馬皆縮慄,士抱戈 愬知其隙 始發, 連 止 吏請所向, 可乘,乃遣從事鄭解 鋒,李忠義 襲張柴, 殲 | 惣日:「入蔡州取 副之,愬率 凍死 其 戍。 手 見裴 道 敕 + 土 中 少 軍

吳元 城 留持柝傳夜自如。黎明,雪止,愬入駐元濟外宅,蔡吏驚曰:「城陷矣!」元濟尚不信,曰:「是 擊之,以亂軍聲。 斷橋以絕洄曲道,又以兵絕朗山道。 重質以單騎白衣降,翹待以禮。 洄 曲 .子弟來索褚衣爾。」及聞號令曰:「常侍傳語。」始驚曰:「何常侍得至此 田進 濟 」士失色,監軍使者泣曰:「果落祐計。」然業從愬,人人不敢自爲計。 誠兵薄之。 賊恃吳房、朗山戍,晏然無知者。 進誠火南門,元濟請罪,梯而下,檻送京師 行七十里,夜半至懸瓠城,雪甚,城旁皆鵝鶩池 乃訪其家尉安之,使無怖 ! 以 率左右登牙 愬道分輕兵 愬令

度使, 之。」度以宰相禮受懲謁,蔡人聳觀。 疑。 乃屯兵鞠場以俟裴度,至, 申、光諸屯尙二萬衆,皆降,愬不戮一人。其爲賊執事帳內廚廏廝役,悉用其舊,使不 封凉國公,實封戶五百,賜一子五 愬以櫜鞬見, 度將避之, 乃還屯文城栅。 品官。 有韶進檢校尚書左僕射、山南 | 惣日:「此方廢上下分久矣,請因示 !東道:

凡 世 十 一 낈 為榮。 帝方經略隴右,故徙總節度 遇, 禽其隊帥五十, 董 重質 得罪被斥,翹請賜軍 俘馘萬計。 鳳翔 淄青平, 中 李師 自劾,許之,乃署爲 道 反, 進同中書門下平章事,徙昭義節度,賜第 韶愬代愿帥武寧軍。 牙將 **惣與財戰金鄉** 旬日踐父兄兩鎭, 破之。

興寧里。

列

戕害之,是無魏也。 富 太子少保還東都,卒,年四十九,贈太尉 曰:「此劍吾先人嘗以揃大盜,吾又以平察姦,今鎭人逆天,公宜用此夷之也。」元翼感動,謝 曰:「敢有 庶 而通于天化者, 田公力也。 田 弘正 不承而愛其死力! 守鎭州 父兄子弟食田公恩者,何以報之?」衆皆哭。又以玉帶、寶劍遺牛元翼, ,乃以愬帥魏博。 」乃下令軍中,勒兵以俟。 上以其愛人,使往治鎭。 、 諡 日 武 長慶初,幽、鎭亂 會慰疾甚,不能軍,詔田布代之,以 殺弘正,愬素服以令軍曰:「魏 且田公撫魏七年,今鎭人不道 而

議者不以掩其賢 | 展克京師,市不改舉, 贈平縣,亦如之。 | 懲行己儉約,其昆弟賴家勳貴,飾興馬,矜室廬,唯| 懲所處乃父時故院,無所增廣。 功名之奇,近世所未 有。 晚雖忽于取士,與鄭注善 始,

其謀也。 贊曰: 憋得李祐不殺,付以兵不疑,知 ,待總乃顯,故曰平察功,總爲多。 可以破賊也。 決策入死, 以愬能用

于頔府。 廳字正思,七歲以蔭爲協律郎,父吏少之,不甚敬, 吐突承璀討王承宗,以聽爲神策行營兵馬使。 聽輒使鞭之, 旣戰,斬賊驍將,憲宗壯之,詔圖狀 晟奇其才。 長 八乃辟佐

以 廢 不治 獻 承璀數問聽計 民盜 鑄 不禁。 ,卒縛盧從史。 聽乃開 五鑪 , 官鑄錢日五萬, 人無犯 遷左驍衞將軍 ·,出爲蔚州刺史。 者 徙安州。 州有銅冶, 會觀察使柳公綽方 自天寶 後

敢獻。 使。 援 裴 渠 御 虞 度 : 溉塞下地千頃 蔡,以聽 史大夫,夏綏銀宥節度使。 擊殺志沼。 趨 敬宗嗣位,改義成軍 帝 使統兵北討。 連水,破沭陽,絕龍 於是帝曰:「李聽往 討李師道 典軍, 以功封涼國公,拜 ( )後賴 一二容之, 出聽楚州刺 始, 以其饒。 聽爲 0 沮 在軍 堰 聲振賊中。 大和初,計李同捷 羽林時, 一、遂取海州 史。 進檢校工部尙書。 又徙靈鹽。 ·中,不與股馬, 一子五品官。 淮南 有駿馬,帝在東宮, 召為 兵緜弱 攻胸山, 部有光祿渠,久廞廢,聽始復屯田 羽林將軍 ,而魏博將 是必可任。」乃授檢校兵部尙書, 穆宗初立, 降之,懷仁、東海兩城望風送款。 丌志沼反, 擊其帥史憲 使左右諷取之, 幽、鎭反,擇名臣節度太原者代 聽自以身宿衞,不 以省轉餉 充河 誠 即掩賊 詔聽 `東節 以功棄 卽 出 度 不

虚 大 棄之, 將 魏 何 王 人乃安。 進滔 廷湊之亂, 聴書 乘 夜 城拒守。 憲誠 馳以死 詔聽悉兵屯貝州 旣 聽 請 朝 於是御 不得入, 魏 人怨 :史中丞温造等劾奏魏州亂 乃屯館陶。 史憲誠 詔 聽 兼 懼 帥 又不設備, 聽因 魏 博 取 道 聽 變之, 遷 魏 延 人襲之, 憲誠 不 衷甲候 卽 死 赴, 師 驚 魏 職 公諸郊。 繇 潰 遂 于聽 亂 死 聴敕 失殆 殺 請 憲 論 半 誠 一秦兵 如法。 · 輜 共推 械

列

傳

第

七

+

九

李

昆

天子 不罪 也 ,罷爲太子 沙師

少保 晉 武 刺 経慈 寧軍 史 視 聽 隰 踰歲 其壞 素以 有故 節 度使。 節度 路 奴爲徐將 莫敢葺。 遺得權幸心 鳳翔 文宗嘆曰:「付之兵不疑,退處散地不怨,惟聽爲可。」四年,以疾求還,復 不喜 ,又徙陳許。 聽日:「將出鑿凶 ٠, 故多爲助力。 聽來 鄭注 乃先殺親吏之使除者以沮聽。 **|掎其過,詔以太子太保分司** 門, 未幾, 何避治署邪?」 拜邠寧節度使。 亟 一使完新之, 聽 東都。 果懼 , 開 以疾解, 不 卒無 成 利治垣 初, 授太子 爲 宣舍,前 河中 改 帥

拜 太子 太保 H 新 細 卒,年六十一,贈司 ,急揫斂,頗 所欲, 徒。 盛飾車馬服玩。 或誠之, 聽曰:「家聲在人,若示

極

衰

聽

沿治官

恐不 見忠功之効 ,吾欲夸而勸之也。」好方書,擇其驗 者,題於 (帷帟牆 屋皆 滿

廣 明 時 聽 子 沙陀數盜邊 |琢 以家閥罹累義昌、平盧 ,於是琢爲宿將 (鎮海 , 拜檢 三節度使,無顯 校尙書右僕射, 功,不爲 蔚朔等州 士 招 大 討、 夫 稱 都統 道。 數免復遷、 行營節度

使。徙 河 ..陽三城,坐逗撓,下遷刺史,卒。

、鏖戦 王佖 者 ,晟之甥, 武 敢, 諸軍乘之, 遂大振。 閑 騎射。 晟 在 師 必無 以功擢神策將。 不從。 攻朱泚 擊 吐蕃 於光泰門, 有功。 晟視/必與子姓 賊 方 銳 佖 興

至1他,以責罷,遂中書進制。 在鎭檢下亡術,猜忌多殺人。 吐蕃欲作烏蘭橋以過師,積材河曲,朔方府常遣兵發其木,委于河,故莫能成。 知其寡謀,乃厚賂之,而亟遂功,築月城以守,自是虜歲入爲寇,朔方乘障不暇,人以咎必。 久之,卒。 召還爲右衞將軍。 故事、將相除徙、皆內出制、故號「白麻」 元和中,拜朔方、 靈鹽節度使。 及似至, 虞

子世似其勞,是宜有後哉。 呼,功能存祉而,不能見信於庸主,卒奪其兵,哀哉!雖然,功蓋天下者惟退,禍可以免。 人,故豪英樂爲之死耳。至師入長安而人不知,雖三王之佐,無進其能,可謂仁義將矣!嗚 李希烈訂鄭、版。 晟無積貲輸糧,捉孤軍抗羣賊〔1〕,身佩安危而氣不少衰者,徒以忠誼感 贊曰: 晟之屯東渭橋也, 朱泚盜京師, 李懷光反威陽, 河北三叛相王, 李納猘河南, 几

#### 校勘記

捉孤軍 - 抗羣賊 「捉」,十行本同,汲、殿、局本作「提」。按上文有「晟提孤軍橫當寇鋒」語,疑「捉」

爲「提」之形誤。

列

傳第

七十九

校勘記

## **唐書卷一百五十五**

#### 列傳第八十

### 馬燧暢 炫 渾城鎬 蟓

馬燧字洵美,系出右扶風,徙爲汝州郟城人。父季龍,舉孫吳倜儻善兵法科,仕至嵐州

刺史。

儒哉?」更學兵書戰策,沈勇多算。 燧麥度魁傑,長六尺二寸。與諸兄學,輟策歎曰:「方天下有事,丈夫當以功濟四海,渠

|平原。 不時決。 安祿山反,使賈循守范陽, 平原不守,復走魏。 會顏杲卿招循舉兵,豫山遣韓朝陽召循計事 ,燧說循曰:「祿山首亂, 今雖舉洛陽, ',因縊殺之。 **猶將誅覆。公盍斬** 燧走西山,間道歸

列

傳第

八

+

馬燧

爲信 抱玉 餼 舉其城,辛雲京覺之,不克。 懷 張忠志、薛嵩、 恩。卽署燧左武衞兵曹參軍 不 才之。 稱 ,犯令者得殺之。 寶 應中 輒 殺 因進說曰:「屬與回 澤路 田 承 抱玉將饋勞,賓介無敢往,燧自請 節 嗣等,其子陽佻勇 度使李抱玉署爲趙城尉。 燧又取死囚給役左右,小違令輒 |満自相 7不義, **衛歸懷恩糧** 將必窺太原, 時回紇還國,恃功恣睢 觀僕固 典辦具。 以絕河津。 懷恩樹黨 戮死, 虜 公當備之。」旣而 乃先路其 大駭, 自重 抱玉令燧說嵩 ,所過皆剽傷,州縣 ,裂河北以授李懷仙 香, 至出境, 與約, 懷恩與太原將謀 ,嵩告絕於 無敢暴者。 得其旗章 供

耕 石 種 賴 以濟。 「樹障之,設二門爲譙櫓, 燧務勤教化,止橫調,將吏有親者,必造之,厚爲禮,瘞暴胔,止煩苛。 累進至鄭州 史,兼水陸轉運使 抱玉守鳳翔,表燧隴州 刺史。 勸督農力,歲一 八日而畢, 虜不能暴。 刺 史。 稅,人以爲便。 西山直 吐蕃, 從抱玉入朝,代宗雅聞其才,召見,授 徙懷州。時師旅後, 其上有通 道 **虜常所出** 歲大旱,田 是 秋 入者。 程 生 于 境 茀 燧聚 不及

次|鄭 息人 大曆中, 即授以汴宋節度留後 靈耀多張旗幟以犯王師,忠臣之兵潰而西,燧軍頓榮澤,鄭人震駭。 河陽兵逐其將常休明,詔燧檢校左散騎常侍,爲三城使。 靈耀不拜 引 魏博 |田承| 嗣 爲援。 韶燧與淮西李忠臣討之。 忠臣將遂歸, 耀 反 帝 師

商

州

刺

卒八千 破永平將杜如江等, 益治 號「餓 軍, 忠臣 狼軍」,燧獨 乃還收亡卒,復振 乘勝距汴一舍而屯。 戰破之, 進至浚儀 忠臣行汴南,燧行汴北 忠臣合諸軍戰不利 是時 河陽 兵冠諸軍 燧爲奇兵擊之,脫單騎遁 敗賊於西梁固。 田悅帥衆二 萬助靈 靈耀以銳

河陽 燧 知忠臣暴傲, 秋大雨,河溢,軍吏請具舟以避,燧曰:「使城中盡魚而獨完其家,吾不忍。」旣而水不 讓其功,出舍板橋。 忠臣入汴, 果因會擊殺宋州刺史李僧惠。 燧還

**汴州平**。

肄,威震北方。 列戟于後,行以載兵,止則爲陣,遇險則制衝冒。 騎 士,教之戰,數月成精卒。造鎧必短長三制,稱士所衣,以便進 遷 河東節度留後,進節度使。太原承鮑防之敗,兵力衰單,燧募廝役,得數千人,悉補 建中二年,朝京師,遷檢校兵部尚書,封豳國公,還軍 器用完銳。居一年,闢廣場,羅兵三萬以 一趨。爲戰車,冒以狻猊象

臨洺 邯 兵馬 使李晟合軍 ,築重城絕內 初, 悦使至,燧皆 田悅 新有魏博, 中救之。 外援。邢將李洪、臨洺將張伾固守。 斬之,遣兵破其支軍 燧出鄭口 恐下未附,即輸款朝廷, 未過 一,射殺賊將成炫之。 險,移書抵悅 燧建言悅必反。 詔 燧以 示之好。 悦聞,使大將楊朝光以兵萬人 步騎二萬 悦以燧畏己,大喜。 旣 而悅果圍 與昭義 李抱眞、神策 邢州, 旣

列

約 悅 據 魏 首 脫 土 重 衆 博 得 以 雙 大 五 悦 敗 岡 4 戰 招 渦 少必 計 執 斬 則 斬 日:「朝光 使 勝 以 首 ! 家 白 西二 術 萬 也。」即 貨 人。 燧 級 栅 賞。 乃 俘 堅栅,且 推 居 以 係千餘 分 至 五 火 車 恆 是 日 焚 州 萬 殫私 進 朝光棚 館 兵 人,雖燧能 燧率軍營二 軍 穀 五 臨洺 [財賜麾] 三十 一千助 自 朝光。 萬 1晨訖 政,未 悦 下。 一壘間 斛 悉 晡 軍 邢 德 宗 嘉 燧 미 戦 急急 童 以 令 是 亦 燧自 數 夜 撃 大 解 芝, 將 日 東壘遁 大 以 下 李 詔 以 破 銳 自良等以騎兵 , 出 功 且 之,斬 士當之, 度 遷 一殺傷必衆 燧進營狗 支錢 尙 朝 書 光 凡百 五 右 千 僕 八守雙岡 禽 則 明 萬 餘 射 其 吾 Ш 償 返 將 已拔臨洺 其 初 取 盧子昌 文棄壘置 財 戒曰:「令 皆 決 戰 進 死 獲 輜 棄 燧

火 騎 燧 進 土 軍 持 齎 路 巾 譟 火 + 燧 |鄴 李 而 請 納 令 燧 日 前 待 諸 於下 糧 李惟 軍 益 軍 畢 進 兵。 燧乃令士 夜 流以鐵 營倉口 發 岳 半 合兵 詔 食, 匿 河 鏁 1其旁, |無動,命除榛莽廣百步爲場, 先 陽 萬三千人 , 與悅 維 雞鳴 李芃 車 數 須 夾 時 以 悅 洹 百 鳴 救 兵 衆 絕 而 鼓角 會 悅 軍 度 泂 悅夏 , , 次 載 卽 造 而 于 焚橋 上  $\equiv$ 散兵二萬 潛 潭 囊 橋 師 遏 逾 並 悅遣 燧 水 恒 泪 行 而 募勇士五千人陣 壁 趨 將 後 日 |洹水,淄 魏 王 餘 度。 挑 州 光 里 戰 進以 令 悅 悅 青 日 悅 知 쬭 兵 燧 軍 不 (守潭之) 李納 其左 聞 出 一而待。 食乏,深壁 賊 陰 等 一, 恆 至 伏 長 兵 比悅至, 冀 踰 止 橋 萬 爲 不 軍 人 橋 陣 戰 築 其 將 月 右 乘 火 留 以 壘 風 燧 縱 掩 令 扼

安墨啜 氣 少衰 , 虜三千人, 尸相駘藉三十里, 淄青兵幾殲。 ,燧縱兵擊之,悅敗奏橋 ,橋已焚,衆赴水死者不 悦夜走魏州 可計, 斬首二萬 其將拒不納, 級, 殺賊將 比明, 孫晉卿、

至,悅乃得入。

攻其必救,故趨,魏以破之。」皆曰:「善。」 恆 三軍爲首尾,欲不戰以老我師,若分擊左右,未可必破,悅且來助,是腹背支敵也。 抱真、芃問曰:「糧少而深入,何也? ·」燧曰:「糧少戰利速,兵善於致人。今悅與淄青、

諸軍 行告窮於朱滔、王武俊。會二人者怨望,乃連和。悅恃燕、趙方至, 李瑤衞還淄青殘兵,璘等亦降。 ·破之。進同 悦嬰城自守。 1中書門下平章事、北平郡王、魏州 於是李再春以博州,悅兄昂以洺州 |魏導御溝貫城,燧塞其上游,魏人恐,悅遣許士則、侯臧間 大都督 王光進以長橋, 長 史。 即出兵背城陣,燧復與 皆降。 悦使符磷、

卽 與滔等戰 滔、 武俊聯兵五萬傅魏。 不 利 悦決水灌 !軍,燧兵亦屈,退保;魏縣。 會帝遣李懷光以朔方軍萬 五千助燧。 滔等瀕河 .為壘。 懷光勇于鬭, 未休土, 會涇師亂,帝幸

奉天,燧還軍太原。

糧 一,燧自有之,以餘 初, 李抱眞欲殺懷州 給抱眞 刺史楊鉢,針奔燧,燧奏其非罪,乃免,抱眞怒。 軍 丁抱真 《益怒。 洹之捷,軍進薄魏,悅以突騎犯燧營 及共解邢圍 李芃救之, 出,獲軍

四

其 抱 而 繇是逗遛 用 地 宣 勒 ,我能獨戰死邪 昭 兵不 義 。帝數遣使講 副 出 使盧玄卿 燧 將 ? 為刺 攻 將 解。 魏 引還, 史, 念交惡,卒不成大功。 取 武 俊 攻具於抱眞營,幷請雜兩 兼魏博招討副使。 略趙 李晟 和之, 地, 抱眞 乃復與抱眞善。 分麾下二千人戍 李晟兵前獨隸抱眞, 軍 卒 及 其 功, 田昂降 邢 抱眞 燧怒謂:「抱眞以 燧請 抱真亦請兼隸于燧, 不 聽 以洺州隸抱眞, 請 獨 兵還守 面

還。 城 瀦爲 時 至 太原 天下方騷 東隍 遣 省守陴萬 軍 北 司 邊數有警, |馬||王權以兵五千走||奉天,又遣子||彙與諸將子壁||中渭橋 人。 又醞汾環城,樹以 燧念晉陽王業所基, 固隄。 宜固險以示敵。 詔 兼保寧軍節 度使。 乃引晉水架汾而屬之 帝已幸梁, 乃 以

協

然議

者答燧

私

帝還 時 賊 京 黨 要廷珍 李 懷 光反河中, 守晉,毛朝數守隰 韶燧爲河東保寧、奉誠軍行營 ٠, 鄭抗守慈,燧移檄鐫諭 一副元帥 , 皆以州降, 與渾瑊、駱元光合兵討 因拜燧晉絳慈隰

節

度

使

節 涿 仗 议 度使。 童 [絳,拔外郛,守將夜棄城去,降四千人。 授 武 俊 日知 乏 及 圍 日知 州 趙 也, 降 大喜 燧 康 過 固 日 望 讓 知 不支 日 知 燧 乃 將棄趙 且 率 言因 步 騎 |燧 降受節 三萬 請詔 遣李自良定六縣 次于 恐後 武俊擊朱滔 絳 有 略定諸縣 功 者 ,授以深、趙,以 , 踵 降其將辛焼 以爲 降其 利 帝 將 嘉 馮 收卒五 萬 許 日知爲晉慈 興、 籍 任 府 象玉 庫兵 裨

將谷秀違令掠士女,斬以徇。 與賊戰寶鼎,射殺賊將徐伯文,斬首萬級,獲馬五百。

覆不可信。 于時天下蝗,兵艱食,物貨翔踊,中朝臣多請宥懷光者,帝未決。燧以「懷光逆計久,反 河中近甸,捨之屈威靈,無以示天下」。乃捨軍入朝,爲天子自言之:「且得三十

日糧,足平河中。」許之。乃與城、元光、韓游瓌之兵合。

以爲不及也,歎曰:「嘗疑馬公能窘田悅,今觀其制敵,固有過人者,吾不逮遠矣!」 感泣 禍,富貴可遂也。」 未對。 拜。 見廷光。 一軍皆流涕,即率衆降。 燧日:「公等朔方士,自禄山以來,功高天下,奈何棄之爲族滅計?若從吾言,非止免 進營焦籬堡, 賊將徐廷光守長春宮城。燧度長春不下,則懷光固守,久攻所傷必衆,乃挺身至城下 廷光憚燧威,拜城上。 堡將降,餘戍望風遁去。 燧曰:「爾以吾爲欺邪?今不遠數步,可射我。」披而示之心。 燧顧其心已屈,徐曰:「我自朝廷來,可西嚮受命。」延光再 燧以數騎入其城,衆大呼曰:「吾等更爲王人矣。」渾瑊亦自 廷光

光祿大夫,兼侍中,賜一子五品官。 懷光降,衆猶萬六千。誅其黨閻晏、孟寶、張淸、吳冏等,它脅附悉赦之。不閱月,河中平。遷 還太原,帝賜宸扆、台衡二銘,以言君臣相成之美。 燧濟河,兵八萬陣城下。 是日,賊將牛名俊斬 勒

石起義堂,帝榜其顏以寵之。 貞元二年,吐蕃尚結贊破鹽、夏二州,守之,自屯鳴沙,及春,畜產死,糧乏。

四八八九

韶燧爲綏

四

然之。 公。」因悲涕。燧亦疾而仆,帝親掖之,詔左右扶去,送至陛,燧頓首泣謝。 固乞骸,讓侍中, 論 銀鱗勝招討使,與駱元光、韓游瓌等會師擊虜。 怒,奪其兵,拜司徒,兼侍中,賜妓樂,奉朝請而已。與李晟皆圖象凌煙閣。後病足,不任謁。 不許。卒,年七十,贈太傅,諡曰莊武。子廩、暢。 九 日:「河曲之屯,春草未生,吾馬飢,公若度河,我無種矣。賴公許和,今釋弇以報。」帝聞,悔 (年十月,自力朝)延英,詔毋拜。 時晟已卒,帝顧燧曰:「尙記與太尉晟俱來邪? 今乃獨見 |頰熱甘辭請于|燧,且重幣申勤勤。 明年,燧還|太原,與|論頰熱俱朝, 。 燧之朝,結贊遽引去。 帝詔渾;與盟平涼,虜劫;城 燧次石州。結贊懼,乞盟, 僅得免。 盛言宜許以盟 吐蕃歸燧之兄子弇, 乃遣將

師。 錢,多亡命入南山 燧怒,執奴以聞,使兄炫拘暢請罪。 暢少以蔭至鴻臚少卿。 爲盜。 |暢客單超俊、|李雲端等竊議,以爲事且危。||暢是其言,遣奴諫||燧班 建中中,燧討賊山東,暢留京師。於是大旱,朝廷議括商旅緡 帝方倚燧,貸不問,但誅其客,敕炫賜暢杖三十,然

神策中尉楊志廉諷使納田產。 燧沒後,以貲甲天下,暢亦善殖財,家益豐。 至順宗時,復賜之。中官往往逼取,暢畏不敢吝,以至困窮。 晚爲豪幸牟侵,又彙妻訟析產。 貞元末, 亦罷

括商

終少府監,贈工部尚書。 諸子無室廬自託,奉誠園亭觀,即其安邑里舊第云,故當世視暢以

**厚畜**爲戒。有司諡曰縱。

子繼祖 ,生四歲以門功爲太子舍人,五遷至殿中少監。

以清白顯。 書記,常參軍謀,光弼器焉。 燧兄炫,字弱翁。少以儒學聞,隱蘇門山,不應辟召。 燧爲司徒,授刑部侍郎,辭疾,以兵部尙書致仕,卒。 遷刑部郎中。 田神功帥宣武、署節度判官、授連、潤二州刺史、 至德中, 李光弼鎭太原, 始署掌

渾瑊 ,本鐵勒九姓之渾部也。 世爲皋蘭都督。父釋之,有才武,從朔方軍,積戰多,遷

累開 **]府儀同三司、試太常卿、寧朔郡王。** 廣德中與吐蕃戰沒。

盪 功。 後二年,從破賀魯部,拔石堡城、龍駒 島, 其勇常冠軍。署折衝果毅。 節度使安思順

城偏 禄山 師, 反 入葛祿部, ,從<u>李光弼</u>定河北,射賊驍將<u>李立節,貫其左肩,死之</u>。 略特羅斯山, 破阿布思, 與諸軍城永清及天安軍。 肅宗 刨 遷 位 中郎 城以兵趨行 將。

傳第八十 渾瑊

列

授

懐恩 釋之喪, 有功 丁,至 平史朝義 天德,與虜軍 遷太子 起復朔方行營兵馬使。 賓客, ,大小數十戰,功最,改太常卿, 遇 屯奉天。 ,敗之。 周智光反, 從郭子儀復兩京,討安慶緒 從子儀擊吐蕃邠州 子儀令城以步騎萬人下同州。 實封二百戶。 留屯別。 勝之新鄉 懷恩反, 虜復入,至奉天, 擢武 城以所部歸 智光平,以邪寧隸 (鋒軍 使。 子儀 從僕 固

領州 鹽州 者十 朔方 自 營 軍 刺 大曆七年,吐蕃盜塞深入,瑊會涇原節度使馬璘討之。次黃菩原,瑊引衆據險,設槍 遏賊奔突。 城屯宜 史 ~李國 子儀 史。 吐蕃 臣 召諸將曰:「朔方軍高天下,今敗于虜,奈何?」|滅曰:「願再戰。」乃馳 禄 趨秦原。 舊將史抗等內輕減,顧左右去槍,叱騎馳賊。 入方渠、 吐蕃 懐安 引去, 城擊走之。 既還,虜躡而入,遂大敗,死 自是歲防長武城盛秋。 朝那 與與 壘

州

刺

韻關 爲三 幾,崔寧領 節 疑,更賜良馬、錦幣。普王爲荆襄元帥討希烈也,以臧爲中軍都虞候 子 而 儀 南 度 以以 入朝 朔方,故召爲 督 瑊 諸 兼 軍 留 單于大都護,振 掎 知 角, 左金吾衞大將 虜引 去。 後務。 武、東受降城、鎭北 進 兼單于副 軍 回紇侵太原 建中 都 中,李希烈詐爲 護、 大都 , 振武 破鮑防軍。 護府、綏銀麟勝 軍 使。 減書 子儀 拜城都知兵馬使, 若同 爲 太尉 洲節 亂 者 度 帝識 德宗析所部 副 大使。未 其諜,

泣。 晝夜不息 晨至日中不解。 |泚方據乾陵下職城,翠翟 帝狩奉天, ,凡狹日,鑿塹圜城。 一 職率家人子弟以從,授行在都虞侯、 或以芻車至,減曳車塞門,焚以戰,賊乃解。 「紅袍,左右宦人趨走,宴賜拜舞,又縱慢辭戲斥天子,以爲勝 城中死者可藉,人心危惴,或夜縋出掇蔬本供御,帝與城相 京畿渭北節度使。 泚治攻具,矢石四集如雨, 朱泚兵薄城,

愈厲。 在景 弊兵盬,瑊但以忠義感率使當賊,人憂不支, 雲梁所道,掘大隧,積馬矢及薪然之。 賊乘風推梁以進,載數千人。 王師乘城者皆凍餧,甲 史大夫、實封五百戶而下,募突將死士當賊,賜城筆,使量功署詔,不足則署衣以授。因曰: 爲鄣 攻城益急,會李懷光奔難,賊乃去。 「殷與公訣矣,令馬承倩往,有急可奏。」」城俯伏嗚咽,帝撫 ,指城東北,構木廬 刻。 雲梁及隧而陷,風返悉焚,賊皆死,舉城歡譟。 使騎環馳,責大臣不識天命。 **「,蒙革周置之,運薪土其下,將塞隍。** 進行在都知兵馬使,實封戶五百 造雲梁,廣數十丈,施大輪,濡氈及革冒之,周布水 羣臣號天以禱。 是日詔授瑊二子官,乃第賞將校。 而遣之。 帝召城,授以詔書千餘 | 城中矢, **瑊前與防城使侯仲莊揣** 自揠 法,被· m 自御 加 泚 戰

中書門下平章事,兼靈鹽豐夏定遠西城天德軍節度、朔方邠寧振武道永平軍奉天行營副元 帝臨軒授鉞,用漢拜韓信故事。 溗 興進狩山南,城以諸軍衛入谷口 制曰:「寇賊干紀,授爾節鉞,以戡多難,往欽哉!」」減 , 懷光追騎至,後軍擊卻之。 遷檢校尙書左僕射、 同

列

傳

第八

--

頓首 曰:「敢不畢力,以對揚天子休命。」乃率諸軍趨京師

咸 自 實封戶八 1東渭 歰 李懷光 賊 《韓旻拒 賜大寧里甲第,女樂五人,將相送歸第,與李晟鈞禮。 橋 百。 破賊,城與韓游瓌、戴休顏以西軍收咸陽,進屯延秋門。 武功, 懷光平,檢校司空,任一子五 天子還宮, 城率吐蕃論莽羅兵破之武亭川, 斬首萬級, 遂屯奉天, 以抗 授河中絳慈隰節度使、 品官。 還屯河中。 河中同陝號行營副 俄加朔方行營副元帥, 泚平,論 元帥 功,以瑊兼 繇樓煩郡王徙 西面。 與馬緣 待中

貞元 惟 燧講好,燧苦贊,帝乃詔約盟平涼川,以瑊爲會盟使。 臣 [奉慰延英,贈太師,諡曰忠武。 城得免。 四年 吐蕃相尙結贊陷鹽、夏,陰闚京師,而畏瑊與李晟、馬燧,欲以計勝之。 ,虜入涇、洲,授洲寧慶副元帥。 自奉天入朝,羸服待罪,詔釋之。會吐蕃復入盜,使城鎭奉天。虜罷 喪車至自鎭,帝復廢朝。 進檢校司徒,兼中書令。 爲結贊所劫,副使崔漢衡以下皆陷 十五年卒,年六十四。羣 乃詭辭重 , 還河中。 一禮,請

曰:「上不疑我。」故治庸十六年,常持軍,猜間不能入。君子賢之。 始信待。 而 志 益下,歲時貢 瑊 好書,通春秋、漢書,嘗慕司馬遷自敍,著行紀一篇,其辭一不矜大。 貞元後,天子常恐藩侯生事,稍桀驁則姑息之,惟臧有所奏論不盡從可, 奉,必躬閱視。 每有賜予,下拜跽受,常若在帝前,世方之金日磾 本名日進,稍顯改焉。 天性忠謹 ,故帝終 輒私喜 功高

子,鎬、鐵爲達官

鎬 供 軍 有法 乃出 聞 相 病 不 不能 聞。 馳 薄 鎬 然短 入城,乃定。令軍 賊 軍 謙謹,喜交士大夫,歷鄧、唐二州刺 金幣十餘萬, 賊始亦畏,見鎬無斥候,乃潛 李絳建言,宜選才職稱者爲刺史。 ,以鎬將家可用,乃遷檢校右散騎常侍、義武軍節度副使。 ,大敗而還。 於計略,不持重。 乃復貶循州 中斂所剽歸鎬,以兵衞 韶以陳楚代之。 **鎭、定二軍間不百里,鎬引兵壓鎭境而** 卒, 師入定境,焚廥蓄,屠鄉聚,鎬軍途搖。 贈工部尚書。 時師飢 乃任鎬 史,有政譽。 出之。 凍,聞鎬方罷 延州。 貶 韶州 元和中,延州沙陀部苦邊吏貪,震擾 會討王承宗,而義武節度使任 刺史。 (), 逐亂, 屯、距 後代州刺史韓重華奏收 劫鎬之家, 俄代 賊三十里,鼓角聲 迪簡爲使。治 亦 會中 至裸辱。 人督戰, 迪 兵 頗 簡

功,富之可也。」宰相 盡。 爲袁王傅,至太子詹 文宗憐之,授 鐬 以 · 蔭補諸衞參軍,累擢至豐州 少府監 事。 言鱥嘗治郡有績,從之,拜壽州刺史。 訓、 ,遷殿中。 注亂 或言蟻匿 宰相 刺史。 낈 城之裔 買餗 坐贓 七 一擬刺 爲 百萬,文宗以勳臣子,貶 百騎 史,帝曰:「是豈可以牧民? 所捕 終諸衞大將軍。 , 苦辨 乃死 袁州 然家 司 爲 馬。 念其父 兵剽 皆 還

20

功。 大臣奔辱,燧之罪也。雖然,燧賢者也,天下以爲可責故責之,不以功掩罪,亦不可以罪廢 未嘗折北,名蓋一時。 則燧、城固出晟下遠甚。 贊曰:唐史臣稱燧沈雄忠力,常先計後戰。 然力能得田悅而不取,虜不可信而決信之,故河北三盜卒不臣,平凉 功名大小,信其然乎! 每戰,親令于衆,無不感槪用命,關必決死,

# 唐書卷一百五十六

#### 列傳第八十一

楊朝晟 戴休顏 陽惠元 李元諒 李 觀 韓游褒

### 杜希全 那君牙

劉 奉天,屬朝晟兵千人下咸陽,賜實封百五十戶。 文喜涇州 楊朝晟字叔明,夏州朔方人。 斬獲多, 加驃騎大將軍。 興行間,以先鋒功授甘泉府果毅。 李納寇徐州 從唐朝臣往討, 建中初, 常冠軍 從李懷光討 懷光赴難

朝晟泣見懷光日:「父立功於國,子當誅,不可以主兵。」懷光繁之。 懷賓爲游瓌將,夜以數十騎斬昕及同謀者。 長春宮,而懷賓戰甚力。 懷光反,韓游瓌退保別、寧, 懷光平,帝原嘲晟,因爲游瓌都虞候,父子皆開府、 賊黨張昕守邠州,大索軍實,多募士,欲潛歸之。 游瓌遣懷賓告行在,德宗勞問,授棄御史中丞 及諸軍圍 賓客、 河中, 游瓌營 御史中 朝晟父

列

傳第

八

+

樼

朝殷

四八九七

#### 丞,軍中以爲榮。

那矣,反者皆當死,吾不願盡誅也,弟取首惡者。」衆所謹指,斬二百餘人,獻甫遂入于軍。 帝以希朝爲節度副使,而朝晟加御史大夫。 當也。」衆稍定。 **脅**監軍,請以范希朝爲節度使。 吐蕃犯邊,游壞自將守寧州,而御士寬,軍驕。及張獻甫來代,軍遂亂,朝晟逃於郊。衆 朝晟結諸將謀誅首惡者,居三日,紿遣人自||派來,曰:「前請報罷,張公已舍 希朝時已在京師。 明日, 朝晟出, 紿衆曰:「予來賀所請之

足,圖其事以聞。 馬嶺而歸,開地三百里。十七年,卒于屯 師次方渠,水乏。有靑蛇降險下走,視其跡,水從而流,朝晟使築防環之,遂爲渟淵,士飮仰 夷,虜且走,此萬全計也。若大發兵,閱月乃至,虜亦來,來必戰,戰則不暇城矣。」帝納其策。 請城方渠、合道、木波以遏吐蕃路。 勢難輕入。若發部兵,十日至塞下,未三旬城畢,積獨聚糧,留卒守之,寇至不可拔,萊野翦 五原, 興師七萬, 今何易邪?」對曰:「鹽州之役, 虜先知之, 今薄戎而城, 虜料王師不十萬, 貞元九年,城鹽州,發卒護境,朝晟屯木波堡。會獻甫卒,有詔代爲邪寧節度使。 有韶置祠,命泉日應聖。 詔問:「須兵幾何?」報曰:「部兵可辦。」帝問:「前日城 已城,吐蕃悉衆至,度不能害,乃引去。復城 朝晟

河 曲 戴 試 休 顏字休顏, 太常卿, 封濟陰郡公, 夏州人。 家世尙武, 進封咸寧郡王 志膽不常。 **棄朔方節度副使。** 郭子儀引爲大將, 城邠州功最, 諭平党項羌, 遷 以安 鹽州

刺史。

懷光胎駭,自涇陽夜走。 等扞禦有勞。帝進狩梁、洋,留守奉天。李懷光屯咸陽,使人誘之,休顏斬其使,勒兵自守。 百。 從乘輿至京師,賜女樂、甲第,拜左龍武 朱泚反,率兵三千,晝夜馳,奔問行在,德宗嘉之,賜實戶二百。與渾瑊、杜希全、韓游瓌 追至中渭橋。 京師平 遷檢校工部尙書、奉天行營節度使。 - ,又與城率兵趨岐陽,邀泚殘黨。 軍統軍。 卒,贈揚州大都督。 合渾城兵破泚偏 加檢校尚書右僕射, 師,斬首三 進戶四

弟休璿 歷開府儀同三司, 封東陽郡王; 休晏, 歷輔國大將軍,封彭城郡公。 俱以將

略稱。

陽惠元,平州 以趫 勇奮, 事 平盧軍。 從田神功、 李忠臣浮海入青州。 韶以兵隸神

第,為京西兵馬使,鎭奉天。

陽

惠

元

萬二千戍關東,帝御望春樓誓師,因勞遣諸將, 奪三橋,惠元功多。 於道,惟惠元軍瓶罍不發。帝咨歎不已, 「初發奉天,臣之帥張巨濟與衆約:『是役也,不立功, 德宗 初立 ,稍繩諸節度跋扈者。於是李正己屯曹州 以兵屬李懷光。 **璽**書慰勞。 酒 至,神策將 毋飲酒。』臣不敢食其言。」旣行, 俄以兵三千會諸將擊田悅, ,田悅增河上兵, 士不敢飲。 河南 帝問 大擾。 故, 戦御河 惠元日: 詔移兵 有饋

從,使神策將字昇往伺,還奏:「懷光反明甚。」是夕,奪二軍,惠元、 陸贄諫帝曰:「四將接壘,晟等兵寡位下,爲懷光所易, 節度使李晟、鄜坊節度使李建徽及懷光聯營便橋。 則建徽孤立。宜因晟行,合兩軍皆往,以備賊爲解,趣裝進道, 馳騎追及於好時。惠元被髮呼天,血流出眥, 建徽獨死。 及朱泚反,自河朔赴難,解奉天圍,加檢校工部尚書,攝貝州刺史。 詔贈惠元尙書左僕射,晟殿中監,暠邠州刺史。 晟知懷光且叛,移屯東渭橋。 袒裼戰而死。 勢不兩完。 二子晟、暠匿井中,皆及 則懷光計無所施。」帝不 建徽走奉天,懷光遣將 晟旣慮變,請與惠元 韶惠元與神策行營 翰林學士

軍潰,有驍卒五千,從史嘗以子視者,奔于旻,旻閉城不內。 少子旻,字公素,惠元之死,被八創,墮別井,或救得免。 衆皆哭曰:「奴失帥,今公有完 歷邢州刺史。 盧從史旣縛

城,又度支錢百萬在府,少賜之,爲表天子求旌節。」長開論禍福遣之,衆感悟,遂還軍。憲宗

嘉之,遷易州刺史。

丞。 贈左散騎常侍。 容州西原蠻反,授本州經略招討使,擊定之。進御史大夫,合邕、洛兩管爲一道。卒, 師 討吳元濟,以唐州刺史提兵深入二百里,薄申州,拔外郛,殘其垣。 以功加御史中

以宿 篇積勞,試太子詹事。 李懷讓節度鎭國,署奏以自副。 李元諒,安息人,本安氏,少爲宦官駱奉先養息,冒姓駱,名元光。 居軍十年,士心憚服 美鬚髯, 鷙敢有謀。

完。 幾,遷鎭國 召還,至華陰,華陰尉李夷簡說驛官捕之,追及關,元諒斬以徇,所召兵不得入,由是華州獨 振。 自潼關引兵徑薄其城,拔之。時兵興倉卒,裹罽爲鎧,剡蒿爲矢,募兵數日至萬餘,軍氣乃 賊來攻, 俄韶元諒與李晟收京師,次漨西。 德宗出奉天,賊遣將何望之襲華州,於是刺史董晉棄城走,望之欲聚兵以絕東道,元諒 軍節度使,封武康郡王。先是,詔發豳、隴兵東討李希烈,師方出關,泚使劉忠孝 輒卻。 時尚可孤守藍田,元諒屯昭應,王權壁中渭橋,賊兵不能踰渭 |元諒先奮鏖賊,敗之,進屯苑東,|晟使壞苑垣入。 南。 泚

列

第

八

† —

李元鯨

連戰皆北 ,遂大潰 京師 平。 讓功於晟,退壁近郊。 加檢校尚書左僕射,實封戶五 百,

第、女樂、一子六品官。

助我 為請,燧赦之。 使約降,曰:「我降漢將耳。」及馬燧至,降於燧。 見曰:「殺一偏裨尙 乎? 李懷光反,與馬燧、渾瑊討之。其將徐廷光素易元諒,數嫚駡,爲優胡戲斥侮其祖。又 ?」許諾。 帝以專殺,恐有司劾治, 旣而遇諸道,即數其罪,叱左右斬之,詣燧謝。 爾 1, 即殺一節度,法宜如何? 前詔勿論 」燧默然。 元諒見韓游瓌曰:「彼詬吾祖,今日斬之,子 元諒請輸錢百萬勞軍自贖, 城亦 燧大怒,將殺元諒,游瓌

俄而虜劫盟, 城奔還, 元諒兵成列出, 而涇原節度使李觀亦以精兵五千伏險, 與元諒相, 所二十里, 元諒密徙營次之。 「潘原去平凉七十里,虜詐不情,如有急,何以赴?請與公連屯。」喊以違詔,不聽。 二人,臧且不免。 虜騎乃解。 貞元三年,吐蕃請盟,詔以軍從瑊會平涼,元諒軍潘原、游瓌軍洛口以爲援。 元諒遣車重先, 而與減振旅徐還, 時以爲有古良將風。 帝嘉歎,賜善馬金幣良厚,因賜姓及名 既會,元諒望雲物曰:「不祥,虜必有變!」傳令約部 是會也,微元諒、觀 伍出 元諒日: 陣。

培高浚淵,身執苦與士卒均,葘翳榛莽,闢美田數十里,勸士墾藝,歲入粟菽數十萬斛,什具 度隴右,治良原。 良原隍堞湮圮,旁皆平林薦草,虜入寇,常牧馬休徒於此。 元諒

畢給。 隴以安,西戎惲之。 卒,年六十二,贈司空,諡曰莊威。 又築連弩臺,遠烽偵,爲守備,進據勢勝,列新壁。 虜至無所掠, 戰又輒北, 由是涇、

遣佐 平劇賊。 人守黑水, 虜不敢侵。 坊州 李觀 刺史吳伷,爲防遏使。以親喪解。 ,其先自趙郡徙洛陽,故爲洛陽人。少沈厚寡言。以策干朔方節度使郭子儀,子 遷大將,試殿中監,召爲右龍武將軍。 嶺南節度使楊愼微奏爲偏將,徐浩、李勉代節度,常倚以軍 吐蕃內寇,代宗幸陝, 觀隱盩厔,率鄉里子 政, 姓千

北庭行 朝,前一 **旝**灌豎, 涇 師叛,觀適番 軍涇原節度使。 日就道,虜至期出精騎狙擊,不及,去。以少府監檢校工部尙書。 士氣益振。 上,即 賜 (封戶二百) 在屯四年,訓部伍,儲藏饒衍。 領兵千餘扈德宗奉天。 授二子八品官。 詔盡祭諸軍, 從至梁州。 平涼之盟,吐蕃不 帝還, 整飭誰邏,增募五 詔總後 得志。 卒,贈太子少傅。 軍 是年,觀入 千人, 擢 四鎮

韓游瓌 列 傳 第 靈州 八 + 靈 武 入, 李 觀 始爲 韓 郭子儀裨將。 游 躨 安祿山反,使阿史那從禮將同羅 四九〇三 突厥五千

騎 之,九蕃府還附。 降於朔方,出塞門,誘河曲九蕃府、 累進邠寧節度留後。 六胡叛,部落凡五十萬。 子儀使游瓌率辛京杲擊破

以游 中, 賊以 詔引 游瓊曰:「是分吾力也。」趨 分以亢我 大治 風返 可夾攻取之。今入奉天,賊亦隨 瓌 和誘 軍屯 戰 奉天之狩,兵未集, 棚、雲橋 惟明 ,棚皆燼 便橋。 之,衆且潰。」遂還奉天。 了餘衆猶能鼓而 賈隱林處之。 次泥泉 士皆懼, 賊氣 沮。 游壞與慶州刺史論惟明以兵三千來赴,自乾陵北趨醴泉,未至 西也,不 與泚兵值, 游瓌曰:「賊取佛祠乾 北 故諸將推游壞赴難功第一 雉 ٠, 遣將郭詢、 如先入衞天子。 泚兵躡攻之,戰不利,泚 至,是引賊迫天子也。」游瓌曰:「不然, 游壞欲還奉天,監軍翟文秀曰:「吾壁于此,賊敢踰 郭廷玉 |木爲攻具,可以火之。」旣 且奉天無彊卒,安得夾攻? 以銳士三百傳滿直 0 帝以衞軍無職局, 兵奪門, 游瓌殊死戰 出 而 我寡賊衆 火其棚 賊 軍置統軍一 吾士乏且 大 課 攻 南 乃解。 投薪於 彼能 我 員, 泚 而

渭北 兵,怙以爲亂 但懷光誤臣 有竇覦,皆守將也,陛下以其衆與地授之,罷懷光權,而尊以元功,諸將仰首,各聽其 李懷 光叛 , 使震驚乘輿,後持臣 ,誘游瓌爲變,游瓌 今那有 張昕 靈 武 有 白發其書,帝曰:「卿可謂忠義矣! 自解。」帝 甯景璿,河中有呂鳴岳,振武有杜 嘉其誠,從問:「計欲安出?」 」對日:「臣安 從政 對 (), 潼關 日「懐光 有李朝臣 知 忠義? 總諸府

賦 帥 方至, 彼安能以亂?」帝曰:「罷懷光權而泚益張 發而 酬之, 其守自固。

別有萬精甲 , 臣得將之,可以誅賊。 , 若何? 」對日:「陛下約士以不次之賞, 四 一方杖義而起,賊不足 今貢

」帝美其言

梁州 高固等應之,斬昕首以聞。 疾不出, 客劉 如捨之。」」改至 懷光自 南 會懷光誘復至, 游瓌使子從帝 金說曰:「別有留甲,可以立功 陰結其將高固等。 蹈 渦機, 公今可取富貴, 一涇陽 懐 渾瑊得書, 稍嚴卒以警。 光 懷光傲假游瓌邠州 遂 走蒲州 **昕欲殺游瓌,戒左右衷** 時懷光子政在別 無共汚不義 ,殆天假也 刺 ,游瓌衞出之, 史,欲因張昕殺之。 也。 游瓌不知,發怒, 甲入,断小史李岌潛白 我願以麾下爲公先驅。」昕 」游瓌悟,誘舊部兵八百 日:「殺之祗以怒敵 **嫚**罵瑊。 游瓌旣失兵,不 帝疑 游瓌 馳 不 入 有 邠 聽。 知 變,即 伏 至必遽,不 所圖。 甲先起, 游瓌移 日 有 幸

李元 京師平 要險 游 瓌 率 諒 游 李晟 瓌屯 ·兵 奉 遷檢校尙書左僕射,實封 (丼力, 迎 七盤,受李晟節度。 入長安,游瓌破泚 論功與瑊等皆第 敗賊衆五千于屯。 兵 \_\_<u>•</u> 〈威陽。 韶拜邪寧節度使, 戶 逐會瑊、馬燧圍蒲城。 四 游瓌還屯邪寧。 百。帝至自 泚 走涇州,游瓌 興元,游瓌及瑊 逐會渾瑊於奉天,與瑊、戴休顏 懷 使 光 諭涇 寇同州, 師次焦籬堡, 將楊澄 、休顔 瑊、 · |澄 從,而 元諒 守將尉珪降。 拒不納, 李晟、 敗於乾坑 分扼 尙 泚 遂 口 懷光 敗。 孤 西

列

僔

四

見勢單蹙,乃縊死。

必怠 前 以分虜勢。」」瑊被劫,馳以免,虜見兵出,卽解去。後吐蕃寇大回原,游壞方壁長武,卽選騎 會盟平凉,詔游瓌以軍屯洛口。盟之日,游瓌以勁騎五百待非常,令曰:「卽有變,急趨怕泉 之請。詔問游瓌,答曰:「西戎弱則請盟,彊則入寇,今侵地益深而乞盟,詐我也!」帝不從。 時也。」有詔李元諒、韓全義率師一萬,會游瓌收鹽州。吐蕃請修淸水盟,以歸侵地,馬燧爲 之,又取銀、夏、麟等州。游瓌請收鹽州以斷戎人走集:「虜入漢,食禾菽,方春而病,此天亡 擊,游瓌羅幟自衞,鼙鼓四發,虜驚潰去。是歲,復圍鹽州,刺史杜彥光約與之城,吐蕃許 八 百迎擊,自引兵繼之。監軍以爲戎不可易,答曰:「賊攻豐義,今游騎先破,則彼大衆不敢 豐義全矣!」戰南原,敗之,吐蕃夜遁。 ,可襲取之。」使將史履澄夜領兵五百入其營, 貞元二年,吐蕃入涇、隴、邠、寧,游瓌追至安化,虜營合水北。游瓌策曰:「賊行無人地, 斬數百級,取馬五千。 遲明, 虜以兵尾

游瓌懼,求歸死 會子欽緒以射生將 京師、帝不許。 · 衞京師,與妖人李廣弘謀反,謀泄,奔邠州,中人捕斬,以狀示游瓌。 又執欽緒二息送京師, 帝亦原之。 未幾入朝,素服聽命,有

韶復位,勞遇如故。

游瓌盛言城豐義以遏虜侵。 帝悅,趣還軍。 初,游瓌之朝,衆謂且得罪,故齎送殊薄。

游 既還,舉軍不自安。大將范希朝善兵,游瓌畏其偪,欲誅之, 環遣 !兵築豐義,纔二板而潰,寧卒數百大掠,游瓌不能禁。 希朝奔鳳翔,帝聞, 韶用張獻甫代之。 游瓌畏亂, 召入宿衞。

委軍輕出,還京師,拜右龍武統軍。卒,諡曰襄。

循 + 李傪、越州 舍 廣 日 入觀、洞。 修上 趣舉。」約欽緒夜擊鼓, 弘於資敬寺,召相工唐郛視之,教郛告人曰:「廣弘且大貴。」乃誘飲緒 弘 - 變, 者,自言宗室子,始爲浮屠,妄曰:「我嘗見岳、瀆神,當作天子,可復冠。」男子董昌 參軍事劉昉等作亂。 乃禽廣弘及支黨鞫仗內,付三司訊實,皆殊死。廣弘臨刑,色自如。 譟凌霄門,焚飛龍廢,循等以神策兵迎廣弘,事捷,大剽三日。 。 昉家數具酒大會廣弘所,陰相署置。 又妄曰:「神戒我 、神策將魏循 由是禁人不 十月

漠谷 奉天之狩, 書左僕射 ,爲賊邀擊,乘 杜 .希全,京兆醴泉人。 以裨將隸郭子儀,積功勞至朔方節度使。 希全與劇坊節 靈 鹽 豐 高縱 夏節度使, 石 度使 下之,彊弩雜發。 李建徽 封餘 姚郡王 鹽州 德宗使援之,不克,還保 將卽 刺 史戴休顔 屯, 獻體要八章,砭 夏州 刺史時常春引兵赴難。 那州。 軍令整嚴,士畏其威。 切政病。 賊平 帝嘉納, 遷檢校尚 賜 次

列

傳

第

八

+

杜

希

全

那

君牙

君臣箴一篇。

神策行營諸節度合選士三萬五千屯鹽州, 尋兼夏綏銀節度都統, 建言:「鹽州據要會,爲塞保鄣,自平凉背盟, 請復城鹽州。」乃韶希全及朔方、邠寧、銀夏、 又敕涇原、劍南、山南軍深入吐蕃, 城陷于虜, 牽燒其力,使 鄭坊、 振武及 於是

排劾之, 希全居河西久,頗越法橫肆,帝數容掩其短。 帝爲斥以答其意。 素苦風眩,稍劇,盆忌忍, 豐州刺史李景略名出 遂誣殺判官李起, 希全上, 吏下累息。 疑逼己, 贈 遂

不得犯塞。

執築凡六千人,閱二旬畢。

由是虜憚,不輕入。

侯希逸涉海入青州 邢君牙, 瀛州樂壽人。 少從幽薊、 田神功爲克鄲節度使,使君牙將兵屯好時防盛秋。 平盧軍, 以戰功歷果毅、 折 衝郎將。 吐蕃犯京師,代宗 安祿 山反,從

出陝,以扈從功,累封河間郡公。

出奉天,晟率君牙倍道赴難,徙屯渭橋, 建中初,李晟從馬燧討田悅,以君牙爲都將,在武安、襄國間 軍中便宜,唯君牙得豫。 凡五戰, 晟在鳳翔, 數行邊,常以 斬馘功最。

展入朝,代爲鳳翔觀察使。俄領節度,檢校尚書右僕射。 吐蕃歲犯邊,君牙劭耕

戰以爲備,戎不能侵。 又城隴州平戎川,號永信城。 卒官,贈司空。 君牙守。

其欺,汾不謝去,曰:「吾在京師,聞邢君牙一時豪俊,今乃與設吏論錢,云何?」居牙慚,遽 初,布衣脹汾者,無紹而干君牙,軒然坐客上。會更擿簿書,以盜沒宴錢五萬,君牙怒

釋吏,引爲上客,留月餘,以五百縑爲謝。

其屈己好士類此。

## 唐書卷一百五十七

### 列傳第八十二

#### 陸贄

不納,止受茶一串,曰:「敢不承公之賜。」以書判拔萃補渭南尉 有重名、實往見、語三日、奇之、請爲忘年交。 陸贄字敬興、蘇州嘉興人。 十八第進士,中博學宏辭。 旣行,餉錢百萬,曰:「請爲母夫人一 調鄭尉, 罷歸。 壽州刺史張鎰 日費。」 贄

好惡, 滯, 字 科登儁乂,四賦經財實,六德保罷瘵,五要簡官事。 , 視墾田贏 視姦盜 德宗立, 遺黜陟使庾何等十一人行天下。 訊簿書考其爭訟,覽車服等其儉奢,省作業祭其趣舍。 有 縮以稽本末,視賦役薄厚以稽廉冒,視按籍煩簡以稽聽斷,視 無以稽禁禦,視選舉衆寡以稽風化,視學校興廢以稽教導。 實說使者,請以五術省風俗,八計聽吏治,三 五術曰:聽謠誦審其哀樂, 八計日: 視戶 三科曰:茂異,賢 囚繫盈 口 納市賈觀 豐耗以 虚以 ( 稽決 稽 其 撫

列

老,慈幼,救疾,恤孤,賑貧窮,任失業。 良,幹蠱。 四赋 曰:閱稼以奠稅,度產以衰征,料丁壯以計庸,占商賈以均利。六德曰:敬 五要日:廢兵之冗食,蠲法之橈人,省官之不急,去

物之無用、罷事之非要。時皆韙其言。 遷監察御史。

帝在東宮,已聞其名矣,召爲翰林學士。 會馬燧討賊河北久不決,請濟師;李希烈寇

襄城。 詔問策安出,贄言:

也。 發,據察、許富全之地,而益以鄧、襄虜獲之實,東寇則饟道阻,北窺則都邑震,此謂急 決,互相制劫,急則合力,退則背憎,不能有越軼之患,此謂緩也。希烈果於奔噬,忍於傷 汝、洛、榮、汴之勢急而禍重。 李懷光解襄城之圍,專以太原、澤、潞兵抗山東,則梁、宋安。 襄城方銳之賊。本非素習,首鼠莫前,則守禦失於不足也。今若還李芃河陽以援東都, 而 財屈,則屯戍失於太繁也。 代、搠、邠、靈自昔之精騎,上黨、盟津今之選師,舉而委之山東,將多而勢分,兵廣 勞於服遠, 莫若脩近; 多方以救失, 莫若改行。今幽、 臙、 恆、 魏之勢緩而禍輕, 。 李勉,文吏也,而當汴必爭地,哥舒曜之衆,烏合也,扞 田悅覆敗之餘,無復遠略,王武俊有勇無謀,朱滔多疑少

又言

立國之權,在審輕重,本大而末小,所以能固。 故治天下者,若身使臂,臂使指,小

之兵以制北虜。今朔方、太原衆已屯山東,而神策六軍悉戍關外,將不能盡敵,則請濟 中興。乾元後,外虞踵發,悉師東討,故吐蕃乘虛,而先帝莫與爲禦,是失馭輕之權也。 又告乏財,則爲算室廬,貸商人,設諸權之科,日日以甚。萬有一如朱滔、李希烈負固 師。陛下爲之輟邊軍,缺環衞,竭內廢之馬、武庫之兵,占將家子以益師,賦私畜以增騎。 旣自陝還,懲乂前事,稍益禁衞,故關中有朔方、涇原、隴右之兵以捍西戎,河東有太原 久,武備微,故祿山乘外重之勢,一舉而覆兩京。然猶諸牧有馬,州縣有糧,肅宗得以 |太宗列置府兵八百所,而關中五百,舉天下不敵關中,則居重馭輕之意也。方世承平 如臂,而四方如指,此天子大權也。是以前世轉天下租稅,徙郡縣豪桀, 稱而不悖。 王畿者,四方之本也;京邑者,王畿之本也。其勢當京邑如身,王畿 以實京師。

與列於廢牧不殊,財用之在關中者,與貯於帑藏不殊。一朝有急,可取也。陛下幸聽 京師稅間架、権酒、抽貫、貸商、點召之令,一切停之,則端本整棼之術。 臣計,使戊還軍援洛,懷光救襄城,希烈必走。請神策軍及將家子占而東者追還之,凡 夫關中,王業根本在焉。豪桀之在關中者,與籍於營衞不殊; 車乘之在關中者,

邊壘,竊發都甸者,何以備之?

列傳第八十二 陸贊

帝不納。後脛師急變、贄言皆効。

事 ,情,衍繹孰復,人人可曉。 旁吏承寫不給,它學士筆閣不得下,而實沛然有餘。 從狩奉天,機務塡總,遠近調發,奏請報下,書詔日數百,贄初若不經思,逮成,皆周盡

盧杞等,帝護祀,因曰:「卿不忍歸過朕,有是言哉。然自古興衰,其亦有天命乎? 今之厄運, 始 了,帝蒼卒變故,每自剋責,<br />
贄曰:「陛下引咎,<br />
撓、<br />
舜意也,<br />
然致寇者乃羣臣罪。」<br />
贄意指

恐不在人也。」 贄退而上書曰:

也。 矣。 給 不足,於是權算之科設,率貸之法 師 了近不見異,羣情囂然,而關畿不 資裝 也; ,以討四方。一人征行,十室資奉,居者疲饋轉,行者苦鋒鏑,去留 聚兵日衆,供費日博,常賦不給, 陛下悉而 自安史之亂,朝廷因循函養,而諸方自擅壤地,未嘗會朝。陛下將一區字,乃命將興 兆庶 ,破產以營卒乘,元臣貴位,孰 將家者 、嗷然, 「統帥 東征,邊備空屈,又搜私牧、責將家以出 而郡邑不寧矣。 岳牧之後也。 興。 其復除 寧矣 邊陲之戍以保封疆, 乃議蹙限而 不 禁防滋章,吏不堪命,農桑廢于 - 解體? 征徭 舊矣。 方且稅侯王之廬, 算裨販之緡, 加斂焉; 今奪 「兵籍 禁衛之旅以備巡警, 馬。 其畜牧, 加斂旣殫, 夫私 事其子 牧者 騒然, 而 乃別配 追 呼, 1,元勳 孫 邦之大; 之; 閭 膏 丐 假 貴 貴不見 加 里 戚 竭 别 以 之 防 于 配 寧

陛下又謂百度弛廢,則持義以掩恩,任法以成治,斷失於太速,祭傷於太精。 斷速

惟 故 則寡恕于人, 而疑似不容辨也; 察精則多猜于物, 而億度未必然也。 人主獨 反側之釁生; 不聞。 多猜而下防嫌,故苟且之患作。 凶卒鼓行,白晝犯闕,重門無結草之禦,環衞無誰何之人。陛下雖有 由是叛亂繼產,忿讟並興,非常之虞, 寡恕而下懼禍

股肱之臣,耳目之佐,見危不能竭誠,臨難不能効死,是則羣臣之罪也。

象焉。 之有也。 之所助者信也。 天命,必不可之理也。 視聽,皆因于人,非人事外自有天命也。 ||紂之辭曰:「我生不有命在天?」此捨人事 陛下方以興衰諉之天命,亦過矣。。書曰:「天視自我人視,天聽自我人聽。」則天所 此天命在人,蓋昭昭矣。人事治而天降亂,未之有也;人事亂而天降康,亦未 尚恐有可疑者,請以近事信之。 履信思乎順,是以祐之。」易論天人祐助之際,必先履行,而吉凶之報 湯曰:「自天祐之。」仲尼以謂:「祐者助也,天之所助者順也,人

無難 有以無難而亡,多難而興。治或生亂者,恃治而不脩也。亂或資治者,遭亂而能治也。 師之人,固非悉通占術、曉天命也。則致寇之由,豈運當然?夫治或生亂,亂或資治。 而 自 失者,忽萬幾之重,而忘憂畏也。多難 比兵興,物力耗竭,人心驚疑如風濤然,洶洶靡定,族謀聚議,謂必有變。則京 (而興者,涉庶事之艱,而知敕愼也。今生 當至危之機,得其道則興,

列

親忠直,推至誠,去逆詐,斯道甚易知,甚易行,不耗神,不劬力, 第約之於心耳。何憂 失則廢,其間不容復有所悔也,惟勤思而孰計之。捨己以從衆,違欲以遵道,遠憸佞,

乎亂人,何畏乎厄運,何患乎不寧哉?

密,要須歸曲於股,以自取名。 股嗣位,見言事多矣,大抵雷同道聽,加質則窮。 納無倦。 帝又問贄事切於今者,贄勸帝:「羣臣參日,使極言得失。若以軍務對者,見不以時,聽 ` 往謂君臣一體,故推信不疑,至憸人賣爲威福。 今茲之禍,推誠之敝也。 兼天下之智,以爲聰明。」帝曰:「朕豈不推誠!然顧上封者,惟譏斥人短長,類非 故頃不詔 又諫者不

次對,豈日倦哉!」贊因是極諫日:

以小虞而妨大道也。臣聞人之所助在信,信之所本在誠。一不誠,心莫之保,一不 誠。所謂民者,至愚而神。夫蚩蚩之倫,或昏或鄙,此似於愚也。然上之得失靡不辨,好 言,失言。智者不失人,亦不失言。」陛下可審其言而不可不信,可愼其所與而不可不 所謂誠信以致害者,臣竊非之。 孔子曰:「可與言而不與之言,失人;不可與言而與之 信,言莫之行。故聖人重焉。傳曰:「誠者,物之終始,不誠無物。」物者事也,言不誠卽 無所事矣。匹夫不誠,無復有事,況王者賴人之誠以自固,而可不誠於人乎?陛下 昔人有因噎而廢食者,又有懼溺而自沈者,其爲防患,不亦過哉!願陛下鑒之,毋

信矣。今方鎭有不誠於國,陛下興師伐之;臣有不信於上,陛下下令誅之。 輕,撫不以情則其效忠薄。 惡靡不知,所祕靡不傳,所爲靡不効。馭以智則詐,示以疑則偷。接不以禮則其徇義 而不敢赦者, 「惟天下至誠,爲能盡其性。」不盡於已而責盡於人,不誠於前而望誠於後,必紿而不 以陛下所有責彼所無也。 上行則下從之,上施則下報之,若景附形,若響應聲。 故誠與信不可斯須去己。 願陛下愼守而力行 有司奉命 故曰:

之,恐非所以爲悔也。

入則 於上者,信非其美,然於盛德,未有虧焉。納而不違,傳之適足增美; 拒而違之,又安能 斯甚矣。 改而之善,愚者恥而之非也。 爲稱首。 而美其補闕。則聖賢之意,貴於改過,較然甚明。蓋過差者,上智下愚所不免,惟智者能 美宣王之功曰:「衮職有闕,仲山甫補之。」夫成湯聖君也,仲虺聖輔也,以聖輔贊聖君, 不稱其無過,稱其改過;周宣中興賢王也,吉甫文武賢臣也,歌誦其主,不美其無國, 造膝,出則詭辭,姦由此滋,善由此沮,天子意由此惑,爭臣罪由此生,媚道行而害 《傳曰:「人誰無過?過而能改,善莫大焉。」 仲虺歌成陽之德曰:「改過不吝。」 吉甫 是知諫而能從,過而能改,帝王之大烈也。 太宗有文武仁義之德、治致太平之功,可謂盛矣,然而人到于今以從諫改過 中古以降,其臣尙諛,其君亦自聖,掩盛德,行小道,乃有 陛下謂諫官論事,引善自予,歸過

禁之勿傳?不宜以此梗進言之路也。

是失天下之心矣。故常情之所輕,聖人之所重,不必慕高而好異也。 有失實之聽。 忽於所輕,溺於所欲。信偏則聽言不盡其實,故有過當之言,疑甚則雖實不聽其言,故 不必智。考之以實,惟善所在,則可以盡天下之心矣。夫人情蔽於所信,阻於所疑; 逆於心不必否;異於人不必是,同於衆不必非;辭拙而效迂者不必愚,言甘而利重者 聖人不忽細微,不侮鰥寡。奓言無驗不必用,質言當理不必違;遜於志不必然, 輕其人則遺可重之事,欲其事則存可棄之人。荷縱所私,不考其實,則

其能哉?夫欲治天下,而不務得人心,則天下固不治矣;務得人心,而不勤接下,則心 過,必甘佞辭,忌直言,則諂諛者進,而忠實之語不聞矣。騁辯而衒明,必折人以言,虞 己,則畏懦者至,而情理之說不申矣。人之難知,堯、舜所病,胡可以一酬一詰,而謂盡 人以詐,則顧望者自便,而切摩之益不盡矣。厲威而恣愎,必不能降情接物,引咎在 騁辯給,銜聰明,厲威嚴,恣彊愎,上之弊也;諂諛,顧望,畏懦,下之弊也。好勝而恥 下之難知。 其心。且下之情莫不願達於上,上之情莫不求知於下,然而下常苦上之難達,上常苦 陛下又以雷同道說,加質則窮。臣謂陛下雖窮其辭而未窮其理,能服其口而未服 若是者何。九弊不去也。所謂九弊者,上有六,下有三:好勝人,恥聞過,

則君子小人固不可辨矣。 固 [不得矣,務接下而不辨君子小人,則下固不可接矣;務辨君子小人,而惡直嗜諛, 趨和求媚,人之甚利存焉;犯顏冒禍,人之甚害存焉。

者易其言而以美利利之,猶懼忠告之不暨,況疏隔而猜忌者乎?

子』,皆大名也。三代而上,所稱象其德,不敢有加焉。 哉?」帝從之。 僻之君,始有聖劉、天元之號,故人主重輕,不在稱謂,視德何如耳。 更益 不若引咎降名,以祗天戒。且矯舊失,至明也;損虛飾,大知也。寧與加冗號以受實患 君,德合於天日『皇』,合於地日『帝』,合於人日『王』,父天母地以養人治物得其宜者曰『天 不宜益美名以累謙德。」帝曰:「卿言固善,然要當小有變革,爲殷計之。」贄奏言:「古之人 ||大號。||贄曰:「今乘輿播越,大憝未去,此人情向背、天意去就之隙,陛下宜痛自貶勵 是時,賊未平,帝欲明年遂改元,而術家爭言數鍾百六,宜有所變,示天下復始。帝乃議 至秦乃兼曰『皇帝』,流及後世昏 若以時屯當有變革,

下窮用兵甲,竭取財賦,變生京師,盜據宮闥。今假王者四凶,僭帝者二豎,其它顧瞻懷貳, 激之使疆其意,卽建言:「履非常之危者,不可以常道安;解非常之紛者,不可以常令論。陛 不 可悉數。 會興元赦令方具,帝以稾付贄,使商討其詳。贄知帝執德不固,困則思治,泰則易驕,欲 而欲 終 ;多難,收羣心,惟在赦令而已。 動人以言,所感已淺,言又不切,人誰肯

列傳

廣,潤澤不可不弘。使天下聞之,廓然一變,人人得其所欲,安有不服哉?其須改革科條, 懷?故誠不至者物不感,損不極者益不臻。 悔。」帝納之。 夫感者, 誠發於心, 而形於事, 事或未論, 故宜之於言, 言必顧心, 心必副事, 三者相合, 乃 可求感。 巳別封上。臣聞知過非難,改之難;言善非難,行之難。 揚曰:『聖人感人心而天下和平。』 惟陛下先斷厥志,以施其辭。度可行者而宣之,不可者措之。無苟於言,以重取 夫悔過不得不深,引咎不得不盡,招延不可不

悟,卽撤其署 旅方般,瘡痛呻吟之聲未息,遽以珍貢私別庫,恐羣下有所觖望,請悉出以賜有功。 令後納 言郡邑賦稅,當委有司以制經用,其貢獻悉歸天子私有之。蕩心侈欲,亦終以餌寇。今師 庫,別藏貢物。 貢必歸之有司 始,帝播遷,府藏委棄,衞兵無褚衣。至是天下貢奉稍至,乃於行在夾廡署瓊林、大盈二 贄諫,以爲:「瓊林、大盈於古無傳。舊老皆言: 開元時貴臣飾巧以求媚,建 先給軍賞,瓌怪纖麗無得以供。是乃散小儲成大儲,捐小寶固大寶也。」帝

因請移屯。 李懷光有異志,欲怒其軍使叛,即上言:「兵稟薄,與神策不等,難以戰。」李晟密言其 此必反,宜有以制之。」因勸帝許晟移軍。 帝遣贄見懷光議事。 贄還奏:「懷光寇奔不追,師老不用,羣帥欲進,與 初,贄與懷光語及晟,懷光妄詫曰:「吾無 沮

也。 之。」晟已徙營,不閱旬,懷光果奪兩節度兵,建徽挺身免,惠元死之,行在震驚,遂徙罕梁。 官虛名,且已與宰相議矣,卿其無嫌。」贄奏:「信賞必罰,霸王之資也。 輕虧褻刑,衰亂之漸 所藉晟。」贊卽美其彊雄,使不得翻覆。 遣李建徽、陽惠元與晟丼屯東渭橋,託言晟兵寡不足支賊,俾爲掎角。 懷光雖不欲遣,且 非功而獲爵則輕,非罪而肆刑則褻。天寶之季,嬖幸傾國,爵以情授,賞以寵加,綱紀 道有獻瓜果者,帝嘉其意,欲授以試官,贄曰:「爵位,天下公器,不可輕也。」帝曰:「試 無以沮解。」帝猶豫曰:「晟移屯, 懷光固怏怏,若又遣建徽等俱東,彼且爲辭。少須 至是,請下詔書如其意者,且無辭歸短於朝。 又建:

之以虚 列稟 散、試之號行焉。今所病者爵輕也,設法貴之,獨恐不重,若又自棄,將何勸焉?陛下謂試官 能,以位勳德 爲虛名,豈思之未熟邪?夫立國惟義與權,誘人惟名與利。名近虛,於敎爲重;利近實,於德 始壞矣。羯胡乘之,遂亂中夏。財賦不足以供賜,而職官之賞興焉。職員不足以容功,而 權得矣。 ,以彰實也;差品列,異服章 凡所以裁是非,立法制,則存乎其義;參虛實,揣輕重,則存乎其權。 ,則物有匱耗而不給矣;專虛名而不副之以實,則情有誕謾而不趨矣。 按甲令,有職事官,有散官,有勳官,有爵號。 所謂施 實利而寓虛名也。 ·,以飾虛也。 勳、散、爵號,止於服色、資蔭,以馭崇貴,以甄功 居上者達其變,相須以爲表裏,則爲國之 其賦事受奉者,惟職事 專實利而 一官,以敍才 故錫貨財,

列

傳

第

果。』瓜果,草木也。若草木然,人何勸哉?夫田父野人必欲得其歡心,厚賜之可也。」 之可謂重矣。 ,所謂假虛名佐實利者也。 。今獻瓜一器、果一盛則受之,彼忘軀命者有以相謂矣,曰:『吾之軀命乃同瓜 。今員外、試官與勳、散、簢號同,然而突銛鋒、排禍難者以是酬

喉梗而心膂分矣, 豈不病哉!今顧望兩端,是乃天誘其衷,通歸塗,濟大業也。」帝釋然,盡 來,賊勝遂往,此焉幾會,不容差跌。使楚琳逞憾,敢爲倡狂,南塞要衝,東與賊合,則我咽 商嶺旣回遠,而駱谷又爲賊所扼,通王命者唯褒斜爾。若復阻,則諸鎭之向背者,我勝則 之罪舊矣,今議者乃始紛紜,不亦晚哉?且勤王之師在畿內者,急宣亟告,景刻不可差。 言其挾兩端,有所狙伺。然帝亦不能容,其使至,皆不得召,欲以渾瑊代之。實諫曰:「楚琳 召見其使,優韶勞安之。 俄以勞遷諫議大夫,仍爲學士。 。時鳳翔節度使李楚琳殺張鎰得位,雖數貢奉,議者頗

云?難則嘗之,何定之云?今與奮命者齒,恐沮戰士之心,結勳臣之憤。」帝乃止 帝欲以內外從官普號「定難元從功臣」。贄曰:「宮官具寮,恪居奔走,勞則有之,何功之

**昔武王克殿,有未下車而爲之者,有下車而爲之者。當今所務,謂宜以大臣馳傳,迎復神** 甿、重傷殘廢之卒,皆忍死扶疾,想聞德音。 京師已平,帝欲韶渾臧訪奔亡內人,給裝使赴行在,實諫曰:「大難始平,而百役疲瘵之 蓋事有先後,義有輕重,重者宜先, 輕者宜後。

主,脩飭郊丘,展禋享之禮,申告謝之意,恤死義,犒有功,崇進忠直,優問耆耋,定反側 後不可先也。 脅從,官失職,復廢業,是皆宜先不可後也。 知爲君之體然也。天下固多褻人,何必獨此?」帝不復下詔,猶遣使論喊資遣。 且內人當離潰之後,或爲將士所私。 葺宮室,治服玩,耳目之娛、巾櫛之侍,是皆宜 昔人掩絕纓、飮盜馬者, 豈忘其愛邪?

舍 人。 **廖**黜,乃以 孤立一意,爲左右權倖沮短,又言事無所回諱,陰失帝意,久之不得宰相。還京,但爲中書 權知兵部侍郎復召爲學士。 章皋以布衣交,先以聞,故所致輒稱詔受之。 相,而實參素不平,忌之。實亦數言參罪失。 初 母韋猶在江東, `劉從一、姜公輔等材下,不逮贄遠甚,徒以單言暫謀偶有合,由下位建台宰。 中書侍郞同中書門下平章事 帝遣中人迎還京師。 入謝, 伏地鯁泣, 帝爲興, 貞元七年,罷學士,以兵部侍郎知貢舉。 俄以喪解官, 又韶中人護父柩至自吳會,葬洛陽。 改容慰撫。 客東都。 眷遇彌渥, 天下屬以爲 諸方赗遺一 一不取, 服除,以 明年, 而贄 惟

鬍,對曰:『得賢不能任,害霸也。 之,或言諸司所引皆親黨,招賂遺, 帝始任楊炎、盧杞,引樹私黨,排忠良,天下怨疾。貞元後,懲艾其失,雖置宰相,至除用 反覆參詰乃得下。 及贄秉政, 任賢不能固, 害霸也。 無實才, 始請臺閣長官得自薦其屬,有 帝復詔宰相自擇。 固始而不終, 贄奏言:「齊桓公問管仲害 不職, 害霸也。 坐舉者。 與賢人謀 帝初許

用。 薦 衆,自異爲不羣,趣 事 任以重者輕其言,待以輕者重其事也。」帝雖嘉之,然卒停薦士詔。 今擇宰相以重於庶品,選長官以愈於下流,及宰相獻言,長吏薦士,則又納橫議,廢始謀,是 後位宰相則可擇天下材乎?夫求才者貴廣,考課者貴精。往武后收人心,務拔擢,非徒人得 史大夫、中丞是也。 而 (士,亦許自舉其才,豈不易哉?然而課責嚴,進退速,故當世稱知人之明,累朝賴多士之 陛下賞鑒獨任,難於公舉,有登延之路,無練覈之方。」武后以易得人,陛下以精失士, 小人議之,害霸也。」所謂小人者,非悉懷險詖以覆邦家也,蓋趨向狹促,以沮議爲出 一小利,味遠圖,効小信,傷大道 陛下擇輔相多出其中,行實不能頓殊也。 爾。 所謂臺省長官,僕射、尙書、丞、郞、御 今乃謂不能進一二屬 吏, 豈

者更相顧不肯判。讚又請如故事,旬一人秉筆,所咨輒判。 每歲計關集人,檢柅吏姦,天下便之。當是時,賈耽、盧邁、趙憬同輔政,凡有司關白,三人 眞,吏緣以爲姦,廢置無綱,至十年不被調者,缺員或累歲不補。實乃請以內外員三分之, 舊制,吏部選以歲集。乾元後,天下兵興,率三年一調,吏員稽壅,則案牒叢淆,僞冒蒙

叉 以 |西北邊歲調河南、江淮兵,謂之「防秋」。士不素練,戰數敗,將統制不一,亡以應

敵。乃上陳其弊曰:

自 [祿山搆亂,肅宗始撤邊備,以靖中邦,借外威,寧內難,於是吐蕃乘釁,回紇矜

邊者,皆務所難,忽所易,勉所短,略所長,行之而要不精,圖之而功靡就 ,中國不振,四十餘年。 於是調斂四方,以屯疆陲,又不能遏其侵。故小入則驅略,深入則戒嚴。于時議安 率傷耗之民,竭力以事,西輸賄繒,北償馬資,尙不足滿其

用 功,雖果成之,不挫則廢。誠以越天授,違地產,虧時勢,以反物宜者也。 命尋常之間,以此禦寇,可謂勉所短而校其長矣。 笑,不恥敗亡,此戎狄所長,中國之短也。 長短各殊。勉所短而敵長者殆,用所長而乘短者彊。且以水草爲居,討獵爲生,便於馳 威也。以此安邊,可謂不量勢而務所難矣。天之授有分,地之產有宜,是以五方之俗, 疆 則先所易,是謂觀釁而動也。今財匱於中,人勞未瘳,而欲發師徒以犯獵寇境,復其侵 ],攻其堅城,前有勝負未必之虞,後有餽運不繼之患,萬一橈敗,適所以啓戎心,挫國 所長乎? 夫勢有難易,事有先後。力大而敵脆,則先所難,是謂奪人之心也;力寡而敵堅, 而欲益兵蒐乘,爭驅角力,交鋒原野之上,決 務所難,勉所短,勞費百倍,終無成 胡不守所易,

攻取 力貴智, 以 若 )昭吾仁;彼求和則善之而勿與盟,彼爲寇則備之而不報復。 乃擇將吏,脩紀律,訓齊師徒;耀德以佐威,能邇以示遐;禁侵暴以彰吾信,抑 好生惡殺;輕利重人,忍小全大;安其居而動,俟其時後行。 此當今所易也。賤 脩封疆, 守要

列

四

矛,以鐏授寇者也。今皆務之矣,尚且守封未固,寇戎未懲者何邪?病在謀無定用,衆 用力寡而見功多,以易敵難,則財不匱而事速成。捨此不務而反爲所乘,斯謂倒持戈 遏其入,寇大至則邀其歸,據險以乘之,多方以誤之,使其勇無所加,衆無所用,掠則靡 害,蹊塹隧 信;行不必當,當不必行。 無適從;任者不必才,才者不必任;聞不必實,實不必聞;所信不必誠,所誠不必 攻則不能, 進有腹背支敵之虞, 退有首尾不相救之患。 此中國之長也。 列 '屯營,謹禁防,明斥候,務農足食,非萬全不謀,非百克不鬭; 寇小至則 我之所長,戎狄之短也;我之所易,戎狄之難也。以長制短 是謂乘其弊,不戰而屈人 則

親戚 **卹常制,不徇衆情,死生進退,唯將所命,攻討之兵也。**人情者利焉則勸,習焉則安,保 肅 疆 而 不死。 , 禦戎狄,則選鎭守之兵以置之。 古之善選置者,必辨其土宜,察其技能,知其好 而後樂生,顧家業而後忘死,可以治術馭,不可以法制驅,鎭守之兵也。 用其力,不違其性;齊其俗,不易其宜;引其善,不責其所不能;禁其非,不處其 又有六失焉。夫兵有攻討,有鎭守。權以紓難,暫以應機,事有便宜,謀有奇詭,不 類其部伍,安其家室,然後能使之樂其居,定其志。 靡督課而自用,弛禁防而不攜。 故守則固,戰則彊。 以惠則感 其術無它,便於人而 而 不驕 王者欲備 以以 (威則

天地。 之,虜已旋返。 銳,悉選以自奉,委疲羸者以守要衝,寇至而不支,則劫執芟蹂,恣所欲得,比都府聞 立 本以增戶實邊,立功自贖,旣無良之人,而思亂幸災又甚於戍卒,適有防衞之煩,而無 路東潰。平居殫資儲以奉浮冗,臨難棄城鎭以搖疆場。 所辛酸,抗所懾駭,將冀爲用,不亦疏乎?又有休代之期,無統制之善,資奉姑息,譬如 鄰 驕子,進不邀以成功,退不處以嚴憲,屈指計歸,張頤待飼,師一挫傷,則乘其危橈,布 斯 視焉,長而安焉,則不能寧居而狎其敵也。 一功之益。雖前代行之,固非可遵者也。 () 晝則荷戈以耕,夜則倚烽以覘,有剽害之慮,無休暇之娛,非生其域、習其風, 可爲羽衞之儀,而無益備禦之實也。 今遠調 聞絕寒荒陬,則辛酸動容;聆彊蕃勁虜,則懾駭褫情。又使去親族,捨園廬,甘 。屯士,以戍邊陲,邀所不能,彊所不欲,廣其數不考於用,賣其力不察其情, 治兵若此,斯可謂措置乖方。一失也。 何者?窮邊之地,千里蕭條,寒風裂膚,豺狼爲 帥臣身不臨邊,而以偏師戍守。 關東百物阜殷,士忲温飽,比諸邊隅,不翅 其弊豈特無益哉? 謫徙之人, 大抵士之犀 幼而

歲時 銜 勒 所以服 賞以存勸、罰以示懲,以懋有庸,以威不恪。 欲 褒 為馬也。 一有 功, 今將之號令不能行之軍, 慮 無功者怨, 嫌疑而不賞,欲責一有罪, 國之典刑不能施之將, 故賞罰之於馭衆, 畏同惡者竦, 譬輗軏所以行車, 上下邍養, 隱忍而 以苟

列

傳

須 也。 此 給無乏, 可謂課責虧度。 求 又 故忘 諸 如 泛過敵 入, 更相 身効節者抵躁於衆,價軍緩救者畜姦不畏。 而 則罹困厄; 1為解, 守不固, 。二失也。 而朝廷含糊, 陳謀而 姦者行私苟媚於衆, 功不成, 未嘗究詰。 責將帥, 則取優崇。 故抱直者吞聲,罔上者不慚。 將帥日資糧不足, 責有司 褒貶稱毀,紛然相亂。 此義士勇夫所以痛 馭衆若 有 心 公者直 剖 解 體

制用若 備禦 橫 行 ,以謂境無人焉。 以課責之虧,措置之乖,將不得竭其才,卒不得盡其力,屯集雖衆,無施戰陣,虜常 而 此 有 弊於供億。 可 謂 財匮 於兵衆矣。 閭井 吏習其常,惟 白耗 一,斂求日繁,傾家析產,権鹽稅酒,無慮所入半以事邊。 三失也。 日兵少不敵,朝廷莫之省, 則 又調發益 師, 無裨於

失 時 辯 不 宜. 殊 ,制西北二蕃,則朔方、河西、 則 人心不 惲 ,所以能 今四 則 其 機 三夷最 彊 會不 不 冠邊者無幾。又器不犀利,甲 敢侵, **疆盛者**,莫如 則 荗 ; 號令不行; 何哉? 機會 茒 吐蕃。 良以我之節 皮 號令不行, 隴右三節度而已, 尙慮權分, 則氣勢自 舉吐蕃衆, 制 則進 衰。 多 不精完,材不 ٠, 未當中國十數大郡,而內虞外備與中國 而彼之統 退難必; 斯 乃勇廢爲 趨敏。 進 帥 退難 尫 也。 動 或詔兼領之。 必, 衆失爲弱。 則 且 、中國戀 則疾徐 節 制 多 其衆不敢抗, 失宜 開元 中興未遑 則 入心不 疾 天 實 徐

氣若勢爲用者也。氣聚則盛,散則消;勢合則威,析則弱。今之邊戍,勢弱氣消。 無軍法臨下,莫能稟屬,邊書告急,方使關白用兵,是謂從容拯溺,揖讓救焚矣。 兵以 汙朔方,則分朔方爲三節度,其鎭軍且四十,皆特詔任之,各有中人監軍,咸得相抗。旣 已,以關東戍卒屬之。雖任未得人,而措置之法存焉。 ,則僑四鎭隸安定,以隴右附扶風,所當二蕃,則朔方、涇原、隴右、河東四節度而 自賊泚亂以誘涇原,懷光反以

若此,可謂力分於將多矣。四失也。

頓殊,人情所不甘也。不爲戎首,已可嘉者,況使協力同心,以攘寇難,臣知有所不能 神策者,稟賜之饒,有三倍之益。此士類所以忿恨,經費所以褊匱。夫事業未異,給養 然衣稟優厚,繼以茶藥,資以蔬醬。豐寡相縣,勢則遠甚。又有以邊軍詭爲奏請遙隸 被邊長鎭之兵,皆百戰傷夷,角所能則習,度所處則危,考服役則勞,察臨敵則勇,然衣 《止於當身,又爲家室所分,居常凍餒。 而關東戍士,歲月更代,怯於應敵,懈於服勞, 養士若此,可謂怨生於不均矣。五失也。 治戎之要,在均齊而已。故軍法無貴賤之差、多少之異,所以同其志,盡其力也。

須某甲兵 凡 任將帥,必先考察行能,然後指所授之方、所委之要,令自揣可否,以見要領。 ()藉某參屬,用若干步騎,計若干資糧,何所列屯,何時成功,觀其言,校其實。

列傳

第

八

馬屯 亦有 所急 若 也。 用 减 則 求易制者,多其部使力分,輕其任使心弱。由是分閩責成之義廢,死綏任咎之志衰。一 賜鈇鉞,故軍容不入國,國容不入軍,機宜不以遠決,號令不以兩從。今陛下命帥,先 不爲濫,當罰者不敢辭,付授專則苟且之心息矣。是以古之遣將者,君推轂而命之,又 百爲 聽 帥 若 不足取,當艱之於初,不宜詒悔於後也。 华 所不能焉。 命,二則聽命,止取承順可矣,若有意乎靖難則不可。 故疑者不使,使者不疑。勞神於拔選,端拱於委任,然後覈否臧,信賞罰,受賞者 ,罅不留息,况千里之遠,九重之深,陳述之難明,聽覽之不專,欲事無遺策,雖聖 此 鞠椎剽矣;嗇夫樵婦,罄俘囚矣。 ,可謂機失於遙制矣。 獲者衍 守戍者以寡不敢抗,分鎭者以無詔不敢救,逗留之頃,寇已奔逼。 百爲千。 帥守以總制在朝,不卹於罪,陛下以權出己, 六失也。 假令詔至發兵,更相顧望,莫敢遮礙。 敗者 若日可任,則當要之於終,不宜掣肘於內 兩疆相接,兩軍相持,事機 不究厥情。

所輸 徙焉 耕耨水火之器畢具,一歲給二口糧,賜種子,勸之播蒔。 資 臣 、糧給應募者, 其 . 愚 謂 ,則弟以本道衣稟, 宜罷四方之防秋者 以安其業。 ,以其數析而三之:其一,責本道節度,募壯 責關內、河東募用蕃、 詔度支市牛,召工就諸屯繕完器具。 夏子弟願 須一年,則使自給,有餘粟者, 傅軍者給焉;其一,以 至者家給牛一, 土願屯邊者

州 盡 縣官倍價以售。 度 暫屯遽罷, 、為治所,所部州若府遴柬良吏為刺史,外奉軍興,內課農桑,愼守中國所長,謹行當 府之兵屬焉。 山 南 西道 豈同 ,凡節度府之兵皆屬焉。又詔一人爲朔方元帥,由鄜坊、邠寧揵靈夏,凡節 又詔一人爲河東元帥,舉河東,極振武,節度府之兵屬焉。各以臨邊要 日論哉!然後建文武大臣一人爲隴右元帥,自涇、隴、鳳翔薄長武城 既息調發之煩,又無幸免之弊,出則人自爲戰,處則家自爲耕。 與夫

帝愛重其言,不從也。

今所易,則八利可致,六失可去矣。

罷。 用。 獝 論 辨 銜之,不肯與。 」不聽。 贄本畏慎,未嘗通賓客。 班宏判度支,卒官、寶薦李巽,帝漫許之,而自用裴延齡,寶言:「延齡僻戾躁妄,不可 乃貶忠州別駕。後稍思之,會薛延爲刺 俄而延齡姦佞得君,天下仇惡,無敢言。 順宗立,召還。 延齡揣帝意薄,讒短百緒, 詔 未至,卒,年五十二,贈兵 史,諭旨慰勞。 贄上書苦諫,帝不懌,竟以太子賓客 帝遂發怒,欲誅贄,賴陽城等交章 章皋數上表請贄代領劍南,帝 、部尙書、諡日宣

裁可否 潔 始 一,時號 贄 有 過 入翰林,年尚少,以材幸,天子常以輩行 內 由是 .相。 帝 嘗爲帝言:「今盜徧天下,宜痛自咎悔, 親倚 至解 衣衣之, 同類 莫敢望。 评而 不名。 雖外有宰相主大議 以感人心。 在 奉天,朝夕進 昔成湯罪己以興 ,而贄常居中參 見,然小心精

列

今古集驗方五十篇示鄉人云。 事有可否必言之,所言皆剴拂帝短,懇到深切。 或規其太過者,對曰:「吾上不負天子,下不 難功、雖爪牙宣力、蓋實有助焉。狩山南也,道險澀、與從官相失,夜召實不得,帝驚且泣, **負所學,皇它卹乎?」旣放荒遠,常闔戶,人不識其面。又避謗不著書,地苦瘴癘,祇爲** 韶軍中得聲者賞千金。久之,上謁,帝喜見顏間,自太子以下皆賀。及輔政,不敢自顧重, 在奉天、山南時, 心。」帝從之。 王出奔,以一言善復國。 故奉天所下制書,雖武人悍卒無不感動流涕。 ,赦令至山東,士卒聞者皆感泣思奮。臣是時知賊不足平。」議者謂興元戡 陛下誠不吝改過,以言謝天下,使臣持筆亡所忌 。後李抱眞入朝,爲帝言:「陛下 庶叛者革

耶? 兄弟爭寵 觀 贊曰:德宗之不亡,顧不幸哉!在危難時聽實謀,及已平,追仇盡言,怫然以讒倖逐猶 贄論 至延齡輩,則寵任磐桓,不移如山,昏佞之相濟也。世言贄白罷翰林,以爲與吳通玄 ,竇參之死,贄漏其言, 諫數十百篇,譏陳時病,皆本仁義,可爲後世法,炳炳如丹,帝所用纔十一。 非也。 夫君子小人不兩進, 邪諂得君則正 士危, 何可訾

胙不競,惜哉!

## 唐書卷一百五十八

### 列傳第八十三

章皋 正貫 劉闢 張建封 嚴震 韓弘 充

|皋迎勞,先納奴,偽受泚詔。卽讓雲光曰:「旣去而復,何也?」對曰:「向未知公之命,故去; 今還,願與公同 泚。 鳳翔 「太尉已爲天子 辟,擢監察御史。 別將翟瞱伺知,以白皋。 ,旣歸節,而留兵五百戍隴上,以部將牛雲光督之。 德宗狩奉天,李楚琳殺鎰,劫衆叛歸朱泚,龐州刺史郝通奔降楚琳。 章皋字城武,京兆萬年人。 ,,使我以御史中丞授皋,若聽,固吾人也,不受,可遂誅之,請以兵俱。」許之。 .生死。」|皋曰:「大使固善,苟無它圖,請釋甲以安衆,而後可入也。」|雲光以|皋 張鎰節度 鳳翔,署營田判官。 雲光懼不克,率衆出奔,至汧陽,遇泚奴使皋所,謂雲光曰: 六代祖範,有勳力周、隋間。 以殿中侍御史知隴州行營留事 至是,雲光謀請皋爲帥 皋始仕爲建陵挽郎,諸帥府更 始,泚以范陽 , 將劫以臣 軍鎭

列傳

第八

+

=

使吐蕃 左右 諸 一人使報泚 生 ,士氣益 廡 與連和, 能 酒行 爲 壯。 ,盡殺之,以其首徇。 帝聞, 乃命 隴坻遂安。 乃築 士 乃授皋隴州 一委仗鎧, 壇 血 牲 帝自梁、洋還,召爲 與土盟曰:「協力一心,以誅元惡,有渝此盟,神其殛 皋受而內其卒。 刺 史, 泚 復使它奴拜皋鳳翔節度使,皋 置奉義 左金吾衞將軍 軍 明日,置酒大會,奴、雲光與其 拜節度使, ·,遷大將 寵其功。 亦斬之及從騎三人, 軍 皋遣兄平 下至, 之。」又馳 及弇繼 皋伏 至 甲

計 部尚書。 願皆 兄子鳥 五 年 得雲南則斬虜右支,乃間使招徠之, 逃逃 ,東蠻斷瀘 封以示 貞元 ~、臘 初、代張延賞 將悍雄者也,旣敗,酋長百餘行哭隨之。 褒進。」詔可。 始,鳥屋幼,那時攝領其部, 城酋悉多楊朱及論 水橋攻吐蕃,請皋濟師。 為劍 又明年,雲南款邊求內屬 南 西川 東柴等,虜墜死崖谷不可計, 節度使。 稍稍通 故請歸爵。 皋遣精卒二千,與蠻共破 初,雲南蠻羈附吐蕃 西南 悍將已亡,則屯栅以次降定。 夷。 約約 皋上言:「禮讓行于殊俗 東蠻鬼主驃傍、苴夢衝等絕吐蕃盟 明年 ٠, 多獲牛馬鎧裝。 蠻 大首 ,其盜塞必以蠻 吐蕃於臺登,殺青海 領 直那時以王 則 遮遮, 爲 **怫戾者化**, 進檢校吏 鄉道。 尚結贊 舒讓: 皋

故戰有功。 初, 東蠻地二千里,勝兵常數萬,南倚閻羅 韶以那時爲順政王,夢衝懷化王 驃傍和義王, 鳳 ,西結吐蕃 刻「兩林」、「勿鄧」等印以賜之。 狙勢疆 弱爲患, 皋能綏服之,

而夢衝 復與吐蕃盟 ,皋遣別將蘇峞召之,詰其叛,斬于 ·琵琶川 寸, 寸, 一次鬼主樣棄等,蠻部震服。

乃建安 、夷軍於資州 ,維制諸 蠻 ; 城龍谿於西山、保納降羌

靈關 九年 南道元帥論莽熱來援,與戰,破其軍,進收白岸,乃城鹽州 破 戦和 ,天子城鹽州, 、通鶴、定廉城、踰的博嶺 ,策虜且 一來橈襲, **遂**圍維州 韶皋出師牽維之。 搏棲雞 乃命大將董勔、 攻下羊溪等三城, 韶皋休士。 張芬分出西 以 取 功為檢校尚 劍山 [屯焚 山

書右僕射、扶風縣伯

靑溪 遣 幕 兵 府崔佐 於是 關 南 溪 號 西山羌女、訶陵、南水、 日「南 道 時 遂 由 道」。 閉。 石門趣 至是蠻 乃韶皋統押近界諸蠻、 雲南、而 徑北谷, 白狗、 南詔 復通。 近 逋 吐蕃 租 、弱水、清遠、咄霸八國酋長,皆因皋請入朝。 石門者,隋史萬歲南征道也,天寶中 西山 故皋治復之。 八國、 雲南安撫使。 蘇黎州出邛部 俄進同中書門下 直 鮮于仲 雲南 车 置 乃

走維 嬰嬰 以 (取償 州 + 籠官 活。 邢 年 玼 帝 馬定德 ٠, 復籌州。 出 詔 黄崖略 皋深 與 入 大將舉落皆降 | 棲雞 吐蕃怨 以 く橈虜。 老翁城 完量 皋遣 造 昆明管些蠻 大將陳洎等出三奇 高倜 舟, 、王英俊繇峨和、清溪道薄故 謀擾邊, 叉 入内附。 皋 輒 ~, 破卻之。 崔堯臣 贊普怒, 趨 自 石 遂 是 門 北掠 曩貢、臘城等九節度 松州 無 衣 靈 Ш 元膺出濕山 朔 , 仇 冕、董振 破 麟 州

列

境五 大度河 成溪 吐蕃 朝 一節度· ,拔其保鎭 臧守至 帝 陳孝陽 悅 大 使, 近,進 道黎、 検校 率雜虜十萬來救。 捕候,追奔轉戰千里, 率蠻苴那時等道西瀘攻昆明 司 篙, 徒兼 韋良金趨平夷, 中書令、 師伏以待,虜乘勝深入, 南康郡王 **遂**圍維 路惟明自靈關、 州。 ,帝製紀 諾濟,師無慮 吐蕃 功碑褒賜之。 釋靈、朔兵,使論莽熱以 夏陽攻逋租 五萬,以八月悉出塞。 師譟而奮,虜大潰, 偏松城, 生禽莽熱獻 (內大相) 十月, 王有道 兼 東

繼請,太子遂受禪, 以 盡 大臣 領 劍 順 南 宗 可 與國大議, 立 則惟 詔檢 君之報。 校太尉。 因投殛姦黨。 即上表請皇太子監國 不然,惟君之怨。」叔文怒,欲斬 會王叔文等干政,皋遣 是歲,皋暴卒,年六十一,贈太師 ,又上牋太子 劉闢來京師謁叔文曰:「公使私於君 , 闢, 暴叔文、伾之姦 闢遁去。 諡 日忠武 皋知叔文多釁 且 勸 進。 會 叉自 請

州 達夫,皋雅所厚禮。 進兵皆鏤「定秦」字, 厚資之,婿給錦衣,女給銀塗衣,賜各萬錢,死喪者稱是。 刺 五 |萬餘級,獲牛羊二十五 皋治蜀二十一年,數出師, 史 介自以 (侈横、務蓋藏之。 始,天寶時,李白爲獨道難篇以斥嚴武,楊更爲獨道易以美皋焉 有陸暢者上言:「臣向在蜀, |萬,收器械六百三十萬,其功烈爲西 故劉闢階其厲,卒以叛。 凡破吐蕃四十八萬, 知『定秦』 禽殺節度、都督、 朝廷欲 其僚掾官雖顯 \_ 者, 南 追繩其咎,而 匠名也。」 劇。 城主、 善拊 ,不使還朝 ー 繇 是 籠 士,至雖昏嫁皆 不 官千 議 與皋者詆 息。 五. 卽 百 暢字 署 所

始,皋務私其民,列州互除租,凡三歲一復。 皋沒, 蜀人德之, 見其遺象必拜。 凡刻石

著皋名者,皆鑱其文尊諱之。

兄津,弟平行。

子司業。 丼按|津,或以道遠不應坐,乃皆赦之。終太子右庶子。 津以蔭調南陵尉,遷祕書郎,以父嫌名換太子司議郎,辟淮南杜佑府。 劉闢與盧文若反,皋子行式娶文若女弟,津不以聞。闢平,行式妻當沒掖庭,有司 元和初,爲國

|平與||皋斬朱泚使者,間走||奉||天上功,擢||萬年尉。

改今名。 累司農卿。 一子正貫,字公理,少孤,皋謂能大其門,名曰臧孫。 舉賢良方正異等,除太子校書郎,調華原尉。後又中詳閑吏治科,遷萬年主簿,擢 坐尙食乏供,貶均州刺史。久之,進壽州團 一練使。 推蔭爲單父尉,不得意,棄官去,

民毋妄祈。 象犀明珠 宣宗立,以治當最,拜京兆尹、同州刺史。 ,上珍而售以下直,正貫旣至,無所取,吏咨其淸。 會海 水溢 ,人爭咎撤祠事,以爲神不厭,正貫登城沃酒以誓曰:「不當神意,長人 俄擢嶺南節度使。 南方風俗右鬼,正貫毁淫 南海舶賈始至,大帥必取 詞,教

列

任其咎 卒,年六十八,贈工部尙書。 無逮 下民。」俄 而 水去,民乃信之。 居鎭三歲,旣病,遺《無厚葬,無用鼓吹, 無請

度東川 後務 宰相杜黃裳勸帝,且言:「闢,妄書生耳,可鼓而俘也。」薦高崇文、李元弈等將神策行營兵皆 西,使嚴礪、李康掎角之。 部 尙 書、 ,諷諸將徼旄節,憲宗以給事中召之,不奉詔。 劉闢者,字太初,擢進士宏詞科,佐韋皋府,遷累御史中丞、支度副使(三)。 劍 即以兵取梓州。且以術家言五福、太一舍于蜀,乃造大樓以祈祥。 南 西川節度使。 闢意帝可動,益驁蹇,吐不臣語,求統三川,欲以所善盧文若節 時帝新卽位, 欲靜鎭四 |方,卽拜檢校工 帝始重征討 皋卒 闢 ''', 而

闢 邪?」帝御興安樓受俘,詔詰反狀,闢曰:「臣不敢反,五院子弟爲惡,不能制。」詔問:「遣使賜節 至羊獾田,自投水,不能死,騎將酈定進禽之。文若先殺其族,縋石自沈于江,失其尸。檻車送 何不受?」乃伏罪。獻廟社,徇于市,斬于城西南獨柳下。子超郎等九人,與部將崔綱以次誅。 《京師,尙冀不死,食飮于道晏然,將至都,神策以兵迎之,係其首, 曳而入,驚曰:「何至是 始,闢嘗病,見問疾者必以手行入其口,闢即裂食之。唯盧文若至,如平常,故益與之 韶許自新,闢不聽,崇文取東川,帝乃下詔奪其官,進破處頭關,遂下成都。闢從數十騎走

魯郡 太守韓擇木迎館之。玠率豪桀段絳等集兵,將斬以徇,擇木不許,唯司兵參軍張孚助其 張 (建封字本立,鄧州南陽人,客隱兗州。 爻)玠,少任俠。安祿山反,使李廷偉脅徇山東,

謀,乃殺廷偉丼其黨以聞。擇木、孚皆受賞,而玠去之江南,不自言功。

劉晏, 祭御史。 曹參軍 鄕 開譬禍 縣。 建封 晏奏試大理評事,使筦漕務,歲餘罷。 福,一日降數千人,縱還田里,由是知 代宗韶中人馬日新與光弼麾下皆討。 不樂職, 燧伐李靈耀,軍中事 少喜文章,能辯論,慷慨尙氣,自許以功名顯。 輒去。 令狐彰節度滑毫, 多所諏訪,從鎭河東,授侍御史,即表其能於朝。 名。 時馬燧爲三城鎭遏使,雅知之,表爲判官,擢監 奏置幕府, 建封見中人,請前喻賊,可不須戰。 湖南觀察使韋之晉辟署參謀,授左淸道兵 彰不朝覲,建封非之。 李光弼鎭河南,盜起蘇、常間,殘掠 往 楊炎將任以 因到 見轉運使 対賊屯

暇取它吏,即白用建封。 李希烈既破梁崇義 ,跋扈不臣,壽州刺史崔昭與相聞,德宗召宰相選代昭者,祀倉卒不 希烈數敗王師,張甚,遂僭卽天子位,淮南節度使陳少游陰附之。

要職,盧杞不喜,出爲岳州刺史。

列

傳

治兵 帝還 杜 僞 希 少 書 烈 誠 自梁,少游卒憂死。 子行 遣 四鄙 將 爲淮南節度使,約破壽州 楊豐齎 附悅。 少游 **偽赦二**, 希烈使票帥悍卒來戰,建封皆沮 强 一、 惠 汗 不 進兼御 界建封、少游。 - 自處, 史大夫、濠壽盧觀察使。 ,以趣江 建封乃劾其附 都。 豐至,建封 建封 超霍丘 习縛致軍 .賊狀 是時 秋 賊平,進封階,又任一子正 帝方蒙難 中,會中人 栅拒之,賊不能 ٠, 四方尚多故 ,不暇治 來 對之斬 東。 也。 乃繕 其首 遷 希 陴隍 團 一員官。 烈 練 又署 因 使。 送 益

徐州 朝 校尙 地 泊 書右 于寇, 貞元 刺 以 史 夫 徐 一高 .僕射。 獻 四年,拜御史大夫、徐泗濠節度使。 常困繫不支。於是李泌建言:「東南漕自准達諸汴,徐之埇橋爲江、准計 明 圳 帝眷 應 重 十三年, 而 甚少,脫爲李納所丼,以梗餉路,是失江、淮也。 遇異等,賜名馬珍具。 兵 分勁, 來朝 若帥 ,帝不待日召見延英殿,詔會朝赴大夫班,以示殊寵,建封 又賢,卽淄靑震矣。」帝曰:「善。」繇是徐復爲雄鎭。 始,李洧以徐降, 海卒, 請以建封代之,益與豪、 高承宗、獨孤 華代之, 檢 泗 賦

死耳 誰 薪 何 是 人以 」遂擊宦者。有司執之以聞,帝黜宦 時 率與直 宦 數尺帛易之,又取它 者主宮市 T ·不償 置 數十 叉 百百 費, 邀 閣 人関物 且. 屋 驅 所 驢 奉 廛左,謂之「白望」。無詔文驗覈,但稱 入宮 人,賜農帛十匹,然宮市不廢也。 皮 脚 一,而 傭, :農納: 至 薪 有 辭 重 帛 荷 趨 欲 肆 前 徒 不許, 泛者。 諫臣交章列上, 宮市 恚 有 農 賣 則莫敢 驢

決無 師過從,人情之常,自今金吾勿以聞。」 左右得以爲姦。 納 可斂,雖蠲除之,百姓尙無所益。」又陳:「河東節度使李說、華州刺史盧徵皆病不能 ,故建封請間爲帝言之,帝頗順聽。 右金吾大將軍李翰好刺細事規籠,人疾惡之。」帝悉嘉可。 會詔書蠲民逋賦,帝問何如, 答曰:「殘逋積負, 未幾,制韶:「官

用此爲況。」建封又賦詩以自警勵。 李抱眞等勳寵卓越,未有以詩餞者。 十六,册贈司徒。 元巳,賜宴曲江,特詔 與宰相同楊食。其還鎭,帝賦詩以餞,于時雖馬燧、渾瑊、劉玄佐、 十六年,以病求代,詔韋夏卿代之,未至而建封卒,年六 帝又使左右以所持鞭賜之,曰:「卿節誼歲寒弗渝,故

激 府,有文章傳于時。 故下皆畏悅。 治 徐凡十年, 性樂士,賢不肖游其門者禮必均, 躬於所事,一軍大治。 善容人過,至健點亦未嘗曲法假之。 故其往如歸。 許孟容、韓愈皆奏署幕 其言忠義 感

|徐 假 謀引以爲 子||愔 旋能節。 ,始以蔭補號州參軍事。建封卒,府佐鄭通 援。 帝不 許 舉 軍怒, 披濠、泗隸淮 斧庫取兵, 環府大譟, 南,韶杜佑討徐亂。 殺通 誠者攝留事 誠及大將數人, 泗州刺史張伾以兵攻埇橋,與徐軍 , 畏其軍亂, 乃表 子 因浙 朝 請曾 西戍兵過 爲留

冽

确 伾 一大敗。 帝 未 有以制,乃授愔右 · 驍衛將 軍、徐州 刺史,知留後。 以 伾 爲 泗 州 留後, 杜兼爲

濠州留後。俄進愔武寧軍節度使。

亂, 而愔得行。 元和初 ,以疾求代 未踰境,卒。 召爲工部尚書,以王紹節度 **愔治徐七年,其政稱治。** 义武寧, 贈尙書右僕射 還濠、 泗隸徐。 徐人喜, 遂不敢

史。 東川 州 度 山山 使。 南 長 節度 第 史。 母 嚴 震字遐聞,梓州鹽亭人。本農家子,以財役里閭。 喪 使 , 解 西 李叔 Л 乃賜上下考, 節 起 爲 明表爲渝州刺史,震 度使嚴武知其才,署押衙,遷恆王府司馬 興、鳳 兩州 封鄖國公。 團練使, 以叔明姻家,移疾去。 治鳳 好 興利除害。 一四年 號 建中中 不稱清嚴 至德、乾元 委以軍府衆務。 山南 劍 南黜陟使章楨狀震治行 遠邇咨美。 西道節度府又表為鳳州 九中, 數出貲助邊, 武卒,罷 遷山 南 西道 歸 得爲 節 爲 會 刺

蹙 憂之, 會震牙將馬勛嗣至 一,帝欲徙蹕 朱泚 反, 山南 遣腹心穆廷光等遺帛書誘之, 震 聞 馳 帝告以故 表 奉 迎 遣 勛曰:「臣請歸取節度符召之, 卽不受, 大將 張 震即斬以聞。 用 誠 以 兵五 是時, 千杆 衞 李懷光與賊連和 用 誠 至整 屋有 斬其首以復 反計 奉天危 帝

賴 始 子。 君。」用誠 迓勛館之,左右嚴侍。 夫 命 山 ´´; |勛 。」帝悅,使計日往。 取用滅爾 「南兵以免。 勛即 ,赴行在,踰半日期,帝頗憂。 軍 懼 中, 將走,壯士自後禽之。 若等無與!」衆乃服,不敢動。 士皆擐甲矣。]勛昌言曰:「若父母妻子在梁州, 尋加檢校戶部尙書、馮翊郡王,實封二百戶。 勛未發,陰令焚草館外,士寒爭附火, 勛還得符,請壯士五人與偕,出駱谷, 比至, |用誠子斫勛傷首,左右扞刀得免,遂仆用誠, 大喜。 即縛用誠送於震, 翌日, 發奉天。 勛從容引符示之, 曰:「大夫 用誠以爲未知其謀, 今棄之而 杖殺之, 而拔其副以統師。 既入駱谷, 反, 懷光以騎追襲, 何所利邪? 以數百 而格殺其 召 騎

門下平 澴 史後, 洋 復 ', 議 ~; 加 方藉六師爲聲援,今引而西,則諸將顧望, 天子至梁州 遂定。然梁、漢間刀耕火耨,民采稆爲食,雖領 檢校尙書左僕射。 Ш 章事 賊 剽掠,戶口 貞元十五 ,宰相以爲地貧無所仰給,請進幸成都,震曰:「山 流 |年卒,年七十六,贈太保,諡 散, 詔 改 震隨宜 梁州 爲 拉勸課, 興元府 鳩 卽 責功無期。」帝未 用震爲尹 十五五 日忠穆 民不 郡,而賦 煩擾, 加 實 ·決,會晟表至, 封 入纔比 而 南密邇畿輔,李晟銳於收 二百戶。 行 在 供 東方數大縣。 億具焉。 久之, 進同中書 亦請駐 車 自安、 躍梁、 一駕將

從孫 列 傳 第 與宰相楊收善。 八 + = 嚴 霞 | 咸通 韓 弘 中, 繇桂管觀察使擢爲江西節度使, 四九四三 改號鎮南軍 時南

狼藉 蠻 內 寇 ,遣使按覆,詔賜死。 韶譔募 財賄

|弘才 理 評 武 韓弘, 事 共 爲 宋州 滑州 立爲留後,請監 南城 匡城 將。 少孤 事 軍表諸朝,詔檢校工部尚書,充宣武節度副大使, 劉 全諒 依其舅劉玄佐。 署都 知兵馬使。 舉明經不中,從外家學騎 貞元 十五 年 全諒 死, 射。 軍 知節 中思玄佐, 由諸曹試 度 事 以

書門下平章事 治道矣,兵且至,請備之。」弘曰:「師來不 陸 血 卽 丹道 長 驅 源 出 先是,曲環 少誠使斬之,選卒三千, 弘言笑自 主帥勢輕,不可制。 ,,以以官與太原王鍔等,詒書宰相, 死, 吳少 如。 自是訖弘去, 誠與全諒 弘察軍 會 謀襲陳許, 中素恣橫者劉鍔等三百人,一 諸 無 軍擊少誠,敗之。 除道 敢 心肆者。 使數輩仍在館。 也。 恥爲鍔下。 師古情得, 李 師古屯 曹州、 乃引去。 弘始 憲宗方用兵准西,藉其重, 日, 以謀鄭、滑,或告:「師古 得 帥, 數其罪斬之牙門, 累授檢校司空、同 來, 欲 以忠自 軍益 表 八於衆, 及殺 中 更

嚴 以王師敗,乃拜弘淮西諸軍行營都統,使扞兩河,而令李光顏、烏重胤擊賊。 授檢校

司

徒,

班鍔上。

疾,命中人掖拜,固願留京 親屯,遣子公武領兵三千屬光顏,然陰爲逗橈計,以危國邀功者,每諸將告捷, 元濟平,以功加 兼侍中,封許國公。 師。 帝崩,攝冢宰。 李師道 誅 弘 俄出爲河中節度使。 大懼,因請入朝,册拜司徒、中書令,以足 以病請還,復拜司徒、 輒累日不怡。

中書令。卒,年五十八,贈太尉,諡曰隱。

子尊寵異等,能以名位始終,亦其天幸。 沈謀勇斷,故少誠、師道等皆憚之。詔使至,或驁侮不爲禮。齊、蔡平,勢屈而後請覲,然天 萬,馬七千,糧三百萬斛,兵械不可數。 始,弘自汴來朝,獻馬三千、絹五十萬、它錦綵三萬,而汴之庫廢錢尙百萬緡,絹亦 弘爲人莊重寡言,罪殺人,問法何如,不自爲輕重 百餘

孺子又當執金吾職乎?」因固辭,改右驍衞大將軍。 性恭遜,不以富貴自處。 卒,贈戶部尙 等州節度使。 子公武,字從偃,起家衞尉主簿,爲宣武行營兵馬使,以討察功檢校左散騎常侍、鄜坊 弘入朝,爲右金吾將軍。 弘出河中,弘弟|充徙宣武,乃曰:「二父居重鎭,我以

書,諡日恭

充本名璀, 少亦依舅家。 列 第 八 + Ξ 韓 弘 李元爲河陽節度使,署牙將。 元改昭義,又從之。 四九四 元嘗謂賓

佐曰:「充後當貴,諸君必善事之。」未幾,弘領宣武,召主親兵,元曰:「我知君舊矣,吾兒不

才,無足累君者,二女方幼,以爲託。」遂辭去。 弘峻法,人人不自保。 充謙愼無 少懈、念弘在鎭久,不入見天子,身又得士,不自安,因

累授御史大夫。

請 入宿衞 ,弘許之,不卽遣。 後因獵,單騎 |走||洛||陽,朝廷亮其節,擢右金吾衞將軍,轉大將

軍,斥軍士虛名不如令者七百人。 歷少府監,鄜坊等州節度使。

鄜坊 穆宗立, 而授充檢校尚書左僕射,爲義成軍節度使。 幽 |鎭、 魏復亂, 王承元以冀兵二千屯滑州, 會汴軍逐字愿,以李齐主留事 朝廷恐冀兵相計爲叛, 徙承 帝謂

元

陳許 素爲汴士悅向,詔節度宣武,兼統義成兵討济。 李光顏亦奉詔討內,屯尉氏,意先得汴,欲俘掠以餌軍,而汴監軍姚文壽亦欲內光顏, 戰郭橋,破之。會李質斬內, 遂入汴。

|充聞其謀、馳至城下、汴人望見充、歡躍無復貳者。

始 · 帝遣人問破賊期,充對:「汴,天下咽喉,臣頗習其人,然王師臨之,一月可破。」方二

千餘,斥出境,令曰:「敢後者斬! 旬 即克。 帝喜曰:「充料敵若神。」加檢校司空。 」由是內外按堵,汴人愛賴之。卒,年五十五,贈司徒,諡 籍內所脅爲兵者三萬,悉縱之。又責首亂者

肅。

·

一

元雖將家,性儉節,歷三鎮,居處服玩如儒先生,乘機決策無餘悔,世推善將。

敢廢。 充爲嫁二女,周其家。 自弘去汴,監軍選軍中敢士二千直閣下,日秩酒肴,物力幾屈,

以繼,可以弊事遺吾帥乎!」因悉罷之而後迎方。

李質者,節士也。 始爲牙將,及所爲留後,邀帥節,勸之不從,內宜發于首,委質以兵,

**遂禽**穴。終金吾將軍。

宜哉 時。 使不遭遇, 贊曰:皋、建封、弘本諸生,震興田畝間,未有以異人,及投隙龍驤,皆爲國梁楹,光奮 與庸夫汨汨並胔而腐可也。 **滜、弘雖陰慝,卒能以誠言自解,長沒天年,** 

#### 校勘記

(1) 弟平 「弟」,本卷上文、舊書卷一四〇章皋傳及通鑑卷二二八俱作「兄」。

支度 公副使 按唐六典卷三,唐代中央設度支,邊軍設支度使。此應作「支度」,據改。 「支度」,各本原作「度支」。 舊書卷一四〇章皋、劉闢傳及通鑑卷二三六均作「支

列傳第八十三 校勘記

四九四七

# 卷一百五十九

### 列 傳第八十四

鮑防 李自良 蕭 昕 薛 播 樊澤 宗師 吳湊 士矩

鄭權

陸亘

盧

坦

閻

濟美

柳晟

崔

戎

雍

留後,兼太原尹、節度使。人樂其治,詔圖形 爲 拜左散騎常侍。 職方員外郎。 鮑防字子愼,襄州襄陽人。少孤窶,彊志于學,善辭章。及進士第,歷署節度府僚屬。 從德宗奉天,進禮部侍郎,封東海郡公。 薛銀訓帥太原,被病,代宗授防少尹、節度行軍司馬,召見,慰遣之。俄 が別殿。 入爲御史大夫,歷福建、江西觀察使,召

知

政者。 美防知人。 貞元元年,策賢良方正,得穆質、裴復、柳公綽、歸登、崔邠、韋純、魏弘簡、熊執易等,世 右司 列 傳 郎中獨孤 時比歲旱,策問陰陽祲沴,質對:「漢故事,免三公, 第 八 + 四 [恤欲下質,<br />
防不許,日:「使上聞所未聞,不亦善乎? 鮑 防 李 自 良 **卜式請烹弘羊。」指當時輔** 四九四九 」卒置質高第

四

#### 見策嘉揖。

部 计尚書。 初,防與知雜御史竇參遇,導騎不引避,參讁其僕。 防吒日:「吾與蕭昕子齒,而同昕老,坐宰相餘忿邪!」不得志卒,年六十九,贈太 及爲相,防尹京兆 「迫使致仕,授工

防 於詩尤工, 有所感發,以譏切世敝, 當時稱之。與中書舍人謝良弼友善,時號「鮑

謝」云。

少保,諡曰宣。

袁傪 路 節 度 ,堅壁勿出,求戰不許,師老而墮,其勢易乘。」防不聽。 事 討賊袁晁,積閥至試殿中監,事浙東薛 李自 會回紇 **兗州泗水人。天寶亂,** 入寇,防遣大將焦伯瑜等擊之,自良曰:「寇遠來,難與爭鋒。 往從竞單節度使能元皓。 兼訓 節度府。」兼訓徙太原,又爲牙將。鮑防代總 伯瑜戰百井,大敗。 以戰多,累授右衞率。 請築二壘搤歸 由是知名。 從

敢當 履 鋒 **T陷陣**, 議者多其讓 功在 諸將 右。 乃授右龍武大將軍。 貞元三年,燧來朝, 入謝,帝終以河東近胡, 德宗罷燧兵,以自良代之。 謂曰:「卿於進退寧不有 自良 以事燧

馬燧代防,表爲

軍候。

自良爲人勤且有謀,燧倚信之。

從討田悅還,攻李懷光

河中,數

禮? 法, 簡儉易循, 民不知有軍, 上下諧附。 然守北門無易卿者,勉爲股行。」乃以檢校工部尚書充河東節度使。 卒于官,贈尙書左僕射。 居治九年,舉不愆

舍人、禮部侍郎。 闕。 詔羣臣有籍于朝及神策六軍子弟隸業者,聽補生員。 哥舒翰爲副元帥担安祿山,辟掌書記,翰敗,儳道走蜀。肅宗立,奉誥册見行在。歷中書 蕭昕字中明,梁鄱陽王恢七世孫,世居河南。 代宗狩陝,昕由武關從帝,擢國子祭酒。建請崇太學以樹敎本,帝寤其言, 再中博學宏辭科,調壽安尉,累遷左補

少傅,爵郡公,兼禮部尚書,知貢舉。 封晉陵侯。 舊功,則隻馬不得出塞下,敦爲失信者?」回紇大慚,因厚禮昕,遣使者約和。轉工部尙書, 臣,爾與連禍,又引吐蕃暴我郊甸。天舍其衷,吐蕃敗北,回紇悔懼,叩顙乞和。非天子卹 我直?」衆失色。

盺徐曰:「國家龕定寇難,功雖絲毫不遺賞,況鄰國乎?僕固懷恩,我之 諡 大曆中,持節弔回紇。回紇恃功,廷讓昕曰:「乃中國亂,非我無以平,奈何市馬不時歸 德宗出奉天, 断年八十餘, 步出城。 久之,以太子少師致仕,卒,年九十三,贈揚州大都督, 賊求之急,獨竄 山谷間,僅至奉天。 遷太子 叛

將有威名,黃裳等繼輔政,並爲名宰云 昕 始 **鴻張鎬** 來瑱 ,在禮部擢杜黃裳、 高郢 来、裴垍。 其後歸興布衣,不數年位將相,與爲

人,出 武 功、萬年令。 子及播兄弟 薛播 爲汝州刺史。 ,河中寶鼎人。曾祖文思,官中書舍人。 ,故開元、天寶間, 温敏而裕,與人交有常,李栖筠、常衮、崔祐甫並器之。 坐小累,貶泉州,再遷至河南尹。以禮部侍郎卒,贈本曹尙書。 播兄弟七人皆擢進士第,衣冠光韙。 播早孤,伯母林通經史,善屬文, 祐甫輔政, 拜中書舍 累授殿中侍御史,遷 躬授經

`」一軍莫能 子公達 復佐河陽軍。以國子助教居東都卒。 ,擢進士第。 中。 公達執弓矢揖曰:「請爲公歡。」射三發連中,衆大呼笑。 佐鳳翔軍。 會帥 不文,嘗集射,設的高數十尺,令曰:「中者酬錦與 帥不喜,乃自免

IĘ, 次潼關 樊澤字安時,河中人。 ,雨淖,困不能前 少孤,依外家客 有熊執易者,同舍逆旅,哀之, 河朔。 相衞 節度使薛嵩表爲堯山令。 輟所乘馬, 傾褚以濟, 舉賢 自罷所 良方

舉。是歲,澤上第,楊炎善之,擢左補闕。

加 嗣 杜文朝、梁俊之等,賊氣沮縮,遂取唐、隨二州。貞元三年,爲荆南節度使。 Ш 年卒,年五十七,贈司空,諡曰成。 南 曹王皋卒,軍亂,剽居人。以澤威惠著襄、漢間,復徙山南東道 東道 澤有 司 武力,喜兵法,議者謂有將帥 馬, 就拜節度使。 每射獵, 計至,帝爲撤宴廢朝。 器。 諸將憚其材武。 嘗召對延英, 數與李希烈确, 德宗嘆其論兵「與我意合」。累遷 加檢校尙書右僕射。 禽 票將張嘉瑜 會山南東道

綿州 妻子告不給, 子宗 韓愈稱宗師論議平正有經據,嘗薦其材云。 刺史。 師 字紹述。 徙絳州 宗師笑不答。 始爲國子主簿,元和三年,擢軍謀宏遠科,授著作佐郎。 ,治有迹。 然力學多通 進諫議大夫,未拜卒。 解 著春秋傳、魁紀公、樊子凡百餘篇 始,宗師家饒于財, 悉散施姆舊賓 歷金部郎 別集尚

以 書 判入等, 王 緯字文卿 歷長 公安尉。 幷州 太原人。父之咸, 大曆中, 與李泌俱爲路嗣恭江西觀察判官。 爲長安尉, 與弟之賁、之與皆有文。 泌見惡於元載 **静舉明經**, 嗣恭

列

傳

第

八

+

四

王

緯

吳

凑

깯

希意 檢校 使。 府史請 賦 觀察使 入尤尤 工部 欲殺之,緯護 裴延齡以諸道負錢四 劇 缺 裒 為進 尚書。 緯清而 泌擬緯, 奉 卒,年七十一,贈太子少保。 解 忠,能惠養民,故請遣之。」制可。 緯上疏 帝曰:「是朕爲君報德者乎?黃門要地,獨不留議 僅死。 願蠲以紓民, 百萬緡獻爲羨錢,以圖寵,緯奏「此諸州經費」, 泌執政,奏於己有私恩,德宗許爲泌報,故進緯給 詔聽之。 貞元 初,州縣有韓滉時罷錢未入者十八萬緡, 十年, 加御 党大夫 事 耶? 大忤延齡意 兼諸道鹽鐵 当對 事 中。 曰:「浙 轉運 浙 西 西

**牌居官以清白稱,然好用刻深吏督察其下,條約苛碎,人不聊云。** 

檢校賓客兼家令。進累左金吾衞大將軍 吳湊,章敬皇后弟也。 繇布衣與兄激一日賜官封皆等,而凑畏太盛,乞解太子詹事,換

故軍中驩附。 挾兵,輒偃蹇搖亂。 即召凑圖之。 |凑才敏銳,而謙畏自將,帝數顧訪,尤見委信。 帝才其爲,重之。元載當國久,愎狀日肆,帝陰欲誅,未發也,顧左右無可與 俄而收載賜死。於是王縉、楊炎、王昂、韓會、包信等皆當坐,凑建言:「法 | 凑持節至||汴、滑,委悉慰說,裁所欲爲奏,各盡其情,亦度朝廷可行者 是時,令狐彰、田神功等繼沒,其下乘喪

有 首從, 、從不應死,一 用極刑,虧德傷仁。」縉等繇是得減死。 丁後母喪解職。 旣除 ,拜右

也。 風 痹不良趨走,帝召還, 宣武 德宗 劉玄佐死, 初 ,出爲福建觀察使,政勤淸 ,以凑檢校兵部尙書領節度使馳代。 驗其疾,非是, :,美譽四騰。 繇是不直參。 與宰相竇參有憾, 擢凑陜虢觀察使, 未至, 汴軍亂,立玄佐子士寧。 參數加短毁, 代李翼。 又言湊 黨

欲遣兵內凑,而參請授士寧以沮凑,還爲右金吾衞大將軍

得容欺 中所 省 息 視 大 有 事 衆讙。」又言:「掌閉、彍騎、飛龍、內園、芙容園、禁兵諸司雜供役手,資課太繁,宜有 司附媚中官,率阿從無敢爭。 湊見便殿,因言:「中人所市,不便宵民,徒紛紛流議。 過不榜責 須 ,明日韶乃下。 貞元十四年夏,大旱,穀貴,人流亡,帝以過京兆尹韓皋, ,責臣可辦。 輒 順可。 凑 吅 召至 ·鞍一視,凡指擿 初,府中易凑貴 廷、詰服 若不欲外吏與聞禁中事,宜料中官高年謹信者爲宮市令,平賈和售,以 凑爲人彊力劬儉,瞿瞿未嘗擾民,上下愛向。 原去,其下傳相 、戚子,不更簿領,每有疑 訓 初 勗 無留思,衆畏服, 舉 無 稽 事 《獄,時其將出,則遮湊取決,幸蒼卒 罷之。 不意凑精裁遣如此。 京師苦宮市疆估取物 即召凑代皋,已謝,督 僚

文敬 太子、義章 公主 | 仍薨,帝悼念,厚葬之,車土治墳,農事廢。 湊候帝閒徐言,極爭不

也。 顧左右鉗噤自安耳,若反復啓寤,幸一聽之,則民受賜爲不少。 或勸論事宜簡約,不爾 ,爲上厭苦,凑曰:「上明睿,憂勞四海, 不以愛所鍾而疲民以逞 **播舌阿旨固善**,有如窮

民上訴,回云罪何?」以能,進兼兵部尙書。

侍醫敦進湯劑,不獲已,一飲之。卒,年七十一,贈尙書右僕射,諡曰成。 年,年七十,尙何求。自古外戚令終者可數,吾得以天年歸侍先人地下,足矣!」帝知之,詔 及屬病,門不內醫巫,不嘗藥,家人泣請,對曰:「吾以庸謹起田畝,位三品, 顯仕四十

人指樹懷之。 先是,街樾稀殘,有司蒔楡其空,湊曰:「楡非人所蔭玩。」悉易以槐,及槐成而湊已亡, 唐興,后族退居奉朝請者,獨以事失職,而凑任中外,未嘗以罪過罷,爲世

外戚表云。

共申解, 狄 ,使杜江淮它鎭循習意。」帝聽,乃流端州 兼譽建言:「陛下擢 一日費凡十數萬。 得以親議, 任士矩,非私也; 文宗弗窮治也,貶察州別駕。 初至,庫錢二十七萬緡,晚年纔九萬,軍用單匱,無所仰。 **士矩負陛下而治之**,亦非私也。 諫官執處其罪, 開成初,爲江西觀察使,饗宴侈 不納。於是御史中丞 請遣御史至江西卽 事聞,中外

列傳第八十四 鄭權 陸亘 盧坦

節度使,徙領德棣滄景軍。 容衆、檄主後務。 衞大將軍 共逐宗奭還京師,有詔斬以徇,徙權節度邠寧。 史李宗奭數違命 兵,藩屯校佐得士心者,皆就命之,權自試參軍拜行軍司馬。 鄭權 汴州開封人。擢進士第,佐涇原節度劉昌府。昌被病入朝 ,權劾奏,詔追之,宗奭以州兵留己自解。 昌去, 軍果亂,權挺身冒白刃,明論逆順,殺首亂者,一軍畏伏。 時討李師道,權身將兵出屯,奏置歸化縣,綏納降附。 或訟宗奭爲權所誣,左遷原王傅。改右金吾 憲宗更以烏重胤代權, 擢累河南尹, 進拜山南東 度其軍必亂 ,以權寬厚 德宗 滄人懼, 滄州 方厭 道 刺

求鎮守,於是檢校尙書右僕射、嶺南節度使,多哀貲珍,使吏輸送,凡帝左右助力者皆有納 有 閚 辯。 穆宗立,以左散騎常侍持節爲回鶻告哀使, 與可汗爭曲直,持議明壯,虜禮異之。 使還,三遷工部尚書。 以足疾辭,不許,肩舁就道。 用度豪侈,乃結權 權識詣魁然, 幸

焉

,人笑之。

卒于官。

色。 練容典,博士降色訪遠,史倚以倨横。 會將册皇太子,草儀,眞參議偃蹇,亘榜逐之,胥曹失 遷累戶部郞中、太常少卿。 陸亘字景山 ,蘇州吳人。元和三年,策制科中第,補萬年丞。再遷太常博士。 歷克蔡號蘇四州刺史、浙東觀察使,徙宣歙。 大和八年卒, 禮史孟眞

制,故易亂。」帝因詔屯士得隸 ,旦還官全稟,繩贓罪,吏畏而賴之。 亘 一文明嚴重,所到以善政稱。 刺 史。 初為兗州, 對延英, 具陳:「節度分兵屯屬州, 刺史不能 温州 瀕海 ,經**賊**亂,奪官吏半祿代民租 ,後相沿,更以

年七十一,

贈禮部尚書。

子孫善守,是天富不道之家,不若恣其不道,以歸於人。」黃裳驚其言,自是遇加 惡人游,破產,盍察之?」坦曰:「凡居官廉,雖大臣無厚畜,其能積財者必剝下以致之。 盧 坦字保衡,河南洛陽人。 仕爲河南尉。 時杜黃裳爲尹,召坦立堂下,曰:「某家子與 厚。 如

等悅之,詣復請爲重職,坦笑曰:「大將久在軍,積勞亟遷,乃及右職。 少年同列邪?」諸將慚,遽出就坦謝。 李復爲鄭滑節度使,表爲判官。 監軍薛盈珍數干政,坦每據理拒之。有善笛者,大將 復病甚,盈珍以甲士五百內牙中,封府庫,舉軍大恐。 奈何自薄, 欲與吹笛

坦勸止之,軍乃安。復卒,詔姚南仲代之,盈珍以南仲本書生,易之,曰:「是將材邪?」坦私 人曰:「姚大夫外柔中剛,監軍若侵之,必不受。 我留,恐及禍。」乃從復喪歸東都,爲壽安

令。 
盈珍果與南仲不相中,幕府多黜死者。

救之,帝遣中人就釋。 過罰令俸爾。 數月遷中丞。 河南賦限已窮,縣人訴機織未就,坦詣府請申十日,不聽。 由是知名。累爲刑部郞中,兼侍御史知雜事。赤縣尉爲臺所按,京兆尹密 |坦白中丞請中覆,中人走以聞,帝曰:「吾固宜先命有司。」遂下詔,乃 坦諭縣人弟輸,勿顧限,違

何人?」曰:「守正而不交權幸者。」均怒,遂罷爲左庶子。 祖墓,坦上疏諫止。 裴均爲僕射,將居諫議、常侍上,坦引故事及姚南仲舊比,均曰:「南仲 帝曰:「殷旣受之,奈何?」坦曰:"出歸有司,以明陛下之德。」帝納之。 李錡誅,有司將毀其 原,不可失信。」坦日:「所以布大信者,赦令也。今二臣違詔,陛下奈何以小信失大信乎!」 觀察使閻濟美格詔輸獻,坦劾奏,晟、濟美白衣待罪。帝諭坦曰:「二人所獻皆家財,朕已許 初,諸道長吏罷還者,取本道錢爲進奉,帝因赦令一切禁止,而山南節度使柳晟、浙西

<u></u> 坦奏「弘有才行,其弟從闢時,距三千里,宜不通謀,今坐廢,非用人意」,因請署判官,帝曰: 數月,拜宣歙池觀察使。初, 劉闢壻蘇彊坐誅,彊兄弘宦晉州,自免去,人莫敢用者。

第八

十四四

玭

他 州 彊 若直 不誅 一段,穀 尚 錄 其材,況彼 不至矣,不如任之。」旣而商以米坌至, 兄耶 !!」時江淮旱,穀踊貴,或請抑其價, 乃多貸兵 食出諸市,估 坦日:「所 部 遂 地 平 狹

足信乎?」三奏,帝乃止。 支。 二十萬石 坦遣 再 遷 更驗,未反,帝遲之,更遣中人劉泰昕往,坦曰:「事付有司,」 戸 部 侍郎 判度支。 表韓重華爲代北水運使,開廢田,列壁二十,益兵三千人,歲收栗 或告泗州刺史薛謇爲代北水運時, 畜異馬, 不以獻, 而又遺宦官,豈 有司 事 下 不 度

北倚 使周懷義亦以爲言。吉甫不悅, 邊 鄣所利。 [山,去河遠,烽候無所統接,虜騎唐突,勢不容知,是無故而蹙地二百里,故曰非便。] 城 ,師人怨,殺重旰,覆其家。 河毁西受降城,宰相李吉甫議徙天德。 若避 河流,不過退徙數里,奈何徇一時省費,墮萬世策邪? 天德故城地壤墝瘠, 出坦爲東川節度。後數月,懷義憂死,燕重旰代之,遂徙 坦以爲:「城當磧口,得制北狄之要,美水豐草,

榷 |皆感慰,無逃還者。 惟請收軍吏閏月糧助行營,爲人所非。 率之籍。 初, 坦與宰相李絳議多協,絳藉爲己助, 吳少誠之誅,詔以兵二千屯安州,坦每朔望使人問其父母妻子,視疾 及坦出半歲而絳罷。 元和十二年卒,年六十九,贈 治東川, 盡蠲山澤鹽井 病醫藥,故

禮部尙書。

爲 階 朝議 憲 司 舊 劾 ]制,官、階、勳俱三品始聽立戟,後雖轉四品官,非貶削者戟不奪。 大夫、勳護軍,以嘗任宣州刺史三品、請立戟、許之。 Ē , 韶罰一月俸,奪戟。 自貞元以來,立戟十八家不應令,並追正之。 時鄭餘慶淹練舊章 坦爲戶部侍郎時, ·,以爲非是。

易, 史,入爲祕書監 居鎭未嘗增常賦 閻 [濟美者,第進士,有長者名。 ,以工部尙書致仕。 罷 浙 西也, 方在道, 見韶 卒, 諡曰温 貞元末, 繇婺州刺史爲福建觀察使, 而貢獻無所還,故帝爲言之。 徙浙西。 尋出華州刺 爲治簡

一,居父喪,爲聞孝。 柳晟, 河中解人。 六世 代宗養宮中,使與太子諸王受學於吳大瓘并子通玄,率十日 祖敏,仕後周爲太子太保。父潭,尚和政公主,官太僕卿。 輒 晟年 上所

旣長,韶大瓘等卽家教授。

拜檢校太常卿

得遣。 自拔歸。 德宗立,<br />
晟親信用事 泚 要籍 將右將軍 朱既昌 郭常、左將軍 告其謀, 朱泚 泚捕繫晟及常外獄,晟夜半坎垣毁械 張光晟皆晟雅故,晟出 反,從帝至奉天, 自請入京師說賊黨以攜 密 詔 陳禍 福 而亡,斷髮爲浮屠 逆順 沮之,帝壯其志, 常奉 詔 受命 门間歸

列

傳

第

八

+

四

柳晟

崔

戎

四九六

奉天,帝見,爲流涕。 乘輿還以師,擢原王府長史。吳通玄得罪,晟上書理其辜,其弟 止日;

「天子方怒,無詒悔 一」不聽。凡三上書,帝意 解,通玄得減 死。

彊。 將軍,爵爲公。卒,年六十九,詔從官臨弔,贈太子少保。 免胄拜,從所徙。 入爲將作監。 城,復詔戍梓州,軍曹怒,脅監軍謀變。 曰:「誅驕不受命者。」|晟曰:「若知|劉闢得罪天子而誅之,奈何復欲使後人誅若等耶?」 士皆 夫禮信不能爲,何足奉中國乎?」可汗諸貴人愕然駭,皆跪伏成禮。還爲左金吾衞大 晟累遷將作少監,以護作崇陵,封河東縣子,授山南 使回鶻,奉册立可汗,逆謂曰:「屬聞可汗無禮自大,去信自 展聞,疾驅入勞士卒,旣而問曰:「若等何爲成 西道節度使。 府兵討劉闢還,未叩 《功?」

展敏于辯,下士樂施,唯自興元入朝,貢獻不如詔,爲御史中丞盧坦所劾,憲宗以其賢,

置弗暴云。

李鄘府。 以鎭叛行,度請法往論,承宗至泣下,乃聽命。 <u>崔</u>戎字可大,玄暐從孫也。舉明經,補太子校書郎。判入等, 衞 次公代鄘,憲宗稱戎才,故次公倚成于職。 入爲殿中侍御史,擢累諫議大夫。 裴度節度太原, 調藍田主簿。 署參謀。 時 王承宗 辟准

尚在,民泣詣使,請白天子丐<mark>戎還,使許諾。|戎恚責其下,衆日:「留公而天子怒,不過斬吾二</mark> 夸後人也。」徙|克|海|沂|密觀察使,民擁留于道不得行,乃休傳舍,民至抱持取其鞾。 時詔使 史。吏以故事,置錢萬緡爲刺史私用,」找不取。及去,召吏曰:「籍所置錢享軍,吾重矯激以 準繒布,優其估以與民。綏招流亡。凡廢若置,公私莫不便之。 三老人,則公不去矣。」」戎夜單騎亡去,民追不及乃止。至兗州,鉏滅姦吏十餘輩,民大喜。 雲南蠻亂成都,詔戎持節劍南爲宣撫使。 奏罷稅外薑芋錢。 還拜給事中。 當賦錢者率三之,以其一 出為華州刺

之,密表其狀。民不知,訴諸朝,宰相路巖素不平,因是傅其罪,賜死宣州。 子確,字順中,由起居郎出爲和州刺史。 龐勛以兵劫烏江, 雍不能抗, 遣人持牛酒勞 歲餘卒,年五十五,贈禮部尙書。

### 校勘記

討使」。 裴度節度太原署參謀時王承宗以鎮叛 北都 留守、 本書卷八穆宗紀及舊書卷一 河東節度使。 長慶元年,「朱右融、王廷凑復亂河朔、詔度以本官充鎮州 四二王廷湊傳亦載廷湊于長慶元年以鎮州叛。而王承宗叛 按舊書卷一七〇裴度傳,度於元和十四年授太原尹、 四面行營招

列傳

第八

+

四

雀戏

校勘記

四九六三

憲宗紀。是蹇度領太原時,以鎮州四九六四

## 唐書卷一百六十

### 列傳第八十五

徐浩 呂渭 溫 恭 孟 簡 劉 伯芻 寬夫 允章 楊 凝

潘孟陽 崔元略 鉉 沆 元式 崔龜從 章綬

徐浩字季海

,

越州

人。

**擢明經**,

有文辭。

張說稱其才, 繇魯山主簿薦爲集賢校理,

見

陽

喜雨 令,治有績。 遷累都官郎中,爲嶺南選補使,又領東都選。 五色鴿賦, 東都留守王倕表署其府。 容嗟曰:「後來之英也! 民有妄作符命者,衆不爲疑,浩獨按篆詰狀,果詐 」進監察御史裏行。辟幽州張守珪幕府。 歷 河

之。 自李林甫、楊國忠當國,專作威福,許有司就宰相府斷事,尙書以下 肅宗 又參太上皇誥册 立 ,繇襄州刺 ,寵絕一時。授兼尚書右丞。 史召授中書舍人。四方詔令,多出浩手,遣辭贍速,而書法至精,帝喜 浩建言:「故事, 有 司 未省卽署, 斷 獄 必 乖愼卹意 刑 部 審覆。

四九六五

列

傳

笰

八 十

五

徐

浩

呂渭

請 如 (故便。) 詔 可。 故詳斷復自此始。 進國子祭酒,爲李輔國譖,貶廬州 長

薛邕分典選。 代宗 復以中書舍人召, 浩有妾弟冒優,託之邕,擬長安尉,御史大夫李栖筠劾之,帝怒, 德宗初,召授彭王傅,進郡公。 卒,年八十,贈太子少師,諡曰定。 遷工部侍郎、會稽縣公,出爲嶺南節度使。 召拜 吏部侍郎,與 黜邕歙州 刺

史,浩明州別駕。 ,浩父嶠之善書,以法授浩,益工。嘗書四十二幅屏,八體皆備,艸隸尤工,世狀其法

日「怒猊抉石,渴驥奔泉」云。 。晚節治廣及領選,頗嗜財,惑於所嬖,卒以敗。

以嫌,今謂少傅爲慢官,疑潤爲涵游說。」乃貶渭繳州司馬。 進殿中侍御史。大曆末,涵爲元陵副使,渭又爲判官。 「涵父名少康,當避。」宰相崔祐甫善其言,擢司門員外郞。 御史共劾渭:「昔涵再任少卿,不 呂渭字君載,河中人。父延之,終浙東節度使。 渭第進士,從浙西觀察使李涵爲支使, 涵繇御史大夫擢太子少傅, 渭建言:

瑞 柳 ,渭令貢士賦之。帝聞,不以爲善。又與裴延齡爲姻家,擢其子操上第,會入閤,遺私 貞元中,累遷禮部侍郎。 始,中書省有古柳,建中末枯死,德宗自梁還,復榮茂,人以爲

出爲潭州刺史。

卒, 贈陝州大都督

溜温 柳宗元等皆坐叔文貶,温獨免,進戶部員外郎。 善王叔文。再遷爲左拾遺。 不遣。 温 字和叔,一字化光,從陸質治春秋,梁肅爲文章。 時叔文秉權, 與游者皆貴顯, 以侍御史副張薦使吐蕃,會順宗立,薦卒於虜, 温 在絕域不得遷, 貞元末,擢進士第。 常自悲。 **元和元年乃還**, 與韋執誼厚,因 虜 以 中國有喪, 丽

道州。 辨,皆妄言,將悉誅羣等,吉甫苦救乃免, 其間謀逐之。 丞 ,薦温知雜事, 温操翰精富,一時流輩推尙。 久之,徙衡州, 會吉甫病,夜召術士宿于第,即捕 上諤爲御史,宰相李吉甫持之,久不報,温等怨。 治有善狀。 卒,年四十。 性險躁,譎詭而好利,與竇羣、羊士諤相昵。 於是貶温均州刺 士掠訊, 史,士諤資州 且奏吉甫陰事。 時吉甫為宦侍所抑 議者不厭,再貶爲 憲宗 **澤**為御史中 駭異, 旣詰 温 乘

判官。 恭字恭叔,尚氣節, 喜縱橫、 孫吳術。 爲山南西道府掌書記, 進殿中侍御史,終嶺南府

儉亦 列 傳 為 第 御 ....史。 八 + 五 讓,太子右 呂 渭 i 庶子。 孟 館 皆美材。

諫議 以倖切出爲常州刺史。州有孟瀆, 部 員 外郎。 大夫,知匭事。 **|孟簡字幾道,德州平昌人。 會祖詵,武后時同州刺史。** |王叔文任戶部, 簡以不附離見疾,不敢顯黜, 宰相 章執 誼爲徙它曹。 韓泰、韓曄之復刺史,吐突承璀爲招討使,簡皆固爭,詣延英言不可狀, 久淤閼,簡治導, 溉田凡四千頃, 簡舉進士、 以勞賜金紫,召爲給 宏辭連中, 元和 累遷倉 中拜

時謂 故使交政。及簡還,半道堂牒還之,如例,乃聽解。 兩失之。 代李遜為浙東觀察使。 以工部侍郎召還。 遜抑士族,右編人,至橫恣不檢,及簡, 初,使府得代,詔至,署留後卽行。 一反之,農估兼受其弊, 李脩觀察浙西,始請留

萬。左授太子賓客,分司東都,再貶吉州司馬。以赦令進睦州刺史,復徙常州,仍太子賓客分 之,數傲很,簡怒,追還,以土囊斃之。家上變,發簡姦贓,御史劾驗,得遺吐突承璀貲七百 政頗嚴峭。 宰相多由此進。 進戶部,加御史中丞。戶部有二員,判使桉者居別一署,謂之「左戶」,元和後,選委華 時有詔置臨漢監以牧馬,命簡兼使職。 崔羣旣相,而簡代之,故簡意且柄任。 簡以親吏陸翰主奏邸,關通閹侍,翰持 及出山南東道節度使, 內不樂。

司,卒。

過甚,爲時所謂。 簡尤工詩,聞江、淮間。 嘗與劉伯芻、歸登、蕭倪譯次梵言者。 尚節義,與之<u>交者,雖</u>歿,視<u>卹其孤不少</u>衰。 晚路殊躁急,佞佛

從母也,吉甫欲按之,求補號州刺史。 之善,擢累給事中。 闕,遷主客員外郎。數過友家飮噱,爲韋執誼陰劾,貶虔州參軍。久乃除考功員外郎。裴垍待 伯芻風度高嚴,善談確,而動與時適,論者少之。 劉伯獨字素芝,兵部侍郎迺之子。行脩謹。淮南杜佑奏署節度府判官。府罷,召拜右補 李吉甫當國而垍卒,不加贈,伯芻爲申理,乃贈太子少傅。或言其妻垍 稍遷刑部侍郎、左散騎常侍。卒,贈工部尙書。

狀、應伏誅。 宫三品若左右丞、侍郎通攝。」俄轉左補闕。 陳帖注浮屠書,因供奉僧以聞,除濠州刺史。 寬夫劾狀, 敬宗怒謂宰相曰: 「帖不繇僧得州, 子寬夫,寶曆中爲監察御史。奏言:「以王府官攝祠,位輕,非嚴恭意,請以尙書省、東 推言所從,恐累國體。」帝讜其言,釋之。 諫臣安受此言?」寬夫曰:「衆劾帖,獨臣草

列傳第

八十

五

劉伯芻

楊憑

官,文書盡用金統。 可。 後爲東都留守。 子 允章 改 國子祭酒。 ,字蘊中,咸通中爲禮部侍郞。 遣取印磎所,磎不與,更悔愧,移檄近鎭起兵扞賊,磎持印還之。 黃巢至,分司李磎挈尚書印走河陽,允章寄治河淸。 又建言:「羣臣輸光學錢治庠序,宰相五萬 請諸生及進士第並謁先師,衣青衿,介幘, ,節度使四萬, 巢僭 刺史萬。」詔 號, 輒受僞 後廢

有名 善,一時歌 大曆中 楊憑字虛受,一字嗣仁,虢州弘農人。 、慕,號 ·, 踵 擢 「楊、穆、許、李」。 進士第,時號「三楊」。憑重交游,尙氣節然諾,與穆質、許孟容、李鄘 少孤,其母訓道 有方。 長善文辭, 與弟凝、 相友 凌皆

接下 捕故官屬推躡,簿憑家貲。 煩,又幽妓妾於永樂別舍,謗議頗讙,故夷簡 江 - 脫略, 姦 歷事 「贓及它不法, 節 度府、召爲監察御史、不樂、輒免去。 人多怨之。 韶刑部尚書|李鄘、大理卿趙昌即臺參訊。 在二鎭尤侈忲。 翰林學士李絳奏言:「憑所坐贓,不當同逆人法。」乃止。 入拜京兆尹。 藉之痛擿發,欲抵以死。 累遷太常 與御史中丞李夷簡 少卿、湖南 于時憑治第永寧里, 江 旣置對,未得狀, 西觀察使。 素有 隙 性簡 憲宗以 功役叢 因 卽

憑治京兆有績 但貶臨賀尉。 始,德宗時假借方鎭,習爲僭儗事,夷簡首按憑,時以爲宜,而

緣 私怨,論者亦不與。 俄徙杭州長史。以太子詹事卒。

簡遽表爲監察御史,晦過謝,問所以舉之之由。 中書舍人,彊直守正,不沈浮於時。嗜酒喪明,以禮部尙書致仕,卒。 臨賀知我,今忍遽棄邪?有如公異時爲姦邪譖斥,又可爾乎?」德輿歎其直,稱之朝。 獨晦至藍田慰餞。 憑所善客<br />
徐晦者,字<br />
大章,第進士、賢良方正,擢<br />
櫟陽尉。 宰相權德輿謂曰:「君送臨賀誠厚,無乃爲累乎?」晦曰:「方布衣時, 夷簡曰:「君不負楊臨賀,肯負國乎?」後歷 憑得罪, 姻支憚累, 無往候 李夷

部 拜 防,水患訖息。 時孟 、兵部郞中,以痼疾卒。 稍遷右司郎中。 凝 字懋功,由協律郞三遷侍御史,爲司封員外郞,坐釐正嫡媵封邑,爲權幸所忌,徙吏 宣武董晉表爲判官,亳州刺史缺,晉以凝行州事。增墾田,決汙堰,築隄 叔度橫縱撓軍治,而凝亦荒湎,晉卒,亂作。 凝走還京師, 闔門三年。

凌字恭履,最善文,終侍御史。子敬之。

敬之字茂孝,元和 初,擢進士第,平判入等,遷右衞胄曹參軍。 累遷屯田、戶部二郎中。

列傳第八

十五

楊憑

潘孟陽

常少卿。 坐李宗閔黨,貶連州刺史。 是日,二子式、戴登科,時號「楊家三喜」。轉大理卿,檢校工部尚書,兼祭酒 文宗尙儒術,以宰相鄭覃兼國子祭酒,俄以敬之代。 未幾,兼太 卒。

章,孜孜玩諷,人以爲癖。雅愛頂斯爲詩,所至稱之,繇是擢上第。斯字子遷,江東人。敬之 祖客灞上,見閩人濮陽愿,閱其文,大推挹,徧語公卿間。 敬之嘗爲華山賦示韓愈,愈稱之,士林一時傳布,李德裕尤咨賞。 會愿死,敬之爲斂葬。 敬之愛士類,得其文

<u>澧州</u>司馬,時興疾上道,不自言。 <u></u>于邵高其介,申救,不見聽。 郎,以病免。 方劉晏任權,炎乃其婿,雖書疏報答,未嘗輒關,時稱有古人節。 晏得罪,坐貶 潘孟陽,史亡何所人。父炎,大曆末官右庶子,爲元載所惡,久不遷。 **載誅**,進禮部侍

使還,罷爲大理卿。其後左司郎中鄭敬宣慰江淮,帝誠曰:「殷宮中用尺寸物皆有籍,唯賑 孟陽恃奧主,又氣豪倨,從者數百人,所至會賓客,留連倡樂,招金錢,多補吏,譽望大喪。 支,奏以自副。 故被慰薦,擢累兵部郞中。貞元末,王紹以恩倖進,數稱孟陽才,權知戶部侍郞。 孟陽少以蔭,俄登博學宏辭科,補渭南尉,再遷殿中侍御史。公卿多父行及外家賓客, 時憲宗新立,詔孟陽馳驛江淮視財賦, 加鹽鐵轉運副使,丼祭諸使治否。 杜佑判度

·無所計,卿是行,宜諭股意,毋若潘孟陽殫財費酣飮游山寺而已。」

判 右,孟陽懼,輟不敢治。 贈兵部尚書,諡曰康 列,帝怒,罷孟陽左散騎常侍。 `度支,又兼京北五城營田使。 元和三年,出爲華州刺史,遷劍南東川節度使。宰相武元衡與孟陽舊,復以戶部侍郎召 而伎媵用度過侈汰, 人多指怒之。病風痺, 復改左散騎常侍。卒, 明年,復舊官。 太府王遂爲西北供軍使,持營田不可,至私忿恨,更請間 盛葺第舍,帝微行至樂游原,望見之,以問左

初,孟陽爲侍郎,年未四十,其母謂曰:「以爾之材而位丞郎,使吾憂之。」

史,以刑部郎中知御史雜事,進拜中丞。時李夷簡召爲大夫,故詔元略留司東臺。改京兆少 崔元略, 博州人。 父儆, 貞元時終尚書左丞。 元略第進士, 更辟諸府, 遷累殿中侍御

尹,行府事,數月,遷爲尹。徙左散騎常侍。

臣。」乃出爲黔南 元略果得之。植恨悵。 初, 中丞缺,議者屬崔植,而元略謬謂植入閣不如儀,使御史彈治。 觀察使,徙鄂岳。 既當國 ,以元略爲宣撫党項使。辭疾不行。 久乃拜大理卿 植奏:「不少責、無以示羣 及宰相以二人進,

列

四

守 栖楚規相 劉 理正 栖楚 ,改義成節度使。 俄 元從質、 敬宗 授戶部侍 又 位 **勃元略前造東渭橋** 初 ,疑元略妨己路,故舉疑 還京兆尹,兼御史大夫。收貸錢萬七千緡,爲御史劾奏, 侍御史温造以三司雜治。 郞 卒,贈尙書左僕射。 譏謗大興, 縱吏增估物不償直 諫官斥元略方劾而 似衊染之。 元略素事宦人崔潭峻,頗左右之, 子鉉。 |大和三年,以戶部尚書判度支,出爲 遷, 取 工徒贓二萬緡 有助力, 元略自解辨 韶刑部郎中趙元亮、 詔 奪 獄 "; **乃** 具, 月 俸。 止 削 兼 東都留 於是 秩 京 兆 而

觀察使。 事 承 旨。 鉉 鉉 3字台碩 入朝凡三歲至宰相, 武宗 宣宗初,擢河中節度使,以御史大夫召,用會昌故官輔政,進尙書左僕射, ,擢進士第,從李石荆南爲賓佐,入拜司勳員外郎、翰林學士,遷中 好蹴鞠、角抵,鉉切 而石 1 %在 諫, 江陵。 帝褒納之。 澤路平, 會昌 兼 三年, 戶部尚書。與李德裕 拜中書侍 郎、同中書門下平章 不 叶,罷爲陝虢 書舍人、學 兼門下

河南尹。 命 通 ,魯、紹、**瓌、蒙。」帝聞之**,題於扆。 |鉱所善者||鄭魯、楊紹復、段瓌、薛蒙,頗參議論,時語曰:「鄭、楊、段、薛,炙手 它日,帝語||鉉日:「魯去矣,事由卿否?」||鉉惶懼謝罪。 是時, 魯爲刑 部 侍 郎, **越欲引以相,帝不許,** 可 熱 用爲 欲得

侍郎,封博陵郡公。

賴。 討 擊,詔兼宣獻池觀察使。 **咸通** 久之,出爲准南節度使,帝餞太液亭,賜詩寵之。 初,徙山南東道、荆南二鎮,封魏國公。 既平,加檢校司空,罷兼使。 龐勛叛,自桂管北還,所過 因宣 居九年, 州 軍 條教 逐 觀察使鄭薰 一下無 剽 復改, 略。 |鉉 |聞 民 鉉 以順 出 兵

募兵屯江、湘、邀賊歸路。 賊懼 ,更踰嶺,自淮而北。 朝廷壯其忠。 卒官下。

永州 政,而黃巢勢寖盛,沉每建裁遏,多爲攜沮抑。 王景崇進兼中書令,讓其兄景儒,求易定節度。 旦告麻,大霧塞廷中,百僚就班脩慶,大風雨雹,時謂不祥。 刺史,復拜舍人,進禮部、吏部二侍郎。 子沆,字內融, 累遷中書舍人。 章保衡逐于踪, 沈亦貶循州 乾符五年,以戶部侍郎同中書門下平章事 賊陷京師,匿張直方第,遇害。 沈謂魏博、 。俄改中書侍郞,兼工部尙書。時 盧龍 且相援,執不可。 司戶參軍 僖宗立 盧攜專 召爲 て。 昕

行營糧料使,元受從之,督供饋。 **元略弟元受、元式、元儒,皆舉進士第。** 皋賽得罪,元受逐死嶺表。 元受以高陵尉直 一史館。 元和時,于皋暮爲河北

靇。 度使。 卒,贈司空,諡日莊 **元式始署帥府僚佐**, 宣宗初,以刑部尚書判度支,拜門下侍郎、同中書門下平章事,進兼戶部尙書。以疾 累官湖南觀察使。 會昌中,澤路用兵, 遷 河中,拜河東、 義成

列傳第八十五 崔元略 章綬

遷至 對仗奏,太宗責其不知禮,學文本歿,是夕罷警嚴,張公謹亡,哭不避辰日,故閔悼之切,不 宜過時。 九宮皆列星,不容爲大祠。大臣薨,不於計日輟朝,乃在數日外。因引貞觀時,任瓌卒,有司 |司勳郞中,知制誥,眞拜中書舍人,歷戶部侍郞。 大和初,遷太常博士。最明禮家沿革,問不虛酬。 大中時,又有宰相崔龜從,字玄告,初舉進士,復以賢良方正、拔萃,三中其科,拜右拾 再歲,罷爲宣武軍節度使,數徙鎭,卒。 又言三品以上官,非經任將相密近,不宜輟朝。 大中四年,以中書侍郎同中書門下平 定 敬宗廟室祝辭,皇帝不可云孝弟。 韶皆可其議, 九宮遂爲中祠。 再

長安尉。 章綬字子章, 京兆萬年人。 有至性, 朱泚亂,羸服走奉天,拜華陰令。 然好不經,喪父,鑱臂血寫浮屠書。 佐襄陽于頔府,數譏謔刺頔橫恣,頔不能容,薦 建中末,爲

諸朝。 鳥得全書耶?」一艘白之,帝喜,卽賜一艘錦綵。 方太子幼,經數爲俚言以悅太子,它日侍,太子鳥得全書耶?」一艘白之,帝喜,卽賜一艘錦綵。 方太子幼,經數爲俚言以悅太子,它日侍,太子 穆宗爲太子,綬入侍讀,遷諫議大夫。 三遷職方郎中。 太子書「依」字輒去「人」,曰:「上以此可天下事,

爲帝道之,帝怒曰:「綬當以經義輔導太子,而反語此,殷何賴焉?」外遷虔州 刺史。

有司祭而 進位禮部尙書。 光順門賀皇太后,然後上皇帝千萬歲壽。」詔可。久之,宰相奏古無生日稱賀者,綬議格。時 大臣論啓或未決,經居中助可否。九月九日宴羣臣曲江,經請集賢學士得別會,帝一順聽。 因以譴也。」時帝不德,故託諷焉。 穆宗立,召爲尙書右丞、集賢院學士,出入禁中,怙寵甚。 不耐,此二君皆受自至之福,書美前史。 帝問所以振災邀福者,對曰:「宋景公以善言退法星三舍,漢文除祕祝,敕 如失德以却災,媚神以丐助,神而有知, 建白:「帝誕日,百官先詣

遣中人弔其家。 子元弼太常丞,帝以舊恩許之。一綬耄而貪,不能事軍政,綱維亂弛。 俄以檢校戶部尚書爲山南西道節度使。入辭,請門戟十二以行,又乞賜錢二百萬, 有司諡通醜,故吏以爲言,改謬醜,不報,罷。 卒, 贈尙書右僕射, 帝 官

且

# 一百六十

#### 列 傳 第八十六

庾敬休 張薦 讀 趙涓 博宣 李紓 鄭雲逵 徐岱 王仲舒 馮伉

御史。 以名。 短時政,貶嶺南 制舉皆甲科,再調長安尉,遷鴻臚丞。 「驚文辭猶靑銅錢,萬選萬中」,時號鷹「靑錢學士」。證聖中,天官侍郞劉奇以驚及同 止 其廷。 張薦字孝舉,深州陸澤人。祖鷟,字文成,早惠絕倫。 調露 性躁十、儻蕩無檢、罕爲正人所遇、姚崇尤惡之。 列 傳 大父曰:「吾聞五色赤文,鳳也;紫文,鸑鷟也。 第 初,登進士第。考功員外郞騫味道見所對,稱天下無雙。授岐王府參軍。八以 , 刑部尚書李日知訟斥太重, 得內徙。 六 四參選,判策爲銓府最。 鷟屬文下筆輒成, 浮豔 開元初,御史李全交劾驚多 若壯,殆以文章瑞朝廷乎?」遂命 爲兒時,夢紫文大鳥,五色成文, 員外郎員半千數為公卿稱 少理致 馬蝗爲 口 語訓 其

ハ

+

張 萬

四九七九

論著率詆誚蕪猥,然大行一時, 否?」答曰:「近自御史貶官。」曰:「國有此人不用,無能爲也。」新羅、日本使至,必出金寶購 晚進莫不傳記。 武后時,中人馬仙童陷默啜,問:「文成在

其文。

終司門員外郎

薦才任 館脩撰,兼陽翟尉。 鷹敏銳有文辭,能爲周官、左氏春秋。 |史官、詔授左司禦率府兵曹參軍,以母老辭不就。 喪除,禮部侍郎于邵以聞,召充史 |真卿爲||李希烈所拘,遣兄子峴及家僕奏事五輩,皆留內客省,不得出。 初,爲顏眞卿歎賞。 大曆中,浙西觀察使李涵

### 薦上疏曰:

年八十 以 泊 告別,介副不及陳請,孱僮單騎,即日載馳。冒姦鋒於臨汝,折元惡於許下,捐軀杖義, 威 (詬羣凶,遂令脅制者回慮,忠勇者肆情。 堪 ,奔固舊穴,蓋眞卿義風所激也。 去正月中,眞卿奉使准西,期不先戒,行無素備。受命之後,不宿於家,親黨不遑 ,被羸老之疾,拘囚環堵之間,顧眄鉤戟之下,呼嗟憤恚,失寢忘食,不知悲翁何 眞卿逮事四朝,爲國元老,忠直孝友,羽儀王室。行 周曾奮發於外,章淸伺應於內,希烈蒼黃窘

捕 京師。 伏 聞 此三人留之無益,請寘境上以贖眞卿,先降詔書,分明諭告。 帝烈之母,鍾念幼子,目不絕泣, 求 責 希烈;又希烈妻祖母郭及妻妹封並逮 且希烈 知眞卿

人望 一,不敢加害,旣無嫌隙,但因循未遣耳。 若歸其親愛, 賊亦何吝還一使哉? 其子頵等拳拳實希

見,望許休澣,告以安否。 臣又聞眞卿所遣兄子峴及家僮從官奉表來者五輩, 皆留中,

疏奏,盧杞持之,不報

朱泚反,詭姓名伏匿城中,著史遁先生傳。 京師平,擢左拾遺。 韶復用起爲刺史,薦與

陳京、趙需等論比姦惡傾覆不當用,入對挺確,德宗納之。 貞元元年,帝親郊。時更兵亂,禮物殘替,用薦爲太常博士,參綴典儀,略如舊章。 刑部

尚書 **| 關播持節送||咸安公主于||回紇,以||薦爲判官。** 還,遷工部員外郞。久之,擢諫議大夫,復

爲 史館脩撰。

薦占 遣使 議 論 册 對 朝 方。髮延齡用事,中傷俊良,建白無不當帝意。 詳 回 政得失,史官書人君善惡,二者不可兼。」薦改祕書少監。延齡必欲以罪斥廢之。 鶻 辯 毗伽懷信可汗,使厲至回鶻。 ,三使絕域,始兼侍御史、中丞,後大夫。 還爲監。 鷹將疏其惡,延齡知之,因言于帝曰:「諫 吐蕃贊普死,擢薦 次赤嶺 ,被病卒,年六十一,吐蕃傳其 工部侍 郞 ,爲弔祭使。 會

|薦 [拾遺 至侍 郞 凡二十年,常兼史館脩撰。 初,貞元時,京師旱,帝避 正殿, 減膳, 薦

柩

以歸。

順宗立,問至,贈禮部尚書,諡

日 憲

列

傳

第

八 +

六

張 鶶

趙 涓

九八八一

參裁 白 限 日 諸 以 儒謂博而詳。 應 活制。 及定昭德皇后廟樂, 所著書百餘篇。 子又新,別有 遷獻、懿 三祖, 傳。 定太儀位號、 大臣耐廟 鼓 吹法,

初爲 吏部 孫 讀 , 字聖用 選牒精允。 幼穎 調者丐留二年, 解。 大中時第進 詔可, 士, 榜其 鄭薰辟署宣州幕府。 (事曹門。 後兼弘文館學 累遷禮部侍郎。 判 院事 中和

卒。

之曰:「卿正直,殷所自知,乃以罪聞,不信也。」命典吏部選。 使,驗治 判 奏冤官,帝見其名, 官。 趙 涓 德宗初,為衢 明諦,迹火所來, 真州 問宰相曰:「是豈永泰時御史乎? 州 幼有文, 刺 史。 乃宦人直舍。 天寶時第進士,補郾城尉,稍歷臺省。 始, 永泰 時,禁中火, 帝在東宮頗德之。 近東宮,代宗疑之。 |對日:「然。」紹拜尚書 及治衢,不爲觀察使韓滉所容, 從狩梁。 河南王縉引署副元帥府 興元元年卒,贈戶部 涓以監察御史爲巡 左丞。 旣至,勞

尙書。

乃誣「受吳少誠金爲反間,數言休咎惑衆」。有詔杖四十,流康州,時人冤之。 子博宣, 亦擢進士第。 藻翰豪邁,沈於酒,傲忽少檢。 陳許曲環辟署於府,久不能堪,

李紓字仲舒, 繇禮部侍郎選爲同州 始仕爲校書郎, 刺史。 帝次梁,舒委城趨行在,擢兵部侍郎、 大曆初, 李季卿薦爲左補闕, 遷累中書舍人。 高邑伯。 建言享 德宗居

武成王廟不宜與文宣王等,制從之。

爲 興元紀功述及它郊廟樂章,論譔甚多。 紛 性樂易,喜接後進。 其自奉養頗華裕,不爲齪齪崖檢。 進東部侍郎。年六十二卒,贈禮部尙書。 官雖貴,而游縱自如。 奉詔

採訪使奇之,言狀 鄭雲逵 ,系本滎陽。 雅北海 尉。 、,爲郾城尉,州刺史移職,民之暴警者遮道留,眄誅殺六七人。 安祿山 反 ·縣民孫俊驅市人以應, 町率衆擊殺之。 改登州

馬。 李光弼表爲武寧府判官,遷沂州 刺 史,諭降賊李浩五千人。 終滁州 刺 史。

雲逵爲 列 傳 人誕 第 八 + 譎敢言,已登進士第, 六 李 紆 鄭 雲 淕 ,去客|燕朔,朱泚善之, 表爲掌書記, 徐 岱 四九八三 妻以滔女。 |泚

浴論 朝, <u>延玉與要藉官朱體微它日與泚從容言:「</u>熖非長者,不可付以兵。」雲達數漏其語以怒滔 使雲逵先入奏 廷玉等,皆得罪死。 雲逵依李晟,晟表以禮部侍郞爲軍司 ,同府蔡廷玉譖于泚, 浴助田悅,雲逵諫,不從,遂棄室自歸。 奏貶爲平州參軍。 "馬,時時容逮戎略。 滔代泚將, 元和初,爲京兆尹,卒。 **德宗悅,擢諫議大夫。** 復辟雲違爲判官。 故

弟方逵,悖悍,結徒剽劫,父欲殺之,不克。 雲逵自劾「不能教, 恐赤臣家」。韶錮死

黔州。

劉晏表爲校書郎。 蔣鎭薦爲太常博士,專掌禮事。 徐岱字處仁,蘇州嘉興人,世農家子。於學無所不通,辯論明銳,座人常屈。大曆中, 觀察使李栖筠欽其賢,署所居爲「復禮鄉」。名達于朝,擢偃師尉。禮儀使 從德宗出奉天,以膳部員外郎兼博士。

德殿, 并召岱及趙需、許孟容、章渠牟講說。始三家若矛楯然, 卒而同歸于善。 予有差。 貞元初,爲太子、諸王侍讀, 兩宮恩遇無比。 性篤慎,至宮殿中語未嘗近之,不談人短,宗族孤孺者皆爲婚嫁。 遷給事中、 、史館脩撰。 帝以 誕日歲歲韶佛、老者大論 帝大悅,賚

然吝嗇,自持家管鑰,世所譏云。卒,贈禮部尚書。

庚敬休 四

列傳

第八十六

王仲舒

馮伉

邪?」俄改右補闕,遷禮部考功員外郎。奏議詳雅,省中伏其能。 第,拜左拾遺。德宗欲相裴延齡,與陽城交章言不可。後入閤,帝顧宰相指曰:「是豈王仲舒 王仲舒宇弘中,并州祁人。少客江南,與梁肅、楊憑游,有文稱。 貞元中,賢良方正高 坐累爲連州司戶參軍,再

徙荆南節度參謀。

完,就加金紫服。 直愿冤,眨峽州刺史,母喪解。 服除,爲婺州刺史。 州疫旱,人徙死幾空,居五年,里閭增 元和初,召爲吏部員外郎,未幾,知制誥。 徙蘇州。隄松江爲路,變屋瓦,絕火災,賦調嘗與民爲期,不擾自辦。 楊憑得罪斥去,無敢過其家,仲舒屢存之。將

皆驅出境。卒于官,年六十二,贈左散騎常侍,諡曰成。 賦不入,歎曰:「我當減燕樂他用可乎!」爲出錢二千萬代之。有爲佛老法、興浮屠祠屋者, |仲舒罷酤錢九十萬。 東坐失官息錢三十萬,悉產不能償,仲舒焚簿書、脫械不問。 水旱,民 聞之,除江西觀察使。初,江西權酒利多佗州十八,民私釀,歲抵死不絕,穀數斛易斗酒。 年,居不樂,曰:「豈可復治筆研於其間哉!吾久棄外,周知俗病利,得治之,不自愧。」宰相 穆宗立,每言仲舒之文可思,最宜爲誥,有古風。召爲中書舍人。旣至,視同列率新進少

|仲舒尙義概,所居急民廢置,自爲科條,初若煩密,久皆稱其便。

馮伉,魏州元城人,徙貫京兆。 第五經、宏辭,調長安尉。 三遷膳部員外郎,爲睦王等

侍讀。

常侍召,領國子祭酒者再。卒,年六十六,贈禮部尙書。 **豫蒙書十四篇,大抵勸之務農、進學,而敎以忠孝。 鄕鄕授之,使轉相敎督。居七年,韋渠牟** 選,德宗曰:「前使澤潞不受幣者,其人淸,可用也。」遂以授忱。 薦爲給事中、皇太子諸王侍讀。 李抱眞卒,优持節臨弔,歸之帛,不受,又致京師,优上表固拒。於是醴泉令缺,宰相高 對殿中, 賜金紫服。 進兵部侍郎,出爲同州刺史。 縣多嚚猾,數犯法,炕爲著 以散騎

少卿,光先吏部侍郎。父何,當未泚反,又與弟倬逃山谷,不臣賊。官兵部郎中。 <u></u> 康敬休字順之,鄧州新野人。祖光烈,與弟光先不受安祿山僞官,遁去。 光烈終大理

|敬休擢進士第,又中宏辭,辟宣||小幕府。入拜右補闕、起居舍人。 建言:「天子視朝,宰

而執政以幾密有不可露,罷之。 羣臣以次對,言可傳後者,承旨宰相示左右起居, 召爲翰林學士。 文宗將立魯王爲太子,愼選師傅,敬休以 則載錄,季送史官,如故事。」詔 可。 旣

戶部侍郎兼魯王傅。

相

丞。 無逋沒。 奏責本道主當歲以四萬緡上度支。 卒,贈吏部尙書。 初,劍南西川、山南道歲征茶,戶部自遣巡院主之,募賈人入錢京師。 又言:「蜀道米價騰踊,百姓流亡,請以本道闕官職田賑貧民。」詔可。 久之,逗留多不至。 敬休始請置院秭歸, 大和初, 收度支錢, 再爲尚書左 崔元略 乃

敬休夷澹,多容可,不飲酒食肉,不邇聲色。 弟簡休,亦至工部侍郞。

## 唐書卷一百六十二

## 列傳第八十七

姚南仲 呂元膺 獨孤及 許孟容 季同 朗 郁 薛存誠 庠 顧少連 廷老 李遜 章夏卿 方玄 瓘 建 段平仲 訥

終以褻近 自近,了復何益? 闕,南迫大道。 國。 皇后崩, 感傷,累日不能平。 長安乃祖宗所宅,其可興鑿建陵其側乎?夫葬者,藏也,欲人之不得見也。 姚南仲, 代宗悼痛 臣竊 華州下邽人。 使近而 惑焉。 且王者必據高明,燭幽隱,先皇所以因龍首而建望春也。 韶近城爲陵,以朝夕臨望。 可視,歿而復生,雖宮以待之可也。 且匹夫向隅, 今國人皆日后陵在邇, 乾元 初, 滿堂不樂,況萬乘乎,天下謂何? 擢制科,授太子校書。 陛下將日省而時望焉, 南仲上疏曰:「臣聞人臣宅於家,帝王 如令骨肉歸土, 遷累右補闕。 斯有損聖德,無益先 陛下諡后以貞懿 魂無不之,雖欲 大曆十年, 今起陵 今西近宮 目前 一宅於 獨 孤

列

僔

第八

+

七

姚南

仲

獨

孤

及

四九八九

欲寵反辱 ,惟陛下孰計。」疏奏,帝嘉納,進五品階以酬讜言。

南仲冤 還, 撫 逞,因毀南仲於朝, 卒,年七 「盈珍橈卿政邪? 百 四 則晨夜追至長樂驛,及之,與同舍,夜殺務盈,投其誣于廁。爲二書,一抵南仲, 姓 坐 遷爲御史中丞,改給事中、陝號觀察使。 一善宰相常衮, 一, ,御三軍 十五,贈太子 自言殺務盈狀,乃自 ;必不能成愷悌之化而正師律也。」帝默然。 」日:「不橈臣 ,德宗惑之。 大保,諡曰貞。 出爲海鹽令。 政, 刊殺。 俄遣小使程務盈誣表以罪。 臣隳陛下法耳。 浙西觀察使韓滉表爲推官, 驛吏以聞,帝駭異。 拜義成節度使。 如盈珍輩,所在有之,雖使洋、杜復生, 南仲不自安,固請入朝。 會南仲稗將曹文洽入奏, 乃授尙書右僕射。 監軍薛盈珍恃權橈政,不能 擢殿中侍御史內供奉。 貞元十九年 帝勞曰: 知其 一治

王叔邕希旨奏位,殺之。 初, 崔位、 馬少微者, 復出少微補外,使宦官護送,度江,投之水云。 俱在南仲幕府。 盈珍之譖也, 出位爲遂州別駕, 東川觀察使

行道, 獨 揚名於後世。」宗黨奇之。 孤 及字至之, 河南洛陽人。 天寶末, 爲兒時, 以道舉高第補華陰尉, 讀孝經, 父試之日:「兒志 辟江淮都統李峘府, 何語?」對日:「立 身

代宗以左拾遺召,既至,上疏陳政曰:

之必行,行之必公,則君臣無私論,朝廷無私政,陛下以此辨可否於獻替,而建太平之 |堯、凡心爲心,日降淸問,其不可者罷之,可者議於朝,與執事者共之。 使知之必言,言 之際,曾不採其一說,堯之疇咨,禹之昌言,豈若是耶?昔堯設謗木於五達之衢。孔子 假令不能如文王之多士,其中豈不有温故知新,可懋陳政要而億則屢中者?陛下議政 歎,而臣亦恥之。 制,以備詢問。此五帝盛德也。然頃者陛下雖容其直,而不錄其言,所上封皆寢不報。 曰:「以能問於不能,以多問於寡。」然則多聞闕疑,不恥下問,聖人之心也。 有容下之名,無聽諫之實,遂使諫者稍稍自鉗口飽食,相招爲祿仕,此忠鯁之人所以竊 陛下屢發德音,使左右侍臣得直言極諫。 十室之邑,必有忠信,況朝廷之大,卿大夫之衆,陛下選授之精歟 壬辰詔書,召裴冕等十有三人集賢殿待 願陛下以

刺,如沸粥粉麻。 羸 餓就役,剝膚及髓。 長安城中,白晝椎剽,吏不敢詰。 官亂職廢,將墮卒暴,百揆隳 師興不息十年矣,人之生產,空於杼軸。 民不敢訴於有司,有司不敢聞陛下,茹毒飮痛,窮而無告。今其心顒 擁兵者第館互街陌,奴婢厭酒肉,而貧

列

苦,廢無用之官,罷不急之費,禁止暴兵,節用愛人,兢兢乾乾,以徼福于上下,必能使 降霜,三月苦熱,錯繆顚倒,沴莫大焉。此下陵上替,怨讟之氣取之也。天意丁寧譴戒, 令宗廟有累卵之危,萬姓悼心失圖,臣實懼焉。 去年十一月丁巳夜,星隕如雨,昨淸明 以警陛下,宜反躬罪己,旁求賢良者而師友之,黜貪佞不肖者,下哀痛之詔,去天下疾 天感神應,反妖災爲和氣矣。 顒,獨恃於麥,麥不登,則易子齩骨矣。 陛下不以此時厲精更始,思所以救之之術,忍

叉言.

自此 之韶,臣竊遲之。今天下唯朔方、隴西有吐蕃、僕固之虞,邠、涇、鳳翔兵足以當之矣。 必力倍而功寡,豈易「不俟終日」之義邪? 遲疑於改作,逡巡於舊貫,使大議有所壅,而率土之患日甚一日?是益其弊而厚其疾 害之地,俾置屯禦,悉休其餘,以糧儲屝屨之資充疲人貢賦,歲可以減國租半。 陛下豈 下之穀,以給不用之軍,爲無端之費,臣不知其故。假令居安思危,以備不虞,自可阨 夫療癕者,必決之使潰。今兵之爲患,猶癕也,不以漸戢之,其害滋大,大而圖之, |而往,東洎海,南至番禺,西盡巴蜀,無鼠竊之盜,而兵不爲解。 傾天下之貨,竭天 减江淮、山南諸道兵以贍國用,陛下初不以臣言爲愚,然許卽施行,及今未有沛然

舒 美,無隱惡,得褒貶之正。 人獨安。 俄 改太常博士。 以治課加檢校司封郞中, 或言景皇帝不宜爲太祖 遷禮部員外郎,歷慶、舒二州刺 賜金紫。 及據禮條上。 徙常州 甘露降其廷。 史。 諡呂諲、 歲饑旱,鄰郡 盧弈、郭知運等無浮 庸亡什四以上, 年五十三,

日憲。

明 (善惡,長於論議。 及 喜鑒拔後進,如梁肅、高參、崔元翰、陳京、唐次、齊抗皆師事之。 晚嗜琴,有眼疾,不肯治,欲聽之專也。 性孝友。 其爲文彰

子朗、郁。

因勸 領 本道鹽鐵, 罷兵 朗字用晦,由處士辟署江西、宣歙、浙東三府。 ,忤憲宗意,貶興元戶曹參軍。 靇 場監管権吏、除百 姓之患。」不聽。 久乃拜殿中侍御 盜殺武元衡, 元和中,擢右拾遺。 史,兼 史館修撰。 |朗請貶京兆尹, 誅捕賊吏。 建言:「宜用觀察使 坐與李景儉飲,

景儉使酒 慢宰相 ,出爲韶州 刺 史。 召還,再遷 諫 議 大

疏論 史 ()期拒 敬宗 執。 不納,見、居中卒改他官。 遷御 初,宦官殿哪令崔發雞干下,朗請 史中丞。 故事 ,選御史皆中丞 侍御史李道樞醉謁朗, 誅 自 首惡以正常法。 請 是時 ,崔晃、鄭居中繇宰相力, 期刻不虔,下除司 王播路權近,還判鹽鐵,閉連 議郎。 得監察 會殿中 御

第八十七 獨孤及 顧少連

列

傳

王源 植 文宗初,遷 貶官 朗 工部侍郎,出爲福建觀察使,創發背卒,贈右散騎常侍。 直 以其枉 一,書 五上不報,即自劾執法不稱,願罷去。 帝遣中人尉諭 不許。

刺史。 制 德 鯁固 初 誥 興 舉制科高等 八乃有佳 郁字古風,始生而孤,與朗育於伯父汜。 號 郁 德 稱 有雅 輿 職。 去 壻 名, 位 ,,拜右拾遺,俄兼史館脩撰,進右補闕。 詔 擢翰林學士。 ,還爲學士。 宰相 帝遇之厚,議者亦謂當宰相,共以早世惜之。 高 選世族, 九年, 德興輔政, 故杜悰尚岐陽公主, 以疾辭禁近,徙秘 以嫌去內職,拜考功員 擢進士第,最爲權德興所稱,以女妻之。 書少監, 然帝循 吐突承璀討王承宗,郁執不可,挺議 謂 屏居 外郎, 不如德興之得郁 鄠 , 卒, 年四十 仍兼脩撰。 也。 憲宗歎 贈 絳 俄 元和 知

子库 ,字賢府,喪父始十歲,有至性,聞呼父官及弔客來, 輒號慟幾絕。 後舉進士,仕至

尚 書 丞。

簿。 邑有虎孽,民患之,少連命塞陷穽,獨移文嶽神,虎不爲害。 顧 少 連 字 夷仲 蘇州 吳人。 舉進士,尤爲禮部侍郎 薛 邕 所器,擢 御史大夫于頒薦爲 上第,以 拔 萃補登封 監察御 主

史。 德宗幸奉天,徒步詣 調,授水部員外郎、翰林學士。 再遷中書舍人,閱十年,以謹密稱。

灼名。 **笏擊賊臣,今吾笏將擊姦臣。」奮且前,元友直在坐,歡解之。改京兆尹。政尙寬簡,不爲灼** 右僕射,諡曰敬。 東 都留守,表禁苑及汝閑田募耕以便民,閱武力,利鎧仗,號良吏。卒,年六十三,贈尙書 歷吏部侍郎。 先是,京畿租賦薄厚不能一,少連以法均之。遷吏部尚書,封本縣男,徙兵部。 裴延齡方橫,無敢忤者,嘗與少連會田鎬第,酒酣,少連挺笏曰:「段秀實

,少連攜少子師閱奔行在,有詔同止翰林院,車駕還,授同州參軍。

策高等。 吏部侍郎 疾甚,詔夏卿爲徐泗行軍司馬,且代之。 ,改長安令。 章夏卿字雲客,京兆萬年人。 少邃於學,善文辭。 大曆中,與弟正卿同舉賢良方正 授高陵主簿,累遷刑部員外郎。時仍歲旱蝗,詔以郎官宰畿甸,授奉天令,課第 轉吏部員外郎、郞中,擢給事中,出爲常、蘇二州刺史。 未至,而建封卒,徐軍立其子愔爲留後,召夏卿 徐州節度使張建封

列傳

第

與爾 爲 東 都 賴 時 先 從弟執誼 留守,辭疾,改太子少保。 卒,年六十四,贈尙書左僕射,諡曰獻。 人遺德,致位及此,顧當是哉?」執誼 在翰林,嘗受人金,有所干請,密以金內夏卿懷中, 大慚。 轉京兆尹、太子賓客,檢校工部尙書, 夏卿毀懷不受, 日:「吾

**贊弟員友善** 如如 夏 卿性 、路隋、張賈、李景儉等,至宰相達官,故世稱 了難同游,終年不見其喜怛**。** 通簡,好古,有遠韻,談說多聞。 撫 孤姪恩踰己子。 晚歲將罷歸,署其居曰大隱洞。 知人。 爲政務通理, 不甚作條敎。 與齊映、穆贊、 所

|瓘往 察使。 請 正 卿 無 間也。 子瓘,字茂弘,及進士第,仕累中書舍人。 李宗閔惡之, 德裕罷, 貶爲明州長史。 與李德裕善,德裕任宰相, 會昌末, 累遷楚州刺史,終桂管觀 罕接士,唯

連表 有所壅隔, 《掌書 段平仲字秉庸,本武威 記。 ,羣臣畏帝苛察,無敢言。 擢 監察御史。 人,隋民部尚書達六世孫。 磊 落有 平仲常曰:「上聰明神武,但臣下畏怯,自爲循默爾。 氣 節 ,嗜酒敢言。 是時 擢進士第。 徳宗春 :秋高, 杜佑 躬自 李復之節度淮南, 1聽斷 了,天下 事 使

被選 我 歸,正色問之,雜以它語,平仲錯牾不得言,乃謬稱名,帝怒,叱去之。蒼黃向幄後,歸趨降 一日得召見,宜大有開納。」會京師旱,詔擇御史、郎官開倉振恤。平仲與考功員外郎陳歸 · 同得對,粗陳振恤事,帝祭其意有所畜,以歸在側未言。 。事訖,平仲方獨進,帝乃幷留

再遷尙書右丞。朝廷有得失,未嘗不論奏,世推其敢直云。終太子左庶子。 <u></u>元和初,為諫議大夫,憲宗使吐突承瓘討鎭州,亟疏爭不可。及還,無功,又請斬之。

招之,乃得去。

由是坐廢七年,然名由此顯。

段平仲一忤上,蒼惶失對,而獨以取名,何哉?下知所職,而上喪其所以爲上也。故聖王屈 得成而功不彰。返是而天下之務粲焉幾矣。德宗祭察,欲折伏臣下,自爲聰明,而治愈疏。 已從諫,君臣兩得其美,知道之本歟! 贊曰:君有常尊,臣有定卑,自然之勢也。然臣不自通於上,君不降而逮諸下,則治不

「吾不及識樓、「郝,殆斯人類乎!」策賢良高第,調安邑尉,辟長春宮判官。 呂元膺字景夫,鄆州東平人。麥儀瓌秀,有器識。 始游京師,謁故宰相齊映,映嘆曰: 李懷光亂河中,

列傳第

八 十

七

呂元隋

拜殿 違 ? 爲 輒 解去。 中侍 如期而 因泣 論 御 史。 惟 至。 元膺惻然, 明節度渭北,表佐其府。 歷右 自是羣盜感愧,悉避境去。 司 `員外郞。出爲蘄州刺史。嘗錄囚,囚或白:「父母在,明日歲旦不得省 悉釋械歸之,而戒還期。 惟明卒,王栖曜代之,德宗敕栖曜留元膺自佐, 吏白不可,答曰:「吾以信待人,人豈我

書左丞。 城,守者不許。 重。 元 臣等昧 膺 元膺 元 直氣讜 和中, 死 上其詔 度支使潘孟陽、太府卿王遂交相惡,乃除孟陽散騎常侍,遂鄧州刺史,詔辭 請留 言,宜留左右,奈何出之? 累擢給事 元膺給事左右。」未幾,兼皇太子侍讀,進御史中丞。拜鄂 左右曰:「中丞也。」對曰:「夜不可辨。」乃還。 ,請明枉直 中。 俄為 一,以 顯褒懲 同 州刺 . 」李藩、裴垍謝,因言:「陛下及此,乃宗社 史。旣謝,帝逮問政事 明日,擢守者爲大將。 ,所對詳詣。 岳觀 明日,謂宰相曰: 察使。 無疆之休。 嘗夜登 無所 入 、拜尙

雖當 誅,猶不 冮 西 I装堪 可為天下 按虔州 刺史李將順受財, ·
法。」
請遣 御 史按 問,宰相 不覆訊而貶。 不 能 元 **唐**曰:「觀察使奏部刺史,不加覆,

其儀 李 師道留邸,邸兵與山棚謀竊發,事覺,元膺禽破之。 選 沮 拜 一威望 東都 留守。 請比 華、汝、 故事 壽三州。 留守賜旗甲,至 帝 不 聽 元膺 并三州 不給。 麗之。 始,盜發,都人震恐,守兵弱不足恃, 或上 言:「用兵討 留守不賜旗 淮西 甲 東都 自 此 始。 近 )賊,損 都有

獵而 元膺坐城門指縱部分,意氣閑舒,人賴以安。 不事 農, 遷徙無常,皆趫悍善鬭, 號曰「山棚」。權德興居守,將羈縻之,未克。 東畿 西南通鄧、號,川谷曠深,多麋鹿 ,人業射 至是,

|元膺募爲山河子弟,使衞宮城,詔可。

<del>曾</del>缺。 拜 吏部侍 改 卒,年七十二,贈吏部尙書。 河 鄓。 中節度使。 Œ. 色立朝,有台宰望,處事裁宜,人服其有體。以疾改太子賓客。 時方鎭多姑息,獨元膺秉正自將, 監軍及中人往來者, 無不嚴憚。 居官始終無

李納以兵拒境,建封 許孟 容字公範, 遣使諭 京兆長安人。 止,前後三輩往,皆不聽。 擢進士異等, 又第明經, 乃使|孟容見|納,敷引逆順,|納卽 調校書郎。 辟武寧張建封府。 ·悔謝,

爲罷兵。表爲濠州刺史。

狀, 視, 以著令對。 德宗 奪尹以下 知其能 帝嘉 召拜禮部 · 俸。 其 守, 孟 容曰:「府縣上事不實,罪應罰。 擢 員外郎。 郞 中。 累遷給事 公主子求補崇文生者, 孟容固謂不可, 中。 京兆 上言「好時 然陛下遣宦者覆視 風雹害稼」,帝遣宦 主訴之帝, ,紊綱紀。 一人覆

列

更擇御史一人參驗,

乃

可。

」不聽。

虞 監察御史爲衢州刺史。 制授,尤不見其可。假令揔有可錄,宜暴課最,解中外之惑。」會補闕王武陵等亦 可否者。 詔中停。 ,總無功越進超授,羣議謂何?且之本判官,今詔書乃言『權知留後,攝都團 浙 東 觀察使裝肅諉判官齊揔暴斂以厚獻,厭天子所欲。 帝召謂曰:「使百執事皆如卿,朕何憂邪?」自袁高爭盧杞後,凡十八年,門下無議 至孟容數論駁,四方知天子開納多士,浩然想見其風 衢,大州 也。 孟容還制曰:「方用兵處,有不待 會肅卒,帝擢揔 次而擢 者。 自大理評事 練 副 、執爭,於是 今衢 使」, 初 不他 兼 無

若取一 祐 定, 帝始不悅 作禁錮當釋未釋;負逋饋送,當免免之;沈滯鬱抑,當伸伸之:以順人奉天。 若是而神弗 、歲弗稔,未之聞 陰陽適然乎?竊惟天人交感之際,繫敎令順民與否。今戶部錢非度支歲計,本備緩急 貞元十九年夏,大旱,上疏言:「陛下齋居損膳,具牲玉,走羣望,而天意未答,豈豐歉有 百萬緡代京兆一歲賦,則京圻無流亡,振災爲福。 ,改太常少卿 也。」先是,爲裴延齡、李齊運流斥者,雖十年弗內移,故孟容因旱及之。 又應省察流移征防當還未還,役

富 訴於朝。 人錢 元 和 初 憲宗韶以昱付軍治之,再遣使, 白 萬 再 一三歲不肯歸 遷尙書右丞、京兆尹。 孟容遣 吏捕詰、與之期使償、曰:「不如期,且死!」一 神策軍自興元後,日驕恣,府縣不能制。 皆不聽,奏曰:「不奉韶,臣當誅。 然臣職司輦戲, 軍吏李昱貸 軍盡驚

列傳第八十七 許孟容 薛存誠

當爲陛下抑豪彊。 錢未盡輸, 是不可得。」帝嘉其守正, 許之。 京師豪右大震。

後數日, 失,而狂賊敢爾,尙謂國有人乎?願白天子,起裴中丞輔政,使主兵柄,索賊黨,罪人得矣。」 累遷吏部侍郎。 果相度。 俄以尚書左丞宣慰汴宋陳許河陽行營,拜東都留守。 <u>盗殺武元衡,孟容白宰相曰:「漢有一汲黯,姦臣寢謀。</u> 卒,年七十六,贈 今朝廷無有過

孟容方勁有禮學,每所折衷,咸得其正。 好提腋士,天下清議上之。

太子少保,諡曰憲。

得官至千人,私謂爲同年, 終宣歙觀察使。 君,不以私害公,設有才,雖親舊當白用。 李絳與季同舉進士爲同年,才數月輒徙。 郎 中。 弟季同,始署西川韋皋府判官。 孟容爲禮部侍郎, 從季同京兆少尹 本非親與舊也。 劉闢反,棄妻子歸,拜監察御史。 帝以問 避嫌不用,乃臣下身謀,非天子用人意。」帝然之。 0 今季同以兄嫌徙少尹 時京兆尹元義方出爲廊坊觀察使, [絳,絳曰:「進士、明經, 歲大抵百人, , 豈臣所助邪? 歷長安令,再遷兵部 且忠臣事 奏劾宰相 吏部

軍高 罰。 詔以 宦豎爲姦,會坐于頔、杜黃裳家事,逮捕下獄。 果無實 曰:「獄已具,陛下必欲召赦之,請先殺臣乃可。 更保救於帝,有詔釋之,存誠不聽。 工徒,存誠曰:「此姦人羼名以避征役,不可許。」又神策軍與咸陽尉袁儋不平,誣奏之,儋被 重昌妄劾信州刺史李位謀反,追付仗內詰狀。 中人爲館驛使,存誠以爲害體甚,奏罷之。 薛 二敕皆執不下。 存誠字資明 河中寶鼎人。中進士第。 憲宗悅,遣使勞之,拜御史中丞。浮屠鑒虚者,自貞元中關通路遺,倚 明日,詔使詣臺諭曰:「朕須此囚面詰,非赦 存誠窮劾之,得贓數十萬,當以大辟。 擢累監察御史。 轉殿中侍御史,累遷給事中。 不然,臣不敢奉詔。」鑒虛卒抵死。 存誠一日三麦,請付位御史臺。 元和初,計劉闢,郵傳事叢, 也。」存誠 瓊林庫廣籍 江西監 及按, 權 近 奏

卒, 帝悼惜 未幾,復爲給事中。 贈刑部侍郎。 會御史中丞闕,帝謂宰相曰:「持憲無易存誠者。」乃復命之。 存誠性和易,於人無所不容,及當官,毅然不可奪。 會暴

子廷老。

|李漢入閣論奏曰:「比除拜不由宰司擬進, 廷老字商叟,及進士第,讜正有 父 風。 恐綱紀寖壞, 寶曆中, 爲右拾遺。 姦邪放肆。」帝厲語曰:「更論何 敬宗 政日 僻, 嘗與舒元褒、

爲職 ? 」元褒曰:「宮中興作太甚。」帝色變曰:「興作何所?」元褒不能對。 ,有聞卽應論 奏。 然見外輦材瓦絕多, 知有所營。」帝曰:「已諭。」時造淸思院 廷老日:「臣等以諫 ,殿中用

切齒。又論李逢吉黨張權 鄭注用事 ,嶺南節度使鄭權附之,悉盜公庫寶貨輸注爲謝。 輿、程昔範不宜居諫爭官,逢吉怒。會廷老告滿百日,出爲臨晉令。 廷老表按權罪, 由是中人

尋加史館修撰。

銅鑑三千,薄金十萬餅,故廷老等懇言之。

譲 夷罷之。 文宗立,召爲殿中侍御史。 開成三年, 遷給事中。 李讓夷數薦之,拜翰林學士。 在公卿間,偘偘不于虚譽, 日酣飲,不持檢操,帝不悅, 推爲正人。卒, 贈刑部

井 侍 郎。

子保遜,第進士,擢累給事中。

保遜子昭緯,乾寧中,至禮部侍郎。 性輕率,坐事貶磎州刺史。

害, 累遷 衆釋鎧 濠州 李遜字友道 刺 史。 自 歸。 , 初, 魏申公發之後,趙郡所謂申公房者, 觀 豪州兵謀殺其將楊騰 察使旨限外浮斂, 遜一不應。 騰走揚州, 入爲虞部郞中。 因滅騰家,曹亡剽劫 客居荆州。 始署 由 衢州刺史以政最擢 「山南 遜 東道掌書記, 至, 鐫 諭 利

列

浙 東觀察使。 當貞元初,福建軍亂,前觀察使奏益兵三千屯于境,以折閩衝 遂爲長成,幾

三十年。遜署事,即停其兵。

豈宜限以日。 入爲給事中。 如是,畢歲得望天子者幾何?」憲宗悅,從之。 故事,天子以畸日聽政,對羣臣。 |遜奏:「陛下求治,而下有所陳,當不時 遷戶部侍 鄓

高霞寓 霞寓 恩王傅。 戰 代嚴經爲山南東道節度使。 賊不勝,言爲遜所橈。 ,得專攻討,而遜督襄、復、郢、均、房五州賦饋之。 久乃歷京兆尹、國子祭酒 帝欲按狀,宰相請置不問,下遷太子賓客。 時方討察, 析山南東道爲兩節度, 初,襄陽兵隸霞寓者多逃還,後 以唐、 中人誣之, 更貶 隋三州授

諭 賞 罰 以檢校 上下皆感畏, 一體部份書爲忠武節度使。 衆遂安。 遜於爲政,抑彊植弱 時吳元濟始平,治條疏額,遜召會大衆,申嚴約束,明 ,貧富均一,所 至有績 म

由是 進檢校 長 慶初 幽 吏部 |鎭 尚書。 亂,遜首建誅 未幾,徙節鳳翔 討計 不聽。 ,過京師,以疾求解爲刑部尙書。 詔以 兵萬人會行營, 卽 日 卒,年六十三,贈 上 上道, 先諸 軍至,

尚書右僕射,**諡**日貞。

子方玄,字景業,第進士。 裴誼奏署江西府判官。 有大獄,論死者十餘囚,方玄刺審其

日:「沈約年八十,手寫簿書,蓋爲此云。」終處州刺史。 ,悉平貸之。 累爲池州刺史。鉤檢戶籍,所以差量徭賦者,皆有科品程章,吏不得私。

無有。」帝喜,濯左拾遺、翰林學士。 以建聞,帝問左右,宰相鄭珣瑜曰:「臣爲吏部時,當補校書者八人,它皆藉貴勢以請,建獨 字之曰:「孩子勸吾食,吾輒飽;進藥,吾意其瘳。」貞元中,補校書郞。 遜弟建,字杓直,與兄俱客荆州。 鄉人爭鬭,不詣府而詣建,平決無頗。 德宗思得文學者,或 母憐其孝,每

會遜被讒,建申治之,出爲澧州刺史。 太子詹事,改殿中侍御史。以兵部郎中知制誥。宰相有竀定稿詔者 順宗立,李師古以兵侵曹州,建作詔諭還之,詞不假借。 召拜刑部侍 鄓。 卒,贈工部 王叔文欲更之,建不可。 尚書。 , 亟請解職, 除京兆少尹。 左除

顯,未嘗治垣屋,以清儉稱。 初, 建爲學時,家苦貧。 兄造知其賢,爲營丐,使成就之。 故遜、建皆舉進士。 後雖通

下所逐,貶朗州 建 子訥,字敦止, 刺 史。 及進士第。 召爲河南尹。 遷 累中書舍人,爲浙東觀察使。 時久雨,洛暴漲,訥行水魏王堤,懼漂汨,疾馳去,水遂 性疏下,遇士不以禮,爲

列

傳第八

+

-6

李猻

廬,爲權貴優笑地邪?」凡三爲華州刺史,歷兵部尙書,以太子太傅卒。 大毁民廬。 議者薄其材。 初,訥居與宰相楊收接,收欲市訥冗舍以廣第,訥叱曰:「先人舊 遺命葬不請鹵簿,

避贈諡,詔聽。

## 書卷 一百六十三

## 列 傳第八十八

柳公綽 孔巢父 仲郢 戣 緯 璞 戡 珪 戢 璧 溫業 玭 穆寧 贊 質 員 崔 邠 图 뾺 鄆

公權

子華

楊於陵

馬 揔

鄎。 而 應,鏟蹟民伍。 德宗狩奉天,行在擢給事中,爲河中、陝、瞱招討使,累上破賊方略,帝嘉納 出爲涇原行軍司馬。 孔巢父字弱翁,孔子三十七世孫。少力學,隱徂來山。 **璘**敗,知名。 累拜湖南觀察使,未行, 廣德中,李季卿宣撫江淮,薦爲左衞兵曹參軍。 會普王爲荆襄副元帥, 永王|璘稱兵江淮,辟署幕府,不 署行軍司馬。 三遷庫部員外 俄

騎 開曉其衆。 |射工,日:「陛下見用,何敵不摧。」巢父日:「若爾,不蚤自歸,乃一劇賊耳。」悅日:「能爲劇 未幾,棄御史大夫,爲魏博宣慰使。 是時,悅久不臣,下皆厭亂,雜然喜曰:「不圖今日還爲王人!」酒中,悅起,自陳 巢父辯而才,及見田悅,與言君臣大義,利害逆順

列 傳 第八十 八 孔 巢 父

賊,豈不能爲功臣乎? 」巢父曰:「國方多虞,待子而息。」悅謝焉。 數日 , 田緒殺悅, 與大將

邢曹俊等聽命,巢父即以緒權知軍務,爲其難

懷光以其使魏博而田悅死,疑其謀出巢父,故軍亂不肯救。 咔 衆忿曰:「太尉無官矣!」方宣詔,乃譟而合, 李懷光據 河中, 帝復令巢父宣慰,罷其兵,以太子太保授之。懷光素服待命,巢父不 害巢父, 并殺中人啖守盈。 帝聞震悼,贈尙書左僕射,諡曰 初,巢父至,

從子戣、戡、戢。

忠。

詔具禮收葬,賜其家粟帛,存衈之。

條上 涉結近倖, 帝意,投匭上言承璀有功不可棄。 中人劉希光受財二十萬緡,抵死,吐突承璀坐厚善,逐爲淮南監軍。太子舍人李涉 |四事:一、多冗官,二、吏不奉法,三、百姓田 戣 字君嚴,擢進士第。 營鬥上聽。 有韶斥涉峽州司馬, 鄭滑盧羣辟爲判官,羣卒,攝總留務。 官寵側目, 不盡墾,四、山澤榷酤爲州縣弊。 入爲侍御史, 監軍楊志謙雅 累擢 諫議 自肆,衆皆 憲宗異其 大夫。 軒軒 奏 知

甚得。

變,捕位 無反狀。 兄 兼 劾禁中。 岳坐誣罔誅,貶位建州司馬。 信州刺史李位好黃、老道,數祠禱,部將韋岳告位集方士圖不軌,監軍高重謙上急 太子侍讀, 京兆尹左右之,翻其情。 |残奏:「刺史有罪,不容繫仗內,請付有司。」詔還御史臺。 | 戣與三司雜治 改給事中。 江 .西觀察使李少和坐臟, 残慷慨論正 中人愈怒,故出爲華州刺史。 ,貶少和 ,殺易簡,奪尹三月俸。 獄寢不下; 博陵崔易簡殺從父 明州歲貢淡菜蚶蛤之 再遷尙

屬

歷大理卿、國子祭酒。

者,女子 之。 死。 以 所水索。 兩。 有 〉法繩之。 驗 者 度 先是,屬刺史俸率三萬,又不時給, 由 會嶺南節度使崔詠 以幾 [是閭 不爲限,悉推與。 ,爲嫁遣之。 舊制 對, 里相約不敢犯。 南方鬻 ,,海商死者,官籍其貲,滿三月無妻子詣府 即拜嶺南節度使。 口 蕃舶泊步有下碇税, 1爲貨, 可,帝不聽,大發江、湖兵,會二管入討。 死, 自貞元中,黃洞諸蠻叛,久 掠人爲奴婢,残峻爲之禁。 帝謂裴度曰:「嘗論罷蚶菜者誰歟?今安在?是可往,爲股求 士之斥南不能北歸與有罪之後百餘族, 旣至, 皆取部中自衣食。 始至有閱貨宴 **免屬州逋負十八萬緡、米八萬斛、黃金稅歲八百** 不平。 (, 所餉 親吏得嬰兒於道,收育之, 則沒入。 答、桂二管利虜掠、幸有 犀 琲, 士被瘴毒死者不勝計, | 残以海道歳 下及僕隸。 才可用用之, 一往復, 功 |残 稟無 7,乃請 無無 茍 告 以

列

乘之,殺都護李象古,而桂管裴行立、容管陽旻皆無功,憂死;獨戣不邀一旦功,夜、廣晏然

許,亦無傷義,而 宜去。」愈曰:「公無留資,何恃而歸?」曰:「吾負二宜去,尚奚顧子言?」愈嗟歎,即 壯,上三留,何去之果?」||残日:「吾豈要君者?吾年, 七十致事, 國忘家,用意至到。 「臣與||残同在南省,數與||残相見,其爲人,守節淸苦,論議正平。 年七十,筋力耳目未 贈兵部尙書, 盜日貞。 穆宗立,以吏部侍郎召,改右散騎常侍,還爲左丞,以老自乞。 若不得謝 有貪賢之美。」不報。 如幾輩,在朝不過三數人,陛下不宜苟順其求,不留自助也。 ,則賜之几杖安車,不必七十盡許致事。 以禮部尚書致仕,歲致羊酒如漢徵士禮。 一宜去;吾爲左丞,不能進退郞官,二 今戣據禮求退, 雅善韓愈,謂曰:「公尙 陛下若不聽 卒,年七十 禮,大夫 上 一 疏言:

子遵孺;温裕,仕爲天平節度使。遵孺子牌。

祭御 府。 史,進禮部員外郎、兼集賢直學士。母喪解。 從崔鉉淮南,復從愼由守河中,再遷觀察判官。 **緯字化文,少孤,依諸父。** 多與有名者游,才譽蚤成。 還爲右司員外郎。趙隱言其才,拜翰林 宰相楊收薦以長安尉直弘文館。 擢進士第, 東川崔愼由表置幕 遷監

俄 知制誥。 頻遷戶部侍郎, 擢御史中丞。|緯方雅,疾惡若讎,中外聞風, 未繩輒肅。

更部 侍 愈。權要私謁至盈几,一不省,當路不悅,改太常卿。

朱玫 邑阨狹 豈以 乎? 盩厔 义 中書門下平章事。 召 大 御 夫 功臣」, 也 且泣下。 一、爲盜剽脅,衣囊略盡。 家事後國 史曰:「吾等身被恩,誼不辭難,今詔羣臣皆不至,夫與人布衣游,猶緩急相卹,況於君 ,次陳倉,惟黃門衞士數百扈乘興。 從 陰信宗 不不 ,不足駐六師,請幸梁州。 鐵券恕十死, 敢後。 西到閩,以刑部尚書判戶部。 事乎?公善自謀,吾行決矣。」往見李昌符曰:「詔書再至,而羣臣顧未行。僕, 御史亦辭方寇奪,丐衣食,請辦一日費而行。 願假兵護送天子所。」昌符具資裝送之。旣及行在, 政平,從帝還,領諸道 又賜天興 [緯謁宰相,欲有所論,遘與<u>裴</u>澈怨田令孜,不欲行,辭不見。 (良田 即日去陳倉而政兵至,微緯言幾不脫。 「、善和 鹽鐵轉運 詔拜輝御史大夫, 令趣百官至行在。 時羣臣露次 蕭遘雅 里第各一 不喜,坐調度不給,改太子少保。 使, 晶 累遷尙書左僕射, 兼京畿營田使。 輝日:「吾妻疾,旦暮盡,丈夫 緯策)政必反,建言關 賜號「持危啓運保 進拜兵部侍郎、同 及帝避 緯

不 見,中尉 朝服, 樞 國典也。 密使索宰 陛下欲假借之,則請以所兼官爲之服。」諫官固執,帝召謂曰:「方舉大禮 相 朝服, 有司 白 中人無 液冠 心助祭事 `,中尉怒,責禮官必得。 輝言:「中人

昭宗

卽

位

進司

空。

以太學焚殘,乃兼國子祭酒,完治之。

加司徒,封

魯國

公。

帝將郊

例

第八

+

八

孔

巢父

據堂受禮,安乎?必欲用之,去都頭乃可。」 爲我容之。」進 **緯日:「固疑公見望也。** 「已謝、當班 見百官。」緯判 兼 太保。 時天武都頭李順節, 且百辟卿士,天子廷臣,班見宰相 止之。 明日 ,順節盛服至, 順節慚縮 疏暴人也, 不 則無 敢 以浙西節度使 以 班 》宰相爲之長。 公提天武健兒, 怏 、快去。 他 兼平章事。臺 日 見緯,以爲言, 一史白:

惡大 藥、卒、贈太尉。 力疾 均州 會天子 、臣朋 刺 到 張 出 京 史。 濬 次石門,從至莎城,以病還都。家人召醫視,緯曰:「天下方亂,何久求生? 比 將伐太原, 師 見帝 ,與藩臣交,更召牌入朝,再擢吏部尚書,以司空、門下侍郎 二人皆密結朱全忠,全忠爲請,詔聽所便,乃屏居華陰。 嗚咽流涕,自陳衰疾不任事, 帝不決,以問緯,緯助濬 請。 乞歸田 既濬 里。 敗, 坐傅會, 帝動 容, 出爲荆南節度使, 李茂貞 詔使者送緯至 復輔政。 入殺韋昭 使者 堂 」不肯服 度 視 敦 俄 貶

幾,李吉甫鎭揚州,表置幕府,戡未應。 戡 自 始 別將代之,留 陰 戡 学 爭不從, 勝始 署掌書記。 則於會肆言以折之, 進士 一及第,: 補修武尉,以大理評事佐昭義李長榮節度府。 從史稍得志,益驕,與王承宗、田緒陰相結,欲久連兵以固其位。 從史始若受其言,後偃蹇不軌, 從史曰:「是故舍我而從人邪?」即誣以事,奏三上, 戡遂以疾歸洛陽。 長榮死,

列傳第八十八 孔巢父 穆寧

可。 韶以衞尉丞分司東都。 憲宗遣使諭曰:「殷非不知戡 自貞元後 行用之矣。」未幾,卒,年五十七。 帥鎭劾奏僚佐, 不驗輒斥。 至是, 從史敗, 給事中呂元膺執不 追贈司勳員

外

郎

進乎? 侍 察使,召授右散騎常侍、京兆 能 者,從史敗,孟元陽代, 史大夫。 ,召還京師。 御史、庫部員外郎。 爲校書郎、陽翟尉, |戦字方舉。 子盍效季孫行父逐莒僕以勉事君者?」武 卒,贈 | 散謂京兆尹裴武曰:「泚所下詔令皆偃爲之,悖逆子不鳥竄獸伏, 工部尚書。 初,父死難,詔與一子官,補脩武尉, 始, 欲復用之。 累遷殿中侍御史,分司東都。 朱泚以彭偃爲中書舍人,偃子充符得不死, 尹。 歲旱,文宗憂甚,戢躬祠曲江池 創逐 昭義判官徐政, 出 不受,以讓其兄戡。 充符。 拜京兆 一夕大澍,帝悅 故嘗助盧從史爲跋 帝怒, 少尹 辟廊坊府。 ′ ,再遷爲 擢明經, 流攻播 乃干譽求 湖南 或薦其 書判 州 詔 兼御 扈 輔

可少警, 子 ·温業,字遜志,擢進士第。 孔吏部不樂居朝矣。」後爲太子賓客。 大中時,爲吏部侍郎。 求外遷,宰相白敏中顧同列曰:

藥 懷州 河內人。 父元休,有名開元間,獻書天子,擢偃師丞,世以儒

眞卿 禄山 州 賊,令致死, 荷不乏嗣 寧 縣 ,將以 寧剛 不從,夜亡過河,見肅宗行在。 井力捍賊。 即遺 正 |眞卿書曰:「夫子爲衞君乎?」|眞卿喜,署寧河北採訪 諫議大夫任之。 ,足矣!」卽馳謁眞卿曰:「先人有嗣矣,我可從公死。」旣而賊攻平原 一, 氣 即奪其兵, 節自任。 史思明略境,郡守召寧攝東光令禦之。 不罷所攝。 以明 會眞卿以直忤旨 經調鹽 始, 帝問 山尉。 寧過平原, ·狀,眞卿對:「不用穆寧言, 安祿 寧亦罷。 見顔眞卿 山反,署劉道玄爲景城守,寧募兵斬之,檄 賊遣使誘寧,寧斬以徇。 ,嘗商賊必 支使。 故至此。」帝異之, 反。 寧以息屬 及是, 寧勸 其母 聞眞 郡守恐怒 7弟日: 酒守, 卿 拒

光弼 與。 光弼執其手謝 鹽鐵轉運使。 命寧主糧者, 光弼怒,召寧欲殺之。 上元 光 丽 初 了為殿 曰:「吾帥衆數萬,爲天子討賊,食乏則 當是時,河漕不通,自漢、河徑商山以入京師。 敕也, 曰:「吾固知不 中侍御史,佐鹽鐵轉運,住埇橋。 公可以檄取乎。今公求糧 或勸寧去, 可, 聊與君議耳。」時重其能 寧日:「避之失守, 而寧專饋; 八人散, 李光弼屯徐州,餉不至,檄 君閉 亂自 守官。 准西節度使李忠臣不奉法,設 廩不救,欲潰吾兵耶? 1我始 寧有求兵, 累遷 Ξ, 何所逃 鄂岳沔都 而公亦專與乎? 罪乎? 取 画 資 諫 糧 及租 卽往見 寧不 庸

戍邏以征商賈,又縱兵剽行人, 道路幾絕。 與寧夾准爲治,憚寧威,掠劫爲衰,漕賈得通。

坐杖死沔州別駕,貶平集尉。

矣,親友彊之,輒復一朝。 乃曰:「可以行吾志矣!」卽罷歸東都。 誣,循置散位。 覆視,實增戶數倍。 天寶舊版校見戶,妄劾寧多逋亡,貶泉州司戶參軍事。 大曆初 , 起 爲 監 察 御 史 , 寧默不樂, 唶曰:「時不我容, 我不時徇,又可以進乎! 召入拜太子右諭德。 德宗在奉天,奔詣行在,擢祕書少監,改太子右庶子。 三遷檢校祕書少監、 以祕書監致仕,卒。 寧性不能事權右,毅然寡合,執政者惡之,雖直 兼和州刺史,治有狀。後刺史疾之,以 子贊訴其枉,三年始得通。 」遂移疾,滿百日屢 帝還京師 詔御 其 史

吾志直道 |寧居家嚴,事寡姊恭甚。 而已。苟枉而道,三牲五鼎非吾養也。」疾病不嘗藥,時稱 嘗譔家令訓諸子,人一通。 又戒曰:「君子之事親,養志爲大, 知命

守道行誼顯。 四子:贊、質、員、賞。 先是,韓休家訓子姓至嚴。 寧之老,贊爲御史中丞,質右補闕, 貞元間,言家法者,尙韓、穆二門云。 員侍御史,賞監察御史,皆以

盧侶欲重妾罪,贊不聽。 贊字相明, 擢累侍御史, 分司東都。 招與宰相竇參共誣贊受金,捕送獄。 弟賞上冤狀,詔三司覆治,無 中丞

列傳

第八十

穆

筮

崔

邪

財,具獄,欲曲貸吏,贊執不可。 延齡白贊深文,貶饒州別駕。 久之,拜州刺史。 憲宗立,進 之, 獨出爲郴州刺史。 參敗, 召爲刑部郎中, 對延英, 擢御史中丞。 裴延齡判度支,屬吏受

宣數觀察使,卒于官。贈工部尚書。

鹽鐵、轉運諸院擅繫囚,答掠嚴楚,人多死。質奏請與州縣吏參決,自是不冤。後論吐突承璀 質性彊直,舉賢良方正,條對詳切,頻擢至給事中,政事得失,未嘗不盡言。 元和時,

坐與楊憑善,出爲開州刺史,卒。

員字與直,工爲文章。杜亞留守東都,署佐其府,蚤卒。

不宜爲將、憲宗不悅、改太子左庶子。

兄弟皆和粹,世以珍味目之:贊少俗,然有格,爲「酪」;質美而多入,爲「酥」(1);員爲

「醍醐」;賞爲「乳腐」云。

崔邠字處仁,貝州武城人。 父倕,三世一爨,當時言治家者推其法。 至德初, 獻賦行

在、肅宗異其文,位吏部侍郎。

舍人再遷吏部侍郎。 | 邠第進士,復擢賢良方正,授渭南尉,遷補闕。 性温裕沈密,行己又簡儉,憲宗器之,裴垍亦薦別材可宰相。 上疏論。裴延齡姦,以鯁亮知名。 會病、遂 由中書

不拜。 去帽,親導母興,公卿見者皆避道,都人榮之。以母憂解,卒于喪,年六十。 久乃爲太常卿,知吏部尚書銓。故事,太常始視事,大閱四部樂,都人縱觀。 贈吏部尙書,諡 | 州自第

弟酆、郾、郇、鄯、鄲。

日文簡

陛下。 畜積無有。 游畋,內酣蕩,昕曙不能朝。 員外郎,下不敢欺,每擬吏,親挾格,褒黜必當,寒遠無留才。 |郾字||廣略,姿儀偉秀,人望而慕之,然不可狎也。 中進士第,補集賢校書郎。 自山以東百城、地千里、昨日得之、今日失之。西望戎壘、距宗廟十舍、百姓憔悴、 願陛下親政事以幸天下。」帝動容慰謝,遷給事中。 郾進曰:「十一聖之功德,四海之大,萬國之衆,其治其亂,繫於 三遷諫議大夫。穆宗立,荒于 累遷吏部

義。 咨詢,天下之人不知有嚮儒意。」帝重咎謝,咸賜錦、幣。、郾與高重類六經要言爲十篇,上 臣無功,不足副厚恩。」帝慚曰:「殷少間當請益。」高武適在旁,因言:「陛下樂善而無所 敬宗嗣位,拜翰林侍講學士,旋進中書舍人,謝曰:「陛下使臣侍講,歷半歲,不一問經

遷禮部侍郎,出爲號州觀察使。 先是,上供財乏,則奪吏奉助輸,歲率八十萬。 |圏

列

之,以便觀省。

尚書, 諡曰德。 蒙衝,駛追窮躡,上下千里,歲中悉捕平。 輸之勞。 者,歲數萬石,民困於輸, 「東不能膽 改鄂、岳等州觀察使。 私 安暇卹民? 則又輦而致之河。 吾不能獨治, 自察人叛,鄂、岳常苦兵,江湖盜賊顯行。 安得自封?」卽以府常費代之。 又觀察浙西,遷檢校禮部尚書,卒于官。 廖乃旁流爲大敖受粟, 竇而注諸艚。 又詔賦粟輸太倉 郾修治鎧仗,造 民悅、忘 贈吏部

不貸。 用威莫能治。 無步廡,至霖淖,則客蓋而屐以就外位。治賦以寬,經月不答一人。及涖鄂,則嚴法 廖不藏貲,有輒周給親舊,爲治其昏喪。 或問其故, 曰:「陝土瘠而民勞, 吾撫之不暇, 猶恐其擾; | 鄂土沃民剽, 雜以夷俗, 非 政所以貴知變者也。」聞者服焉。 居家怡然,不訓子弟,子弟自化。 室處痺漏, 「峻誅,

五子: 瑶、瑰、瑾、珮、璆。 **瑤任禮部侍郎、浙西、** 鄂岳觀察使。 瑾禮部侍郎、 湖南觀察

医。 瑰、珮俱達官。

|鄯 擢進士,累遷至左 金吾: **衞大將軍**, 暴卒, 以韓約代之。 不閱旬, 李訓亂, 約死於難

世謂酅之亡,崔氏積善報也。贈禮部尚書。

集賢殿學士。再遷吏部侍郎,由宣歙觀察使入爲太常卿。 中書侍 郿 郎, 及進士第, 罷爲劍南西川節度使。 補渭南尉。累除刑部郎中, 宣宗初,以檢校尚書右僕射同平章事, 出副杜元穎西川節度府。 文宗末,擢同中書門下平章事 召入爲工部侍郎、 節度准南,

光德 即其里爲「德星社」云。 里,構便齋,宣宗聞而歎曰:「鄲一門孝友,可爲士族法。」因題曰「德星堂」。 崔氏四世總麻同爨,兄弟六人至三品,邠、郾、鄲凡爲禮部五,吏部再,唐興無有也。 後京兆民 居

部員外郎。 之,答曰:「四方病飢,獨能飽乎? 郎。間一年,再登其科,授渭南尉。 制,願以右職署渠帥。」公綽曰:「若同惡邪;何可撓法。」立誅之,寇亦引去。遷侍御史、吏 ,友,性質嚴重,起居皆有禮法。屬文典正,不讀非聖書。舉賢良方正直言極諫,補校書 柳 公綽字寬,京兆華原人。,始生三日,伯父子華曰:「興吾門者,此兒也。」因小字起之。 時武 元 **衡節度劍南,與裴度俱爲判官,尤相引重。** `」累遷開州刺史,地接夷落,寇常逼其城,吏曰:「兵力不能 歲歉饉,其家雖給,而每飯不過一器,歲豐乃復。或問 召為吏部郎 中。

與心 卑以 乘氣 司太醫,敢告諸御。」天子高其才,遣使謂曰:「卿言『氣行無間,隙不在大』,愛股深者,當置 居慮後,防處事先。 地厚矣,横流潰之。 耳 自 生 流 憲宗喜武 ,嗜慾以萌。 ,疾乃伺之。 心知 人謹 於 功 好愛、能保其身。 內。 了,且 端絜爲隄, 數 心靜樂行,體和道全。 飲食資身,過則生患; 氣離有患,氣完則成。 畋游恣樂,流情蕩志。 出游畋,公綽奏太醫箴以諷曰:「天布寒暑,不 奔射猶 清靜無瑕, 輝光以 敗。 克施 氣 馳騁勞形 巧必喪眞,智實誘情。 衣服稱德, 行 無間, 萬物,以享億年。 新。 、叱吒傷 隙不 修則 寒暑滿天 生 在 氣。 慢。 地,狹肌膚於 謂 聖人在上,各有攸處。 醫之上者,理於未然。 唯 不養其外,前 私於 天高 過 與侈 人。 矣,氛蒙晦 ,心必隨之。 品類 脩 所 旣 之; 好愛在 臣 氣 患

選兵六千屬焉,戒諸校曰:「行營事一決都將。」聽被用畏威,遂盡力,當時服其知權。 廷謂 不聽。 之坐隅。」踰月,拜御史中丞。 且欲署職,以兵法從事。」聽曰:「唯命。」卽以都知兵馬使、中軍先鋒、行營都虞候三牒授之, 「公所以屬鞬負弩,豈非兵事邪?若褫戎容,則兩 吾儒生不知兵邪! 公綽本與裴垍善,李吉甫復當國,出爲湖南觀察使。以地卑濕,不可迎養,求分司東都 後徙鄂岳觀察使。 」卽請自行,許之。 時方討吳元濟,詔發鄂岳卒五千,隸安州刺史李聽。公綽曰:「朝 引兵度江抵安州 :|郡守耳,何所統壹哉?以公世將曉兵,吾 聽以軍禮迎謁。公綽謂曰:

公綽數省問其家,疾病生死厚給之,婦人敖蕩者,沈之江。 軍中感服曰:「中丞爲我知家事,

敢不死戰!」故鄂軍每戰輒克。

使。」帝乃解。以母喪去官。服除,爲刑部侍郎,領鹽鐵轉運使,轉兵部,兼御史大夫。 帝曰:「旣死,不以聞,可乎?」公綽曰:「臣不當奏。在市死,職金吾;在坊死,職左右巡 赴府,有神策校乘馬不避者,卽時搒死。帝怒其專殺,公綽曰:「此非獨試臣,乃輕陛下法。」 元和十一年,爲李道古代還,除給事中。 李師道平, 遣宣諭鄆州, 復命, 拜京兆尹。 方

數,由是更得紓罪。宦官共惡疾之。改吏部侍郎,遷御史大夫。韓弘病,自河中還,詔百 令子姓傳言耶?」弘懼,挾扶以出。 官問疾,弘遣子辭不能見,公綽謂曰:「上使百司省候,是謂異禮,宜力疾以見公卿,安可臥 麗置多闕。敕使衣緋紫者,所乘至三四十騎;黃綠者,不下十數。東不得視券,隨口輒 驛馬盡,乃掠奪民馬。怨嗟驚擾,行李殆絕。 請著定限,以息其弊。」有詔中書條檢定 長慶元年,復爲京兆尹。時幽、鎭用兵,補置諸將,使馹係道。公綽奏曰:「比館遞匱

姦吏壞法,法亡。」誅舞文者。其廢馬害圉人,公綽殺之。或言良馬可愛,曰:「安有良馬而 納賄、舞文二人同繁獄。縣令以公綽素持法,謂必殺貪者,公綽判曰:「贓吏犯法, 改禮部尙書,以祖諱換左丞。俄檢校戶部尙書、山南東道節度使。 行部至鄧,縣吏有 , 法在;

列傳

第八

十八

柳公綽

害人乎?

論所宜, 公綽曰:「尊毆卑,非鬭也,且子在,以妻而戮其母,不順。」遂減論 刑部尙書,俄拜邠寧節度使。 「自顱門。」時朱克融方叛,遽曰:「惜哉,藥自賊境來,雖驗何益!」卽棄藥而逐道士。 止之,答曰:「高章始去台宰,方鎭重宰相,所以尊朝廷也。」有道士獻丹藥,問所從來,曰: 寶曆 元年,就遷檢校左僕射。牛僧孺罷政事,爲武昌節度使,公綽具軍容伏謁,左右諫 因韶屯營緩急悉受節度。 先時神策諸鎭列屯部中, 不聽本道節制, 復爲刑部尚書。 京兆獄有姑鞭婦至死者, 故虜得窺間。 府欲殺之。

勇武喜鬭,爲九姓、六州所畏。公綽召其酋朱邪執宜,治廢栅十一,募兵三千留屯塞上,其妻、 母來太原者,令夫人飲食問遺之。沙陀感恩,故悉力保鄣 意,闢牙門,令譯官引謁,宴不加常。 暢德之,出涕,徐驅道中,不妄馳獵。 李暢以馬萬匹來市,所過皆厚勞,飭兵以防襲奪。至太原,公綽獨使牙將單騎勞問,待以至 大和四年,爲河東節度。 遭歲惡,撙節用度,輟宴飲,衣食與士卒鈞。 北虜遣梅祿將軍 脛北有沙陀部,

乃曰:「爲我白宰相,徐州專殺」李聽親吏,非用高瑀不能安。」因瞑目不復語,後二日卒,年六 以病乞代,授兵部尙書,不任朝請。忽顧左右召故吏韋長,衆謂屬諉以家事。 及長至,

贈太子太保,盜日元。

爲育其女嫁之。嘗曰:「吾莅官未嘗以私喜怒加於人,子孫其昌乎!」與錢徽、蔣义、杜元穎 薛存誠善,取士如許康佐、鄭朗、盧簡辭、崔璵、夏侯孜、李拭、韋長,皆知名顯貴云 公綽居喪毀慕,三年不澡沐。 事後母 薩邁甚,雖姻屬不知非薛所生。 外兄薛宮早卒,

子仲郢。

其守。 執日:「賊不死, 誣里 幕府,有父風矩,僧孺歎曰:「非積習名敎, 長工文,著尚書二十四司箴,爲韓愈咨賞。 人斫父墓柏,射殺之,吏以專殺論,而中尉護免其死,右補闕蔣係爭,不省。 仲野字諭蒙。 是亂典刑。」有韶御史蕭傑監之,傑復爭。 母韓,即皋女也,善訓子,故仲野幼嗜學,嘗和熊膽丸,使夜咀嚥以助勤。 安及此邪?」入爲監察御史,遷侍御 元和末, 及進士第,爲校書郞。 遂獨詔京兆杖之,不監。 牛僧孺辟武昌 ... 史。 仲野監罰, 有禁卒 朝廷嘉

禁私 吳湘 伏。 製者。 會昌 獄得罪,仲郢切諫,宰相李德裕不爲嫌,奏拜京兆尹。 遷左諫議大夫。武宗延方士築望仙臺,累諫諄切,帝遣中人愧諭。 一初,累轉吏部郎中。 北司吏入粟違約,仲野殺而尸之,自是人無敢犯,政號嚴明。 時韶減官冗長者,仲郢條簡狹日,損千二百五十員,議者厭 置權量於東西市,使貿易用之, 御史崔元藻以覆按 會廢浮屠法,盡壞

五〇二三

列

五

官以爲言,改右散騎常侍,知吏部銓。 受惡官者。 銅象爲錢。 中書舍人統干泉訴甥劉詡毆其母,詡爲禁軍校,仲郢不待奏,即捕取之,死杖下,宦 又當調者,持關簿令自閱,即擬唱,更無能爲姦 仲郢爲鑄錢使 了,更請以字識錢者,不答。 德裕頗抑進士科, 仲郢無所徇。 旣,淮南鑄會昌字,久之,僧反取爲鍾 是時,以進士選,無

年 擢 以寬惠爲政。或言不類京兆時,答曰:「輦轂之下,先彈壓;郡邑之治,本惠養。烏可類 劍 相 「有本色官,若委錢穀,名分不正。 召爲吏部 ,薦授河南尹,召拜戶部侍郎。 宣宗初,德裕罷政事,坐所厚善,出爲鄭州刺史。 東川節度使。大東邊章簡挾勢肆貪,前帥不能制,仲野因事殺之,官下肅然。 侍郎,俄改兵部,領鹽鐵轉運使。 帝悟,乃賜縑遣還。 揮罷,它宰相惡仲郢,左遷祕書監。數月,復出河南尹 有劉習者,以藥術進,韶署鹽官。仲郢以爲 周墀鎮滑,而鄭爲屬郡, 高 其績;及 乎? 居五

令權 為天平 以 檢 奔以罪 校 節 中十二年,辭疾,以刑部 尙 度 書 使。 左僕射 仲郢杖之,六日死,貶雷州刺 初 東都留守。 ·仲郢為諫議大夫,後每遷,必烏集升平第,庭樹戟架皆滿,五 尚書罷使,轉戶部,封河 會盜發父墓, 史。 棄官歸 頃之,以太子賓客分司 華原。 東縣男, 徙 華州 爲山南西道節度使。 刺史,不 東都, 拜。 起爲 虢州 日乃散。及 咸 通 刺史, 五. 南鄭 年,

是不復集。

卒於鎭。

濟單弱。 帶正色,服用簡素。 質 《爲推官,知蘇州院。 仲郢方嚴,尙氣義,事親甚謹。李德裕貶死,家無祿,不自振;及領鹽鐵,遂取其兄子從 每旱潦,必貸匱蠲負, 父子更九鎭,五爲京兆,再爲河南,皆不奏瑞,不度浮屠。 宰相令狐綯持不可, 里無逋家。 衣冠孤女不能自歸者,斥稟爲婚嫁。 乃移書開諭綯,綯感寤, 從之。 每私居內齋,束 急於摘貪吏, 在朝,非慶

旁 司馬遷、班固、范曄史皆一鈔 7錄仙 家有書萬卷,所藏必三本:上者貯庫, 佛書甚衆,皆楷小精眞,無行字。 \<u>魏、晉及南北朝史再</u>, 其副常所閱,下者幼學焉。 又類所鈔它書凡三十篇, 仲郢嘗手鈔六經, 號柳氏自備

子蹼、炷、屋、玭。

**弔不至宰相第**。

其迹略相同。

實 以 一自餘 大政、大祥異、侵叛戰伐隨著之,閏位者附見其左。 璞字韜玉,學不營仕。 史家皆差」。蔣係以爲然。 著春秋三氏異同義,又述 終著作郞。 天祚長曆, 常謂「杜征南春秋後序述紀甲曆爲得 斷自漢武帝紀元, 爲編年,

**珪字**交玄。 列 第 八 + 大中中, 柳 與壓繼擢進士,皆秀整而文,杜牧、李商隱稱之。 公 綽 五〇二五 杜悰鎭西川

弘文館 職爲 在幕府,久乃至。 尉 少卿。 不 町, ,遷右拾遺, 謂 不孝則 會悰徙淮南,歸其積俸,珪不納;悰舉故事爲言, 而給事中蕭做、鄭裔綽謂珪不能事父,封還其詔。 誣 請勒就養」。詔可。 始,公綽治家埓韓滉,及珪被廢,士人愧悵。 卒辭之。 仲郢訴其子「冒處諫 以藍田尉直

衞

未幾, 壁字 賓玉。 軍亂。 擢右補闕,再轉屯田員外郎。 馬植鎭汴州,辟管書記。 又從李瓚桂州,規止其不法,瓚不聽,乃拂衣去。 僖宗幸圖,授翰林學士,累遷右諫議大夫。

中書 以相,中官譖玭煩碎,非廊 副 外 鄓 使。 舍人、御史中丞。 地 廨中橘熟,既食, 以經明補祕書正字,由書判拔萃,累轉左補闕。 提貶高要尉 、班三疏 文德元年,以吏部侍郎脩 乃納直於官。黃巢陷交、廣,逃還,除起居郎。巢 廟器, 中理。 乃止。坐事貶瀘州刺史,卒。 提後得稿嗟歎,以爲其言雖自辨不 國 史,拜 高湜再鎭昭義,皆表爲副,擢刑部員 御 史大夫。 光化初,帝自華還,詔復官爵。 直清有父風,昭宗欲倚 加 入京師,奔行 也。 出爲嶺南 在 一,再 節 遷 度

班常述家訓以戒子孫曰:

夫門地高者, 一事墜先訓, 則異它人, 雖生可以苟爵位, 死不可見祖先地下。 門

則福 名。 來,莅官則絜己省事,而後可以言家法,家法備,然後可以言養人。 基 獨農夫鹵莽種之而怨天澤不潤,雖欲弗餒,可乎? 余幼聞先公僕射言: 立己以孝悌爲 不得不至,爲學不得不堅。 阅則自 ],恭默爲本,畏怯爲務,勤儉爲法。 肥家以忍順,保交以簡恭,廣記如不及,求名如儻 至。 憂與禍不偕,絜與富不並。 驕 ,族盛則人窺嫉。 又曰:「賀者在門, 弔者在闆。」言受福則驕奢, 驕奢則禍至。 夫士君子生於世、己無能而望它人用、己無善而望它人愛、 實蓺懿行,人未必信;纖瑕微累,十手爭指矣。所以修己 董生有云:「弔者在門,賀者在閭。」言憂則恐懼,恐懼 直不近禍,廉不沽 故世族遠長與命

嶺表。 盛 報吾婦, 唐夫人事姑孝,每旦,櫛縱笄拜階下,升堂乳姑,長孫不粒食者數年。 位豐約,不假問龜蓍星數,在處心行事而已。 實爲名閥。 昭 今勢利之徒,捨信誓如返掌,則襲之蕃衍,乃天之報施也。 厚豐,必有令匹,子孫將遍天下,宜北歸。」家人遂不敢議。 及北還, 國里崔 冀子孫皆得如婦孝。 山南琯子孫之盛, 女已踰笄。 天后時, 宰相魏玄同選尚書之先爲壻, 其家議無以爲衣食資, 然則崔之門安得不大乎?東都仁和里裴尚書寬子孫衆 仕族罕比。 山南曾祖母長孫夫人年高無齒, 願下髮爲尼。 未成婚而魏陷羅織獄 及荆門,則裴齎裝以 余舊府高公先君兄 有一尼自外至, 曰: 一日病, 言無以 家徙 祖母

弟三人,俱居清列,非速客不二羹胾,夕食齕蔔瓠而已,皆保重名於世。

飾,涯曰:「爲郎吏妻,首飾有七十萬錢,其可久乎!」馮爲賈相國餗門人,賈有奴頗橫, 豈於女惜?但釵直若此,乃妖物也,禍必隨之。」女不復敢言。後釵爲<br />
馮球外郎妻首 於物邪。馮以卑位貪貨,不能正其家,忠於所事,不能保其身,不足言矣。 賈之奴害客 曲。 寒,奉地黃酒三杯。」馮悅,盡舉之。俄病渴且咽,因暴卒。賈爲歎息出涕,卒不知其 馮愛賈,召奴責之,奴泣謝。 未幾,馮晨謁賈,賈未出,有二青衣齎銀罌出,曰:「公恐君 之易如燎毛 不由祖考忠孝勤儉以成立之,莫不由子孫頑率奢傲以覆墜之。成立之難如升天,覆墜 致繁罪, 于牆廡間而 明年,王、賈皆遘禍。噫,王以珍玩爲物之妖,信知言矣,而不知恩權隆赫之妖甚 永寧王相國涯居位,竇氏女歸,請曰:「玉工貨釵直七十萬錢。」王曰:「七十萬錢, 後舒亦及禍。今世人盛言宿業報應,曾不思視履考祥事歟。夫名門右族,莫 不 知,欲終始富貴,其得乎?舒相國元興與李繁有隙,爲御史,鞫譙獄,窮

來,門祚衰落,基構之重,屬於後生。 有根無葉,或可俟時;有葉無根,膏雨所不能活也。 余家本以學識禮法稱於士林, ,比見諸家於吉凶禮制有疑者,多取正焉。 夫行道之人, 德行文學爲根株, 正直剛毅爲柯葉。 至於孝慈、友悌、忠信、篤行,乃食 喪亂以

之醯醬,可一日無哉?

其大概如此。

帝改容,悟其以筆諫也。 員外郎。 記。 工祝、願徙散秩。乃改右司郎中、弘文館學士。 因入奏,穆宗曰:「朕嘗於佛廟見卿筆蹟,思之久矣。」即拜右拾遺、侍書學士 公權字誠懸,公綽弟也。 帝問公權用筆法,對曰:「心正則筆正, 公綽嘗寓書宰相李宗閱,言家弟本志儒學,先朝以侍書見用,頗類 年十二,工辭賦。 元和初,擢進士第。 筆正乃可法矣。」時帝荒縱, 故公權及之。 李聽鎭 夏州,表爲掌書 一,再遷 司封

明賞罰 舉袂曰:「此三澣矣!」學士皆賀,獨公權無言。帝問之,對曰:「人主當進賢退不肖,納諫諍 蠟液濡帋繼之。 公權益不奪,帝徐曰:「卿有諍臣風,可屈居諫議大夫。」乃自舍人下遷,仍爲學士知制誥。 復無停思,天子甚悅,曰:「子建七步,爾乃三焉。」常與六學士對便殿,帝稱漢文帝恭儉, 公權爲數十言稱賀,帝曰:「當賀我以詩。」宮人迫之,公權應聲成文,婉切而麗。 文宗復召侍書,遷中書舍人,充翰林書詔學士。 服澣濯之衣,此小節耳,非有益治道者。」異日,與周墀同對,論事不阿,墀爲惴恐, 從幸未央宮,帝駐輦曰:「朕有一喜,邊戍賜衣久不時,今中春而衣已給。」 **嘗夜召對子亭,燭窮而語未盡,宮人以** 詔令再賦 因

謂獻二女乃有是除,信乎?」帝曰:「女自參承太后,豈獻哉?」公權曰:「疑嫌間不可戶曉。」 倚父從子,太皇太后季父,官無玷郵,自大金吾位方鎭,何所更議? 」答曰:「**哎誠勳舊**,然人 因引王珪諫廬江王妃事。是日,帝命中官自南內送女還敗家。其忠益多類此。遷學士承旨。 開 轉工部侍郎。 召問得失,因言:「郭畋領邪寧,而議者頗有臧否。」帝曰:「畋,

稍耄忘,先羣臣稱賀,占奏忽謬,御史劾之,奪一季俸,議者恨其不歸事。」咸通初,乃以太子 子詹事,改賓客。累封河東郡公,復爲常侍,進至太子少師。 太保致仕。卒,年八十八。贈太子太師。 武宗立,罷爲右散騎常侍。宰相崔珙引爲集賢院學士,知院事,李德裕不悅,左授太 大中十三年,天子元會,公權

嘗書京兆西明寺金剛經,有鍾、汪、歐、虞、褚、陸諸家法,自爲得意。凡公卿以書貺遺,蓋鉅 律,而不喜奏樂,曰:「聞之令人驕怠。」其書法結體勁媚,自成一家。文宗嘗召與聯句,帝 獨 師 曰:「人皆苦炎熱,我愛夏日長。」公權屬曰:「薰風自南來,殿閣生餘凉。」它學士亦屬繼,帝 行。當時 諷 宣宗 |公權者,以爲詞情皆足,命題於殿壁,字率徑五寸,帝歎曰:「鍾、王無以尙也!」其遷少 公權博賈經術,於詩、書、左氏春秋、國語、莊周書尤邃,每解一義,必數十百言。 大臣 召至御座前,書希三番,作眞、行、草三體,奇祕,賜以器幣,且詔自書謝章,無限眞、 [家碑誌,非其筆,人以子孫爲 不孝。 外夷入貢者,皆別署貨貝曰:「此購柳書。」 通音

羽化矣!」不復詰。唯研、筆、圖籍,自鐍祕之。 萬,而主藏奴或盜用。 嘗貯盃盂一笥,縢識如故而器皆亡,奴妄言叵測者,公權笑曰:「銀盃

收付獄,劾發宿罪,杖殺之,一邑震伏。載不敢怨,遣吏厚謝。預知其終,自爲墓銘 略足。宰相元載有別墅,以奴主務,自稱郎將,怙勢縱暴,租賦未嘗入官。 市 以子華爲京兆少尹,尹惡其剛方,沮解之,遂爲昭應令,檢校金部郞中、脩宮使。設棘圍 ,徇邑中曰:「民有得華淸瓦石材用,投圍中,踰三日不還者死。」不終日,已山積矣,營辦 子華,公綽諸父也。 始辟嚴武劍南府,累遷池州刺史。代宗將幸華清宮,先命完葺,欲 子華因奴入謁 於

物、熟生物、不以元氣佐喜怒耳。」位光祿少卿。公器生遵,遵生燦,別有傳。 子公器、公度。公度善攝生,年八十餘,有彊力。常云:「吾初無術,但未嘗以氣海煖冷

歲,間關至江左,逮長,有奇志。十八擢進士,調句容主簿。節度使韓滉剛嚴少許可,獨奇 於陵,謂妻柳曰:「吾求佳壻,無如於陵賢。」因以妻之。辟鄂岳、江西使府。 楊於陵字達夫,本漢太尉震之裔。父太清,倦宦,客河朔,死安祿山之亂。於陵始六 滉居宰相,領財

陵

弔宣 京兆李實恃恩暴橫, 賦 外 鄓。 武 、幽州、節度獻遺無所納。 震中 以吏部 外。 未幾 判南曹 於陵 遷右司 隨 於陵與所善許孟容不離附 選者恃與宰相親,文書不如式,於陵駁其違,宰相怒,以 府罷,避親不肯 。郎中,換吏部,出爲絳州 拜華州刺史,遷浙東觀察使。 調, 退廬建昌,以文書自娛樂。 , 爲所譖 刺史。 短, 德宗雅聞其名, 徙祕書少監 越人飢, 請出米三十萬石 滉卒,乃入爲膳部員 留拜 帝 中書舍 崩 南 宣 曹 遺 人。 郞 拯 詔 出 於 時 使

聞京師,憲宗 於陵被詔程其文,居第一,宰相惡其言,出爲嶺南節度使。 貧民,政聲流聞 遺,肯私 失,敎民 :,姦人無所影賴,京師豪右大震。 入爲京兆尹。 '陶瓦易蒲屋,以絕火患。 官錢邪 不能 ?。」宰相襲垍亦爲帝別白言之,乃授吏部侍郞,而遂振終得罪 無惑,有詔罷歸。 先是,編民多竄北軍籍中,倚以橫閭里。 監軍許遂振者,悍戾貪肆,憚於陵不敢撓以私 遂振領留事, 答吏剔抉其贓, 吏呼曰: 「楊公尙拒他方路 遷戶部侍郎。 元和 初, 辟韋詞、李翺等在幕 於陵請限丁制,減三丁者不得 牛僧孺等以賢良方正對策 "府,容訪得 則 爲飛語

建言:「他官 三考官止較科目選 初 吏部程 1但第判 判,別韶 ,至常調悉還吏部。 ,能否,不知限員,有司計員爲留遣之格,事不相謀,莫如勿置。」於是有詔 官參考,齊抗當國,罷之。 又請修甲曆,南曹置別簿相檢實, 至是,尚書鄭餘慶移疾,乃循 吏不能爲姦。 舊制。 於陵 始

奏選者納直給符告,居四年,凡調三千員,時謂爲適。

部侍 騰牒度支,以餉道乏,及戰敗,詔責之,指以爲言。帝怒,貶於陵郴州刺史。徙原王傅,復以戶 趣使上道。還奏,帝悅其能。會浙西觀察使李翛死,皇甫鎛素忌於陵,薦以代翛,帝不之可。 郞 以兵部棄御史大夫,判度支。 知吏部選。李師道平,詔宣慰淄青。朝廷始議分其地,而劉悟節度滑州,未出鄆,於陵 王師討淮西, 於陵用所親爲供軍使、主唐、鄧,而高霞寓

以尙書左僕射致仕,詔賜實俸,讓不受。於陵器量方峻,進止有常度, 穆宗立,遷戶部尚書,爲東都留守。 數上疏乞身,不許。授太子少傅,封弘農郡公。 節操堅明,始終不失 俄

一,時人尊仰之。 |大和四年卒,年七十八。 册贈司空,諡日貞孝。

四子:景復仕至同州刺史,紹復中書舍人,師復大理卿,中子嗣復位宰相,自有傳。

薛 盈 珍誣南仲不法, 總坐貶泉州別駕。 馬總字會元, 系出扶風。少孤窶, 盈珍入用事,福建觀察使柳冕希旨欲誅之,會刺史 不妄交游。貞元中, 辟署滑州姚南仲幕府, 監 軍

穆贊保護乃免,徙恩王傅。

元和 列 中,以虔州刺史遷安南都護,廉淸不撓,用儒術教其俗,政事嘉美,獠夷安之。 傳 第 八 + 馬 揔 校 勘 記 五〇三三 建

貊風。 徙忠武,改華州防禦、鎭國軍使。李師道平,析鄆、曹、濮等爲一道,除揔節度,賜號天平軍。 御史大夫,副裴度宣慰淮西。 二銅柱於漢故處,鑱著唐德,以明伏波之裔。徙桂管經略觀察使,入爲刑部侍郎。十二年,兼 擦爲設教令,明賞罰,磨治洗汰,其俗一變。始奏改彰義爲淮西,尋擢拜淮西節度使, 吳元濟禽,爲彰義節度留後。 蔡人習僞惡,相掉計,獲戾有夷

著頗多。卒,贈右僕射,諡曰]懿。 抱,復詔還鎭。 二年,檢校尙書左僕射,入爲戶部尙書。 揔篤學,雖吏事倥偬,書不去前,論 長慶初,劉總上幽、鎭地,詔總徙天平,而詔摠還,將大用之。會總卒,穆宗以軍人附賴

蕃衍。 穆、崖、柳代爲孝友聞家,君子之澤遠哉! 贊曰:巢义恃正義,觸羣不肖,謀不以權,遂喪其身。 寧、哪皆所謂邦之司直者,後世卒 公綽仁而勇,於陵方重,揔沈懿,皆有大臣風,才堪宰相而用不至,果時有不幸邪?

校勘記

(1) 質美而多入爲酥 「入」,冊府卷七八三作「文」。

## 唐 卷一百六十

#### 列 傳 第八十九

衞次公 歸崇敬 洙 登 融 薛戎 奚陟 放 胡証 崔衍 丁公著 盧 景 亮 王源中 崔弘禮 薛苹 崔玄亮 膺

#### 王質 殷侑 盈孫 王彦威

直講。 以貧求 授左拾遺。 歸崇敬字正禮,蘇州吳人。 解。 天寶中,舉博通墳典科,對策第一,遷四門博士。 肅宗次靈武, 歷同州長史、潤州別駕。 再遷起居郎、贊善大夫、史館脩撰、兼集賢殿校理,脩國史、儀注。 未幾,有事橋陵、建陵,召還參掌儀典,改主客員外郎, 有詔舉才可宰百里者, 復策高等,

治禮家學,多識容典,擢明經。

遭父喪,孝聞鄉里。

調國子

代宗幸陝,召問得失,崇敬極陳:「生人疲敝,當以儉化天下,則國富而兵可用。」時百官 列 傳 第 八 + 九 歸 崇 敬 五〇三五

復兼脩撰

議:「五人帝於國家爲前後,無君臣義,天子祭宜毋稱臣,祭而稱臣,於天帝無異。」又「春秋 釋奠孔子,祝版皇帝署,北面揖,以爲太重。宜准武王受丹書於師尚父,行東面之禮。」事皆 祀天地。」 詔禮官儒者雜議。 崇敬議:「禮以先立秋十八日迎黃靈,祀]黃帝,黃帝於五行爲 都之置。且商遷都前八後五,不必每都別立神主也。若曰神主已經奉祀,不得一日而廢, 猶天無二日,土無二王也。 東都太廟,本武后所建,以祀諸武,中宗去主存廟,以備行幸遷 朝朔望,皆服袴褶,崇敬非之,建言:「三代逮漢無其制,隋以來,始有服者,事不稽古,宜 土,而火爲母,故火用事之末而祭之,三季月則否。彭祖牽緯侯說,事詭不經,不可用。」又 則桑主以虞,至練祭而埋之,明是不然。」時有方士巨彭祖建言:「唐家土德,請以四季月郊 停。」詔可。 。又言:「東都太廟不當置木主,按禮,『虞主用桑,練主用棸』,作栗主則瘞桑主,

崇敬 答曰:「今共舟數十百人,我何忍獨濟哉?」少選,風息。 晃亂 寰 彙惟 衾 衣,東夷傳其淸德。 大曆初,授倉部郎中,充弔祭册立新羅使。 廣州 , 監察御史憚之, 請望祀 還,授國子司業、兼集賢學士。八年,遣祀衡山, 而還,崇敬正色曰:「君命豈有畏邪? 海道風濤,舟幾壞,衆驚,謀以單舸載而免, 先是,使外國多齎金帛,貿舉所無, 未至,而

皇太子欲臨國學行齒胄禮,崇敬以學與官名皆不正,乃建議,

子學。隋大業中,更名國子監。今聲明之盛,辟雍獨闕,請以國子監爲辟雍省。祭酒、 爾。 司業之名,非學官所宜。業者,栒簾大版,今學不敎樂,於義無當。 請以祭酒爲太師氏, 在禮爲澤宮,故前世或曰璧池,或曰璧沼,亦言學省。漢光武立明堂、辟雍、靈臺, 古天子學日辟雍。以制言之, **壅水環繚如璧然;以誼言之,以禮樂明和天下云** 

位三品;司業爲左師、右師,位四品。

莊重可為師表者,委四品以上各舉所知,在外給傳,七十者安車蒲輪敦遣。 教,請皆罷 學、四門三館,各立五經博士,品秩、生徒有差。 經,周官、儀禮、毛詩爲中經,倘書、周易爲小經,各置博士一員。公羊、穀梁春秋共準 中經,通置博士一員。博士兼通孝經、論語,依章疏講解。德行純絜、文詞雅正、形容 近世明經,不課其義,先取帖經,顓門廢業,傳受義絕。 舊博士、助教、直講、經直、律館算館助 請以禮記、左氏春秋爲大 國子、太

益。 入與坐,割脩鹹酒,三爵止。乃發篋出經,摳衣前請,師爲說經大略,然後就室,朝晡請 師二時堂上訓授道義,示以文行忠信、孝悌睦友。 教授法。學生謁師,贄用殿脩一束,酒一壺,衫布一裁,色如師所服。 旬省,月試,時考,歲貢,視生徒 師出中門,延

列

傳第八十九

歸崇敬

變,徙之四門;四門不變,徙本州之學;復不變,繇役如初,終身不齒。 及第多少爲博士考課上下。有不率教者、檟楚之、國子移禮部、爲太學生; 雖率教, 太學又不

學不成者,亦歸之本州

兼收焉。 天下鄉貢如之。 習業考試,並以明經爲名,得第授官,與進士同。 通 ;策三道,以本經對,通二爲及第。其孝行聞鄉里者,舉解具言,試日義闕一二,許 禮部考試法。請罷帖經。於所習經問大義二十而得十八,論語、孝經十得八, 爲

有 詔 尚書省集百官議。 皆以習俗久,制度難分明,省禁非外司所宜名,獨宜世職者稱氏,國

學非世官,不得名辟雍省、太師氏。大抵憚改作,故無施行者。

常侍,充皇太子侍讀,又兼普王元帥參謀,封餘姚郡公。田悅、李納稟命,持節宣慰,稱旨。 八十八,贈尙書左僕射,諡曰宣。 表歸上冢,寵賜繒帛,儒先以爲榮。 坐史給稟錢不實,貶饒州司馬。 論撰數十篇。 遷工部尙書,仍前職。 德宗立, 召還, 復拜國子司業, 稍遷翰林學士、左散騎 年老,以兵部尚書致仕。

子登。

登字沖之,事繼母篤孝。 大曆中,舉孝廉高第。 貞元初,策賢良,爲右拾遺。 裴延齡得

進趨,自喜得顯官,惟登與右拾遺蔣武退然遠權勢,終不以淹晚槪懷。 處。」故同列有所諫正,輒聯署無所回諱。 幸,德宗欲遂以相,右補闕熊執易疏論之,以示登,登動容曰:「願竄吾名,雷霆之下,君難 轉右補闕、起居舍人,凡十五年,僚類有出其下而 遷兵部員外郎 獨

諸王 太子少師,諡曰憲 納諫爭,內外傳爲讜言。 一侍讀,獻龍樓箴以諷。 順宗爲皇太子,登父子侍讀,及卽位,以東宮恩超拜給事中,遷工部侍郎,復爲皇太子、 後判國子祭酒事,進工部尚書,累封長洲縣男。卒,年六十七,贈 徙左散騎常侍,入謝,憲宗問政所先,登知帝睿而果于斷,勸順

|登服幾死,訊之,乃未之嘗,人皆爲怒,而|登不爲愠。 登性温恕,家僮爲馬所踶,笞折馬足,登知,不加責。 常慕陸象先爲人,世亦許其類云。 有遺金石不死藥者,紿曰已嘗,及

子屬

刻, 家,中外之財皆陛 初, 生人受弊, 罪始周仁。 拜御 融字章之,元和中,及進士第,累遷左拾遺。 史中丞。 下府庫,周仁陳小利,假異端,公違詔書,徇私希恩。 湖南觀察使盧周仁以南方屢火, 請 重責,還所進,代貧民租入。」詔不從,置錢河陰院以虞水旱。 事文宗爲翰林學士,進至戶部侍郎。 取羨錢億萬進京師。 恐海內效之,因緣漁 融劾奏:「天下一 開成

列傳

第八十

九

歸

崇

皶

奚陟

故益 鄎。 錢 八千萬,俱貶嶺 益所 歲間 止 初 貶 海州 |犯與盧元中、姚康孰甚。」對曰:「元中等枉失庫錢,益所坐子弟受賄,事異法輕 , 出 部 爲 員 一多軍。 山南 外 南尉。 鄓 盧 西道節度使,徙東川。 融遷京兆尹 元中、左司員外郎判戶部案姚康受平糴官秦季元絹六千 數年, 金部員外郞韓益判度支,子弟受財三百萬 、,李固言爲相,惡之,徙祕書監。 還,歷兵部尙書,累封晉陵郡公。 固言罷 ,未入者半。 擢權知兵部侍 迍 貸乾 帝問 疫

會昌 後 儒 臣 少 朝廷禮典多本融議。 辭疾,以太子少傅分司東都。 大中七年,卒, 贈

尙書左僕射。

翰林 拜。 淸 麗 科, 學士 奚陟 楊炎輔政, 字殷卿 授弘文館校 一,不就 召授 職。 ,其先自譙亳 賊平 左拾遺。 書 郎。 , 改 德宗 太子 西徙,故爲京兆人。少篤志, 居親喪,毀瘠過禮。朱泚反,走間 立 司 , 議 諫議大夫崔 郎,歷金部、 河圖 吏部員外。 持節使吐蕃 通羣書。 道及車駕于 會左右 表陟 大曆末, 擢進士、文辭 丞 缺 自 ,轉左 興元,拜 副 ,以親老辭不 司 起 郎 居郎、 中。

史倚宰相勢,常姑息,獨陟遇之無假借。 貞元 八年, 遷中書舍人。 於是江南、 准 先是,右省雜給視職田稟, 西皆大水, 詔陟勞問 循尉 主事與拾遺等, 所 至 人人便安。 陟以奉 中

有之,陟均舍寮無 稍爲率, 由是更官有差。 **深厚薄。** 雖細務,皆身親其勞,久益疆力,人以爲難。 中書令李晟有紙筆猥料積于省,它日以遺舍人,而雜事舍人常私

以險文。陟持平無所上下,具獄上,且言「京兆錢給縣館傳,餘以度支符用度略盡」。 | 克旣 乾沒京兆錢六十八萬緡,請付比部鈎校。 遷刑部侍郎。 京兆尹李充有美政,裴延齡惡之,誣劾沈比陸贄,數遺金帛,當抵罪,又 時郎中崔元翰怨贄,揣延齡指,逮繫搒掠甚急,內

盧從愿也。 尚書 **陟尋知吏部選事,遷侍郞。** 十五年,病癰,帝遣醫療視,敕曰:「陟,賢臣,爲我善治之。」卒,年五 **銓綜平允,時謂與|李朝隱略等,不能擿發淸明如裴行儉、** 十五,贈禮

免,元翰不得意,以恚死。

陟 子敬玄,位左補闕。 」少自厎厲,著名節。 常薦權德輿爲起居舍人知制誥,楊於陵爲郞中,其後皆有名。

崔衍字著,深州安平人。

列

傳

第

八

+

九

崔

ŴΤ

父倫 字敍 ,居父喪,跣護柩行千里,道路爲流涕,廬冢彌年。 服除,及進士第, 歷吏部

年七十一,贈工部尙書,諡 員 外 忠 郞 逼 卽 |為書約城中降,|倫不從,更囚邏娑城,閱六歲,終不屈,乃許還。 具陳虜情僞、山川險易,指畫帝前,人服其詳。遷尙書左丞,以疾改太子賓客。卒, 安祿 長安令, 山 反 封武邑縣男。 陷 于 、賊,不汙僞官, 日樹。 寶應二年, 使子弟間表賊事。 以右 庶子使吐蕃 賊平 • ·,下遷晉州長 **虜**背約, 代宗見之, 留二歲, 史。 爲 執 李 齊物 |倫

吾給。」倫怒, 衍 」倫悟, 李 ,天寶末擢明經,調富平尉。 益 謹 蘇是潛 召附 歲爲李子郃償 !無入。 將袒 而鞭之,衍涕泣 調 清源 負不 勝計 令 繼母|李不慈,|倫自吐蕃歸,|李弊衣以見,問故,曰:「衍 勸民 故 無所陳。 官刺 力田 史, ,懷附流亡,觀察使馬燧表其能 妻子僅 倫弟殷趨 白「衍 寒 所稟舉送夫人所 ,徙美原。 尚 何

衍 支减 亡,不蠲 九 前 賦 歷 恵 贈工部尚書。 刺 朝 滅 遷宣 史無發明,公當止 虢 廷不 租 額 二州。 歙 · 矜貸 八人無 池 觀 也。 虢 察使, 生 |彷儉約畏法,室無妾媵,祿稍周於親族, 居陜、 理。 陛 一。」所不 簡靜 下 華間 臣見長 拔臣 爲 大州 聽,復奏:「州 百 而 (吏之患,在因循不 姓 賦 所懷。 寧欲 数倍 入, 衍白 視民困 幕府奏聘皆有名士, 部多巖田 而 **|**太重。 · 以 聞 顧望不 , 不不 叉郵 裴延齡領度支,方聚斂, 葬埋嫁娶,倚以濟者數十家。 患 言哉? 傳 陛 劇道 下 後多顯 」德宗公其 不 屬歲 憂卹 于時。 也; 無 秋 患 卒, 爲 申 民 舉流 請 私 詔

及卒,不能蔵喪,表諸朝,賜賻帛三百段,米栗稱之。

錫凡十八品,皆倍直市于州,民匱,多逃去,衍至,蠲革之。居十年,嗇用度,府庫充衍。及 |桁有惠在民,言狀,元和元年,詔書褒美,賜一子官云。 諡曰懿。 1學贊代州,以錢四十萬緡假民賦,故雖旱,人不流捐,由|衍蓄積有素也。 先是,天下以進奉結主恩,州藏耗竭,韋皋、劉贊、裴肅爲之倡。 贊死,衍代之。 路應爲觀察使,以 舊貢金

|李泌劾景亮等嘗衆會,漏所上語言,引善在己,即有惡歸之君。帝怒,貶爲朗州司馬,質亦斥 不深。」帝然之。景亮志義崒然,多激發,與穆質同在諫爭地,書數上,鯁毅無所回。 荆 去,廢抑二十年。 南 ,表爲枝江尉,掌書記。入遷右補闕。 盧景亮字長晦,幽州范陽人。少孤,學無不覽。 至憲宗時,由和州別駕召還,再遷中書舍人。 朱泚反,景亮勸德宗曰:「陛下罪己不至,則 第進士、宏辭,授祕書郎。 張延賞節度 宰相 感人

項以來至唐, 剟治道之要, 著書上下篇, 號三足記。 切指當世。 景亮善屬文,根於忠仁,有經國志,嘗謂:「人君足食足兵而又得士,天下可爲也。」乃興 公卿伏其達古今云。 元和初卒, 贈禮部侍郎。 又作答問,言輓運大較及陳西戎利

芯

列

罪,宜歸 領禁兵,數亂法,捕臺府吏屬繫軍中。 憲宗時,以直諫知名者,又有王源中,字正蒙。 有司 ',無令北軍亂南衙,麾下重於仗內。」帝納之。 累轉戶部郞中、侍郞,擢翰林學 源中上言:「臺憲者,紀綱地,府縣責成之所。 **擢進士、宏辭,累遷左補闕。** 是時,中官 設吏有

書右僕射。 以疾自言,出爲山南西道節度使,入拜刑部侍郎。 源中嗜酒,帝召之,醉不能見。及寤,憂其慢,不悔不得進也。他日,又如之,遂失帝意。 未幾,領天平節度使。 開成三年卒,贈尙

士,進承旨學士。

源中澹名利,率身治人,約而簡,當時咨美。

事, 將引之,輒謝絕。 薛苹,河中寶鼎人。 七世祖道實,爲隋禮部尚書。 父順爲奉天尉,與楊國忠有舊,及用

|浙 西,加御史大夫,累封河東郡公。 史。 所居守法度, 憲宗時, 奏最, 務在安人。 擢湖南觀察使, 徙浙東, 治身觳薄, 所衣綠袍更十年, 以治

年七十致仕。 至緋衣乃易。居三鎭,聲樂不聞于家,所得祿,即分散親屬故人, 是時有年過岸不肯去, 故論者高岸。 居四年,卒,贈工部尙書, 而無餘藏。 除左散騎常侍, 諡日宣。 本

兄芳,有器幹;萊與莘,其母代宗從母也,以外戚奉朝請,皆贊善大夫。

於文章中長於詩。

聞,不及請,馳赴之,哀甚,聞者垂泣。 | 本子 | 膺, 大和初,爲右補闕內供奉。 後歷工部員外郎。 其弟齊佐興元李絳幕府, 絳遇害, 齊死于難。 |膺

渭 崩 久疾,冢嫡也,內外係心久矣。 南尉。 ,與鄭絪皆召至金鑾殿。 衞 次公字從周,河中河東人。舉進士,禮部侍郞潘炎異之,曰:「國器也。」高其第。 嚴震在興元,辟佐其府。 時皇太子久疾,禁中或傳更議所立,衆失色。 必不得已,宜立廣陵王。」細隨贊之,議乃定。 累遷殿中侍御史。 貞元中, 擢左補闕、翰林學士。 次公日:「太子雖 德宗 調

權 力侵橈。 順宗立,王叔文等用事,輕弄威柄, 由中書舍人充史館脩撰 改兵部侍郎。 次公與絪多所持正。 知禮 坐與善,下除太子賓客。 部貢舉, 斥華取實,不爲

列

傳第

八

十九

衙次

公

薛

戎

爲准 書左丞。 之孫,皆以負不得調,次公召見曰:「子之祖, 久乃爲陝、<<br />
號州觀察使,獨橫租錢歲三百萬。 南節 度使。 時方討察,數建請罷兵,帝將相之,制稟具而察捷書至,乃追 久之,召還,道病卒,年六十六,贈太子少傅,諡 勳在王府, 復入爲兵部侍郎。故英公李勣、大理卿徐有功 寧限常格乎? 日敬。 止。 卽 優補 以檢校工部尚書 而遣。 進尙

次公本善琴,方未顯時,京兆尹李齊運使子與游,請授之法,次公拒絕,因終身不復鼓。

其節尙終始完潔。

諫官寵之。」乃爲左拾遺,歷義成節度使。 子|洗, 舉進士,尙臨眞公主,檢校祕書少監、駙馬都尉。 威通 文宗曰:「洙起名家,以文進,宜

按置其罪。成曰:「以是待我耶?我始不願仕,正謂此爾! 先是,馬揔佐鄭滑府,監軍宦 府,三返乃肯 薛戎字元夫, 應。 故宰相 河中寶鼎人。 齊映代衡, 人誣劾之,貶泉州別駕。 客毗陵陽羨山, 奏留之,府罷,復歸陽羨。 年四 冕欲除懲以附倖家, 十餘不仕。 ·」不肯從,還白其狀。<br/>
冕怒,據案引 福建觀察使柳冕辟佐 江西觀察使李衡 卽 使戎攝 辟署幕 其 刺

辱之,累月,成終不爲屈。 |成入,|成叱引者曰:「見賓客乃爾乎?」由東廂進。 淮南節度使杜佑聞之,書責冕,會冕亦病死,得解,自放江湖間 冕度未可屈,揖而去,囚之它館,環兵齊

所 內按故無所治迓。 部州 復爲藩府交奏,稍遷河南令。 觸 酒禁者罪當死,橘未貢先鬻者死,成晚其禁。卒治下,年七十五,贈左散騎常侍。 留府卒犯令者, 縛置獄, 留守怒, 遣將略出之, 不與。 吐突承璀討鎭州,所過吏迎廷畏不及,治道前驅,惟成境 累遷浙東 觀察使,

悉 奉 稟賙 |戎爲 、濟內外親,無疏遠皆歸之,旣病,以所有分遺之曰:「吾死矣,可持爲歸資 更, 不尚約束詭名譽,其有善,歸之所部,故居官時無灼灼可驚者,已罷 則懷之。

哭 而

帝謂 有 賢能 日:「小子新 弟放, 端厚寡言。 [處之。] 帝美其誠,進工 立,懼不克荷,先生宜相,以輔不 第進士, 擢累兵部郎中。 一部侍郎、集賢學士,寵待 -逮。」放 穆宗爲太子,拜侍讀,及卽位, 尤至。 可頭 改刑部侍 曰:「臣庸淺,不足塵大任,自 郞 參贊機命。

道 **〔要乎?」對曰:「論語,六經之菁華也,孝經,人倫之本也。** 帝嘗問 成成 (敗得失,亦足以鑒,然謬於是非,非六經比。」帝曰: 「吾聞學者白首 (史,何先?」|放日:「六經者,聖人之言,孔子所發明,天人之極 漢時論語首立於學官。光武 不 能 通 一經,安 也。

列

傳

第

八 +

九

嶭

胡 証

要道,信然。」終江西觀察使,諡曰簡

令虎賁士皆習孝經 玄宗爲注訓 蓋人知孝慈, 則氣感和樂也。」帝曰:「聖人以孝爲至德

以魏 史爲 韶州 博 胡 | 内屬 証字啓中,河中河東人。 刺 ,請使自 史,以母老辭,爲太子舍人。 副 , 韶兼御史中丞, 爲弘正副使。 舉進士第, 更從襄陽于頔,署掌書記。 渾瑊美其才, 入遷諫議大夫。 又以鄉府奏寘幕下。 入爲戶部郎中。 繇殿 田 中侍御 弘

使。 道 元 河中, 和 九 年 時趙宗儒爲帥, 党項 屢擾邊,而單于都護府累更武將, 以州民 (入謁,里人榮之。 職事廢,証以儒而勇選拜振武軍節度 居四年,召任金吾大將軍,又充京西

京北巡邊使。

京兆 者 人子納貲 必 易 尹 太 胡 和 左散 服 於使而 公主降回鶻,以檢校工部尚書爲 騎 又欲 常常侍。 命之官。 主便道疾驅者 寶曆初,以戶部尚書判度支,固辭,拜嶺南節度使。 証請儉受省費,以絕鬻官之濫。 固 不 從,以唐官儀 和親使。 舊制,行人有私覿禮,縣官不能具,召富 自 將,訖不辱 次漢南, 命。 虜 |人欲| 還, 卒,年七十一,贈 屈脅之, 拜 部 侍郎、改 且言使

尙

書右僕射。

號 京師 廣 高訾。 有舶貝奇寶,証厚殖財自奉,養奴數百人,營第脩行里,爾亙閭陌,車服器用珍侈,遂 素與賈餗善,李訓敗,衞軍利其財,聲言陳匿其家,爭入剽劫,執其子腶內左

軍,至斬以徇。

擊之。」衆唯唯。 証悉驅出。故時 客皆失色。 証 旅力絕人。晉公裴度未顯時,羸服私飲,爲武士所窘,証聞,突入坐客上,引觥三釂 因取鐵燈檠,摘枝葉,擽合其跗,橫膝上,謂客曰:「我欲爲酒令,飲不釂者,以此 人稱其俠。 証一 飲輒數升,次授客,客流離盤杓不能盡,証欲擊之,諸惡少叩頭請去,

于家。 直學士,充皇太子、諸王侍讀,因著太子諸王訓十篇。 帛,旌闕其閭。 絕粒學老子道,父聽之。 丁公著字平子,蘇州吳人。三歲喪母。甫七歲,見鄰媪抱子,哀感不肯食,請於父緒,願 父喪,負土作冢,貌力癯惙,見者憂其死孝。觀察使薛苹表上至行,詔刺 淮南節度使李吉甫表授太子文學,兼集賢校理。 稍長,父勉敕就學,舉明經高第,授集賢校書郎 會入輔政,擢爲右 ,不滿 秩 史 7 弔問 輒 補闕, 去,侍養 ,賜粟

穆宗立,未聽政,召居禁中,條詢治理,且許以相。 第 八 + 九 J 公 著 崔 弘 禮 公著陳讓牢切,乃擢給事中,遷工部 五〇四 九

29

五

清靜 侍 郎 聞 知 吏部選事 几 久之,入爲太常卿。 遷 )禮部 尚書、 公著 翰林 內 知帝欲進用, 侍講 大和中,以 學士。 病
写
身
還 故辭疾求外, 長慶 中 , 鄉里、卒、年六十四 浙 東災癘 遷授浙西觀察使 拜 觀察使 詔 徙 賜 爲 米 泂 七 南 萬斛 尹 ,治以 使使

公著清約守道,每進一官, 輒憂見顔間。 几 一十喪妻,終身不畜妾。 及卒,天下惜之。

贈

尚書右

僕

射

賑

饑

涓

劉玄 玄佐 資 介餉 臂 佐 崔 獵 鷹 弘 至 京 與以 夷門 禮字從周 師 禮 所 玄佐 馳逐, 善李觀 ,系出博陵, 酒 酣 急 一,顧日 緩 病 在 且死 手 北 , 崔 齊左僕射懷遠六世孫。 弘 禮 生 軍 殫 驚 獨 褚爲 不 日:「安得此 知 治喪,葬畢乃 此 樂邪 奇客? 弘禮 磊磊有大志,通 去 」玄佐 笑曰:「我 大悅,欲留之, 固喜武,請爲公歡 兵略。 固辭,厚爲 過宣武, 從

患。 時 天 子 遷 及 留留 計 進 守 蔡 士 第 判 李師 平 擢 判 道 異等。 謀 忻 襲洛 汾二 靈 州 脋 武 刺 沮 李欒 朝 史。 廷以 表 田 爲 弘 釋察 判官, IE 危。 請 朝 以親老 弘禮 表 弘 爲 不 禮 箝 應 徙 揣 , 衞 更 賊 州 情 署 東都留守呂 兼 部 魏 分設 博節 張 度 元膺 東都 副 使。 參謀。 卒無 伐

長 慶初,張弘靖鎭 幽州 韶弘禮往 副 未 及行 軍亂, 改絳州刺史。 李乔反于汴, 韶徙

師

道

弘

正

多

所

**容逮** 

還

魏

博

表

爲相

州

刺

史。

河南 尹,倚以捍賊。 遷河陽節度使, 治河內秦渠,溉田千頃,歲收八萬斛。 徙華州 刺史、改

天平節度使。

腦、靑當徐道者出車五千乘,轉粟饋軍,弘禮度道遠,乃自兗開官山故渠,自黃隊抵靑丘,師 宋守黃州,奪其兵,擊賊禹城,破之,獲鎧裝數十萬。 刑 里 人大濟。 部尙書,復爲留守。卒,年六十五,贈司 李同 ·捷叛,與李聽合師討之。至濮州,大將李萬瑀、劉案擁兵自固,弘禮表萬瑀守沂州 李祐以鄭滑兵三千入齊而潰 ,弘禮悉斬之,爲出 空。 時徐泗節度使王 智興檄克、海、鄆、曹、 召還 以病自乞,改

弘禮短於治民,少愛利,晚頗務多積,素議訿之。

終制 澹 如 也。 崔玄亮字晦叔,礠州昭義人。貞元初,擢進士第,累署諸鎭幕府。 地下濕,因得痺病,不樂進取。 稍遷密、歙二州 刺 元和初,召爲監察御史,累轉駕部員外郎。 父喪,客高郵,臥苦 淸愼 介特,

不問。

民

山

「處,輸租者苦之,下令許計斛輸錢,民賴其利。

列

傳

第八十九

崔

玄

髙

王質

歷湖、曹二州,辭曹不拜。大和

四年,繇太常少卿改諫議大夫,朝廷推爲宿望,拜右散騎常侍。 每遷官, 「輒讓形 於色。

諭,玄亮置笏在陛日:「孟軻有言: 下法,不爲申錫言也。」俯伏流涕,帝感悟,衆亦服其不橈,繇此名重朝廷。 下皆曰殺之,然後察之,乃寘於法。今殺一凡庶,當稽典律,況欲誅宰相乎? 鄭注構宋申錫, 捕逮 倉卒, 內外震駭。玄亮率諫官叩延英苦諍,反復數百言 衆人皆曰殺之,未可也,卿大夫皆曰殺之,未可 臣爲陛下惜天 也; 文宗未 天

頃之,移疾歸東都,召爲虢州刺史。 卒,年六十六、贈禮部 尙 書。

未嘗遷、當歸葬滏陽、正首丘之義。」諸子如命。 玄亮晚好黃、老淸靜術,故所居官未久輒去。 遺言:「山東士人利便近,皆葬兩都,吾族

素器之,擢給事中、河南尹,徙宣歙觀察使。卒,年六十八,贈左散騎常侍,諡曰定。 閣 累佐帥府,五遷侍御史,繇山南西道節度副使再轉諫議大夫。宋申錫之得罪,質與諫官伏 授業者甚衆。 了文宗開延英召見,泣涕陳諫,帝稍寤,申錫得不 質字華卿。 年逾四十,偃蹇無進取意,姻友苦勸以仕,乃舉進士,中甲科。 五世祖通爲隋大儒。質少孤,客壽春,力耕以養母。講學不倦,諸生從 死。 為宦豎所惡,出號州 刺史。 繇祕書省正字

署幕府者,若河東裴夷直、天水趙晢、隴西李行方、梁國劉蕡,皆一 質清白畏慎,爲政必先究風俗,所至有惠愛。 雖與德裕厚善,而中立自將,不爲黨。 時選云。

奏

欲留不遣,衆色怖,惟徐曰:「可汗,唐婿,欲坐屈使者拜,乃可汗無禮,非使臣倨也。」虜憚其 正 其學長於禮,擢太常博士。 元和八年,回鶻請和 少卿李孝誠使回鶻,可汗驕甚,盛陳甲兵,欲臣使者,惟不爲屈。 殷侑,陳州人。幼有志於學,不治貲產。 長通經術,以講道爲娛。 親,朝廷以仰費廣劇, 已傳命,虜責其倨,宣言 欲
斜
以
期
。 貞元末,及五經第, 韶侑、宗

以語切,出爲桂管觀察使。寶曆元年,徙江西。所至以絜廉稱。入爲衞尉 王承宗叛,遣侑招諭,承宗聽命。 卿

言,不敢逼。

還,遷虞部員外郎。

爲武,含垢安人爲遠圖,網漏吞舟爲至誠。」帝不納,然內嘉尙 討贼,羣臣無敢異論者,獨侑請舍廷湊而專事同捷,且言:「願以宗社安危爲計,善師攻心 文宗即位,李同捷叛,而王廷凑陰爲脣齒,兵久不解,詔五品以上官議尚書省。 帝銳欲

同捷平,以侑嘗爲滄州行軍司馬,遂拜義昌軍節度使。於時痍荒之餘,骸骨蔽野,墟里

第

八

九

殷

以勞加檢校吏部尙書。 入瞻其半,二歲則周用, 田 生荆棘, 一,丐耕 侑單 上牛三萬,詔度支賜帛四萬匹佐其市。 ·身之官,安足粗淡,與下共勞苦,以仁惠爲治。 乃奏罷度支所賜。 戶口 初,州兵三萬,仰稟度支,惰始至 滋饒, 廥儲盈腐,上下便安, 歲中, 流 戶襁屬 而還, 請立石紀政。 一歲,自以賦 遂爲營

院,而 府者。 毋輕用新進。」帝善之,賜綵三百匹。初,鹽鐵度支使屬官悉得以罪人繫在所獄,或私置牢 崔元武受吏財,又率屬邑奉錢,增私馬估售官,疊三罪計絹百二十匹。 尚書右僕射。 死。」詔用覆訊,流元武賀州。 削三官,刑部覆訊當流,未決。惟奏:「三犯不同,坐所重。律,頻贓者累論。」元武犯皆枉法,當 開 六年,徙天平節度。 侑以餉軍有贏,當上送官,乃裁制經費,歲以錢十五萬緡、栗五萬石歸· 成元年,再召爲刑部尚書。時李訓、鄭注已誅,帝問惟治安術,惟言:「朝廷宜任耆德, 御史大夫温造劾侑違制,擅賦斂民爲無名之獻,詔以庾承宣代還。 自李師道亂,朝廷雖析三鎭,然務安反側,賦入盡爲軍貲, 帝嘉侑守法,進刑部尚書,以造所奏不直,復用爲天平節度。 大理以入私馬一重, 有司。 會濮州掾 加檢校 無 輸王

涇原節度使朱叔夜坐侵牟士卒,贓數萬,家畜兵器,罷爲左武衞大將軍,侑薄其罪,

許之,賜黃金十斤,以酬直言。

天子由是疏之,賜叔夜死, 出侑爲山南東道節度使。 坐減兵不先論啓,左遷太子賓客分司

東都 俄領忠武節 度。 卒,年七十二,贈司空。

晚節內冀台輔,稍務交結,

而素望少衰云。

變禮。 還京,而七廟焚殘,告享無所。 府監寓 在,獨盈孫從,議曰:「故廟十一室,二十三楹,楹十一梁,垣墉廣袤稱之。 主、樂縣, 今天子還宮,宜前具其禮。」宰相建言,脩復宗廟, 盈孫 太廟,請因增完爲十一室,其三太后廟,權舍西南 按至德時作神主長安殿,饗告如宗廟, 廣明初,爲成都諸曹參軍。 皆所創定,舊學禮家當其議 盈孫白 宰相:「始乘輿西, 僖宗至蜀,聞有禮學,擢太常博士。 廟成乃耐。 功費廣, 夾廡,須廟成議遷。」 有司盡載神主以行,至鄂, 今正衙 請與禮官議。 外無它殿,伏聞 今朝廷多難, 光啓三年,帝 詔可。 時佗博 詔旨 悉爲 自 I是神 以 宜 將 小

容典,皆盈孫 服 侍 洞 龍 紀 必欲 元 年 折衷焉 - , 昭宗 之,當隨 郊 終大理 洞 所攝資品 兩 中尉及樞 卿 贈 雖 吏部尚書。 無援據,猶免僭逼。」詔可。 密皆以宰相服侍上。 盈孫奏言:「先世 時喪亂後, 制度彫紊, 與令, 無內官 追補

列

僔

第

八

+

九

殷

求爲太常散吏,卿知其經生,補檢討官。 王彦威,其先出太原。 少孤,家無貲,自力於學。 舉明經甲科,淹識古今典禮,未得調,

元和新禮,上之。

有韶拜博士。

典也。 高宗九月,睿、代二宗皆五月,德宗十月,順宗七月,惟玄、肅二宗皆十二月,有爲爲之,非常 元慶賜皆廢矣。」有詔更用五月。 不志葬,必其時也。 |憲宗以正月崩,有司議葬用十二月下宿, 彦威建言:「天子之葬七月,春秋之義,志崩 且葬畢而虞,虞而卒哭,卒哭而祔,皆卜日。今葬卜歲暮,則畢祔在明年正月,是改 舉天下葬一人,故過期不葬則譏之。高祖、中宗葬皆六月,太宗四月,

太祖 清內難,肅宗收復兩都,皆撥亂反正,猶不稱祖。今當本三代之制,黜魏、晉亂法,大行廟號 以景皇帝爲太祖,祖神堯而宗太宗,自高宗後咸稱宗,以爲成法。不然,太宗致升平,玄宗 而降,則又祖有功,宗有德。故夏人祖顓頊而宗禹,商人祖契而宗陽,周人祖文王而宗 淮南李夷簡上言:「大行皇帝功高宜稱祖。」穆宗下其議,彦威奏:「古者始封爲太祖,由 

還告太極殿。 宜稱宗。」制可。又舊事,祔廟必告于太極殿,然後奉主入廟,旣事則已,而有司祔主畢,又 彦威以爲不可,執政怒,坐祝辭誤,奪二季俸,削一階。 彦威終不回屈。 後累

擢司封郎中、弘文館學士、諫議大夫。

史館脩撰 李師道旣平,其十二州賦法未均,詔彥威爲勘定兩稅使,差量纖悉,人不爲煩。 還,兼

人。」有詔貸死,彥威詣宰相據法爭論,下遷河南少尹。 俄改司農卿。 自歸死免父之囚,可勸風俗,議減死。彥威上言:「殺人者死,百王共守。 興平民上官興殺人亡命,吏囚其父。 興聞,自首請罪。 京兆尹杜悰、御史中丞宇文鼎以 原而不殺,是教殺

之一,又三之二則衣賜仰給焉。 戶三百五十萬,而兵乃九十九萬,率三戶資一兵。 察者十,節度者二十有九,防禦者四,經略者三,大都通邑皆有兵,最凡八十餘萬。 毫釐差。假令臣一旦迷愚,欲自欺沒,亦不可得。」因上近觀圖。 固該邃,亦善吏事,但經總財用,出入米鹽,非所長也。 「百口家知有歲計,而軍用一切可不謹邪?臣按見財,量入以爲出,隨色占費,終歲用之,無 李宗閔執政,雅善之,進拜平盧節度使。開成初,召爲戶部侍郎,判度支。彦威於儒學 自留州留使外,餘四十萬衆, 今舉天下之入,歲三千五百萬,上供者三 而性剛計自恃, 嘗見文宗, 顯奏曰: 皆仰度支。」又爲供軍圖上 又言:「至德訖元和,天下觀 長慶籍

彦威雖自 1謂楗柅姦冒,著定其費,於利害無益也。

者仇 兵訴 所賜不時,縑皆敞惡,攝吏送臺獄,而彥威視事自如,及詔停務,始惶恐就第。貶衞尉卿。 士良、魚弘志方用事,彥威乃奏復與直,悅媚士良等。又効王播貢羨贏以冀速進。 ,神策軍多以稟縑於度支取直,吏私增賈厚給之,經用益耗,開成初,有詔禁止。時宦 會邊

性疆敏,善著書,頗行于時。卒,贈尙書右僕射,諡曰」構。

俄 檢校禮部尙書,爲忠武節度使,毀山房三千餘所, 、盜無所容。 徙節宣武,

封北海

子之賢. 太重。 莫敢廢也。 庶幾,其從於陳、廢者,亦各有號,出於 拜 跪 漢際祭, 贊曰:韓愈稱:「郡邑通得祀社稷、孔子,獨孔子用王者事,以門人爲配,天子以下,北面 方是時,公卿無韓愈之賢,無有折其非是者。 ,未有加於十人,坐而祀之,始於開元,非特牽於 禮如親弟子者。 如崇敬誠不知禮,尊君以媚世,歷朝循而不改矣。 句龍、棄以功,孔子則以德,固自有次第。」崇敬乃請東揖,以殺 一時, 後世坐祀十人以爲哲, 豈夫子志哉?」觀七十 道州刺史薛伯高嘗謂:「夫子稱顏 一時之稱號。 伯高之語,柳宗元志之於其 記曰:「祭,有其舉之, 旦

書,必有辨其妄者。

# 唐書卷一百六十五

### 列傳第九十

鄭餘慶 濣 處誨 從讜 鄭珣 瑜 覃 裔綽 朗 高郢 定 鄭 絪

顥

權德輿 璩 崔羣

法凑以罪爲民訴闕下,詔御史中丞宇文邈、刑部侍郎張彧、大理卿鄭雲逵爲三司,與功德判 官諸葛述參按。 ,奏置幕府。 鄭餘慶字居業, 述,故史也,餘慶劾述猥賤,不宜與三司雜治,時韙其言。 貞元初,還朝,擢庫部郎中, 鄭州滎陽人,三世皆顯宦。 爲翰林學士,以工部侍郎 餘慶少善屬文, 擢進士第。 知 吏部選。 嚴震帥 浮屠 口1

貶 郴州 凡 所陳,必左右之,碩坐事貶; 貞元十四年,拜中書侍郎、同中書門下平章事 司馬。 又歲旱飢,朝廷議賑禁衞十軍,爲中書史漏言。疊二忤,故 每奏對,多傳經義。 素善度支使于碩,

列傳第九十 鄭餘慶

相前 官刺 劉光琦相倚爲姦 史。 順宗 ,餘慶叱去。 以尚書左丞召, 杜佑、鄭絪執政,頗姑息,而佑常行輩待,不名也。 ,每宰相議,爲光琦沮變者,令渙往請必得, 未幾,罷爲太子賓客。後澳以贓敗,帝寖聞叱去事,善之。改國子祭酒,累 會憲宗立, 即其官復拜同中書門下平章事。 由是四方貲餉奔委之, 至餘慶議事,渙傲然指畫諸宰 時主書滑渙與宦人 弟泳至

路,不可。」權者不悅,改太子少傅,兼判太常卿事 餘慶以時 醫工崔環者,自淮南小將除黃州司馬,餘慶執奏:「諸道散將無功受五品正員,開徼幸 '久平,奏復舊制。 出爲山南西道節度使。 入拜太子少師,請老,不許 自朱泚亂,都輦數驚,太常肄樂禁用鼓,

遷吏部尙書。

以爲貴,帝亦惡之,始詔餘慶條奏懲革。 紫率十八;近臣謝、郞官出使,多所賜與。 韓愈、李程爲副,崔郾、陳佩、楊嗣復、庾敬休爲判官,凡損增儀矩,號稱詳衷。 公論浩然歸重。 時數赦,官多汎階; 帝患典制不倫, 又帝親郊,陪祠者授三品、五品不計考;使府賓吏,以軍功借賜朱 謂餘慶淹該前載, 遷尙書左僕射。 每朝會,朱紫滿廷而少衣綠者,品服大濫, 乃詔爲詳定使,俾參裁訂正。 僕射比非其人,乃餘慶以宿德進, 餘慶引

以來,學校廢,諸生離散。今天下承平,臣願率文吏月俸百取一,以資完葺。」詔可。穆宗立, 俄拜鳳翔尹,節度鳳翔。 '復爲太子少師,封滎陽郡公,兼判國子祭酒事。 建言、「兵興

加 檢校司徒。卒,年七十五,贈太保,諡曰貞。帝以其貧,特給一月奉料爲賵襚。

生內謁,必引見,諄諄敎以經義,務成就儒學。自至德後,方鎭除拜,必遣內使持幢節就第, 肆廣大,常語人曰:「祿不及親友而侈僕妾者,吾鄙之。」大抵中外姻嫁,其禮獻皆親閱之。後 世謂「南鄭相」、「北鄭相」云。 曰:「是家貧,不可妄求取。」議者或詆其沽激,餘慶不屑也。奏議類用古言,如「仰給縣官」、 至則多饋金帛,且以媚天子,唯恐不厚,故一使者納至數百萬緡。 ·馬萬蹄」,有司不曉何等語,人訾其不適時。 餘慶少砥礪,行已完絜,仕四朝,其祿悉賙所親,或濟人急,而自奉粗狹,至官府,乃開 與從父絪家昭國坊, 絪第在南, 餘慶第在北, 憲宗每命餘慶,必誠使

子牌。

涵 |澣 卿令子,而朕直臣也,可 本名涵,避文宗故名,改焉。 更相賀。」遷起居舍人、考功員 第進士,累遷右補闕。敢言,無所諱,憲宗謂餘慶日: 外郎。 時刺史或迫吏下紀功愛,

涵請責觀察使以杜其欺。 餘慶爲僕射,避除國子博士、史館脩撰。

文宗立,入翰林爲侍講學士。

卽 酬 析, 無留答, 因賜金紫服。 累進尚書左丞,出爲山南西道節度使。 帝使粹擷經史爲要錄,愛其博而精,試舉諸條擿問之,隨 始, 餘慶在興元創

列

五〇六二

學廬 澣 嗣完之,養生徒,風化大行。 以戶部尚書召,未拜,卒,年六十四,贈尙書右僕射,

四子、處誨、從讜尤知名。

諡

處誨字廷美, 文辭秀拔。 仕歷刑部侍郎、 浙東觀察、 宣武節度使, 先是, 李德裕

**(次)** 近氏舊聞 ,處酶謂未詳,更撰明皇雜錄,爲時盛傳。

嶺 遷 南 中書舍人。 東道節度。 從 黨字正求。 威通 先是,林邑蠻內侵, 中, 及進士第,補校書郎,遷累左補闕。 爲吏部侍郎, 召天下兵進援, 銓次明允。 出為 會雕勛亂,不復遣,而北兵寡弱。 河東節度使,徙宣武,以善最聞, 令狐綯、魏扶皆澣門生,數進譽之, 從讜 改

募土豪,署其酋右職,爲約束,使相捍禦,应、廣晏然。

間 蘇 以爲憂,帝欲大臣臨制,乃拜從讜檢校司徒,以宰相秩復爲河東節度兼行營招討使,詔自擇 弘 邊 彩 多虞, 僖宗 引兵拒之, 戰數負, 立,召爲刑部尚書。 入據振 武、 雲朔等州 傳圭斬擊以徇。 久之, 南略太谷。 擢同 中 ·書門下平章事,進門下侍郞。 彦球 所部 河東節 · 反,攻傳主,殺之,劫府庫爲亂。 度使康 傳圭遣大將伊釗、 沙陀都督李國昌 張彦球 朝廷

官,前 首 爲 小朝 進 從讜 以彦球本善意, 廷 劉 言得才多也。 卽 崇魯推官, 表長安令王調 且才 左拾 時承 可任 自 遺李渥掌書記,長安尉崔澤支使 軍 副 亂, 釋不問,而付以兵, 剽奪 兵部員外郎劉崇龜 日旁午,從讓旣視 曠無餘猜, 司 事 勳 丁, 姦 皆 員外郎趙崇為節度觀察府判 故得其死力。 無廋情 時 選。 乃推捕反賊 京師 士人比 渠凶宿狡不 ~,誅其 太

發又輒得,士皆寒毛惕

嵐 功報 仍。 領 從 高 千 河東。 石 讞 弁 劉 遭 從讜 崇 合 等 天子 會黃 上將論 並 魯 諸 踵 河 、巢犯京 克用 厚 知 將 墼 以 安從爽。 而 觀 飯 ', 亦 恩 命 南 察留 使 醪犒軍, 持 會 克用辭窮, |來日:「方省親 獨 師 安出 振 後 克用從數 武 而 帝 ,敕克用 契苾 克用 李克用謂 駐 斬之鞠場 梁、漢, 再 隃 通 百 拜 至按籍 謂 至 鴈門,願 騎 去, 太原 ,與沙陀戰 曰:「我且 過辭 韶從 中 然陰縱其下 一效之乃行 可乘,以沙陀 城下 和 公公徐 引 -,從 年 行。 而 沙陀 ٠, 識以 南, 朝 肆 從讜即 廷 大敗 兵奄 ·掠 欲 液 名 面招討副使諸葛爽入討。 與公面 馬器幣 沙陀、使擊賊 引 以 入 日 還。 撼 八其地 以監 人心。 約。 歸 卽 一從黨登 壁汾 之。 軍 遣安等屯 周 從 自 從 明年 東, 識 膻 寓 追 城,開 ,兵不敢道 釋言 知兵馬 安 北 賊 百 平 討 使 勉 井 從讜 賊 留後 與將 感 詔 太原 |安 擅 概 克用代 須 團 使立 王 索 士: 還, 蟾 五 繇

黃 軍 以 糧 少劫其貲,從 讓間走絳州,方道梗不通,數月, 召拜 司空、 〇六三 復秉政,進太傅兼

列

傳

第

九

+

鄭

餘

夓

鄭

珀

瑜

五

侍中。 從帝 至 興元,以疾乞骸骨,拜太子太保,還第,卒,諡文忠

鎭 署 鳳翔 金 吾 於後 從 移檄 將軍 讜 生 進 ,數稱譽之,展後位宰相。 止有禮法 計財財 初, ,兩人以忠義相提衡,賊尤憚之,號「二鄭」云。 盜流中原,沙陀疆悍,而卒收其用者,蓋從讜爲太原重也。 了,性不矜滿,沈毅有謀。在汴時,以處誨殁於鎭,訖代,不奏樂牙中。 張彥球者,拳擊善斷,累破虜有功,奏爲行軍司馬,後 時鄭畋以宰相 識

官。 珣瑜檢校本官兼奉先令。 高第 使 劉 、入拜 晏奏補 鄭珣 侍 瑜字元伯 (理評 御史、 寧陵、宋城尉,山南節度使張獻誠表 事 ,,調陽翟丞,以拔萃爲萬年尉。 刑部員 ,鄭州祭澤人。 外郎, 明年 進饒州 以母 少孤,值天寶亂,退耕陸渾山,以養母,不干州里。 喪 刺史。 解。 訖 喪, 入為諫議大夫,四遷吏部 南鄭丞、皆謝不應 崔祐甫爲相,擢左 遷 更部。 貞元 初, 一補闕, 大曆中,以 詔擇 侍 出爲 十省 鄓 郎治 涇原 諷 諫 主文科 帥 府判 轉運

至河南,清靜惠下,賤斂貴發以便民。 未 爲 河南尹 到官而遽事 ,未入境,會德宗生日 獻 ,禮歟?」 不 聽。 , 尹當獻馬, 性 方是時,韓全義將兵伐察,河南主魏運 一嚴重 少言,未嘗 吏欲前取印,白 以 私 託 人,而人亦不 珣 瑜視 事,且 敢 內贄。 **珣瑜密儲** 謁 以 珣瑜徐 私 Ż 旣

陽翟 與監軍別檄有所取,非詔約者,珣瑜輒挂壁不酬,至軍罷,凡數百封。 ,以給官軍,百姓不知僦運勞。凡迎送敕使,皆有常處,吏密識其馬,進退不數步差也。 有諫者曰:「軍須

期會爲急 (產沴也。」故下無怨讟。 ,公可不報? ?」珣瑜曰:「武士統戎,多恃以取求。苟以爲罪,尹宜坐之,終不爲萬 時謂治河南比 張延賞,而重厚堅正過之。

顯詰曰:「留府緡帛入有素,餘者應內度支。今進奉乃出何色邪?」 具以對。 復以吏部侍郎召,進門下侍郎、同中書門下平章事。 李實爲京兆尹,剝下務進奉,珣瑜 實方幸,依違

以免。

尙書。 叔文志 言:「文者,經緯天 章執誼 白:「二公同 順宗 周也; 亦會有疾,數月卒,年六十八,贈尙書左僕射。 爲宰相 叱吏, 立,卽遷吏部尚書。 ·飯矣。」珣瑜喟曰:「吾可復居此乎!」命左右取馬歸, 文終、文成,漢也。 ,居外奉行。 更走入白, 地。 用二諡,非春秋之正 執誼起, 叔文 王叔文起州吏爲翰林學士、鹽鐵副使,內交奄人,攘撓政機。 沉珣瑜名臣,二諡不嫌。」巽曰:「諡一,正也,薨、舜是也。二 日至中書見執誼 就閣與叔文語。 ,請更議。」復謂:「二諡,周、漢以 , 珣瑜與杜佑、高郢 直吏白:「方宰相會食, 太常博士徐復諡 臥家不出七 文獻,兵部 輟甕以待。 來有之。 百官無見者。」 日, 侍 罷爲吏部 頃之,吏 郎李巽 威烈

,非古也,法所不載。」詔從復議。

諡

子覃。

厚以父蔭補弘文校書郎,擢累諫議大夫。 憲宗取五中官爲和糴使,覃奏罷之。

重取 政 閣中奏久廢,至是,士相 ,而內耽宴嬉,外盤游畋。今吐蕃在邊,狙候中國,假令緩急,臣下乃不知陛下所在,不敗 · 朕之闕,下能盡規,忠也。 」因 穆宗立 ·姓,天下之幸也。」帝不懌,顧宰相蕭倪曰:「是皆何人?」倪曰:「諫官也。」帝意解,乃 夫金繒所出,固民膏血 一,不卹國事, 數荒昵。 慶。 一,可使倡優無功濫被賜與? 願節用之,以所餘備邊,毋令有 [詔|覃曰:「閣中殊不款款,後有爲我言者,當見卿延英。」時 吐蕃方彊。 覃與崔鄽等廷對曰:「陛下新卽位,宜側身勤

王 承元 璠副之。 徙鄭滑 始,鎭人慢甚,及覃傳韶,開勗大義,軍遂安,承元乃得去。 節度使,鎭 人固留不出。 承元請以重臣勞安其軍, 韶厚爲宣諭使,

講 帝尤 殷侑善言經,其爲人鄭覃比也。 欲推遠之。 重之。 寶 曆初,擢京兆 李宗閔、牛僧孺 帝雅 尹。 向 學, 文宗召為翰林侍講 知政,以覃與李德裕厚 頗思覃, 宗閔猥曰:「二人誠通經,然其議論不足取。」德裕曰:「厚、 復召爲侍講學士。 學士,進工部侍郎。 `,忌其親近爲助力,陽遷工部尙書,罷侍 德裕旣相, 覃於經術該深,諄篤守正, 以爲御史大夫。 帝嘗謂

宗閔得罪,遷刑部尙書,進尙書右僕射,判國子祭酒。 **悄之言**,它人不欲聞, ,惟陛下宜聞之。」俄德裕罷 宗閱復用,覃繇戶部尚書下除祕書監 李訓誅,帝召覃視詔禁中,遂拜同中

書門下平章事,封滎陽郡公。

飾 本于治平,人人無事,安逸致然。」帝曰:「要在謹法度而已。」進門下侍郎、弘文館大學士。 可易?」乃止。帝嘗謂百司不可使一日弛惰,因指香案爐曰:「此始華好,用久則晦,不治 何 · [必文辭。] 又言:「文人多佻薄。」帝曰:「純薄似賦性之異,奚特進士?且設是科二百年,渠 ,何由復新? 帝 不喜文辭,病進士浮夸,建廢其科,曰:「南北朝所以不治,文采勝質厚也。」士惟用才, 坐延英論詩工否,覃曰:「孔子所删,三百篇是已,其非雅正者,烏足爲天子道哉?夫 .」『覃日:「救世之敝,在先責實。 比皆不攝職事,至慕王夷甫,以不及爲靳。此

{風 特能詩之章解,而不知王術,故卒歸於亂。 、大小雅,皆下刺上之變,非上化下爲之。故王者采詩,以考風俗得失。若陳後主、隋煬帝 章什諓諓,願陛下不取 也。」

故武帝本紀多失實。」覃曰:「武帝中年大發兵事 日:「陛下樂觀書, 帝 包 覃所陳, 言:「順宗事不詳實,史臣韓愈豈當時屈 然要義不過一二,陛下所道是矣,宜寢饋以之。」 因武帝以諫,欲陛下終究盛德。」帝曰:「誠然, 邊,生人耗瘁,府庫殫竭,遷所述非過言。」 人邪? 昔漢 司馬遷與任安書,辭多怨懟 靡不有初, 鮮克有終。」覃

列傳第九十 鄭珣瑜

宜陛下以爲殷鑒。」帝善其將美。以病乞去位,有詔解太子太師, 開成三年,旱,帝多出宮人,李珏入賀曰:「漢制,八月選人,晉武帝平吳,多采擇,仲尼所謂 未見好德者。 俄罷爲尚書左僕射。 武宗初,李德裕復用,欲援厚共政,固辭,乃授司空,致仕,卒。 覃 旣 名儒 陛下以爲無益,放之,盛德也。」覃又推贊曰:「晉以采擇之失,舉天下爲左衽 ,故以宰相領祭酒 ;,請太學<u>五經</u>,經置博士,祿廩比王府官。再遷太子太師 ,許五日一入中書商量政

惡多所 是正其文,刻于石。 딞 生共力讎刊,準漢舊事,鏤石太學,示萬世法。」詔可。 衞 ·佐,帝重其不昏權家。 覃之侍講,每以厚風俗、黜朋比再三爲天子言,故終爲相。 然疾 厚清正退約,與人未嘗串狎。 不容,世以爲太過,憚之。始, 位相國,所居第不加飾,內無妾媵。女孫適崔皋,官裁九 厚以經藉 刑繆,博士陋淺不能正,建言:「願與鉅 **覃乃表周墀、崔球、張次宗、孔温業等** 學鴻

子裔綽。

宣宗 者頒韶, 初, 裔 綽峭立有父風,以門蔭進,爲李德裕所知,擢渭南尉。 劉潼 追罷之。 蘇鄭州 遷給事中。 刺史授桂管觀察使,裔綽固爭 楊漢公爲荆南節度使, ,「潼被責未 坐貪沓,貶祕書監,尋拜同州刺史。 久, 直 弘文館, 不宜付廉察。」帝已遣使 累遷 諫議大夫

日 太宗興王地,陛下爲人子孫,當愼所付。且漢公墨沒敗官,奈何以重地私之?」帝變色。 裔綽與鄭公輿封還制書。 會賜宴禁中, ,貶商州刺史。時獨衣綠,因詔賜緋魚。後繇祕書監遷浙東觀察使,終太子少保。 天子擊毬,至門下官,謂二人曰:「近論漢公事,類朋黨者。」 裔綽曰:「同州, 帝自卽位, 諫臣規正無不納。至是,有爲漢公地者,遂終不易。

厚弟朗。

必記,朕恐平日言之不叶治體,爲將來羞,庶一見,得以自改。」則遂上之。 自飭。』」帝悅,謂宰相曰:「朗援故事,不畀朕見起居注,可謂善守職者。 失,見之,則史官無以自觅,且不敢直筆。』褚遂良亦稱:『史記天子言動 故事,天子不觀史,昔太宗欲觀之,朱子奢曰:『史不隱善,不諱惡。 適 見朗執筆螭頭下,謂曰:「向所論事,亦記之乎? 朕將觀之。」郞曰:「臣執筆所書者,史也。 朗字有融,始辟柳公綽山南幕府,入遷右拾遺。開成中,擢起居郎。文宗與宰相議政, 自中主而下,或飾非護 ,雖非法必書,庶幾 然人君之爲,善惡

察使,進議武、宣武二節度。 累遷諫議大夫,爲侍講學士。 中人李敬寔排朗騶導馳去,朗以聞。 歷工部尚書判度支、 由華州刺史入拜御史中丞、戶部侍郎。 宣宗詰樹寔,自言供奉官不避道,帝曰:「傳我 御史大夫,復爲工部尚書、同中書門下 爲鄂岳、浙西觀 屯

列傳第

九

鄭珣瑜

高點

五〇七〇

興輔相爭得失,不論則廢職,奏徙它官。久之,以疾自陳,罷爲太子少師。 命則絕道行可也,而私出,不避宰相邪?」即斥敬寔。右拾遺鄭言者,故在幕府,閉以諫臣 卒,贈司空。

放,相者賀曰:「安之。」已而果相。 始,劇舉進士,有相者言:「君當貴,然不可以科第進。」俄而有司擢則第一,旣又覆實被

稱之。父伯祥爲好時尉,安祿山陷京師,將誅之,郢尚幼,解衣請代,賊義,并貸之。 高野字公楚,其先自渤海徙衞州,遂爲衞州人。九歲通春秋,工屬文,著語默賦,諸儒

寶應初,及進士第。代宗爲太后營章敬寺,即以白衣上書諫曰:

非禮。 颗人,不得無損。 捨人就寺,何福之爲? 昔<u>魯莊公丹桓公廟楹而刻其桷,春秋</u>書之爲 之報,其爲不可亦明矣。 一罷之。夫廟獨不越禮而立,況寺非宗而所安、神靈所宅乎?殫萬人之力,邀一切 陛下大孝因心,與天罔極,烝烝之思,要無以加。臣謂悉力追孝,誠爲有益, 漢孝惠、孝景、孝宣令郡國諸侯立高祖、文、武廟,至元帝,與博士、議郎斟酌古 妨時

間者昆吾孔熾,荐食生人,百姓懷懷,無日不惕。遣將攘却,亡尺寸功,隴外壤地,

聊,延頸嗷嗷,以役王命。縱未能出禁財,膽鰥寡,猶當稍息勞弊,以喚休之。 計十三年,舉百萬之衆,資糧屝屨,取足於人,勞罷宛轉,十不一在。父子兄弟,相視無 用武以來十三年,傷者不救,死者不收,繕卒補乘,于今未已。 委諸豺狼。 竭,則又誅求,若人不堪命,盜賊相挻而興,戎狄乘間,以爲風塵,得不爲陛下深憂乎? 之。無寺猶可,無人其可乎。然土木之勤,功用之費,不虛府庫,將焉取之。府庫旣 虜未平,侵地未復,金革未戢,疲人未撫,太倉無終歲之儲,大農有榷酤之敞,欲以此時 宮室,盡力溝洫, 海之內,權心助祭,延福流祚,永永無窮。 祉,施于孫子。」是知王者之孝,在於承順天地,嚴配宗考,恭愼德敎,以臨兆民。 興力役哉? 比八月雨不潤下, 不貴必成,事貴相時,不貴必遂。陛下若回思慮,從人心,則聖德孝思,格于天地,千福 人,當與夏后齊美,何必勞人動衆,踵梁武遺風乎?及制作之初,伎費尙淺,人貴量力, ·日··「德教加於百姓,刑于四海,天子之孝也。」又曰:「無念爾祖,聿脩厥德。」「旣受帝 臣聞聖人受命於天,以人爲主,苟功濟于天,天人同和,則宗廟受福,子孫蒙慶。 太宗艱難之業,傳之陛下,一夫不獲,尺土見侵,告成之時,猶恐有闕。 人到于今稱之。 菽麥失時,黔首狼顧,憂在艱食,若遂不給,將何以救 梁武帝窮土木,飾塔廟,人無稱焉。陛下若節用愛 未聞崇樹梵宮,彫琢金玉之爲孝者。 夫興師十萬, 日費千金, 夏禹卑 奈何戎 俾四

列

萬祿,先后受之,曾是一寺較功德邪?

書奏,未報。 復上言:

不然。陛下戢定多難,勵精思治,務行寬仁,以幸天下。今固違羣情,徇左右過計,臣 急,人徒竭作,土木並起,日課萬工,不遑食息,搒笞愁痛,盈於道路。以此望福,臣恐 神明,光于四海,不在費財。若以攘禍,則方務厥德,罔有天災,不在勞人。今興造趣 化,未曾有爲也。若以爲名,則至德要道,以順天下,未曾有待也。若以致福,則通于 脩德以銷禍,不勞人以攘禍。<br />
陛下之營作,臣竊惑之。<br />
若以爲功,則天覆地載,陰施陽 之功,故功莫大;不爲有名之名,故名莫厚。古之明王積善以致福,不費財以求福; 不除而絕。 竊爲陛下惜之。 王者將有爲也、將有行也、必稽于衆而順于人、則自然之福、不求而至、未然之禍、 臣聞神人無功者,不爲有功之功;聖人無名者,不爲有名之名。不爲有功

**个**級

乘興,懷光反方銳,不聽。旣又欲悉兵鼓而西。時渾城提孤軍抗賊,羣將未集,郢恐爲懷光 ·引捄甚力,忤子儀意,下徙騎氏丞。|李懷光引佐||邪寧府。| 懷光將還河中, 郢勸不如西迎 以茂才異行高第,累擢咸陽尉。郭子儀取爲朔方掌書記。 子儀怒判官張曇,奏抵死,

遇害, 請謁,顓行藝。 人。久之,進禮部侍郎。時四方士務朋比,更相譽薦,以動有司,徇名亡實,即疾之,乃謝絕 溲,懷光先斬二將,然後引郢詰誚,郢抗詞無所愧隱,觀者爲泣下。 懷光慚,赦之。 孔巢父 不有奔潰而助順者乎?」唯大懼,流汗不能語。 Ħ. 所 一國家固有天命,人力不豫焉。 乘,與李鄘固止之。會懷光子雖候郢,郢因脅說曰:「君視天寶以來稱兵者,今尙誰在? 野撫屍而哭。懷光已誅,李晟表其忠,馬燧奏管書記。 司貢部凡三歲,甄幽獨,抑浮華,流競之俗爲衰。遷太常卿。 今若恃衆而動,自絕于天。 十室之小,必得忠信,安知三軍 郢因與其將呂鳴岳、張延英謀間道歸國,事 召拜主客員外郎, 遷中書舍

戍 始 召爲太常卿,除御史大夫。 二,贈太子太保,諡曰貞。 良原,元光卒,軍入神策,而州仍歲餉其糧,民困輸入,累刺史憚不敢白,郢奏罷之。復 詔皇太子監國,而野以刑部尙書罷。明年,爲華州刺史,政尙仁靜。 貞元末,擢中書侍郎、同中書門下平章事。順宗立,病不能事,王叔文黨根據朝廷,帝 數月;改兵部尚書,固乞骸骨,以尚書右僕射致仕。卒,年七十 初,駱元光自華引軍

也 私家。」生平不治產 ,與鄭珣 郢 恭愼不與人交。常掌制誥,家無留稾,或勸盍如前人傳制集者,答曰:「王言不可藏 瑜同拜。 ,有勸營之者,答曰:「祿稟雖薄,在我則有餘,田莊何所取乎?」」郢之相 既叔文用事, **珣瑜憂甚,爭不能得,乃稱疾不出,野未有所建白,俄與** 

列傳

第九

高罂

鄭絪

**珣瑜免,故議者賢珣瑜而咎郢。** 

子定。

野與杜佑等毅然引東宮監國, **珣瑜一忿臥第,與郢、佑固位,二者亦不足相輕重云** 贊曰:王叔文雖內連姏尹,外倚姦回,以攘天權。 執退叔文輩, 其力不難。 然是時太子已長,朝無嫌罅,若珣瑜、 顧循嘿苟安, 所謂焉用彼相者矣。

字顯。 備焉。 邪?」對曰:「用命賞于祖,不用命戮于社,是順人乎?」」野異之。 定辯惠,七歲讀尚書,至湯誓,跪問野日:「奈何以臣伐君? 仕至京兆府參軍。 長通王氏易,爲圖合八出,上圓下方,合則重,轉則演,七轉而六十四卦,六甲、八節 小字董二,世重其早惠,以 」郢曰:「應天順人,何云伐

第。 張延賞帥劍南,奏署掌書記。 鄭絪字文明,餘慶從父行也。 幼有奇志,善屬文,所交皆天下有名士。 入爲起居郎、翰林學士,累遷中書舍人。 **擢進士、宏辭高** 

**德宗自興元還**, 、以監 軍爲中尉。 置六軍統軍視六尚書,以處功臣,除制用白麻付外。 竇文場恃功, 陰諷 以宰相進 擬 如統軍比。 又廢宣 奏言:「天子 威軍益 封

以來, 中書 令也? 建,或用宰相 作韶 無復舊制。 」帝悟,謂文場曰:「武德、貞觀時,中人止內侍,諸衞將軍同正賜緋者無幾。自魚朝恩 1,并罷 ,以白麻 統 肸 軍用麻矣。 因用 署制, 爾不謂私, 付中書、門下。 明日 帝見絪曰:「宰相不 若麻制宣告,天下謂爾脅我爲之。」文場 今以命中尉, 能拒中人,得卿言乃悟。」 不識陛下特以寵文場邪?遂著爲 11 頭 謝

立 太子 順 詔 宗 一; |細 病,不得語 不 請 「輒書曰:「立嫡以長。」跪白之,帝頷乃定。 ,王叔文與牛美人 用事,權震中外, 惲 廣陵王雄 欲危之。 帝召絪草

造爲醜辭以怒陛下。」帝良久曰:「幾誤我!」 「吉甫 學士李絳語其 和 有詔 憲宗卽位, 爲我言。」絳 歸路 ,從史辭路乏糧 故, 拜 曰:「絪任宰相、識名節,不當如犬彘梟鏡與姦臣外通。 中書侍郎、 且曰:「若何而處?」 ,請留軍山東 同中 書門下平章事 絳曰:「誠 李吉甫密譖 , 如 遷門下侍郎。 是, | 級漏言於從史,帝怒,坐浴堂殿,召 罪當族。 始, 然誰 盧從. 以聞陛下者?」曰: 恐吉甫勢軋內忌, 史陰與王承宗連

艒 爲 太子賓客。 先 是 杜黃裳方爲帝夷削節度, 久乃檢校禮部尚書,出爲<u>嶺</u>南節度使,後累遷河中節度。 彊 王室,建議 裁可, 不關決于絪, 入爲御史大夫, 居位 四

列

傳

第

九

+

鄭

絪

樾

徳 廮

檢 八,贈司空,諡 校尚書左僕 射 宣 兼 太子少保。 文宗大和中, 年老乞骸骨, 以太子太傅致仕

脚本以儒術進,守道寡欲,所居不爲烜赫事,以篤實稱。 善名理學,世以耆德推之。

孫 灝 ,舉進士,以起居與尙萬壽公主,拜駙馬都尉。 有器識,宣宗時, 恩寵無比。

校禮部尙書、河南尹。

間 權 韓洄 德 興字載之。 黜陟 河南,辟置幕府。 父皋,見卓行傳。 復從江 德 西觀察使李銀府爲判官。杜佑、裴胄交辟之。 興七歲居父喪, 哭踊如成人。 未冠,以文章稱諸

聞其材,召爲太常博士,改左補闕。

儒

方 固 則 者, 也。」帝乃遣奚陟等四人循行慰撫。 旁資數道 貞元 持節勞徠 八年,關東、淮南、浙西 一, 故 問 天下大計,仰於東南。 人所疾苦,蠲其租 州縣 大水, 入, 今霆 裴延齡以巧倖進 與連 雨 壞廬舍, 漂殺人。 前守 二時,農田 長 講 求 不開 判度支, 所宜 庸 德 亡 興建言:「江、淮田一 賦 德興上疏斥言:「延齡以 日 取 衆。 於人, 宜 澤羣 不若 藏 臣 於 明 善熟 人之 識 通

罔 宋, 擇中朝臣按覆邊資。 上 ; 賦 E 邊 額 軍乏,不稟糧,召禍 用度未盡者爲羨利,以夸己功;用官錢售常平雜物,還取其直,號別貯羨錢,因以 如言者不謬,則邦國之務,不宜委非其人。」疏奏,不 疆場,其事不細。 陛下 疑為流言, 胡不 以新利召延齡, 質覈本

不宜 曹 獨 凡 干 手 首 一歲,甄 員 制 久廢。」帝曰:「非不 兩 省 中下。 起 以相 ,數旬一還舍,乃上書言:「左右掖垣 居舍人。 品籍語 防檢。 始, ,所得 德 歲中, 兼知 奥知制誥 大抵 土相 知 事有所壅, 卿之勞,但擇 繼 制誥,進中書舍人。 ,而徐岱給 爲 公卿、宰相。 則 如 吏得爲非。 事中,高野 卿者未得其人耳。」久之,知禮部貢舉 取明 承天子誥命,奉行詳覆 當是時,帝親攬 四方聞 爲舍人。 經初不 限 者,或以 員 居數歲,岱卒 庶政,重除拜 朝 廷爲乏士,要重之司, 一,各有攸 郢 司。 知 ·,眞拜侍郎。 , 、禮部 凡命 舊 一、德奥 諸朝 制 分

路, 縣令爲民毆辱 除。 心 物 慮 設不 者流 可 種 祈, 九 |麥時, 蠲 惠澤 年 必致其禮,一 除 ,大旱,德 亦 種 和 無 不得下。 不可不祭。」又言:「漕運本濟關中,若轉東都以西緣道 氣 可斂之理 治, 興 因是上陳闕 士有請,必聽其言, 則 祥 宜 不不 詔在 應 至矣。 如先事圖之, 所裁留經用, |政日:「陛下齋心減膳,閔惻元元,告于宗廟 畿甸 憂人之心可謂 之內,大率赤地 則 以種貸民。 恩歸 於上。 至已。 而無 今茲租 去十 所望, 臣 边 賦 聞 年 及宿逋 銷天災者脩 ·夏旱, 轉徙之人, 倉廩,悉入京師 遠貨, 吏趣常 一幕諸 政 斃踣 一切蠲 賦 術 天 地, 至 感感 道

列

年未 啖口 督 上獻 其 矣。」又言:「大曆中,一縑直錢四千,今止八百,稅入如舊 徒 、 困 更相 受命 · 為國掊怨,廣軍實之求,而兵有虛籍,剝取多方, 准 人均也。」又言:「比經絀放者,自謂技拭無期, 所輸以備常數, 勉, ,衣食旣空,溘然就斃,此亦窮人之一端也。 知牽復 可望。 然後約太倉一歲計, 惟因而弘之,使人人自效。」帝頗采用之。 斥其餘者以糶于民, 坐爲匪人,以動和 雖有心 近陛下洗宥絀放者,或起爲二千石 一,則出 計巧曆 於民者五 則 能能 時 倍其初 氣。 價 商 不 功利 踊 而多薦官踰三 而蓄 7 其於割股 几 方 藏 者出 銳 於

許昭 其父虔卒京師 自 軍 校 憲宗 義 則 ,偃蹇不 不可。」帝 元 和 初,歷兵 法,今可 丽 成德王承宗父死求襲,德興諫,以爲:「欲變山東,先擇昭義之帥。 不 聽。 、部侍鄓,坐累,徙太子賓客,俄還前官。 因其喪,選守臣代之。 及王 承宗叛,從史乃詭計以橈王師,兵老無功。德興復請赦承宗, 成德習俗既久,當制以漸,許成德之請則可 時澤路盧從史詐傲,寖不制 從史拔

不制者, 相, 李藩以爲 會裴 不得已與之。 垍 病 不 可 德 , 輿 德奥 自 今鰐 太常 亦奏:「平章事 無 卿拜禮部尙書、 功,又非 姑 非 息時 序 同中書門下平章 進 一假 宜得,比方鎭 此 名,以開後 **紫帶宰相** 事。 人,不可 王鍔繇 必必 有 河中入朝, 。」帝 大忠 若 乃止 勳,否則 求兼宰

徙從史。

後皆

略

如

所

料

董溪、于皋謩以運糧使盜軍興,流嶺南,帝悔其輕, 韶中使半道殺之。 德興諫:「溪等方

心 二 **明堂圖,始禁鞭背,列聖所循,皆尚德教。** 衆同棄,則人人懼法。 11 康用兵,乾沒庫財,死不償責。 帝深然之。 嘗問政之寬猛孰先, 臣知已事 不諍,然異時或有此比,要須有司論報,罰一勸百,孰不甘 陛下以流斥太輕,當責臣等繆誤,審正其罪,明下詔書,與 對曰:「唐家承隋苛虐,以仁厚爲先。太宗皇帝見 故天寶大盜竊發,俄而夷滅,蓋本朝之化,感人心

之深也。」帝曰:「誠如公言。」

之罪旣貸不竟,宜因賜寬詔。」帝曰:「然,卿爲吾過諭之。」復拜太常卿,徙刑部尚書。 扶風郡公。 于順以子殺人,自囚,親戚莫敢過門,朝廷無爲請者。 德輿將行,言于帝曰:「順 帝前遽言亟辯,德輿從容不敢有所輕重,坐是罷爲本官。以檢校吏部尚書留守東都, 帝又自用李絳參贊大機。是時,帝切于治,事鉅細悉責宰相。 [德興善辨論,開陳古今本末,以覺悟人主。 爲輔相,寬和不爲察察名。 李吉甫再秉政 吉甫、絳議論不能無持異,至 進

復研考,定三十篇奏上。復檢校吏部尚書,出爲山南西道節度使。後二年,以病乞還,卒於 先是、詔許孟容、蔣义刊彙格敕、旣成、上之、留禁中、德輿請出其書、與侍郞劉伯獨參

道,年六十,贈尚書左僕射,諡曰文。

觀。 德輿生三歲,知變四聲,四歲能賦詩,積思經術,無不貫綜。 嘗著 論,辨漢所以亡, 西京以張禹,東京以胡廣,大指有補於世。 自始學至老,未曾一日去 其文雅正贍縟,

列

傳第

九十

橶

德興

崔

當時公卿侯王功德卓異者,皆所銘紀,十常七八。雖動止無外飾,其醞藉風流,自然可慕。 貞元、元和間、爲搢紳羽儀云。

其母病,徙鄭州。 訓傾覆陰巧,且亂國,不宜出入禁中。不聽。 中書舍人。時李訓挾籠,以周易博士在翰林,璩與舍人高元裕、給事中鄭肅韓俠等連章劾 子朦,字大圭,元和初,擢進士。歷監察御史,有美稱。宰相字宗閔乃父門生,故薦爲 及宗閔貶,璩屢表辨解,貶閬州刺史。

爲灃王作讓。羣奏:「大凡己當得則讓,不當得之,烏用讓?今逐王嫡,宜爲太子。」帝從其議。 魏博田季安以五千縑助營開業佛祠,羣以爲無名之獻,不當受。有詔却之。進戶部侍郎。 「凡奏議,待羣署乃得上。」羣以「禁密之言,人人當自陳,一爲故事,後或有惡直醜正,則它學 良方正,授祕書省校書郎。累遷右補闕、翰林學士、中書舍人。數陳讜言,憲宗嘉納,因詔學士: 士不得上言矣」,固讓,見聽。<br />
惠昭太子薨,是時,<br />
遂王嫡,而禮王長,<br />
多內助。帝將建東宮,詔羣 崔羣字敦詩,貝州武城人。未冠,舉進士,陸贄主貢舉,梁肅薦其有公輔才,擢甲科,舉賢 訓誅,時人多據明禍福大體,能世其家。

冤死 帝與 孔子有衆好衆惡、浸潤膚受之說, 辨謗略,以自儆鑒。 ,以問羣,羣請釋之,幷還其奴婢貲產。鹽鐵院官權長孺坐罪抵死,其母耄,丐子以養。 、然欲赦之,以問宰相,羣對:「陛下幸憐其老,宜卽遣使窳旨,若須出敕,無及矣。」於是 元和 羣凡啓奏,平恕如此。 十二年,以中書侍郞同中書門下平章事。 其要云何?」 羣對:「無情,曲直辨之至易;有情,則欺爲難審也。 。帝嘗語宰相:「聽受之際,不亦難乎! 比詔學士集前世事,爲 以其難辨也。 若陛下擇賢而任,待之以誠, 糾之以法,則 李師道既誅,師古等妻子沒入掖廷,帝 故

因推 固已分矣。」 左右爲感動。 天寶爲戒,社稷之福也。」又言:「世謂祿山反,爲治亂分時。 宋璟、盧懷愼輔以道德,蘇興、李元紘孜孜守正,則開元爲治。 皇甫 人,故宇文融以言利進, 人自歸正,而不敢以欺。」帝韙其言。 「孝德」爲號,羣獨以爲有「睿聖」,則「孝德」幷見。 ;言其極曰:「安危在出令,存亡繫所任。 | 鎛言利幸於帝,陰藉左右求宰相, | 羣數言其佞邪不可用。 處州 ,刺史苗積進羨錢七百萬,羣以受之失信天下,請還賜其州,以紓下戶之賦。是時, 李林甫、楊國忠怙寵朋邪, 羣以是諷帝,故鎛銜之。 昔玄宗少歷屯險,更民間疾苦,故初得姚崇、 帝聞不樂。會度支稟賜邊士不時,物多 帝卒自 則天寶爲亂。 1相縛。 臣謂罷張九齡,相林甫 其後安于逸樂,遠正 既入對,及開元、天實事,羣 會羣臣上帝號,鎛欲兼用 願陛下以開元爲法,以 土 ,則治亂 一,呢小

列

傳

第九十

崔

怨天子。」於是罷爲湖南觀察使。

弊惡,李光顏憂甚,至欲引佩刀自決,中外皆恐。」轉奏:「邊鄙無事,乃澤鼓動,欲以買直,歸

陛下 若假以節度,不報。智興討幽、鎭還,藉兵逐羣,羣失守,左遷祕書監,分司東都。改華州刺史, 歷宣\歌池觀察使,進兵部尙書,出爲|荆南節度使,召拜吏部尙書。 卒,年六十一,贈司空。 付久矣。」俄拜御史大夫。未幾,檢校兵部尚書,充武寧節度使。臺以其副王智興得士心,不 ·向爲准西節度使,臣起制草,其言有『能辨南陽之牘,允符東海之貴』,先帝然之,則傳 穆宗立,以吏部侍郞召之,勞曰:「我爲太子,卿力也。」羣曰:「此先帝意,臣何力焉?且

畏,聖人難之。觀孝明皇帝本中主,遭變可與謀始,持成不可與共終。崔羣以爲相李林甫 支, 偃然自慰曰:「我曷以喪?」故能舉天下付之亡, 不畏也。常人所畏, 聖人易之, 所不 施施自如曰:「賢難得,雖無賢,尚可治也;佞可去,雖存佞,不遽亂也。」視漏弗填,忽傾弗 未也, 曰:「吾覆亡不暇, 又何以安?」故能舉天下付之興, 畏之也。禍難已平, 上恬下嬉, 贊曰:聖人不畏多難,畏無難。 何哉?多難之世,人人長慮而深謀,日惕于中,猶以爲

則治亂已分,其言信哉!是扁鵲所以誚桓侯也。

## 唐書卷一百六十六

## 列傳第九十一

買耽 杜佑式方 悰 孺休 慆 牧 顗 **令狐楚** 緖 綯 滈 定

使。 使王思禮署爲度支判官。累進汾州刺史,治凡七年,政有異績。 不平,請爲公殺之。」耽曰:「是何謂邪?朝廷有命,卽爲帥矣。吾今趨覲,得以君俱。」乃行, 張獻甫曰:「天子播越,而行軍以公命問行在,乃規旄鉞,利公土地,可謂事人不忠矣。 耽內詔于懷,飲如故。 俄爲山南西道節度使。梁崇義反東道,耽進屯穀城,取均州。 賈耽字敦詩,滄州南皮人。天寶中舉明經,補臨淸尉。上書論事,徙太平。 耽使司馬獎澤奏事。 澤還,耽大置酒會諸將。俄有急詔至,以澤代耽,召爲工部尙 既罷,召澤曰:「詔以公見代,吾且治行。」敕將吏謁澤。 召授鴻臚卿,兼左右威遠營 建中三年,徙東道。德宗 河東節度 大將

軍中遂安。

雖削僞號,而陰蓄姦謀,冀有以逞。 俄 郑道 爲 東都 ,奈何疑之,使暴于野?」命館城中,宴<u>無下,納</u>士皆心服。 留守。 故事 ٠, 居守不出城,以耽善射,優詔許獵近郊。 其兵數千自行營還, 道出滑 , 耽每畋,從數百騎,往 遷義成節度使。 或請館 于 外。 |耽日: 淄

射。 往入納境。 命之,若謀之軍中,則下有背向,人固不安。帝然之,不用也。 時王叔文等干政,耽病之,屢移疾乞骸骨,不許。卒,年七十六,贈太傅,諡曰元靖 貞元九年,以尙書右僕射同中書門下平章事,俄封魏國公。 納大喜,然畏其德,不敢謀。 順宗立,進檢校司空、左僕 常以方鎮帥 缺, 當自 天子

著真元 **[別 録** 布隴 區產 墨,今州 以寸爲百 右、 六篇、河西戎之錄四篇,上之。 山 耽 十道錄,以貞觀分天下隸十道,在景雲爲按察,開元爲採訪,廢置升降備焉。 嗜觀書,老益勤,尤悉地理。四方之人與使夷狄者見之,必從詢索風俗,故天下地土 Ш 縣以朱,刊落疏舛,多所釐正。 山南 里。 夷岨,必究知之。方吐蕃盛彊,盜有隴西,異時州縣遠近,有司不復傳。、耽乃繪 **幷譔古今郡國縣道四夷述,其中國本之禹貢,外夷本班固漢書,古郡國題以** 九州 且載河所經受爲圖, 詔賜幣馬珍器。 帝善之,賜予加等。或指 又以洮湟甘凉屯鎮額籍、道里廣狹、山險水原爲 又圖海內華夷,廣三丈,從三丈三尺, 圖問其邦人,威得其眞。又 至陰陽

雜數罔不通。

行, 自其所長。 其器恢然,蓋長者也,不喜臧否人物。爲相十三年,雖安危大事亡所發明,而檢身厲 每歸第,對賓客無少倦,家人近習,不見其喜愠。 世謂淳德有常者。

杜佑字君卿,京兆萬年人。

開元中,交河公主嫁突騎施,詔希望爲和親判官。 諸將金事泄,抵死,畀金者皆得罪。 結其驩,答曰:「以貨藩身,吾不忍。」仙童還奏希望不職,下遷恆州刺史,徙西河。 和非臣下所得專。」廣悉衆爭檀泉,希望大小戰數十,俘其大會,至莫門,焚積蓄,卒城而還。 授二子官。 領隴西節度,故拜希望鄯州都督,知留後。馳傳度隴,破鳥莽衆,斬千餘級,進拔新城,振旅 而 還 父希望,重然諾,所交游皆一時俊桀。爲安陵令,都督宋慶禮表其異政。 自代州都督召還京師,對邊事,玄宗才之。屬吐蕃攻勃律,勃律乞歸,右相字林甫方 擢鴻臚卿。於是置鎭西軍, 希望引師部分塞下, 吐蕃懼,遺書求和。 時軍屢興,府庫虛寡,希望居數歲,獨粟金帛豐餘。 宦者牛仙童行邊,或勸希望 希望愛重文學,門下所引如崔顯等皆名重當時。 信安郡王漪表署靈州別駕、關內道支度 希望報日:「受 坐小累去官。 而仙童受

|佑以蔭補濟南參軍事、|剡縣丞。 | 管過潤州刺史||韋元甫,|元甫以故人子待之,不加禮。 它

列

第

+

杜佑

五

中,爲 初 准 日 ,河朔兵挐戰,民困,賦無所出。 , 元 水陸 甫 皆表置幕府。入爲工部郎中,充江淮青苗使,再遷容管經略使。 有 |轉運使,改度支兼和糴使。 ·疑獄不能決,試訊佑,佑爲辨處契要無不盡 |佑以爲救敝莫若省用,省用則省官,乃上議 於是軍興餽漕,佑得剸決。以戶部侍郎判度支。 元甫奇之,署司法參軍 楊炎輔政 ,府徙浙 ,歷金部郞

選 察,猶今觀 卿、 不 使,則二伯 庶, 今十二 則 者,旣無闕員,則置員外官二千人,自是以爲常。 同 駕部 故古者計人置吏,不肯虛設。 垂 爾 昔咎繇作士,今刑部尚書、大理卿, 漢光武 衞 也。 詎 郎 中、尚 夷也。 有 察使之有副 神策 契作 省官七百,隋開皇廢郡五百; 建武中廢縣四百,吏率十署一;魏太和時分遣使者省吏員, 事 實哉? 八軍,凡將 司徒,今司徒、戶部 伯益 御、 誠宜 也。 爲虞,今虞部 閉廏使,則 斟 軍六 參 酌繁省。 軍 十員。 · 者 自漢至唐,因征戰艱難以省吏員,誠救弊之切也 。, 參 尚書, 郎中、都水 其府軍事 伯囧也。 欲致治者先正 舊名不廢, 則二咎繇也。 則二製也。 貞觀初省內官六百員。 設官之本, 使者, ,猶今節 古天子有 新 當開元、天寶中,四方無虞,編戶九 則二伯益 名。 資 睡作共工,今工部尚書、將作監 伯夷爲秩宗,今禮部尚書、禮儀 日 度判官也。 神龍 六軍 加 中,官 丁,漢前: 也。伯囧爲太僕,今太僕 且 漢 置 官名 後 紀 別 蕩然,有司 左右 職 正始時并郡 務 將軍四人, 隨 ,以治衆 直 刺 大集 史巡 遷

按比,纔得三百萬,比天寶三分之一,就中浮寄又五之二,出賦者已耗,而食之者如舊, 百餘萬,帑藏豐溢,雖有浮費,不足爲憂。今黎苗凋瘵,天下戶百三十萬,陛下詔使者

安可不革?

作耶? 輩繁刑暴賦,惟軍是**卹**,遇士人如奴,固無<u>范</u>睢業 〉、賈季 彊 狄之患。 若以習久不可以 司、光祿大夫,亦官名,以其太多,回作階級。隨時立制,遇弊則變,何必因循憚改 者居之,貴寵第一,周、隋間授受已多,國家以爲勳級,纔得地三十頃耳。又開府儀同三 不如狀,舉者當坐;不爲人舉者,任參常調。亦何患哉?如魏置柱國,當時宿德盛業 遽改,且應權省別駕、參軍、司馬,州縣額內官,約戶置尉。當罷者,有行義,在所以 正始、太元時吳、蜀鼎立,開皇時陳尚割據,皆羅取俊义,猶不慮失人以資敵。今田悅 且才者薦用,不才者何患其亡,又況顧姻戚家產哉!建武時公孫述、隗囂未滅, 議者以天下尙有跋扈不廷,一省官吏,被罷者皆往托焉。此常情之說,類非至論。 聞

## 議入,不省。

列傳

第九

杜佑

節度使。怙爲開大衢,疏析廛閈,以息火災。|朱厓|黎民三世保險不賓,|佑討平之。召拜尚 盧杞當國,惡之,出爲蘇州刺史。前刺史母喪解,佑母在,辭不行,改饒州。 俄遷嶺

書右丞。俄出爲淮南節度使,以母喪解,詔不許。

書門下 佐 廣 應 了。故南宮傳、李亞、鄭元均至爭權**亂**政,帝爲佑斥去之。 灌溉,斥海 變非所長, 徐州 - 平章事 節度使張建封卒,軍亂,立其子愔,請于朝,帝不許,乃詔佑檢校尚書左 瀕棄地爲田,積米至五 因固境不敢進,乃韶授愔徐州節度使,析濠、泗二州隸淮南。 ,節度徐泗討定之。 佑具舠艦,遣屬將孟 十萬斛,列營三十區,士馬整飭, 準度准撃徐,不克 四鄰畏之;然寬假僚 引還。 初, 佑決雷 一僕射、 |佑於出 陂 同中 以 師

決, 躯 鐵使。 溹 助 鹽鐵於 染湿 /, |佑 中 不 溪。 於是王 九年, 少府 陳諫 應 ,乃謀逐之, ,職務簡脩。 始,度支嗇用 請須叔文,佑曰:「使不可專耶? 拜檢校司空、同中書門下平章事。 |叔文爲副,佑旣以宰相不親事, 未決而敗。 (度,多署 明年,拜司 更權 佑 徒,封 更薦李巽以自 攝 百 岐 司, 國 . 」乃出: 叔文遂專權。後叔文以母喪還第, 公。 繁而 德宗崩, 諫爲河中少尹 副 不 一綱; 佑 詔 憲宗 攝冢宰。 在諒闇 以營繕還將作,木炭歸司農 進檢校司徒, 叔文欲搖 復攝冢宰, 東宮、冀佑 虚 佑 兼度支鹽 有所: 讓度支 按 爲

党項 陰導吐蕃 爲亂 諸 將 邀功,請討之,佑 以爲 無良邊臣 有爲 而 叛, 卽 上 疏

北 拒匈奴 昔 周宣 西逐諸法,結怨階亂,實生謫 中 興, 獫狁 爲害,追之太原,及 戍。 境 蓋聖王之治天下, 面 止 ,不欲弊中國 惟欲綏靜生人,西至于 怒遠 夷 也。 秦 恃兵力,

宋璟慮邊臣由此邀功,但授郎將而已,繇是訖開元之盛,不復議邊,中國遂安。此成敗 者爲國家生事夷狄。比突厥默啜寇害中國,開元初,郝靈佺捕斬之,自謂功莫與二, 首京師,威震西域,宣帝議加爵土,蕭望之獨謂矯制違命,雖有功不可爲法,恐後奉使 流沙,東漸于海,在北與南,止存聲教,豈疲內而事外耶?昔馮奉世矯詔斬莎車王,傳

輯,禁絕誅求,示以信誠,來則懲禦,去則謹備。 爲邊境。」此誠聖哲識微知著之略也。今戎醜方彊,邊備未實,誠宜愼擇良將,使之完 狄西戎相誘盜邊。 党項小蕃,與中國雜處,間者邊將侵刻,利其善馬子女,斂求繇役,遂致叛亡,與北 傳曰:「遠人不服, 則脩文德以來之。」管仲有言:「國家無使勇猛者 彼當懷柔,革其姦謀。 何必亟興師役,

鑒戒之不遠也。

帝嘉納之。

坐取勞費哉?

備厚。元和七年卒,年七十八,册贈太傅,諡曰安簡 名。後數年,固乞骸骨,帝不得已,許之,仍拜光祿大夫、守太保致仕,俾朝朔望,遣中人錫予 歲餘,乞致仕,不聽,詔三五日一入中書,平章政事。 佑每進見,天子尊禮之,官而不

佑資嗜學,雖貴獨夜分讀書。先是,劉秩摭百家,侔周六官法,爲政典三十五篇,房琯稱

列傳

第九

+

杜佑

其書約而詳。

才過劉向。 他以爲未盡,因廣其闕,參益新禮爲二百篇,自號通典,奏之,優詔嘉美,儒者服 一個以爲未盡,因廣其闕,參益新禮爲二百篇,自號通典,奏之,優詔嘉美,儒者服

職,爲治不皦察,數斡計賦, 頗治亭觀林芿,鑿山股泉,與賓客置酒爲樂。 爲 人平易遜順,與物不違忤,人皆愛重之,方漢胡廣,然練達文采不及也。 相民利病而上下之,議者稱估治行無缺。 子弟皆奉朝請,貴盛爲一時冠。 惟晚年以妾爲夫人, 天性精於吏 朱坡樊川

子式方。

有所蔽云。

使。 出爲昭應令,遷太僕卿。 弟從郁痼疾,躬爲營方藥羞膳,及死,期而泣, 從郁,元和初爲左補闕,崔羣等以宰相子爲嫌,再徙祕書丞。終駕部員外郎。 式方字考元,以蔭授揚州參軍事。 子悰, 尚公主。 再遷太常寺主簿,考定音律,卿高郢稱之。 式方以右戚, 輒病不視事。 世稱其篤行。 卒,贈禮部尙書。 穆宗立,授桂管觀察 子性。 佑旣相,

見郁文雅,歎曰:「德輿有婿乃爾!」時岐陽公主,帝愛女。 除字永裕,以門蔭三遷太子司議郎。權德輿爲相,其婿翰林學士獨孤都以嫌自白。憲宗 舊制, 選多戚里將家,帝始韶字

不謝, 相李吉甫擇大臣子,皆辭疾,唯悰以選召見麟德殿。 初 当由 澧州 文宗怪之。 刺 史召爲京兆 戶部侍郎李珏曰:「比駙馬都尉皆爲公主服斬衰三年,故悰不得謝。」帝矍 尹,遷鳳翔忠武節度使。入爲工部尚書,判度支。 禮成,授殿中少監、 駙馬都尉。 會公主薨,悰久

然,始韶杖而期,著于令。

爲留守,復節度劍南西川。 **欲**閱良家有姿相者,[除日:「吾不奉詔而輒與,罪也。」監軍怒,表于帝。 更表以爲祥。 韶罷所進伎, 會昌 始,宣宗世,夔王以下五王處大明宮內院,而鄆王居十六宅。帝大漸,樞密使王歸長、 劉稹平,進左僕射、兼門下侍郎。 時方旱,道路流亡藉藉,民至應漕渠遺米自給,呼爲「聖米」,取陂澤茭蒲實皆盡,除 一初,爲淮南節度使。 有意倚悰爲相矣。 獄囚積數百千人,而荒湎宴適不能事。 罷,兼太子太傅,分司東都。 召爲右僕射,判度支,進兼門下侍郎同平章事。 武宗詔揚州監軍取倡家女十七人進禁中,監軍請悰同選,又 踰年,召拜檢校尙書右僕射、同中書門下平章事,仍判度 未幾,以本官罷,出爲劍南東川節度使,徙西川,復鎭 帝以悰有大臣體,乃 踰歲,起

列傳第九十一 杜佑

人請帝監國奏,因諭宗劾大臣名不在者抵罪。

爲懿宗。

馬公儒等以遺詔立夔王,而左軍中尉王宗實等入殿中,以爲歸長等矯詔,乃迎鄆王立之,是

久之,遣樞密使楊慶詣中書,獨揖悰,它宰相畢誠、杜審權、蔣伸不敢進,乃授悰中

悰遽封授使者復命,

謂慶曰:「上踐祚未久,

君等秉權 敗,奔于悰,悰囚之,劾不能伏節,有詔斬之。悰不意其死,駭愕得疾卒,年八十,贈太師。 空,封邠 國公,以檢校司徒爲鳳翔、荆南節度使, 了以愛憎殺大臣,公屬禍無日矣。」<br />
慶色沮去,帝怒亦釋, 加棄 太太傅。 會黔南 大臣遂安。 觀察使秦匡謀 未幾, 討 册 拜 一,兵 葬 司

韶宰相百官臨奠。 | 惊於大議論往往有所合,然才不周用。 雖出入將相,而厚自奉養,未嘗薦進幽隱,佑之

素 風 、衰焉,故時號「禿角犀」。

日

中。 金。 孺休爲之,以解爲 \_ |粲 子裔休, 大順初,錢鏐遣弟嫁率兵擊徐約於蘇州,破之,以海昌都將沈粲行刺史事,而昭宗更命 日:「殺爾 懿宗時歷翰林學士、給事中,坐事貶端州司馬。弟孺休,字休之。 , 制置指揮使。 金焉往 ? 」與兄述休同死。 一個不悅,密遣緊害焉。始,孺休見攻也,曰:「勿殺我,當與爾 累擢給事

|惊弟||作。

守。 慆 慆 曰:「吾出百 滅通 中爲 泗 口 州 求 刺史。 生 衆心搖矣, 會龐勛反 不如與將士生死共之。」衆聞皆泣下。 圍城,處士辛讜自廣陵來見惱, 勸出家屬, 慆之聞難,完 獨以身

濬城隍,閱器械無不具。

流 所包, 累攻不得志,招討使馬舉率兵至,遂解去。 令狐綯遣牙將李湘屯淮口 見慆約降,慆怒殺之。」勛復遺之書,慆答書言安祿山、朱泚等終底覆滅者,以陰攜其黨 伏 不息,讜乃請救於戍將郭厚本,賊解去。 而 梯 以書射城中促降。 甲士三百,宴毬場 賊 衝 將 源城。 軍盡沒。 李圓易慆 糧盡,爲薄饘以給。一懲宗遣使加慆檢校右散騎常侍, 慆使人間道走京師, ,馳勇士百人欲入封府庫,慆爲好言厚禮迎勞,賊不虞慆之謀也。 ,賊皆殲焉。 會夜,慆擊鼓乘城大呼, [ ,與郭厚本合,爲圓所敗,湘等並沒,於是援絕。 圓怒,傅城戰。 詔戴可師以沙陀、 浙 西節度使杜審權遣將以兵千人來援,反爲圓 圓氣奪,奔還徐州。 **慆殺數百人,圓** 吐渾兵二萬招討。 退壁城 未幾, 勉以 西 賊焚淮口 》堅守。 賊乃以鐵鎖 勛聞, |動造||圓 淮南 益其兵, 晝夜戰 節 明日 絕准 度使 入 勛 軍

平 临遷、歲尾節度使,檢校兵部尚書,卒。 蓮 凡 十月,慆拊循土,皆殊死奮,而字讜冒圍出入,糾輯援師,卒完一州,時稱爲難。

賊

淮 南 節 收 字牧之,善屬 度 府掌書記。 文。 擢監察御 第進 士,復舉賢 史,移疾分司東都 (良方正。 沈傳師 以弟顗病棄官。 表爲 江 西團練府巡官, 復爲宣州 團 又爲牛僧孺 練 判官

殿

中

侍

御

史內

供

術,復失山東 是時 劉從諫守澤路,何進滔據魏博,頗驕蹇不循法度。 鉅封劇鎮,所以繫天下輕重,不得承襲輕授, 皆國家大事 |牧追答長慶以來朝廷措置亡 ,嫌不當位而言,

實有罪,故作罪言。其辭曰:

下。 唯 沈鷙多材力,重許可,能辛苦。 日冀州,舜以其分太大,雜爲幽州,爲丼州。 山東敦五種,本兵矢,他不能蕩而自若也。 冀州,以其恃彊不循理,冀其必破弱;雖已破,冀其復彊大也。抖州, 生人常病兵,兵祖於山東,羨於天下。 幽州,幽陰慘殺也。 。聖人因以爲名。 一號、晉以下,工機纖雜,意態百出,俗益卑弊,人益脆弱, 不得山東,兵不可死。 程其水土,與河南等,常重十一二,故其人 **產健馬,下者日馳二百里,所以兵常當天** 山東之地,禹畫九土 力足以并

河以窺胡。 宋武敵也,是宋不得山東,隋得山東,故隋爲王,宋爲霸。 **|晉**亂胡作,至宋武號英雄,得圖,得關中,盡有河南地,十分天下之八,然不能使一人度 故蒯通知漢、楚輕重在信。光武始於上谷,成於鄗。 至秦萃銳三晉,經六世乃能得韓,遂折天下脊;復得趙,因拾取諸國。 黃帝時,蚩尤爲兵階,自後帝王多居其地。 至高齊荒蕩,宇文取之,隋文因以滅陳,五百年間,天下乃一家。隋文非 周劣齊霸,不一世,晉大,常傭役諸侯。 魏武舉官渡,三分天下有其二。 由此言之,山東,王者不得不 韓信聯齊有之,

爲王,霸者不得不爲霸,猾賊得之,足以致天下不安。

盡得 自 焦然七十餘年。運遭孝武,澣衣一肉,不畋不樂,自卑冗中拔取將相,凡十三年,乃能 轉,顚倒橫邪,未常五年間不戰。生人日頓委,四夷日日熾,天子因之幸陝,幸漢中,焦 脩障戍,塞其街蹊。 齊、魯、梁、蔡被其風流,因亦爲寇。 以裏拓表,以表撑裏,混澒回 未至於怙泰邪?豈人謀未至邪?何其艱哉 爾百餘城,天下力盡,不得尺寸,人望之若回鶻、吐蕃,義無敢窺者。國家因之畦河 河南、山西地,洗削更革,罔不能適。唯山東不服,亦再攻之,皆不利。 豈天使生人 |天寶末,||燕盜起,出入||成皋、||函、||潼間,若涉無人地。 郭、李輩兵五十萬,不能過鄴。

治所,實不輟 年,豈不綽綽乎? |蔡,得齊 亦叛, 其他未叛者, 迎時上下, 不可保信。 齊、蔡叛,梁、徐、陳、汝、白馬津、盟津、襄、鄧、安、黃、壽春皆戍厚兵, 山 .東,兵不可去。 今者,上策莫如自治。 今日天子聖明, 、牧郡縣 一人以他使,遂使我力解勢弛,熟視不軌者,無可奈何。 二百餘城,所未能得,唯山東百城耳。 亦足自以爲治也。 超出古昔, 志於平治。若欲悉使生人無事,其要先去兵。不得 法令制度,品式條章,果自治乎?賢才姦惡,搜選 何者?當貞元時,山東有燕、趙、魏叛,河南有 自元和初至今二十九年間,得閩,得吳,得 土地人戶,財物甲兵,較之往 ,十餘所纔足自護 階此,蜀亦叛,吳

列傳

食盡 取? 故 操燕、趙之命。 以其能遮趙也。 置 且 者 誅 年 壘相望, 如 不審攻守,爲浪戰,最下策也。 元 趙,罷 三,至 日取魏爲中策。 - 無山東憂,亦以能得魏也。 不 捨 ,便於守; 兵少粟少, 人不驅自戰者, 便於戰。 和中,舉天下兵誅察,誅齊,頓之五年,無山東憂者,以能得魏也。 三五世,後生所 且下。 故曰上策莫如自治。中策莫如取魏。 - 果自治,是助虜爲虜。 ,果自治 一有圍 如 朝駕暮戰,是二津虜能潰一,則馳入成皋,不數日間。 長慶時,亦以失魏也。 急食盡 郗士美敗 乎?障戍鎭守, 故魏在山東最重。 旣不 見言語舉止,無非叛 ,啖屍以戰。 最下策爲浪戰,不計地勢, ",趙復振; 可越魏以取趙 環土三千里, 植根七十年, 復有天下陰爲之助, 干戈車馬,果自治乎? 長慶初誅趙,一日五諸侯兵四出潰解,以失魏也。 以此爲俗 杜叔良敗,趙復振; 故河南、山東之輕重在魏。 黎陽距白馬津三十里,新鄉距盟津一百五十里,陴 固不可越趙以取燕。 也,以爲事 '', 豈 魏於山東最重,於河南亦最重。 印 興決 不審攻守是也。兵 故我常失於戰,虜常困於守。 理正當 一勝 井関阡 李聽敗,趙復振。 如此,沈 一負哉?自 陌 是燕、趙常取重於魏,魏常 非魏彊大,地形使然也。 , 倉廩財賦 耐入骨髓,無 故魏於河南亦最重。 多粟多, 一十餘 昨日誅滄,頓之三 故日不計地勢, 年 ,果自治 凡三收趙, 魏在山東, 鰛 則安可以 人使戦 以爲非 Ш 昨日 東 平 ? 叛

折膠 舉無類矣。」德裕善之。 回鶻 天井關彊百 累遷左補闕、 重馬 口 鶻 免乳,與之相校,故敗多勝少。今若以仲夏發幽、<br/>
,抖突騎及酒泉兵,出其意外, 種落潰入漠南 里,用萬人爲壘 史館修撰, 會劉稹 , 牧說德裕 ,窒其口,深壁勿與戰。 改膳部員外郎。 拒命, 不如遂取之,以爲:「兩漢伐虜,常以秋冬,當匈奴勁弓 韶諸鎭兵討之, 收復移書於 德裕, 宰相李德裕素奇其才。 成德軍世與昭義為敵,王元逵思一雪以 會昌中, 以「河陽西北去 點夏斯破

池、陸三州刺史,入爲司 潤弩手二千,道絳而入,不數月必覆賊巢。 自奮,然不能長驅徑擣上黨,其必取者 山 [西兵單少, 可乘虛襲取。 `勳員外郎、常兼史職。 故兵聞拙速, 在 西面。 未睹巧之久也」。俄而澤潞平, 昭義之食, 改吏部, 今若以忠武、武寧兩軍益青州精甲五千、宣 盡仰山東 復乞爲湖州刺史。 常日節度使率留食邢州, 略如牧策。 踰年,以考功郎 歴黃

駒」字 宋邧善,其通古今,善處成敗,甘等不及也。 而 |牧回 |牧 ,,或曰「過隙也」。俄而炊甑裂,牧曰:「不祥也。」乃自爲墓誌,悉取所爲文章焚之。 剛直有奇節, 躓不自振,頗怏怏不平。 不爲齪齪小謹, 卒,年五 敢論列 十。 牧亦以 大事 初,牧夢人告曰:「爾 疏 指陳病利尤切至。 直 時無右援者。 應名 畢。」復夢書「皎皎白 少與李甘、 從兄悰更 李中敏、 歷將相,

中知制誥,遷中書舍人。

收於詩,情致豪邁,人號爲「小肚」,以別杜甫云。

列

傳

第

九 十

杜

佑

令

孤楚

卒。 滴袁州 李訓、 人。」授祕書省正字。 顗 字勝之, 鄭注必敗。」行未及都,聞難作,即辭疾歸。 歎曰:「門下愛我皆如顗,吾無今日。」大和末, 幼病目, 李德裕奏爲浙西府賓佐。 母禁其爲學。 舉進士, 德裕貴盛,賓客無敢忤,惟顗數諫正之。 禮部侍郎賈餗語人曰:「得杜顗足敵數百 **顗亦善屬文,與**牧相上下。竟以喪明 ,召爲咸陽尉 , 直史館。常語人曰: 及

歲謝 |楚,使草遺奏,諸將圜視,||楚色不變,秉筆輒說,以徧示士,皆感泣,一軍乃安。 其材,將辟煙,懼不至,乃先奏而後聘。雖在拱所,以父官井州不得奉養,未嘗豫宴樂。 許正倫輕薄士,有名長安間,能作蜚語,楚嫌其爭,讓而下之。旣及第,桂管觀察使王拱愛 太原奏,必能辨楚所爲,數稱之。儋暴死,不及占後事,軍大讙,將爲亂。夜十數騎挺刃邀取 歸。|李說、嚴綬、鄭儋繼領太原,高其行,引在幕府,由掌書記至判官。 令狐楚字殼士,德棻之裔也。 生五歲,能爲辭章。逮冠,貢進士,京兆尹將薦爲第一,時 德宗喜文,每省 由是名益重。 满

以親喪解,旣除,召授右拾遺。

憲宗 時,累擢職方員外郎, 知制 誥。 其爲文,於牋奏制令尤善,每一篇成,人皆傳諷

度使, 停楚學士,但爲中書舍人。 皇甫 方伐察,久未下,議者多欲罷兵,帝獨與晝度不肯赦。一元和十二年,度以宰相領彰義節 鎛以言利 楚草制,其辭有所不合, 度得其情。 1幸,與楚、蕭俛皆厚善,故薦 俄出為華州刺史。 于帝。 時宰相李逢吉與楚善,皆不助度,故帝罷逢吉 後它學士比比宣事不切旨,帝抵其草,思楚 帝亦自聞其名, 召爲翰林學士,進中書舍

係路。 營景陵,詔楚爲使,而親吏韋正牧、奉天令于翬等不償傭錢十五萬緡,楚獻以爲羨餘,怨訴 楚斬其首惡,衆遂定。 道 長慶二年,擢陝號觀察使,諫官論執不置,楚至陝一日,復罷還東都。 下侍郎。 潰歸,保北城,將轉掠旁州。 鎛既相,擢楚河陽懷節度使,代烏重胤。 韶捕暈等下獄誅,出楚爲宣獻觀察使。俄貶衡州刺史,再徙,以太子賓客分司東都。 。度出太原,鎛薦楚爲中書侍郞、同中書門下平章事。 |楚至中渾,以數騎自往勞之。衆甲而出,見楚不疑,乃皆降。 始,重胤徙滄州,以河陽士三千從,士不樂,半 穆宗即位,進門

宣 武節度使。 會逢吉復相,力起楚,以李紳在翰林沮之,不克。一敬宗立,逐出紳,即拜楚爲河南尹。遷 **汴軍以** )驕故,而韓弘弟兄務以峻法繩治,士偷于安,無革心。 楚至,解去酷

辭,有詔嘉允。 河東 以仁惠鐫諭 | 鄆帥每至 召爲 (東部尙書,檢校尙書右僕射。 ,以州錢二百萬入私藏, 俄兼太常卿,進拜左僕射、彭陽郡公。 ,人人悅喜,遂爲善俗。 |楚獨辭不取。 入為戶部尚書,俄拜東都留守,徙天平節度 故事 ,檢校官重,則從其班,楚以吏部自有品,固 又毁李師古園檻僭制者。 使。 徙節

實爲 亂 艺 一雜治, 又議官自治園植茶,人不便,楚請廢使, 會李訓亂 楚以 兆 朝 在宦 放故 新 至 帝許相楚,乃不果, 內仗非宰相繫所也。」帝領之。旣草詔,以王涯、賈餗冤,指其罪不切,仇士良等 豎 建福門。及是亂,乃罷。 誅 王 ,將相皆繫神策軍。文宗夜召楚與鄭覃入禁中,楚建言:「外有三司 璠 大臣 數 、郭行餘 Ĺ 暴 一疏辭位,拜 骸 未收、怨診感結、稱 驅將吏, 更用李石,而以楚爲鹽鐵轉運使。 山南 课 血 西道 楚即奏:「鎭 京 節 師 度使。 所宜 疾不 如舊法,從之。一元和中,出禁兵界左右街使衞 師初 出,乃請給 停止。」詔 卒,年七十二, 2拜,必戎服屬仗詣省謁辭,本於鄭注 म 衣 衾槥櫝 開 贈 先是, 成 司 元年上巳,賜羣臣宴 以, 空, 鄭注 諡 斂刑骨 奏建権茶使, 文。 御史,不則 ,順陽氣。

子 有 績 召門人李商隱曰:「吾氣魄且盡,可助我成之。」其大要以甘露事誅譴者衆,請霽威,普見 人得 所 宜 疾 甚 一,諸子 進藥,不肯御 一、日:「士 固 有命 何事 此物 邪 ? 自 力爲 奏謝 天

|楚 外

嚴

重不

可

犯,而

中寬厚

/', 待

士有禮。

客以

星步

鬼神

進者

不

接

爲

政善撫

御、治

昭洗。 乘葬,銘誌無擇高位。」是夕,有大星實寢上,其光燭廷。坐與家人訣,乃終。 辭致曲盡,無所謬脫。 書已,敕諸子曰:「吾生無益於時,無請諡,勿求鼓吹,以布車 有詔停鹵簿

子緒、綯,顯于時。

以申其志。

嘉其意,乃止。 緒以蔭仕,歷隋、壽、汝三州刺史,有佳政。汝人請刻石頌德,緒以綯當國,固讓。宣宗

綯字子直,舉進士,擢累左補闕、右司郎中。

出爲湖州刺史。

胸今守湖州。」因曰:「其爲人,宰相器也。」即召爲考功郎中,知制誥。入翰林爲學士。它夜, 已。」胸再拜曰:「陛下必欲興汪業,捨此孰先?詩曰:『惟其有之,是以似之。』」進中書舍人, 育,至亂未嘗任賢。任賢,享天下之福;任不肖,罹天下之禍。」帝曰:「善,**朕讀此常三復**乃 召與論人間疾苦,帝出金鏡書曰:「太宗所著也,卿爲我舉其要。」綯擿語曰:「至治未嘗任不 宮不去,果誰耶?」敏中言:「山陵使今狐楚。」帝曰:「有子乎?」對曰:「緒少風痹,不勝用。 大中初,宣宗謂宰相白敏中日:「憲宗葬,道遇風雨,六宮百官皆避,獨見頎而髯者奉梓

列傳

宣武 嗣 華 炬 彭 位 陽 送 又徙 還 男 由 尚 淮 院 書左僕射、 遷 | 東望見,以爲天子來。 南副 御 史 大使。 中 丞 門下 ,再遷兵部 安南平 侍 郎 以 册 侍 及綯 饋 拜 鄓。 司 運 勞, 空。 至, 還爲翰林 皆驚。 封涼國 未幾 承旨。 俄 檢校司徒平章事 同 中書門下平 夜對禁中, 章 燭 事 虚 爲 ', 輔 河中節度使。 帝以 政 + 乘輿、 年。 金蓮 懿宗

會, 其度 杰, 使得 間 假 勛 幟 日 勛 漫 直 . |徐 示侈 啖 解 淮 襲 節 絕 龐 人以 勛自 湘 准 兵 而 謝 於 何 壘, 綯 泗 擅 湘覆 勅 豫 人,其畏我甚 飽 桂州 還 ,合除之不逞, 湘 我 二「數蒙 悉俘 ),果反· 哉? 曰:「賊已降 詔 還, 賊 綯 而 矣, 」 勛還 爲徐州 道 殺赦 食之, 建 浙 淮 , 雖 所 西白沙 禍亂滋 南 高 未有詔,一 ,弟謹 果盜徐州 以 南 郵 旌 醢 未 面 湘 厓 入濁 卽 招 英。」胸 峭 及 戍 降 計 監 之,亦皆 准 水 者 使。 切制亂 河 其 狹 軍 口 衆六 ),若使荻艚 都 , 懦 剽 無 一二將爲異耳 賊方 厚本。 緩 庸戦 陷 舟 七 不 我 攻泗州 而 萬。 能 上。 得 時 用 湘 專之。 火 除乏食, ,又自以不 八其前 綯聞 乃 西杜 徹 杜慆 願 警 今其兵不二 , ,勁兵乘其後, 圖 審 遣使慰撫 釋械 分兵 去之, 堅 權使票將翟 奉 守 攻 詔 日 以 |滁 綯 與 因日 命湘 千 和、楚、 身 勛 且餽之。 聽 , 行 衆 彼彼 而 舉 率 命 約 歡 廣 兵 口 |綯 쬭 壽 舟艦 不 覆 五. 裨將 于 爲 喜 千 陷之,糧 - 兵與湘 後 暴 , ·救之。 不 李湘 張 賊 卽 聽 旗 乘

綯 旣師敗, 乃以左衞大將軍馬舉代之。 以綯爲太子太保,分司東都。 僖宗初, 拜鳳翔

至而

偽偽

幟

誘

子滈、渙、渢。

已解 爲渦家事 貨 幼序,使先帝貽厥之謀幾不及陛下。 流著,使天下兵戈調斂不給。 奏自治 韶下,左拾遺劉蛻、起居郞張雲交疏指其惡,且言:「綯用李琢爲安南都護, 「綯,大臣,當調護國本,而大中時,乃引諫議大夫」豆盧籍、 可,是歲及第。諫議 財,皆側目無敢言。 ,使天下謂 高避嫌不舉進士。 帝爲貶雲爲 ,,請委御史按實其罪。 無解及第,不已罔乎? 興元 大夫崔瑄劾奏綯以十二月去位,而有司解牒盡十月,屈朝廷取士法 |懿宗嗣位,數爲人白發其罪,故||淘去宰相。 |綯輔政,而<br />
鴻與鄭顥爲姻家,怙勢驕偃,通賓客,招權,以射取四方 少尹 |琢本進路于鴻, 鴻爲人子 不聽。 且瀉居當時,謂之『白衣宰相』。瀉未嘗舉 渦 高乃以長安尉爲集賢校理。稍遷右拾遺、史館脩撰。 亦懼,求換它官 **滈亦凐泥不振死。** ,陷綯於惡,顧可爲諫臣乎?」又劾: 刑部侍郎李鄴爲變王等侍讀,亂長 ,改詹事府司直。 因丐 高與羣進士試有司, ,首亂南方,贓虐 綯方守淮南,上 進士 ,而妄言

漢、<br />
渢皆舉進士,<br />
渙終中書舍人。

列

傳

以是日就職,定往賀,爲神策軍抖收,欲殺者屢矣,已而免。 定字履常,楚弟。及進士第。大和末,以駕部郎中爲弘文館直學士。李訓亂,王遐休方 終桂管觀察使。

贊曰:耽、佑、楚皆惇儒,大衣高冠,雍容廟堂,道古今,處成務,可也;以大節責之,蓋

骨中而玉表數!悰、綯世當國,亦無足譏。 收論天下兵曰:「上策莫如自治。」賢矣哉!

# 唐書卷一百六十七

## 列傳第九十二

#### 白志貞 裴延齡 崔損 章渠牟 李齊運 李實

皇前鎮 鏞 王播起 龜 式

帳下議。 軍使,賜今名。 白志貞者,本名秀珪,故太原史也。事節度使李光弼,徑硜自力,有智數,光弼善之,使與 代宗素聞,及光弼卒,擢累司農卿。 有所建白,善窺億帝指,故言無不從。 在官十年,德宗以爲敏,遂倚腹心,進授神策

宰相李勉固諫,不許。 懷光反,論斥其姦,貶恩州司馬,贊播州司馬。 從狩奉天,以爲行在都知兵馬使。 明年,拜浙西觀察使,死于官。 懼李懷光暴其惡,乃與趙贊、盧杷等抑懷光不使朝。 稍徙閬州別駕。 貞元二年, 起為果州刺史,

官 京 召 兆 尹 可 裴 遷 鄭 部 延 太常 叔 郎 中, 則 河中河東人。 博 佑尉 士。 不待命, ,而御史中丞竇參善延齡 盧杞秉政, 輒還集賢院, 乾元 末,爲汜水尉,賊陷東都,去客江夏。 引為膳部員 宰相 一个逐 外郎、 張延賞疾其易, 出爲昭應令。 尹。 集賢院直學士。 德宗用參輔政, 崔造表 華州 即擢延齡 刺史董晉表 與尉 知東都度支院。 一交訴 司 農 所財, 少

以詭 言:「左 宰 爲負 之。 覆 百 頃 柏 果詐 帝, 然 庫 陸贄等以 會 願 一, 抽 藏 天下 班 以爲內廢牧地 於 延齡 宏 ,天下歲入不貲,耗登不 貫三百萬緡爲 財 負 卒 用 人皆窮 為 大 假領 無 非是, 慚 所加 帝 人,償入無期, 度支。 不從。 不 也 水甘草 責 賸 延齡 庫 也 俄 京右 ·,樣物三 以戶 薦 素不善 與苑廢等。」帝信之,以問宰相, 可校,請列別舍,以 抽 偏故 部 貫 侍 十萬緡爲季 與給皆盡 財計 有 郎爲眞。 雚 : , 乃廣 葦 地 ; 數頃 叉請 め 鉤 距 庫,帛以 樣物與帛固 ん 檢 盈 以京兆 延齡妄言:「長安、 ,取宿姦老吏與謀 虚 素出、以色入者爲 。」於是以天下宿負 苗錢 有籍 皆日 市 草千萬 :「當無有。」帝遣 延 齡 咸陽間 以 但 一多其 月 固 俾民 一帝幸。 庫 八百 簿 得 輸 萬 最 帝 陂 諸 労數 使 皆 緡 因 析 可

財 以 )實府,帝曰:「安得而實之?」延齡曰:「開元、天寶間,戶口繁息,百司務殷, 京兆 積歲 和 市 亦 得 直 尹李充 請 之官 , 延齡 誣其妄, 反合 還輸 號 日 「底 折 錢 官且有缺 嘗 請 斂

者,比兵興,戶不半在,今一官治數司足矣。請後官闕不卽補,收其稟以實帑簿。」

帝悅。 谷,木數千章,度皆八十尺。」帝曰:「吾聞開元時,近山無巨木,求之嵐、勝間。 今何地之近, 材之良邪?」延齡曰:「異材瑰產,處處有之,待聖主乃出。今生近輔,豈開元所當得也!」 哉!」帝領曰:「人未嘗爲朕言之。」又造神龍佛祠, 儉,以所餘爲百官稟料飱錢,未盡也,則所不盡者爲本分錢。 殿棟微矣。且陛下本分錢,用之亡窮,何所難哉?」帝驚曰:「本分錢奈何?」對曰:「此在經 下奉宗廟,能竭天下賦三之一乎?鴻臚禮賓,勞予四夷,用十一爲有贏。 ,愚儒不能知,臣能言之。 按禮,天下賦三之:一以充乾豆,一以事賓客,一君之庖廚。 它日,帝謂延齡曰:「朕所居浴堂殿,一棟將壓,念易之,未能也。」延齡曰:「宗廟至重 須材五十尺者。延齡妄奏:「同州得大 以治殿數十尚不乏,況一棟 陛下所御饗餼簡

符桉覆覈,有御史以監董之,則財用不得回隱。延齡乃言掊冀土得銀十三萬兩,它貨且百 弗讎其直,名曰『和雇』, 弗與之庸。 又度支出納, 與太府交相關制, 出物旬計, 見物月計, 廣,宣索多矣。 列其狀,具言:「延齡嘗奏句獲乾隱二千萬緡,請舍別庫爲羨餘,供天子私費,故上之興作 是時,陸贄爲宰相,帝素所信重,極論其譎妄不可任,帝以爲排娼,愈益厚延齡。贄上疏 延齡欲實其言,乃大搜市廛,奪所入獻,逮捕匠徒,迫脅就功,號曰『敕索』

列傳第九

+

装延

萬,已棄而獲,皆羨餘也, 鹽鐵使張滂、京兆尹李充、司農卿李銛皆指延齡專以險僞罔上,帝怒,乃罷贄宰相, 侵削兆民,爲天子取怨于下。」又引建中橫斂多積致播遷者,其言甚深切。 悉移舍以供別敕。 太府卿韋少華劾其妄,陛下縱之不爲治 帝得奏不 左除滂 此 會

|贄」。 延齡 它日 |
充等得不 妄用京 忠 又捕充所善吏張忠榜掠之,誣充「沒官錢五十萬緡,以餌結權幸,令妻以犢車載金餉 ,帝畋苑中,而神策軍訴度支不賦廢芻者,天子惑延齡言,乃下詔斥逐讚等,朝廷震恐。 時 具獄 兆錢 大旱,人情愁惴。 冤 穀 了其母投訴光順門匭,有詔御史審劾,一夕得狀,乃釋<br />
忠。<br />
延齡不得逞,復奏<br />
充 願 下有司比句,以比部郎中崔元翰欲釋憾於實也。 延齡言:實等失權怨望,顯言歲饑民流、度支糧芻乏以激怒衆士。 賴刑部侍郎奚陟辨治,

不 永貞初 7輔政 疑 使者 ,亦人之所未 |延齡資苛刻,又劫于利,專剝下附上,肆騁譎怪。 少所降下, 日三輩往。 度支建言:「延齡囊列別庫分藏正物, 聞者。帝頗 至嫚駡 死, 年六十九。 邇 臣 知其詐,但以其不隱,欲聞外事,故斷用 時 人側目。 人語以相 屬疾 E 安, 無實益而有吏文之煩。」乃詔復以還左藏。 队第, 載度支官物輸之家, 唯帝悼不已。 其進對,皆他人莫敢言,而延齡言之 册贈太子太傅、 不 疑。 延齡恃得君,謂 **4**# 敢言。 上柱 帝念

而損性齪齪能自將,延英進見,不敢出一言及天下事。 二年,以本官同中書門下平章事。 評事。累勞至右諫議大夫。于時,宰相趙憬卒,盧邁屬疾,裴延齡素善損,**薦之**德宗。 崔損字至無,系本博陵。 大曆末,中進士、博學宏辭,補校書郎、咸陽尉。 始,中書虚位十日,議者謂選有德,及用損,中外悵失。 踰年,進門下侍郎。嘗以疾臥家久, 避親、改大理 貞元十

遇彌渥。 建中後,宰相無久任者,損以便柔遜愿中帝意,乃留八年。帝亦知公議病其持祿,然憐 **損無卓卓稱于人者,而歷二省華要至宰相。母殯而不葬,亦不展殯;女兄爲尼,沒不臨** 卒,贈太子太傅,諡曰靖。

賜絹三百爲醫藥費。

去爲道士,不終,更爲浮屠,已而復冠。 章渠牟,京兆萬年人,工部侍郎述從子也。少警悟,工爲詩,李白異之;授以古樂府。 浙西韓滉表試校書郎,進至四門博士。

列

傳第

九

+=

崔損

窜渠

牟

李

運

是皆 刻乃 秘書 謨 正 師 解 翟 屬 郞 貞元 並 ,天子歡甚。 目。 對麟德殿 感悟得君也 進詩七百 十二年,德宗誕日 歲中,至諫議 ,質問大趣。 言,未狹旬, [渠|年爲人佻躁,志向浮淺,不根於道德仁義,特用憸巧中·帝意 大夫。 ,詔給事中徐岱、兵部郎中趙需、禮部郎中許孟容與渠牟及佛老 渠牟有口辯,雖於三家未究解,然答問鋒生,帝聽之意動。 擢右補闕內供奉。 大抵延英對,雖大臣率漏下二三刻止,渠牢每奏事 始, 同列易之,後數遣中人專召渠牟 了,輒五 ,非有嘉 , 六 遷

延齡 于時。 門, 簡。 布 衣 赫然勢焰可炙。 至 、實皆姦虐 然處深宮 自 一補 陸贄 闕 一角, ,引體泉令馮伉爲給事 ,帝躬攬庶政,不復委權于下,宰相取充位、行文書而已,至守宰、御史,皆自推 紹紹 所倚 無所建明。 而 再擢太常卿。 信者裴延齡、 渠牟後出,望最 中、 卒,年五十三, 李齊運、王紹、 太子侍讀。 輕,張恩勢以動 帝 贈刑部尚書, 李實、 旣偏于任聽, 韋 執誼與渠牟等, 天下,召崔芊于茅山 士之浮競甘進者 所論著甚多 其權侔人主。 1 争 出 其 超 鄭隨 傳

李 齊運者, 蔣王輝孫。 始補寧王府東閣祭酒,擢累監察御史,復辟江淮都統李峘府。

訟者。 由 工部郎中為長安令, 瀚怒,辱諸朝,齊運以聞,代宗貶瀚。由是稍擢京兆少尹。 政頗脩辦。 宗正少卿李瀚從子有所訟, 齊運於瀚爲卑行, 出爲河中尹、晉絳慈隰觀 而 不禮

察使。

子使宰相論諫官御史,後毋得羣署章以劾,然卒不直邃 邀家告冤,御史大夫崔縱請窮治,帝不許。 發民築城保,督芻粟以餉晟。 酒 「豐甘,人人喜悅。及懷光反,還守河中,齊運棄城走。 德宗出狩,李懷光還兵奔難,晝夜馳,及河中,士罷困,乃休三日。 賊平, 頗有助。 御史聯章深劾,齊運訴于帝,言爲朋黨所擠。 萬年丞源邃不事, 冤 詔拜京兆尹。 齊運怒, 時李晟壁渭橋 齊運悉所賦勞軍,牛 弊辱之, 死於廷。 齊運

李錡 尙書左僕射。 能 相 謁 內殿對已,齊運常次進,帝與參決大事。 ,每除吏,往往遣使即家咨逮。 爲浙西,受路數十萬, 久之,大蝗旱,齊運不能政,乃以韓洄代之,改宗正卿、閑廢宮苑使。進至禮部尙書。 又薦李詞爲湖州刺史,人告其贓, 晚以妾爲妻,具冕服行禮,士人蚩之。卒,年七十二,贈 既無學,暗于大體,第以甘言阿匼而已。 帝置不問。 齊運臥疾,滿歲不 一當薦

Ш 南 東道 李 ,復從之。 道王元慶四世孫。 |皋卒,實知後務,刻薄軍費,士怨怒,欲殺之,夜縋亡歸京師 以蔭仕, 嗣曹王皋辟署江西府判官, 遷蘄州刺史。 皋節度

殺之。 實方務聚斂以結恩,民訴府上,一不問。 責租調 累 或言:「古者,瞽誦箴諫,雖詼諧託諭,何誅焉? 進 人窮無告, 司農卿,擢拜京兆尹 至徹舍鬻苗輸于官。 , 封嗣道王。怙寵而愎,不循法度。貞元二十年旱, 德宗訪外疾苦,實詭曰:「歲雖旱,不害有秋。」乃峻 優人成輔端爲俳語諷帝,實怒,奏賤工謗國,帝爲 」帝悔,然不罪實。 闍 輔飢,

此。 請託,實公詣曹劫請趙宗儒 廷辱之。 應用 公卿爲讒短遷斥 故事,京兆避臺官。 此第, 惡萬年令李衆, 不 爾 者甚衆,專情警色見顏間。 君且外遷 實嘗與御史王播遇,而騶唱爭道,播鉤責從者,實怒,奏播爲三原 ,無所畏。 誣逐虔州司馬,以所善虞部員外郎房啓代之。 !」德輿雖拒之,然常憚其誣。 權德與爲禮部 吏部每奏科目頗嚴密,以杜 而實 私薦 士二十人,迫語 其怙權作威若

數 輒死 十人于府。 ,桉之無罪者, 貶通州長史。市人爭懷瓦石邀劫之,實懼,夜遁去,長安中相賀。 **猥**日 「死亦非枉」, 復殺之。 專以殘忍爲政。 順宗 在涼闇 ,不踰月, 以赦令內 實殺

移,死號州。

詔書蠲

人逋租

,實格詔固斂,

畿民大困,官吏皆被榜罰, 掊取三十萬緡。

吏乞貣

詹 支,改戶部侍郎。 事 府司直。 市 鎛,涇州臨涇人。貞元初, 久之,遷吏部員外郎,典南曹,鈴制 憲宗方伐蔡,急於用度,鎮 第進士,又擢制科,爲監察御史。 夏會嚴亟,以辦濟師,帝悅,進兼御史大夫。 更姦,稍知名。進郞中,遷累司農卿,判度 居喪游處不度 〉,下除

平之明年,遂同中書門下平章事

,猶領度

在 樂,鎛與程异知帝意,故數頁羨財,陰佐所欲,又路吐突承璀爲奧援,故帝排衆論,決任之, 相 度 反以度爲朋黨,不內其言。 「輔相。 鎛 乃表罷 則 四方解矣。請授以浙西觀察使。」其辭切至。帝以天下略平,亦欲崇臺沼宮觀自娛 政事 文道 今承宗削地,程權赴闕,韓弘 進, , ,極論||풸姦邪苛刻,天下怨之,將食其肉。 且言:「天下安否繫朝廷,朝廷輕重 既由聚斂句剝爲宰相,至雖市道皆嗤之。 興疾討賊,非力能制之,顧朝廷處置能服其心 崔羣、裴度以聞, 帝怒,不聽。 也。

聞 餘 ,韶度支評直,鱘貴售之以給邊兵, |鏤指所著鞾曰::「此內府所出,牢韌可服,彼言不可用, 鎛 [乃益以巧媚自固,建損內外官稟佐國用, 故繒 陳綵, 給事中崔植上還詔書,乃止。 觸 手 輒 壞, 詐也。」 帝信之。 士怨 怒, 聚焚之。 |鋳銜度, 装度以 帝斥內帑所 乃與 其 事

列

僔

第

九

+

\_\_

皇

鏈

李逢吉、令狐楚合擠之,出度太原。 又以崔羣有天下重望,勁正敢言,後議帝號,餺乃譖澤

抑損徽稱,帝怒,逐澤湖南。

其所。

藥, 帝惑之。 鎛罷 度支,進門下侍郎平章事。 穆宗在東宮, 聞其姦妄,始聽政,集羣臣於月華門, **嘗與金吾將軍李道古共薦方士柳泌、浮屠大通爲長年** 貶鎛崖州司戶參軍

歲,鎛敗,與泌皆誅。 争,以爲列聖亦有寵方士,未嘗使牧民,帝曰:「煩一州而致長年于君父, | 餺與道古營解,乃復待詔翰林。 「天合山靈仙所舍,多異草,願官天台,求采之。」起徒步拜台州刺史〔〕,賜金紫。 泌者, 泌驅吏民采藥山谷間,鞭笞苛急,歲餘無所獲。 |鎛之貶,前||坊||州刺史||班||肅以嘗僚,獨餞於野,朝廷義之,擢爲司封員外郎。 本楊仁晝也,習方伎。 初,吏責巡妄,答曰:「皆道古教我。」解衣卽刑,卒無它異。 帝餌泌藥,蹇躁怒不常,宦侍懼,以弒崩。 道古薦于餺,召入禁中,自云能致藥爲不死者, 懼詐窮,舉族遁去, 何愛哉?」 浙東觀察使捕得。 大通自言百五十 後不敢 諫臣 因言: 固

求分司爲太子右庶子。|餺敗,朝廷賢之,授國子祭酒。 鎛 弟鏞,字龢卿,第進士。 鎛爲相時,任河南少尹,見權寵太盛,每極言之,鎛不悅,乃 開成初,以太子少保卒。

御史。 有名 受命,趨府 播遇諸衢。 要近,會母 1,並擢 王播字明敭, 遷工部 雲陽丞源咸季坐賕免,路有司復得調, 喪解。 謝 進士,而播 歷號州 故事 如禮。 郞 中, ,尹當避道揖,實不肯。 還,除駕部員 刺 其先太原人, 父恕爲揚州倉曹參軍, 邑中豪彊犯法,未嘗輒貸,歲終課最。 史。 知御 、起舉賢良方正異等。 史雜事。 外郎。 刺舉不阿, 長安令于頔 播移文詆之。 補盩厔尉。 播劾解其官。 有能稱。 奴客與民盜馬,吏繫民而縱奴,播捕 實大怒,表播爲三原令,將折之。 以善治獄 遂家焉。 關中饑,諸鎭或閉糴, 實重其才 歷侍御史。李實爲京兆尹 ,御史中丞李汝薦爲監察 播,貞元中與弟炎、起皆 ,更薦之,德宗將擢以 播以為言 叛,均 ,與

爲能 劍, 坐隅,商處重輕 姦人冒之以剽劫,又勳戚家馳獵近郊,播請一 ,進刑部侍郎,領諸道鹽鐵轉運使。 李巽領鹽鐵,奏以副己。 · 剖 決如流,吏不能竄其私。 擢御史中丞,歲終,改京兆尹。 是時,天下多故,大理議讞 帝討准西也,切於饋餉,播引程异自副,异尤通 切苛止,盜賊不能 時禁屯列畿內者,出入屬鞬佩 ,科條叢繁,播悉置 隱, 皆走出 境。 憲宗以 格律

傳

第

九

+

\_\_

王播

結宦

一要,中外以爲言

萬 貨 盈 虚 一,使 馳 傳 江淮 , 夏財用以給軍興, 兵得無乏。 帝嘉其功,超拜禮部尙書。 稍以貲賄

劍 南 西川 播 薦 ※皇甫 節度使。 鎛, 及鏄用事,更忌播,而以异代使, 穆宗立、逐轉、播求還。 長慶初,召爲 播罷守本官。久之,檢校戶部尚書,爲 刑部尙書,復領 鹽鐵,進中書侍

衆望 同中 南方旱敷 書門下平章事 不 厭 ,人相食,播掊斂不少衰,民皆怨之。 , 乃以檢校尚書右僕射出爲淮南節度使, 時權倖競進,播賴其力至宰相 然後七里港以便漕引 仍領使職,不肯易印, 專務將 迎, 居位 ,後賴其利 ·無所裨 詔 聴自 益 ,復失河北 隨

闕 間薦之,天子有意復用播 章仁實劉敦儒 敬宗 即位, 卽 拜檢校司空,以王涯代使。 拾遺李景讓薛廷老等見延英 於是諫議大夫獨 孤朗張仲方、 播失職, 言播傾邪關通帝左右狀, 見王守澄方得君, 起居郎孔敏行 柳公權宋申錫 厚以金謝,守澄乘 帝沖闇, 不內其 補

當 亟 ,以獻替自任,天子嚮之。 文宗立,就進檢校司 徒。 大和元年,入朝,拜左僕射 播專以錢穀進,不甚與事 0 ,復輔政,累封太原郡公。 居位四年卒,年七十二,贈太尉 時韋處厚

言,遂復領使,天下公議

益

不

與

|播 少孤貧,自刻苦至成立,居官以疆濟稱。 天性勤吏職,每視簿領紛積於前,人所不堪 諡

敬

未嘗 南還 播 書于笏。 反用爲樂。 1、獻玉帶十有三、銀盌數千、綾絹 再 領鹽鐵, 所署吏,苟無大罪,以歲勞增秩而已,卒不易所職。 嗜權 利, 不復 初操。 四十萬,遂再得相云。 重 赋 取, 以正 額月進爲羨餘, 歲百萬緡。 雅善占奏,雖數十 事 自

貶, 殿 直 韶起覆核,起建 學士。 起 字舉之, 元和 京、累遷中書舍人。數上 釋褐校書郎,補藍田尉。 〔言:「以所試送宰相閱可否,然後付有司。」 一疏諫穆宗 李吉甫辟爲淮南掌書記,以殿中侍御史 ) 政游 事 ,歲中考第一。 詔 可。 議者謂起爲 錢徽 坐 失職 貢 入 舉 兼 一失實 集賢

吏部 史李繁以 侍 拜 禮 鄓 擅 部 侍 誅 方播以僕射居相, 賊抵 鄓。 罪 李介叛,與播俱上疏請詔王智興討之,卒定其亂。 避選曹,改兵部, 爲集賢殿學士。 拜 陝虢觀察使。 賜金紫,拜 河南 時亳州 尹 刺 進

不從, 節 河 度使。濱漢塘堰 中 節 入 寘于 度使。 拜 尙 法。 書 左 方蝗旱,栗價騰踊 由是 乏, 聯 廥 屬 以戶部尙書判度支。 ,吏弗完治,起至部,先脩復,與民約爲水令,遂無 積咸出,民賴以生。 起下令家得儲三十斛,斥其餘以市,否者死 召授兵部尚書。 靈武、邪、 寧多曠土,奏爲營田 以檢校尙書右僕射 凶 年 以省 爲 神策 山 飽 輓。 南 土 怙 勢 歷

二字相 起門生也,欲引與共政,即加銀青光祿大夫,復以兵部尚書召判戶 訓

以解帝錮人意。俄兼太常卿、禮儀使。 以經術進,起以敦博顯,帝數訪逮時政。 敗,起素長厚,人不以訓諉之,止罷其判。 寵遇如此。又使廣五位圖,俾太子知古今治亂。開成三年,入翰林爲侍講學士,改太子少師。 帝題詩太子笏以賜,詔畫像便殿,號「當世仲尼」,其 因積雨,願寬逐臣過惡,又短鮑叔終身不忘人過, 俄加皇太子侍讀。 文宗上文,好古學。是時,鄭覃

起治生無檢,所得祿賜爲僮婢盜有,貧不能自存。帝知之,詔月益仙韶院錢三十萬。

議者謂與玩臣分給,可恥也,起賴其入,不克讓。

**耆老,股有闕,當以聞。」宴賜備厚。** 使、同中書門下平章事。 以夙儒兼宰相秩,前世所罕。 入辭,帝勞曰:「宰相無內外。 公,國 起典貢舉。進尙書左僕射,封魏郡公。凡四舉士,皆知名者,人伏其鑒。 武宗立,爲章陵鹵簿使、東都留守。 召爲吏部尚書,判太常卿。 帝患選士不得才,特命 。擢山南西道節度

宣宗初,檢校司空,以疾願代,不許。卒,年八十八,贈太尉,諡曰文懿。 喪還,命使者

者上,凡成十篇,號曰寫宣。它譔集亦多。 也。 莊恪太子薨,韶爲哀册,詞情悽惋,當世稱之。帝嘗以疑事令使者口質,起具牓子附使 |起性友悌,播喪,哀戚加於人。 嗜學,非寢食不輒廢。 天下之書無不讀,一經目,弗忘

淡終太常博士。子鐸、鐐自有傳。

起子龜、 式。

嬰。 僻,構半隱亭以自適。 員外郎,稱疾去。 武宗雅知之,以左拾遺召。入謝,自陳病不任職,詔許。 龜字大年 性高簡, 崔 <u></u>工興觀察宣歙,表爲副,龜樂宛陵山水,故從之。 侍父至河中,廬中條山,朔望一歸省,州人號郎君谷,未始以人事 博知書傳,無貴胄氣。 常以光福第賓客多,更住永達里,林木窮 終父喪,召爲右補闕。再擢 屯田 自

白約素暴橫,嘗譁言月稟薄,以動士心爲亂,龜 臨 州 , 有惠政, 人聞其至, 歡迎之。 卒, 贈工部尙 入爲祠部郞中、 史館脩撰。 咸通中, 知制誥。 書。 捕殺之, 人皆震慄。 徙浙東觀察使。 同州 刺 史。 初, 牙將 |式

子薦,力學,有文辭,以譯當國,不貢進士。 終右司員外郎。

王 式以蔭爲太子正字, 擢賢良方正科, 累遷殿中侍御史。 少節檢, 巧于宦, 因鄭注以交

|大中中,爲晉州刺史;飾郵傳,器用畢給。|守澄,中丞歸融劾之,出爲江陵少尹。

列

傳第

九十

王

播

五一一九

會河曲大歉,民流徙,佗州

不納,

獨武勞卹

當避之!」以善最

之,活數千人。 時 特峨胡亦饑,將入寇汾、澮,聞式嚴備,不敢道境,報其種落日:「晉州刺史

讓,矢旝交發,叛者走。翌日,盡捕斬之。初,容管災歉,不歲貢,式始上輸,大犒宴軍中。歸 海襲我矣!」相率夜圍城,合譟:「請都護北歸,我當抗黃頭軍。」式徐被甲, 質外蕃,而占城、眞臘慕義,悉入獻,亦還所掠王民。 錦田步,式使譯者開論,一昔去,謝曰:「我自縛叛獠,非爲寇也。」忠武戍卒服短後褐,以 芍木,豎周十二里,罷歲賦外率以紓齊人。浚壕繚栅,外植刺竹,寇不可冒。後蠻兵入掠 冒首,南方號「黃頭軍」,天下銳卒也。 徙 安南都護。 故都護田早作木栅,歲率緡錢,旣不時完,而所責益急。 初,交阯數有變,懼式威,不自安,譁曰:「黃頭軍將度 引家僮乘城責 式取一年賦市

獵 利?」帝顧左右曰:「宜與兵。」於是詔益許、滑、淮南兵。」式發自光福里第,麾幟皆東靡,獵 牧 「盜若倡狂,天誅不亟決,東南征賦闕矣,寧得以億萬計之乎?兵多則功速費寡。二者孰 (馬起用之,集土團諸兒爲向導,擒)甫斬之。 有聲,喜曰:「是謂得天時矣!」聞賊用騎兵,乃閱所部,得吐蕃、回鶻遷隸數百,發龍陂監 寧國劇賊仇甫亂,明越觀察使鄭祗德不能討,宰相選式往代,詔可,因至京師。懿宗問 加檢校右散騎常侍。 餘姚民徐澤專魚鹽之

利 ,慈溪民陳城冒名仕至縣令,皆豪縱,州不能制。 试目:「庸竊發,不足畏;若澤、臧,乃巨

猾也。」窮治其姦,皆榜死。

三日 ,悉以計誅亂兵。 咸通三年,徐州銀刀軍亂,以式檢校工部尚書,徙武寧節度使,詔許、滑兵自隨。 會韶降武寧爲團練,罷歸。 終左金吾大將軍。 視事

而卒陷不明。 乃天下選,彼暫勞一功,鳥足勝任哉?中興之不終,有爲而然。 贊曰:裴延齡引經誼惑其主,以不忠爲忠。 君臣回次, 可不戒哉! 憲宗銳於立功, 德宗倚延齡、韋渠牟等商天下成敗,自謂明 而皇甫 轉以聚斂取宰相。 夫宰相者

#### 校勘記

台州 刺 本書卷七及舊書卷一五憲宗紀、舊書卷一三五皇前鎮傳、通鑑卷二四〇均作「台州」,據改。 史 「台州」, 各本原作「天台」。 按唐無「天台州」而有台州, 隸 江南 東道, 天台山在其

冽

## 唐書卷一百六十八

## 列傳第九十三

章執誼 王叔文 王伾 韓奉 陳諫 凌準 韓泰 陸質 劉

### 柳宗元 程异

常仲孺、 窺望。帝 備顧問。 士,便敏側媚,得幸於德宗。 爲吏部 卒見無所藉言者,乃曰:「君知王叔文乎?美才也。」執誼由是與叔文善。以母喪解。 章執誼,京兆舊族也。 : 鄭中,數召至禁中。 呂洞往賀之,或謂執誼曰:「彼將論君與叔文鉤黨事。」、執誼即白成季等朋比, 韶金吾何,得相過食飮狀,悉逐出之。 帝誕日,皇太子獻畫浮屠象,帝使執誼贊之,太子賜以帛,詔執誼到東宮謝太子, 幼有才,及進士第,對策異等,授右拾遺。 使豫詩歌屬和,被詔稱旨。 補闕張正一以上書召見,所善王仲舒、韋成季、 與裴延齡、韋渠牟等寵相埒,出入 年踰冠,入翰林爲學 劉伯芻、 終喪, 裴茝、

列

傳第九十三

章 執

誼

王叔

文

黨與者,乃時時異論相可否,而密謝叔文曰:「不敢負約,欲共濟國家事爾。」叔文數爲所梗, 相杜黃裳之壻,故最後貶。 遂詬怒,反成仇怨。 及憲宗受內禪,流<u>叔文、</u>伾,分北支黨,貶<u>執誼爲崖州司戶參軍。帝以</u>宰 尔 居中竊命,欲執誼据以奉行,因用迷奪朝權。 順宗立 以疾不親政,叔文用事,乃擢執誼爲尙書左丞、同中書門下平章事。 |執誼既爲所引,然外迫公議,欲示天下非 叔文與

相,所坐堂有圖,不就省。旣易旬,試觀之,崖州圖也,以爲不祥,惡之。果貶死 未顯時,不喜人言嶺南州縣。 執誼已失形勢,知禍且及,雖尙在位,而臨事奄奄無氣,聞人足聲輒悸動, 既爲鄓,嘗詣職方觀圖,至嶺南輒瞑目,命左右徹去。及爲 至于敗。 始

小 子曰:「向君無言,何哉?」叔文曰:「太子之事上,非視膳問安無與也。且陛下在位久,有如 讀 (`,因論政及宮市之弊,太子曰:「寡人見上,將極言之。」坐皆趣贊,|叔文獨嘿然。 旣罷,太 ,人間之,謂殿下收厭羣情,則安解乎?」太子謝曰:「非先生不聞此言!」由是重之,宮中 王叔文,越州山陰人。以棋待韶。 頗讀書,班班言治道。德宗詔直東宮,太子引以侍

事

咸與參訂

一,而士之欲速進者,率諧附之,若韋執誼、陸質、呂温、李景儉、韓曅、韓泰、陳諫、柳宗元 叔文淺中浮表,遂肆言不疑,曰:「某可爲相,某可爲將,它日幸用之。」陰結天下有名

以自結。 因征,任因忠言,忠言因昭容,更相依仗。任主傳受,叔文主裁可,乃授之中書,執誼作韶文 劉禹錫爲死友,而凌準、程异又因其黨進,出入詭祕,外莫得其端。 彊藩劇帥,或陰相路遺 |王伾密語諸黃門:「陛下素厚叔文。」即繇||蘇||州司功參軍拜起居郎、翰林學士。 大抵||叔文 順宗立,不能聽政,深居施幄坐,以牛昭容、宦人李忠言侍側,羣臣奏事,從幄中可其

杜佑領度支、鹽鐵使,己副之,實專其政。不淹時,遷戶部侍郞。 宦人俱文珍忌其權,罷叔文學士,詔出,駭悵曰:「吾當數至此議事,不然,無由入禁

管、萬復出, 憪然謂天下無人。 |叔文每言:「錢穀者,國大本,操其柄,可因以市士。」乃白用

施行焉。時景儉居親喪,温使吐蕃,惟質、泰、諫、準、墨、宗元、禹錫等倡譽之,以爲伊、周、

中。」怔復力請,乃聽三五日一至翰林,然不得舊職矣。

兵 使 在 」乃論 省不 ,泰爲司馬副之。 事 諸鎭 所職,日引其黨謀取神策兵,制天下之命。 ,愼毋以兵屬人。 於是諸將移書中尉,告且去,宦人始悟奪其權,大怒曰:「吾屬必死 |希朝、泰到奉天、諸將不至,乃還。 乃以宿將范希朝爲西北諸鎮行營

列傳

第

九

+

欲前 監 中 此 言:「羊士諤毀短我,我將杖殺之,而執誼懦不果。 度 國 將 支所以興 跨鞍若飛, (執吾手,非凶人邪? 掃木場將斬之,而執誼持不可。每念失此二賊,令人悵恨。」又陳領 廣 ,貶渝州 然向之悉心戮力,難易亡所避,報天子異知爾。今一去此,則百謗至,孰爲吾助者?」又 叔 何爲邪?」明日,乃發喪。執誼 陵王爲太子,羣臣皆喜,獨叔文有憂色,誦杜甫諸葛祠詩以自況,歔欷泣下。 利 司戶參軍 法害者爲己勞。 敢異議者斬。」又自陳:「親疾病,以身任國大事,朝夕不得侍,今當請急 ·,明年,誅死。 文珍隨語詰折,叔文不得對。 左右竊語曰:「母死已腐,方留 **益不用其語,乃謀起復,斬執誼與不附己者,聞者恟懼** 劉闢來爲章皋求三川,吾生平不識闢,便

不及佐 伾 本 一關茸 尤通 王伾者,杭州人。始以書待詔翰林,入太子宮侍書。 天下財謝 之無間 [陋,楚語,無它大志, 也 ,叔文入止翰林,而伾至柿林院,見牛昭容等。 日月 不闋。 爲巨匱,裁竅以受珍 帝褻寵之,不如 叔文任 》,使不 可出 氣 順宗立,遷左散騎常侍、待詔。 好言事 則 當其黨盛 寢其上。 ',爲帝 所禮。 門皆若沸羹,而 至出處,又

叔文既居喪, 伾日請中人及杜佑起叔文爲宰相, 且總北軍, 不許;

又請以威遠軍使同

歸第。 中書門下平章事,復不可。 貶開州司馬,死其所。 乃一日三表,皆不報。 支黨皆逐,惟質以前死免。 憂悸,行且臥, 至夕大呼曰:「吾疾作。」輿

爗者,滉族子,有俊才。 以司封郎中貶饒州司馬。終永州刺史。

台州 司馬,終循州刺史。 諫警敏, **嘗覽染署歲簿**, 悉能言其尺寸。 所治, 閱籍, 終身不忘。 自河中少尹貶

準字宗一,有史學。 自翰林學士貶連州司馬,死于貶。

虔州 司馬。終湖州 泰 字安平,有籌畫,伾、 刺史。 叔文所倚重, 能決大事。 以戶 部與中、 神策行營節度司馬貶

陸質 列 字伯冲。 傳 第 九 十 Ξ 七 代祖 陸 澄, 質 仕梁爲名儒。 劉 禹 錫 世居吳。 明春秋, 師事 趙匡 五一二七 匡 師啖助 質盡

刺

傳二家學。 陳少游鎭淮南,表在幕府,薦之朝,授左拾遺。累遷左司郎中, 歷信、 台二州

本名淳,避太子名,故改。時執誼懼太子怒己專,故以質侍東宮,陰伺意解釋左右之。質伺 間有所言,太子輒怒曰:「陛下命先生爲寡人講學,何可及它?」質惶懼出。 質 (素善章執誼,方執誼附叔文竊威柄,用其力召爲給事中。 憲宗爲太子,詔侍讀。 質

私共諡曰文通先生。 執誼未敗時,質病甚,太子已卽位,爲臨問加禮。卒,門人以質能文聖人書,通于後世, 所著書甚多,行于世。

喜,自御史中丞下除太子右庶子;御史竇羣劾禹錫挾邪亂政,羣卽日罷;韓皋素貴,不肯 言必從。 交,叔文每稱有宰相器。 太子卽位,朝廷大議祕策多出叔文,引禹錫及柳宗元與議禁中,所 親叔文等,斥爲湖南觀察使。 杜佑表管書記。入爲監察御史。素善章執誼。 劉 |禹錫字||夢得,自言系出||中山。世爲儒。擢進士第,登博學宏辭科,工文章。淮南 **擢屯田員外郎**,判度支、鹽鐵案,頗馮藉其勢,多中傷士。 若武元衡不爲柳宗元所 凡所進退,視愛怒重輕,人不敢指其名,號「二三、劉、柳」。 時王叔文得幸太子,禹錫以名重一時,與之

歎 ; 意哉 禹錫望它人, 尤不可赦。」 度不敢對, 帝改容曰:「朕所言責人子事, 能往,當與其子死 近,而憾不釋。 送神,乃倚其聲,作竹枝辭十餘篇。於是<u>武</u>陵夷俚悉歌之。 者不喜,出爲播州刺史。 可用,塗罷 將澡濯用之,會程异復起領運務, 張九齡爲宰相,建言放臣不宜與善地,悉徙五谿不毛處。然九齡自內職出始安,有瘴癘之 丛 罷政事守荆州,有拘囚之思。 鬼,每祠,歌竹枝,鼓吹裴回, 禹錫久落魄,鬱鬱不自聊, 始,坐叔文貶者八人,憲宗欲終斥不復,乃詔雖後更赦令不得原。 憲宗立,叔文等敗,禹錫貶連州刺史,未至,斥朗州司馬。 議者以爲開元良臣,而卒無嗣,豈忮心失恕,陰責最大,雖它美莫贖邪 久之,召還。 決, 恐傷陛下孝治, 韶下, 宰相欲任南省郎, 御史中丞裴度爲言:「播極遠,猿狖所宅, 其吐辭多諷託幽遠,作問大鈞、 乃韶禹錫等悉補遠州刺史。 其聲傖儜。 身出遐陬,一失意不能堪,矧華人士族必致醜 請稍內遷。」帝曰:「爲人子者宜愼 禹錫謂屈原居沅、湘間作九歌,使燧人以迎 而禹錫作玄都觀看花君子詩, 州接夜郎諸夷,風俗陋甚,家 而元衡方執政,諫官頗言不 謫九年等賦數篇。 終不欲傷其親。一乃易 然宰相哀其才且困 事 禹錫母八十餘,不 ٠, 不貽 語譏忿 地, 欲 親憂。 然後快 感調 常路 又敍;

權

連州,又徙夔州

刺

第 九

+

=

劉

五

二二九

禹錫嘗歎天下學校廢,乃奏記宰相曰:

之無餘,可乎?貞觀時,學舍千二百區,生徒三千餘,外夷遣子弟入附 **圮廢,生徒衰少,非學官不振,病無貲以給也。** 言者謂天下少士,而不知養材之道,鬱堙不揚, 非天不生材也。 者五 是不耕而歎廩庾 國。 今室:

非禮之祀媚之,儒者所宜疾。 傳曰:「祭不欲數。」又曰:「祭神如神在。」與其煩於薦饗,孰若行其敎? 逮元帝時,韋玄成遂議罷之。夫子孫尚不敢違禮饗其祖 孔子廟,其禮 凡學官,春秋釋奠于先師,斯止辟雍、領宮,非及天下。 不應古, 甚非孔子意。 竊觀歷代 漢初羣臣起屠販,故孝惠、高后間置原廟 無有是事 , 況後 今州縣咸以春秋上丁有事 學師先聖道 今教頹靡,而以 而 欲違之。 於 郡

林甫 奏天 補也。 縣歲釋奠費十六萬,舉天下州縣歲凡費四千萬,適資三獻官飾衣裳,飴妻子,於學無 爲宰相,不涉學,使御史中丞王敬從以明衣牲牢著爲令,遂無有非之者。 下州縣置三獻官, 武 [德初,詔國學立周公、孔子廟,四時祭。 其他 如立社。 玄宗與儒臣議, 貞觀中,詔脩孔子廟兗州。 罷釋奠牲牢, 薦酒 後許敬宗等 脯 今變 時王 孫 JU

請 下禮官博士議,罷天下州縣牲牢衣幣,春秋祭如開元時,籍其資半界所隸州,

官各加稍食,州縣進士皆立程督,則貞觀之風,粲然可復。 增學校,舉半歸太學,猶不下萬計,可以營學室,具器用,豐饌食,增掌故,以備使令,儒

當時不用其言。

分司東都。 霞。 由 又十四年過之,無復一存,唯冤葵、燕麥動搖春風耳。」以詆權近,聞者益薄其行。俄 和州刺史入爲主客與,復作游玄都詩,且言:「始謫十年,還京師,道士植桃,其盛若 宰相裴度兼集賢殿大學士,雅知禹錫,薦爲禮部郎中、集賢直學士。度罷,出爲

精 ,與白居易酬復頗多。居易以詩自名者,嘗推爲「詩豪」,又言:「其詩在處應有神物護持。」 禹錫恃才而廢,褊心不能無怨望,年益晏,偃蹇寡所合,乃以文章自適。素善詩,晚節尤

以政最,賜金紫服。徙汝、同二州。遷太子賓客,復分司。

蘇州刺史。

塞在洛北山, 「漢景帝子勝,封中山,子孫爲中山人。七代祖亮,元魏冀州刺史,遷洛陽,爲北部都昌人,墳 會昌時,加檢校禮部尙書。卒,年七十二,贈戶部尙書。 後其地陿不可依, 乃葬滎陽檀山原。 德宗棄天下,太子立,時王叔文以善弈 始疾病,自爲子劉子傳,稱:

闡 度支、鹽鐵使,翌日 得通籍 西李景儉、 ", 因 間 言事 河東柳宗元以爲信然。三子者皆予厚善,日夕過,言其能。 ,,積久,衆未知。至起蘇州掾,超拜起居舍人、翰林學士,陰薦 , 自爲副, 貴震 一時。 叔文,北海 人,自言猛之後, 有遠 叔文實工言治道 祖 風 丞相杜佑爲 東平呂温

列 傳 第 九 +  $\equiv$ 劉 禹 錫 柳 宗 元

能以 建 植立 口 順 辯移人,既得用,所施爲人不以爲當。 (,功歸貴臣,由是及貶。」其自辯解大略如此 太上久疾, 宰臣及用事者不得對, 宮掖事秘,

末遇 參軍。佐 2亂,奉母隱王屋山,常間行求養,後徙於|吳。 柳宗元字子厚,其先蓋河東人。 |郭子儀朔方府,三遷殿中侍御史。 從曾祖奭爲中書令,得罪武后,死高宗時。 以事 觸竇參,貶夔州 肅宗平賊,鎭上書言事 司馬。 還,終侍 事, 擢左 衞率府兵 御 史。

內禁近 調 藍 宗元 田 尉。 與計事 少精敏絕倫,爲文章卓偉精緻,一 貞元 ,,擢禮部員外郎,欲大進用。 十九年,爲監察御史裏行。 善王叔文、韋執誼,二人者奇其才。 第進士、博學宏辭科, 及得政 授校書

時輩行推仰。

郎,

堙 厄感鬱 俄 面 叔文敗,貶邵州 寓諸文,做離騷 刺史,不半道,貶永州司馬。 數 十篇 讀 者 咸 悲 惻。 雅善蕭 既竄斥,地又荒癘,因自 俛 力,
計書 言情日: 放 山澤間

冥間 求 進 記哉? 而 僕 (嚮者進當臲鼿不安之勢,平居閉門,口 退者,皆聚爲 僕當時年三十三,自御史裏行得禮部員外郎, 仇怨, 造作 粉飾 蔓 延 益 肆。非的 舌無數,又久與游 然昭晰、自 超取顯美, 欲免世之求進者怪 斷 者,发发 于内 孰 而 能 操其間。 了 僕 於冥

奇,務相悅可,自以速援引之路。僕輩坐益困辱,萬罪橫生,不知其端,悲夫!人生少 六七十者,今三十七矣,長來覺日月益促,歲歲更甚,大都不過數十寒暑,無此身矣。 人之怒,謗語轉侈,囂囂嗷嗷,漸成怪人。飾智求仕者,更詈僕以悅仇人之心,日爲新 怒媢疾,可得乎? 與罪人交十年,官以是進, 辱在附會。 聖朝寬大,貶黜甚薄,不塞衆

是非榮辱,又何足道!云云不已,祗益爲罪。

舌啅躁,今聽之恬然不怪,已與爲類矣。家生小童,皆自然曉曉,晝夜滿耳,聞北人言, 與木石爲徒,不復致意。 此尙復幾何,豈可更不知止,言說長短,重爲一世非笑哉?讀易困卦至「有言不信,尙 則啼呼走匿,雖病夫亦怛然駭之。出門見適州閭市井者,其十八九杖而後興。自料居 慘懷,毛髮蕭條,瞿然注視,忧惕以爲異候,意緒殆非中國人也。 楚、越間聲音特異,鴂 口 :乃窮」,往復益喜,曰:「嗟乎!余雖家置一喙以自稱道, 詬益甚耳。」用是更樂瘖默, 居蠻夷中久,慣習炎毒,昏眊重膇,意以爲常。忽遇北風晨起,薄寒中體,則肌革

未能盡忘。 數?命乃天也,非云云者所制,又何恨?然居治平之世,終身爲頑人之類,猶有少恥, 今天子興教化, 定邪正, 海內皆欣欣怡愉, 而僕與四五子者, 淪陷如此, 豈非命 儻因賊平慶賞之際,得以見白,使受天澤餘潤,雖朽枿敗腐不能生植,**猶** 

列

第九

十 三

柳

宗元

買土一廛爲耕甿,朝夕歌謠,使成文章,庶木鐸者采取,獻之法宮,增聖唐大雅之什,雖 足蒸出芝菌 ,以爲瑞物。 一釋廢錮,移數縣之地,則世必曰罪稍解矣。然後收召魂魄,

又治京兆尹許孟容日:

不得位,亦不虛爲太平人矣。

寬貸,各得善地,無公事,坐食奉祿,德至渥也,尙何敢更俟除棄廢痼,希望外之澤哉? 如此也。末路厄塞臲兀,事旣壅隔,狠忤貴近,狂疎繆戾,蹈不測之辜。今其黨與幸獲 勵 ,唯以忠正信義爲志,興堯、舜、孔子道,利安元元爲務,不知愚陋不可以彊 宗元早歲與負罪者親善,始奇其能,謂可以共立仁義,裨敎化。 過不自料,勤勤勉 一,其素意

立,未有子息,荒陬中少士人女子,無與爲婚,世亦不肯與罪人親昵。以是嗣續之重,不 夷獠之鄉,卑濕昏霧,恐一日塡委溝壑,曠墜先緒,以是怛然痛恨,心骨沸熱。 熒熒孤 知恥 年少氣銳,不識幾微,不知當否,但欲一心直遂,果陷刑法,皆自所求取,又何怪也? ,若受鋒刃。此誠丈人所共閔惜也。先墓在城南,無異子弟爲主,獨託村鄰。自譴逐 如鏤,每春秋時變,孑立捧奠,顧眄無後繼者,懷懷然欷歔惴惕,恐此事便已,摧心傷 1,日復一日。然亦有大故。自以得姓來二千五百年,代爲冢嗣,今抱非常之罪,居 宗元於衆黨人中,罪狀最甚,神理降罰,又不能卽死,猶對人語言,飮食自活,迷不

以無 路,士女徧滿,皂隸庸丐,皆得上父母丘墓,馬醫、夏畦之鬼,無不受子孫追養者。 來,消息存亡不一至鄉閭,主守固以益怠。 以至此也。 付受所重,常繫心腑,然無可爲者。立身一敗,萬事瓦裂,身殘家破,爲世大僇。是以當 斬伐,無復愛惜。家有賜書三千卷,尚在善和里舊宅,宅今三易主,書存亡不可知。 已息望,又何以云哉?城西有數頃田,樹果數百株,多先人手自封植,今已荒穢,恐便 大戾。近世禮重拜掃,今闞者四年矣。每遇寒食,則北向長號,以首頓地。 孟子禮之。今已無古人之實爲而有詬,欲望世人之明已,不可得也。直不疑買金以償同 食不知辛鹹節適,洗沐盥漱,動逾歲時,一搔皮膚,塵垢滿爪,誠憂恐悲傷,無所告愬, 婦翁者。然賴當世豪桀分明辨列,卒光史册。管仲遇盜,升爲功臣,匡章被不孝名, 自古賢人才士,秉志遵分,被謗議不能自明者,以百數。故有無兄盜嫂,娶孤女撾 晝夜哀憤,懼便毁傷松柏, 芻牧不禁, 以成 想田野道

鼎耳,爲齊上客;張蒼、韓信伏斧鑕,終取將相;鄒陽獄中,以書自治;賈生斥逐,復 召宣室;兒寬擯厄,後至御史大夫;董仲舒、劉向下獄當誅,爲漢儒宗。此皆瓌偉博 劉寬下車,歸牛鄉人。此誠知疑似之不可辯,非口舌所能勝也。鄭詹束縛於晉,終 死;鍾儀南音,卒獲返國;叔向囚虜,自期必免;范座騎危,以生易死;蒯通據

列

傳

第 九 + =

柳 宗 元

辯奇壯之士,能自解脫。 今以恇怯淟澀,下才末伎,又嬰痼病,雖欲慷慨攘臂, 自同昔

人,愈疏闊矣。

今皆頑 無異能解,欲秉筆觀縷,神志荒耗,前後遺忘,終不能成章。 除刑部囚籍,復爲士列,亦不堪當世用矣! 賢者不得志於今,必取貴於後,古之著書者皆是也。 然無復省錄。讀古人一傳,數紙後,則再三伸卷,復觀姓氏,旋又廢失。假令 宗元近欲務此,然力薄志劣, 往時讀書,自以不至

雖 有 不敢望歸掃塋域,退託先人之廬,以盡餘齒,姑遂少北,益輕瘴癘,就婚娶,求胄嗣, 可付託,即冥然長辭,如得甘寢,無復恨矣! 伏惟興哀於無用之地,垂德於不報之所,以通家宗祀爲念,有可動心者操之勿失。

萬

然衆畏其才高,懲刈復進,故無用力者。

宗元久汨振,其爲文,思益深。 嘗著書一篇,號貞符,日:

「非也。 臣 |所貶州流人吳武陵爲臣言:「董仲舒對三代受命之符, 何獨仲舒爾, 司馬相如 劉向、揚雄、班彪、彪子固皆沿襲嗤嗤,推古瑞物以配 誠然?非邪?」 臣日

臣爲尙書郞時, 其言類淫巫瞽史,誑亂後代,不足以知聖人立極之本,顯至德,揚大 **嘗著貞符,言唐家正德受命於生人之意、** 累積厚久宜享無極之 功,甚失厥

蠻夷,不聞于時,獨不爲也。苟一明大道,施于人世,死無所憾,用是自決。臣宗元稽 使聖王之典不立,無以抑詭類、拔正道、表覈萬代。」臣不勝奮激,即具爲書。念終泯沒 ,本末閎闊。 會貶逐中輟,不克備究。」武陵卽叩頭邀臣:「此大事,不宜以辱故休缺

初罔 道怠者奪。於是有聖人焉,曰黃帝,游其兵車,交貫乎其內,一統類,齊制量,然猶大公 然後疆有力者出而治之,往往爲曹於險阻,用號令起,而君臣什伍之法立。德紹者嗣, 焉而鬭,力大者搏,齒利者齧,爪剛者決,羣衆者軋,兵良者殺,披披藉藉,草野塗血 草木,取皮革;飢渴牝牡之欲驅其內,於是乃噬禽獸,咀果穀,合偶而居。交焉而爭,睽 知道。 首拜手以聞曰: 之,運臂率指,屈伸把握,莫不統率,年老,舉聖人而禪焉,大公乃克建。由是觀之,厥 之道不克建。於是有聖人焉,曰內,置州牧四岳,持而綱之,立有德有功有能者,參而維 「濬哲文明」,於禹曰「文命祗承于帝」,於踼曰「克寬克仁,章信兆民」,於武王曰「有道 !匪極亂,而後稍可爲也。 孰稱古初朴蒙空侗而無爭,厥流以訛,越乃奮奪鬭怒振動,專肆爲淫威?曰:是不 惟人之初,總總而生,林林而羣。雪霜風雨雷雹暴其外,於是乃知架巢空穴,挽 稽揆典誓,貞哉惟茲德,實受命之符,以奠永祀。 而非德不樹,故仲尼敍書,於堯曰「克明俊德」,於舜曰 後之祆淫囂昏好怪之徒二了

也,莫知本于厥貞。

乃始陳大電、大虹、玄鳥、巨跡、白狼、白魚、流火之鳥以爲符,斯皆詭譎闊誕,

帝曰光武,克綏天下,復承舊物,猶崇赤伏,以玷厥德。 之泰山、石閭,作大號謂之「封禪」,皆尚書所無有。」莽、述承效,卒奮鰲逆。 乃下取虺蛇,上引天光,推類號休,用夸誣于無知氓,增以騶虞、神鼎,脅驅縱踴,俾東 |漢用大度,克懷于有氓,登能庸賢,濯痍煦寒,以瘳以熙,茲其爲符也。 魏、晉而下,尨亂鉤裂,厥符不 而其妄臣, 其後有賢

躖 斂發謹飭,歲丁大侵,人以有年。 據 類 風 灼 貞,邦用不靖,亦罔克久,駁乎無以議爲也。 、阻命 集族 ,<br />
人乃漻然休然,相睎以生,相持以成,相彌以寧。 謳 乃克完平舒愉,尸其肌膚,以達于夷途。 爛 歌 號 積大亂至于<br />
隋氏,<br />
環四海以爲鼎,<br />
跨九垠以爲鑪,<br />
爨以毒燎,<br />
煽以虐焰,其人沸湧 、歌舞 灝 遏 呼騰蹈,莫有救止。 德 灝 、義威 悦懌, 和寧。 **珍戮**, 用砥于元德。 帝庸威栗,惟人之爲。敬奠厥賦,積藏于下, 咸墜厥緒。 於是大聖乃起,丕降霖雨,濬滌盪沃,蒸爲淸氛,疏爲泠 簡于厥刑,不殘而懲,是謂嚴威。 徒奮袒呼,犒迎義旅,讙動六合,至于麾下。 無劉于虐,人乃並受休嘉,去隋氏,克歸 焚坼抵掎奔走轉死之害不起, 而 琢斮屠剔膏流節離之禍 是謂豐國。 小屬而支, 大生而 鄉 人乃克鳩 不作,而 于唐 爲義廩, 大盜 豪

作兵革,不竭貨力。丕揚于後嗣,用垂于帝式,十聖濟厥治,孝仁平寬,惟祖之則。澤 ,,愷悌祗敬,用底于治。凡其所欲,不謁而獲,凡其所惡,不祈而息。 四夷稽服,不

久而逾深,仁增而益高,人之戴唐,永永無窮。

以敬于人事。其詩曰: 帝曰諶哉!乃黜休祥之奏,究貞符之奧,思德之所未大,求仁之所未備,以極于邦治, 唐德之代,光紹明濬,深鴻尨大,保人斯無疆,宜薦于郊廟,文之雅詩,祗告于德之休。 大,宋之君以法星壽,鄭以龍衰,魯以麟弱,白雉亡漢,黃犀死漭,惡在其爲符也?不勝 天,茲惟貞符哉!未有喪仁而久者也,未有恃祥而壽者也。 商之王以桑穀昌,以雉雊 是故受命不于天,于其人;休符不于祥,于其仁。惟人之仁,匪祥于天。匪祥于

藏,厚我糗粻。 炎以澣。 子思孝父,易患于己。 神之曷依?宜仁之歸。 於穆敬德,黎人皇之。惟貞厥符,浩浩將之。仁函于膚,刃莫畢屠。澤熯于爨,灊 勃厥 《凶德,乃驅乃夷。懿其休風,是煦是吹。父子熙熙,相寧以嬉。 刑輕以淸,我完靡傷。 拱之戴之,神其爾宜。 濮鉛于北,祝栗于南,幅員西東,祗一乃心。 貽我子孫, 百代是康。 載揚于雅,承天之嘏。 十聖嗣于治,仁后之子。 天之誠神,宜鑒于 祝唐之紀,後 賦徹而

俾彌億

天罔墜; 祝皇之壽,與地咸久。曷徒祝之,心誠篤之。神協人同,道以告之。

列

傳

第

九十三

柳宗

元

萬年 ,不震不危。我代之延,永永毗之。仁增以崇,曷不爾思? 有號于天, 僉曰嗚呼,

咨爾皇靈,無替厥符!

宗元不得召,內閎悼,悔念往吝,作賦自儆曰:

萃之。 日施陳以繫熙兮,邀<u>善</u>舜與之爲〔三〕。 上睢盱而混茫兮,下駁詭而懷私。 旁羅列 以交貫兮,求大中之所宜。 觀古兮,怪今昔之異謀。惟聰明爲可考兮,追駿步而遐游。 絜誠之旣信直兮,仁友藹而 **懲**咎愆以本始兮,孰非余心之所求。處卑汙以閔世兮,固前志之爲尤。 始余學而

清。蹈乎大方兮,物莫能嬰。 兮,與時偕行。萬類芸芸兮,率由以寧。剛柔弛張兮,出入綸經。登能抑枉兮,白黑濁 日道有象兮,而無其形。推變乘時兮,與志相迎。不及則殆兮,過則失貞。謹守而中

鼎鑊。幸皇鑒之明宥兮,纍郡印而南適。惟罪大而寵厚兮,宜夫重仍乎禍謫。 已兮,悼乖期乎曩昔。 惟懼夫誠之不一。不顧慮以周圖兮,專茲道以爲服。讒妬構而 哀吾黨之不淑兮,遭遇任之卒迫。 奉訏謨以植內兮,欣余志之有獲。再明信乎策書兮,謂耿然而不惑。愚者果於自用 欲操術以致忠兮,衆呀然而互嚇。 勢危疑而多詐兮,逢天地之否隔。 進與退吾無歸兮, 不戒兮,猶斷斷於所 欲 甘脂 既明懼乎 圖 退 潤骨分 而保

天討兮,又幽慄乎鬼責。惶惶乎夜寤而晝駭兮,類麝麝之不息。

 
 專退兮, 盪洄汨乎淪漣。際窮冬而止居兮, 羈纍棼以縈纏。
 Щ 幽兮,黝雲涌而上屯。暮屑窣以淫雨兮,聽嗷嗷之哀猿。 漂遙逐其詎止兮,逝莫屬余之形魂。 凌洞庭之洋洋兮, 泝湘流之沄沄。飄風擊以揚波兮, 舟摧抑而迴邅。 攢巒奔以紆委兮,束洶涌之崩湍。畔尺進而 衆鳥萃而啾號兮,沸洲渚以連 日霾 **遭以**昧

未可。 暑兮,猶貿貿而自持。 哀吾生之孔艱兮,循凱風之悲詩。罪通天而降酷兮,不亟死而生爲!逾再歲之寒 進路呀以劃絕兮,退伏匿又不果。爲孤囚以終世兮,長拘攣而轗軻 將沈淵而隕命兮, **詎蔽罪以塞禍?惟滅身而無後兮,顧前志猶** 

遂兮,衆之所宜蔽也。不擇言以危肆兮,固羣禍之際也**。** 囊余志之脩蹇兮,今何爲此戾也? 豈貪食而盜名兮,不混同於世也。 將顯身以直

緩兮,完形軀之旣多。苟餘齒之有懲兮,蹈前烈而 御長轅之無橈兮,行九折之峩峩。 却驚棹以橫江兮, 泝凌天之騰波。 不頗。 死蠻夷固吾所兮,雖 幸余死之已 顯寵其焉

加?配大中以爲偶兮,諒天命之謂何!

忍 元 和 無辭以白其大人,如不往,便爲母子永決。」卽具奏欲以柳州授禹錫而自往播。 十年,徙柳州 刺史。 時劉禹錫得播州,宗元曰:「播非人所居,而禹錫親 在堂,吾不

大臣亦爲禹錫請,因改連州。

令書庸, 視直足相當, 還其質。 柳 人以男女質錢,過期不贖,子本均,則沒爲奴婢。 已沒者, 出己錢助贖。 南方爲進 宗元設方計, 士者, 走數千里從宗元游, 悉贖歸之。 尤貧者,

經指授者,爲文辭皆有法。

世號柳柳州。

十四年卒,年四十七

輒 曰:「雄深 死 宗元 廟於羅池, 雅健,似司 少時嗜進,謂功業 愈因碑以實之云。 馬 子長,崔、蔡不足多也。」旣沒,柳人懷之,託言降于州之堂,人有慢者 行就。 旣坐廢,遂不振。 然其才實高, 名 蓋 時。 韓愈許其文

一祭御史爲鹽鐵揚子院留後。 程异字師舉,京兆長安人。 叔文敗,貶郴州 居鄉以孝 稱。 第明經,再補鄭尉。 司 馬 精吏治,爲叔文所引

由

察,异使江麦調財用,因行諭諸帥府,以羨贏貢,故异所至不剝下,不加斂,經用以饒 兩稅使。 李巽 ·領鹽鐵,薦异心計可任,請拔濯用之,乃授侍御史,復爲揚子留後。 异起痕廢,能厲己竭節,悉矯革征利舊弊。 入遷累衞尉卿、 鹽鐵 轉 運 稍遷准南 副 使。 等道 **遂** 

上史大夫爲鹽鐵使。

非人望, 久不敢當印秉筆。 會卒,贈尙書左僕射,諡曰恭。 元和十三年,以工部侍郎同中書門下平章事,猶領鹽鐵。 明年,西北軍政不治,議置巡邊使,憲宗問孰可者,乃自請行。 身歿官第,無留貲,世重其廉云。 异以錢穀奮而至宰相,自以

彼若不傅匪人,自勵材猷,不失爲名卿才大夫,惜哉 之,徼幸一時,貪帝病昏,抑太子之明,規權遂私。故賢者疾,不肖者娼,一饋而不復,宜哉! 贊曰: 叔文沾沾小人,竊天下柄,與陽虎取大弓, 春秋書爲盜無以異。 宗元等橈節從

#### 校勘記

(二)後之派淫囂昏好怪之徒 「囂」,影宋世綵堂本柳河東集及四部叢刊影元本唐柳先生集卷一貞

符作「嚚」。

邀堯舜與之爲 柳河東集及唐柳先生集卷二懲谷賦「爲」下有「師」字。

列傳第九

五

# 唐書卷一百六十九

## 列傳第九十四

#### 杜黄裳 裴垍 李藩 章貫之澳 綬 溫 蕭祜

主留事。 懷光,懷光流汗服罪。於是諸將狠驕難制者,黃裳皆以子儀令易置,衆不敢亂。 杜黃裳字遵素,京兆萬年人。 李懷光與監軍陰謀矯詔誅大將等,以動衆心,欲代子儀。 **搔進士第,又中宏辭。** 郭子儀辟佐朔方府、子儀入朝,使 黃裳得詔,判其非,以質

「吾受恩三朝,豈以一官見賣!」即拂衣出。 壻章執誼輔政,黃裳勸請太子監國,執誼曰:「公始得一官,遽開口議禁中事!」黃裳怒曰: 地賜公主,德宗曰:「城南杜氏鄉里,不可易。」遷太常卿。 入爲侍御史,爲裴延齡所惡,十期不遷。貞元末,拜太子賓客,居韋曲。時中人欲請其 時王叔文用事,黃裳未嘗過其門。

皇太子總軍國事,擢黃裳門下侍郎、同中書門下平章事。於是,夏綏銀節度使韓全義檢

列

傳第九十四

杜黄裳

奏罷 **黃裳使人謂曰:「公不奮命者,當以濟代。」崇文懼,一死力縛賊以獻。** 黄裳曰:「時卿之功。」 佞 無 [中人監軍,而專委高崇文。凡兵進退,黃裳自中指授,無不切于機。 功,因其來朝,白罷之。 俄而劉闢叛,議者以闢恃險,討之或生事,唯黃裳固勸不 蜀平,羣臣賀,憲宗目 崇文素憚劉澭 ·赦,因

宰相,紀律設張,赫然號中興,自黃裳啓之。 隋文帝日昃聽政,衞士傳飡,太宗笑之。 本非人主所自任。 要,因推言:「王者之道,在脩己任賢而已。 幣結左右,以求節制,晏年尤甚,方鎭選不出朝廷。 目之祭,然後爲治哉?」帝以黃裳言忠,嘉納之。 不力。孔子之稱帝舜恭已南面,以其能舉十六相,去四凶,而至無爲。 整法度,殷損諸侯,則天下治。」帝嘗問前古王者所以治亂云云,黃裳知帝銳於治,恐不得其 始,德宗創艾多難,務姑息藩鎭,每帥臣死,遣中人伺其軍,觀衆所欲立者,故大將私金 昔秦始皇帝親程決事 故王者擇人任而責成,見功必賞,有罪信罰, , 見嗤前 操執綱領,要得其大者,至簿書獄訟,百吏能否, 由是平夏,翦齊,滅察,復兩河,以機秉還 黃裳每從容具言:「陛下宜鑒貞元之弊 世; 魏明帝欲案尚書事,陳矯不從; 豈必刓神疲體 一,勞耳 孰敢

本,年七十,贈司徒,諡曰宣獻。 元和二年,以檢校司空同中書門下平章事,爲河中、晉絳節度使,俄封邠國公。

節度使高崇文錢四萬五千緡,按故吏吳憑及黃裳子載,辭服,帝念舊功,但流憑昭州,原載 無絜白名。當大政未久,不究其才,及處外,天下常所屬意。卒後數年,御史劾奏黃裳納邪寧 死,表還其柩葬焉。 黄裳達權變,有王佐大略。 嘗被疾,醫者誤進藥,疾遂甚,終不怒譴。然除吏不甚別流品,通饋謝 性雅澹,未始忤物。 初不爲執誼所禮,及敗,悉力營救; 旣

載終太僕少卿。

不問。

章武 勝檢校禮部尚書,出爲天平節度使,不得意,卒。 嘉歎,拜給事中,遷戶部侍鄓判度支,欲倚爲宰相。 **医 香** 載弟勝, , 元和時大臣子若孫在者, 多振拔之。 字斌卿, 寶曆初擢進士第。 楊嗣復數薦材堪諫官,不爲鄭覃所佑。 帝嘗問勝,勝具道黃裳首建憲宗監國議,帝 及蕭鄴罷,爲中人沮毀,而更用蔣伸,以 宣宗感

就。 **裴垍字弘中,絳州聞喜人。** 四遷考功員 外郎。 吏部侍郎鄭珣瑜委坤校辭判,研覈精密,皆值才實。 擢進士第,以賢良方正對策第一補美原尉。 藩府交辟,不

列

傳第

五

之。」垍 拜||1中 對策 非 憲宗 更十 書 是 卽 侍 崖略疏三十許人, 元 **飞船學士,為戶部侍郎** 年 和 鄓 初, 、同中書門下 始 相 召入翰林爲學士, 天子 ", 比 平章 吉甫 日人物,吾懵 事。 籍以薦于朝, 帝器垍方直 再遷中書舍人。 加集賢殿 不及 一,以爲 大學 天下 知 ; 且宰 士 任 李吉甫始執政, 一,監 公卿 相 脩 得 職當 ,薄其過 國 人。 史。 進 坐 賢 ),眷館 覆 任 以情謂 視 能 皇甫 彌 君精鑒, 厚。 | 均日: 「吾 湜、牛僧 吉甫罷,乃 爲 孺 我 落 等 魄

旣當 許 政 欲 遂 有 出 振 關 或 坤 I始承 監 一; 請 所 說 軍 巡 繩 李輔光,垍劾其儒 一,韶授冗官,垍曰:「以 旨翰林,天子新 帝軍垍 不 軌 課 誠使 吏治,分明淑 勿言。 翦蜀 ,以李鄘 亂 一中 帝在 慝 厲精 ,帝降意 代之。 人罪藩臣,陛下之法安在?」更授美官。嚴綬守太原 殿 中, 致治,中外機筦,垍 常呼垍官 順 納。 吐突承璀自 而 不 名。 多所參與,以小 嶺南 東宮 1得侍 節 度使楊於陵爲 恩 心 顧 愼 默稱 親 渥 帝意 監 承 軍 間

往。 矣。」帝猗 而從史遣部將王翊元奏事 于時澤路盧從史詭獻征 王 承 且 宗 武 違不 俊 擅 襲節 能 有 功於國 決。 度,方帝 久之,卒用 陛下前以地 屢削 討計 ,垍從容以語動之,翊元因言從史惡稔可圖狀,垍比遣往,得其 叛族, 承璀謀,會兵討承宗 1,||
1 ||
1 || 授李師道, 意必 爭 以爲:「從史苞逆節, 取之,又吐突承璀每欲燒垍權 而今欲奪承宗地有之,賞罰不 ,從史果反覆,兵久暴無功,王師告病 內連 承宗, , 外請 因 探 · , 興 帝 師 意 沮 勸 以 自 廢

五年,暴風痺,帝悵惜,遣使致問,藥膳進退輒疏聞。 列 傳 第 九 + 四 装 垍 李 潛

之。」俄而承璀縛從史獻于朝,因班師。 其機致之,後無興師之勞」。帝初矍然,徐乃許之。」垍請祕其計, 大將烏重胤等要領。 垍乃爲帝陳「從史暴戾不君,視承璀若小兒,往來神策軍不甚戒,可因 · 坦奏:「承璀首謀無功,陛下雖詘法,人心不厭,請流 ,帝曰:「惟|李絳、梁守謙知

斥以謝天下。」乃罷所領兵。

苛, 贍,故送使之財悉爲上供。 輕 重 齊民重 |相反,民輸率一倍其初,而所在以留州、送使之入,捨公估, 更實私直以自潤, 先是,天下賦法有三:日上供,日送使,日留州。 困。 | 均奏禁之, 一以公估準物,觀察使得用所治州租調, 自是起淮、江而南,民少息矣。 建中初,釐定常賦,而物重錢輕。 至不足, 乃取支郡以 故賦益 其後

任,罔 同列。 惟垍獎勵使盡言。 君異夫二人孜孜獻納者,前日進擬,上固爲疑。」休復大慚。 |坩器局峻整,持法度,雖宿貴前望造詣,不敢干以私。 :不精明, 及相,又擢韋貫之、裴度知制誥, 人無異言。 杒, 拾遺獨孤郁、李正辭、嚴休復三人皆遷,及過謝垍, 士大夫不以||1年少柄用為嫌, 李夷簡御史中丞,皆踵躡爲輔相,號名臣。 故元和之治,百度脩舉,稱朝無 諫官言得失,大抵執政多忌之, **坩爲學士時**, 引李絳、崔羣與 均獨讓休復日: 自它選

居三月,益痼,乃罷爲兵部尚書。

贈,給事中劉伯芻表其忠,帝乃贈太子太傅。 上德宗實錄,吉甫以垍引疾解史任,不宜冒奏,乃徙垍太子賓客, 垍之進,李吉甫 薦頗力,及居中,多變更吉甫時約束,吉甫復用, 銜之。 罷武等史官。 會垍與 史官蔣武 會卒,不加

者爲脩撰,否者直史館,以準六典。」遂著于令。 |坩始相,建言:「集賢院官,登朝自五品上爲學士,下爲直學士,餘皆校理, 史館以登朝

議者謂帝知山明,倚任方篤,尙不免疑嫌,以信處位之難云。 朝。」帝怒,召學士李絳議斥武,絳言:「坤身備宰相,明練時事,勢不容先見武。」帝悟,釋之。 京兆少尹裴武使王承宗還,得德、棣二州,已而地不入。或言:「武還,先見垍, 明日乃

年四十餘,困廣陵間,不自振,妻子追咎,藩晏如也。 閉美,敏于學。居父喪,家本饒財,姻屬來弔,有持去者,未嘗問,益務施與,居數年略盡。 李藩字叔翰,其先趙州人。父承,仕爲湖南觀察使,有名于時。 杜亞居守康都,表致府中。 藩少沈靖有檢局,麥制 亞嘗疑牙

徐州 張建封辟節度府,未嘗察苛細。 建封卒,濠州刺史杜兼疾驅至,陰有覬望,藩泣謂 將令狐運

爲盜

| ,掠服之,藩爭不從,輒去,後果獲眞盜,稍知名。

發,召見藩曰:「世謂生死報應,驗乎?」藩曰:「殆然。」曰:「審若此,君宜 示藩,藩色不變,曰:「信乎,杜兼之報也! 曰:「公今喪,君宜謹守土,何棄而來?宜速還,否則以法劾君!」 「建封死,藩撼其軍,有非望」。德宗怒,密詔徐泗節度使杜佑殺之。 !」|佑日:「愼毋畏,吾以闔門保君矣。」帝未之信,亟 康錯忤去,恨之, 佑雅 遇事 器藩,得韶,十日 無恐。」因出詔 、因誣

追藩。

旣入,帝望其狀貌,日:「是豈作亂人邪?」釋之,拜祕書郎。

授著作 藩 所語 敕 客 曰:「自古故事 相 樂,慕藩名,彊致之。 時 何哉!」 」裴垍 :鄓,再遷給 王紹得君,邀藩與相見,當即用,終不詣。 白憲宗,謂藩 後仲舒等果坐斥廢。 ·,由不識體之人敗之,不可復正, 事中。 制有不便,就敕尾批卻之,吏驚 仲舒等爲俳說廋語相狎昵,藩一見,謝不往,曰:「吾與 有宰相器 憲宗爲皇太子, 會鄭絪罷,因 王仲舒與同舍郎韋成季、呂洞日置酒邀賓 雖紹何誅?」累擢 拜門下侍郎、同中書門下平 王紹 ,請聯它紙,藩曰:「聯紙是牒,豈曰 避太子諱, 吏部 始改 郎中。 名,時議 章 終日,不曉 坐 以 小 累,左 爲諂。

每祭 於人者和 敕 藩具對:「儉則足用 有司 於神 敬而 人乃神之主, 不祈 ,敦本則百 使 神無 人安而 知 [姓富 , |福至。」帝悅曰:「當與公等上下相勗, 則 不 反是 能 降福 則匱。」又言:「孔子 有 知, 固不可私已求媚 病, 止 子路 而 以保此言。」後復 之壽。 悅 之也。 漢 文帝 且

藩

忠謹

好醜

必言

帝以爲無隱。

嘗問

前

世所以家給或國匱乏者何致

而

然及祈

譲之

列

傳第

九

+

깯

李

藩

郼

貫

之

問 神仙長 (年事,藩知帝且有所惑,極陳荒妄謾誕不可信。 後入柳泌等語,果爲累云。

相」字,署其左曰:「不可。」還奏之。宰相權德輿失色曰:「有不可,應別爲奏,可以筆塗詔 河東節度使王鍔賂權近求兼宰相, 密詔中書門下曰:「鰐可兼宰相。」藩遽取筆滅「宰

」藩曰:「勢迫矣,出今日便不可止。」旣而事得寢。

中人假印節與吳少陽,臣爲陛下恨之。」帝變色不平。 復思藩, 李吉甫復相,藩頗沮止。會吳少陽襲淮西節度,吉甫已見帝,潛欲中藩,即奏曰:「道逢 召對殿中,事寖釋。 明年,爲華州刺史,未行,卒,年五十八,贈戶部尚書,諡曰 翌日,罷藩爲太子詹事。 後數月,帝

藩材能不及韋貫之、裴垍,然人物淸整,是其流亞云。

貞簡

章貫之名純,避憲宗諱,以字行。 後周柱國貿八世孫

少監。 載日: 父<sup>肇</sup>,大曆中爲中書舍人,累上疏言得失,爲元載所惡,左遷<u>京</u>兆少尹。 久之,改祕書 「摩若過我,當擇善地處之。」終不肯詣。 **載**誅,除吏部侍郎。 代宗欲相之,會

卒, 諡曰貞。

曰:「此其姓名也,與我同里,素聞其賢,願識之而進於上。」或者喜,以告曰:「子今日詣實, 以厚幣召,皆不應**。** 貫之及進士第,爲校書郎,擢賢良方正異等,補伊闕、渭南尉。 居貧,噉豆糜自給。 再遷長安丞。 或薦之京兆尹李實,實舉笏示所記 河中鄭元、澤路都士美

子爲之。」又刻忠義不宜汙朝籍,忠義竟罷。於是權幸側目。 有得失,使從郁議,是子而議父,殆不可訓。」卒改它官。 相杜佑子從郁爲補闕,貫之與崔羣持不可,換左拾遺,復奏:「拾遺、補闕爲諫官等,宰相政 工巧幸,擢少府監,蔭子補齋郎,貫之不與,曰:「是將奉郊廟祠祭,階爲守宰者,安可以賤工 而明日賀者至矣!」貫之唯唯,不往,官亦不遷。 永貞時,始爲監察御史,舉其弟纁自代,及爲右補闕,纁代爲御史,議者不謂之私。宰 遷禮部員外郎。 新羅人金忠義以

下平章事。 除,安得重?」曰:「然爲陛下柬宰相者,得無重乎?」帝美其言。改尚書右丞,俄同中書門 抑浮華,先行實,于時流競爲息。 嘗從答奏曰:「禮部侍郞重於宰相。」帝曰:「侍郞是宰相 退決請乎?」垍曰:「奉教。」事果見聽。 召爲都官郞中,知制誥,進中書舍人。宰相裴垍嘗三奏事,憲宗不從。 進吏部員外郎,坐考賢良方正牛僧孺等策獨署奏,出爲果州刺史,半道貶巴州。久之, 遷中書侍郎。 坦因曰:「君異時當位於此。」改禮部侍郎。所取士, 貫之日:「公亦以進

列傳第

九十四

郼

貫之

唐

蔡,以宣武 今陛下獨 應 置 都統 也 齊、 討 **?吳元** ,又令二帥連營, 趙 不能 韓弘 濟也 同起,德宗引天下兵誅之,物力殫屈,故朱泚 少忍,俟察平而誅鎭邪?」時帝業已討鎭,不從。 爲都統,又詔河陽烏重胤、忠武李光顏合兵以進。 貫之請釋鎭州,專力准西,且言:「陛下豈不知建中事乎?始於蔡急而魏 則各持重養威,未可歲月下也。 亦不從。 乘以爲亂。 終之,蔡平鎭乃服。 後四年乃克蔡,皆如貫之 貫之諫諸將戰方力,今若 此非它,速於撲滅也。 初,討

李正 翰林學士、左拾遺郭求上疏 以鉤黨去,由是中外始大惡宿。 何欲假以寵乎?」由是宿等怨,陰構之,又與度論兵帝前,議頗駁, 甫 辭、薛公幹、李宣、韋處厚、崔韶坐與貫之厚善,悉貶爲州刺史。 鎛、張宿皆以幸進。 帝以段文昌、 張仲素爲翰林學士。 宿使淄青, 申 理, 裴度欲爲請銀緋,貫之曰:「宿姦佞, 韶冤求學士, 貫之謂學士所以備顧問, 出貫之爲湖南觀 不宜專取辭藝,奏罷之。 故罷爲吏部侍郎。 察使。 ) 顗、正辭、 正辭、 吾等縱不能 不三日 處厚皆清正 **韋**顗、 际,奈 於是

部尙書召,未行,卒,年六十二,贈尙書右僕射,諡曰貞,後更諡曰文。 獻 不中异意,因取 時國用不足,遣鹽鐵副使程异督諸道 屬 內六州留錢繼之。左遷太子詹事分司 心賦租, 异諷州縣厚斂以獻。 東都。 穆宗立,即拜河南尹 貫之不忍橫賦 而 所

相。 |裴均子持萬縑請撰先銘,答曰:「吾寧餓死,豈能爲是哉!」 生平未嘗通饋遺,故家無羨財。 貫之命左右引出,曰:「此妄人也。」居輔相,嚴身律下,以正議裁物,室居無所改易。 貫之沈厚寡言,與人交,終歲無款曲,不爲僞辭以悅人。爲右丞時,內僧造門曰:「君且

善,欲薦用之,諷澳謁己。 無呈身御史。」 子澳,字子斐,第進士,復擢宏辭。方靜寡欲,十年不肯調。 温歸以告,澳不答,温曰:「元裕端士, 若輕之邪?」澳曰:「然恐 御史中丞高元裕與其兄温

胎,澳曰:「爵賞刑罰,人主之柄,公無以喜怒行之,俾庶官各舉其職,則公斂袵廟堂上,天下 治矣,烏用權?」與歎曰:「吾先居此,得無愧乎!」 周墀節度鄭滑,表署幕府。會墀入相,私謂曰:「何以教我?」澳曰:「願公無權。」墀愕

不若就擇可任者與計事。」帝曰:「朕固行之矣。自黃至綠,自綠至緋,猶可,衣紫卽合爲一 前世無比。 須見帝,開陳可否,未嘗不順納。 與蕭寘皆爲宣宗禮遇,每兩人直,必偕召問政得失。常夜被旨草詔書,事有不安者,卽遷延 **擢考功員外郎、史館脩撰。 歲中知制誥,召爲翰林學士。 累遷兵部侍郎,進學士承旨。** 帝搖首日:「未也。 策安出?」澳倉卒答曰:「若謀之外廷,則大和事可用追鑒, 一日,召入,屏左右問曰:「朕於敕使如何?」 澳陳帝 威制

列傳

第

矣。」澳愧汗不能對,乃罷。改京兆尹。

下乎?」帝入白太后曰:「是不可犯。」后爲輸租,乃免。 且言必寘以法。 帝舅鄭光主墅吏豪肆,積年不輸官賦,澳逮繫之。它日延英,帝問其故。 帝曰:「可貸否?」答曰:「陛下自內署擢臣尹京邑,安可使畫 由是豪右斂跡 一法獨行於貧 澳具道姦狀,

劇非所任者。」帝默不樂。 而得,卒無以自白。今時事寖惡,皆吾輩貪爵位致然。」未幾,授河陽節度使。 「卿自便而遠我,非我去卿。」 會戶部闞判使,帝以問澳,澳三不對。 。出謂其甥柳玭曰:「吾本不爲宰相知,上便委以使務,脫謂吾他岐 帝曰:「任卿可乎?」曰:「臣老矣,力疲氣耗,煩 入辭,帝曰:

侍郎召,不起。卒,贈戶部尚書,諡曰貞。 時史盜簿書爲姦,貶祕書監,分司東都。 懿宗立,徙平盧軍,入爲吏部侍郎,復出爲邪寧節度使。 就遷河南尹,辭疾不拜,丐歸獎川。 宰相杜審權素不悅澳, 逾年, 以吏部 坐吏部

卿。」蓋將以爲相也。 澳在河陽累年,宣宗遣使至魏博,道出澳所,帝以薄紙手作詔賜澳曰:「密飭裝,秋當見 因問輔養術, ,澳具言金石非可御,方士怪妄,宜斥遠之。其八月,帝

爲學士時,帝嘗曰:「殷每遣方鎭刺史,欲各悉州郡風俗者,卿爲殷撰一書。」澳乃取十

崩,不果相

道 ]四方志,手加紬次,題爲處分語。 後鄧州刺史薛弘宗中謝,帝敕戒州事,人人驚服。

之,不對策輒去,凝遂及第。 貫之兄。 舉孝廉,又貢進士,禮部侍郎潘炎將以爲舉首,授以其友楊凝親老,故讓 後擢明經,辟東都幕府。

用。 母老,屢丐解職,每請,帝輒不悅。 鄭絪欲馳告之,帝不許,時大寒,以妃蜀襭袍覆而去,其待遇若此。 [德宗時,以左補闕爲翰林學士, 密政多所參逮。 出入八年, 而性謹畏甚。 帝嘗幸其院, 晚乃感心疾, 每入直,踰月不得休。 章妃從, 罷還第,不極於 會經方寢,學士 以

帝曰:「爲文不已,豈頤養邪!」敕自今勿復爾。 九月九日,帝爲黃花歌,顧左右曰:「安可不示」章綬!」卽遣使持往,綬遽奉和,附使進。 終左散騎常侍。

弟纁,有精識,爲士林器許,兄弟皆名重當時。

|綬子温。

然, 疑假權謁進, 温 字弘育。 方七歲, 召而試諸廷, 日誦書數千言。 文就無留意,喜曰:「兒無愧矣!」入爲監察御史, + 舉兩經及第, 以拔萃高等補咸陽尉。 以臺制苛 父愕

傳第九十四 章貫之

列

旣 嚴 倡 日 居 不 喪, 可 丞相操履有初,不宜反,乃姦人陷之。 一毀瘠不 以省 養 支。 不 拜。 服 除, 換 (著作郎 李逢 吉辟置 旣 謝 宣 武 輒 府。 解歸。 吾等豈避雷霆,使上蒙霧咎邪 頻遷 侍親疾,調適湯劑, 右 補 闞。 宰相宋申錫被構,罪不 彌 三 十 . --率同舍伏閣 衣 不 · 弛帶。 測 温

切

爭

由

[是益

知

名

費, 吏舉 江 臣 自敕 「竊惜 准旱歉,京師雪積五 則宗 中人葺之。 大 之。 和 /廟最重 事 五 歸 請還將作, 正 矣。 也。 太廟室 温 |諫:「吏舉其職, 今慢吏奪稟, 比 尺,老稚凍 一漏罅, 則官脩業矣。」 詔 下 閱 詔宗正、 月, 仆, 面 有 國 易以 司 此 將作營治,不時畢,文宗怒責卿李銳、監王堪 帝乃罷官 以治 弛墯 非 中人,是許 崇飾虛名 ; **示力**, 事 人。 歸 正 於正, 時。 . 百 司 可黜 會羣臣 。」帝順記 慢官,懲 法以脩。 公廢職, 論計上 納, | 奪號, 乃謝 以宗廟之重,爲陛下 不恪,擇可 夫設 季臣。 温 制 度, 固 諫「今河南 任者繕完之, 改 立官 分侍御 「奪其稟, 司 史。 所 度 經

换 至 外 文 郞 注 是 知制誥 節 固 拜 諫 度 鳳翔 議 大 引疾徙太常少卿。 帝怒曰:「寧經治命邪?」禮部 夫。 ,表爲副 未幾,爲翰林學士。 温日:「拒 宰相李固言薦温給事中,帝曰:「温素避事,肯爲我論駁乎? 則遠黜,從之禍 先是,綬在禁廷, 侍郎崔蠡曰:「温 不 測,吾焉能 積憂 用 亂 是病廢, 爲注 命, 起 益 邪 所以爲孝。」 故誠 ? 注 温 誅 不 得 由考功員 帝 任 意釋, 近 職

德

裕

入輔,

擢

禮部員外郎。

或言雅

爲牛僧

孺

厚,

德裕日:「是子

堅正

盯

以

私

廢乎?

,

須太子長,以爲賓客。」久之,卒爲給事中。

陝虢觀察使。 行無疵。若吏材幹而不入淸選,佗日孰肯當劇事者?此衰晉風,不可以法。」帝素重温,出爲 按大獄,帝以爲能,擢職方員外郎,將趨省,温使戶止,即上言:「郎官淸選,不可賞能吏。」帝 命中人諭送,温執議不移,詔改區檢校禮部郎中。帝問故於楊嗣復,對曰:「勗,名臣後,治 戶參軍,厚賂貴近,狹日,改撫州司馬,樂工尉遲璋授光州長史,温悉封上詔書。太子得罪, 而賦辦。 詔諭羣臣,温曰:「陛下訓之不早,非獨太子罪。」時頗直其言。 遷尙書右丞。 鹽鐵推官姚勗 如文王故事。」太子不悅。辭侍讀,見聽。王晏平罷靈武節度使,以馬及鎧仗自隨,貶康州司 初,兼莊恪太子侍讀, 是詣宮,日中見太子,諫曰:「殿下盛年,宜鷄鳴蚤作,問安天子, 民當輸租而麥未熟,吏白督之,温曰:「使民貨田中穗以供賦,可乎?」爲緩期

使。 武宗立,擢吏部侍郎。李德裕欲引同輔政,温苦言李漢可釋,德裕悵然,出宜歙觀祭 池民訟刺史,劾無狀,榜殺之,威行部中。

旣疾,召親屬,賦經詩「在室愧屋漏」,因泣下曰:「今知沒身不負斯誠矣!」卒,年五十

八,贈工部尚書,諡日孝。

列專第

十四四

章 貫

温性剛峻,人望見無敢戲慢者。 與楊嗣復、李珏善,嘗勸與李德裕平故憾,二人不從,

温少合,所善惟蕭祜。

及皆謫, 温歎曰:「用吾言, 孰至是邪!」一女,歸薛蒙。女工屬文,續曹大家女訓,

及輸,召至,將責之,會有賜與,倩祜爲奏, 品者,字社之,夷澹君子也。少貧窶、隱居,以孝養聞。 實稱善,即薦于朝。 司農卿李實督官租,祜居喪,未 終制, 以處士拜左拾遺。

遷諫議大夫,終桂州觀察使,贈右散騎常侍。

精畫及書, 自鍾、汪、蕭、張以來, 皆能識其眞警。 然不以塵事自蒙,故温號「山林友」

云。

而資貪,黃裳亦以受餉見疵,至於忠烈嶤然,則不可掩已。 王,菑攘四方。 贊曰:杜黃裳善謀,裴垍能持法,李藩 憲宗中興, 寧不謂得 人而致然邪?昔子買凡堂高第而貨殖, . 鯁挺,韋貫之忠實,皆足穆天縡,經國體, 韓安國漢名宰 撥衰奮

## 唐書卷一百七十

## 列傳第九十五

高崇文 承簡 伊愼 朱忠亮 劉昌裔 范希朝 王鍔 稷

張萬福 高固 郝玼 史敬奉 野詩良輔 孟元陽

王栖曜

茂元

劉昌

土徑

趙昌

李景略

任迪簡

寧州 少籍平盧軍。貞元中,從韓全義鎭長武城,治軍有聲。 ,崇文率兵三千往救,戰佛堂原,大破之,封渤海郡王。 高崇文字崇文,其先自渤海徙幽州,七世不異居,開元中,再表其閭。 全義入朝,留知行營節度後務 累官金吾將軍。 崇文性樸重寡 吐蕃三萬寇

遷長武城都知兵馬使。

列

傳第

九

+

五

髙

崇

文

麟游 奉天諸 劉闢反, 屯兵討關。 宰相杜黃裳薦其才, 時顯功宿將,人人自謂當選,及詔出,皆大驚。 韶檢校工部尙書、 左神策行營節度使,俾統左右神策、 始,崇文選兵五千,

五

常若寇至 士奪 斬以 以兵三千自歸,仇良輔舉鹿頭城二萬衆降,執闢子方叔、壻蘇彊 阿跌 使。 南距 初,闢 徇。 而 成 光顏與崇文約,後期,懼罪,請深 不克攻。 有之, 都 一,至是 百五 乃西自 陷 東川 盡殺戍者,焚其栅, 明 十里,扼二川之要,闢城之,旁連八屯,以拒東兵。 慢中出 卯漏 日 執節度使李康 ,戰萬勝堆,堆直鹿頭左,使聽將高霞寓鼓之,士扳緣上,矢石 受命,辰已出師,器良械完,無一不具。過興元,士有折逆旅匕箸者, 卻劍門兵,解梓潼之圍,賊將邢泚 不殺也,至是歸康以丐雪,崇文數康失守罪,斬之。 下瞰鹿頭城, 入自贖,乃軍鹿頭 人可頭數。 西,斷 退守梓州。 凡八戰皆捷,賊心始搖。 賊糧 道。 **逾越成都,餘兵皆面** 崇文始破賊二萬于城下, 賊 韶拜崇文東川節 大震,其將李文悅 如雨 **鹿頭** 夢死 I 縛 送 大將 度 卽

脅汙者詣牙請命,崇文爲條上全活之。 ,刻石紀功于鹿頭山 入成都也,師屯大達,市井不移,珍貨 進檢校司空、西川節度副大使,南平郡王,實封三百 如山,無秋豪之犯。 邢泚已降而貳,斬于軍 一,衣冠

闢走,追禽之,檻送京

師

朝廷儀,憚於覲謁,有詔聽便道之屯。 事、邠寧慶節度使,爲京西諸軍都統。 崇文不通書,厭案牘諮判以爲繁,且蜀優富無所事,請扞邊自力,乃詔 崇文恃功而 居別三年,戎備整脩。 修,舉蜀帑藏百工之巧者皆自隨,又不 卒,年六十四,贈司徒,諡 同中書門下 卒 日 曉

裴度征蔡,奏署牙將。 子承簡,少事忠武軍,後更隸神策。 。蔡平,詔析上蔡、郾城、遂平、西平四縣爲澱州,拜承簡 以崇文平蜀功,除嘉王傅。

刺史,治

郾城。 勞,承簡夷其丘,吃家財以葬。葺儒宮,備俎豆,歲時行禮。野有政實,民得以食。將吏立石 始開屯田,列防庸,瀕澱綿地二百里無復水敗,皆爲腴田。 先是,賊築武宮以夸戰

頌功。 遷宋州。會宣武將李尔反,遣使責財于宋,承簡囚之,前後數輩輒繫獄,一日幷出斬于 遷邢州刺史,觀察府責賦尤急,承簡代下戶數百輸租。

牙門,威震部中。「岕悉兵攻之,宋有三城,南城陷,承簡保北兩城,數爲賊确,會徐州救至,

犯邊,承簡請屯寧州以制其侵。 遷義成軍,檢校尚書左僕射。入拜右金吾衞大將軍,復節度邠寧。 屬疾還朝,道卒,贈司空,諡曰樹。 先是, 虜多以盛秋

崇文孫駢自有傳。

葬

前

不知父墓,晝夜哭,夢若有導者,既發之,舊志 伊愼字寡悔 ·**克州人。通春秋、戰國策、天官、五行書,用善射爲折衝** 可按也 乃得 葬 都 喪母 了,將合

駛,乃爲桴,貧薪焉,乘風縱火,賊焚且溺不可計,與諸將追斬見泔溪。 江 西路嗣恭討哥舒晃,以愼爲先鋒。 疾戰破賊,斬首三千級,下韶州。 授連州長 戰把江口 史,知團練 水湍

量水 果反。 副使。 反間。 之,收黃梅,次長平,殺賊將,斬級千餘,拔察山尤力,遂下歐州, ,效俘三萬。 討梁崇義也,愼以江西牙兵屬李希烈,希烈署漢南北兵馬使,不受,獨率所部破崇義於 天子在 帝遣使即軍中斬之,皋表列其誣,未報。賊泝江徇地,皋授愼兵,勞而遣,與賊大戰,破 嗣曹王皋至鍾陵,得而壯之,拔爲大將。希烈恐爲皋所任,遺以七屬甲,詐爲愼書,行 三遷江州別駕。 梁州 ,包信轉東南財糧次廝口,賊遣驍將杜少誠以兵萬人遏江道,不得西。 襄、漢平,功多。 希烈愛其材,數饋遺,欲噄止之,卒以計免。 即拜刺史,封南充郡王。 明年 希 烈

**戦** 厲郷 千來搜, 亂 選 士七千,列三屯相望,偃旗以待。 誠 斬首五千級,喻降李惠登,即薦惠登爲刺史。 走,斬別 愼 逆 之擊于 將 應山 許 小 , 禽之, 示城下, 華,封其尸爲京冢, 少誠分圍之,未合,愼自中屯鼓之,諸屯悉出奮擊,賊 州開門降。 漕無留艱。 以功爲安州刺史,實封百戶。 拜愼安、黃州節度使。 進圍安州,希烈之甥劉戒虛以兵八

吳少誠反,詔領步騎五千兼統荆南、湖南、江西兵當一面,遇賊于三州港,營義陽,戰于

申,斬首數千,加檢校刑部尙書。貞元末,詔安、黃爲奉義軍,即爲奉義節度。 卒,贈太子太保,諡曰|此繆。 人求帥河中,事暴,帝沒其半贓,貶右衞將軍。 明年,念舊勞,復檢校右僕射兼右衞上將軍。 憲宗卽位,以兵付其子宥,身入朝,拜尙書右僕射,改金吾衞大將軍。以錢三千萬賂官 乾符中,盜發其墓,賜絹二百脩瘞云。

峙糧,以功擢太子賓客。 |朱忠亮字仁輔, 汴州浚儀人。 舉明經不中,往事昭義節度使薛嵩爲裨將,屯普潤,開田

長安獄。 拒詔爲亂,方集諸校計事,屋壞,琦壓死,乃授忠亮涇原四鎭節度使。 朱泚亂,率麾下四十騎至奉天,封東陽郡王,爲「定難功臣」。扈狩梁州,爲賊鈔獲,繫 賊平,李晟釋之,奏隸本軍,累遷定平軍使。 憲宗立,加御史大夫。 本名士明,至是賜 涇州將楊琦謀

老馬不棄, 戀 一覈軍籍,得竄名者三千人,歲收乾沒十萬緡。 況戰士乎?」聞者莫不感奮。 脛俗舊多賣子,忠亮以財贖冤者前後數百。 吏白耄卒不任戰者可罷,答曰:「古於

列傳

第

九十五

朱忠

亮

劉

昌裔

潘原城有勞,改封丹楊。 卒,贈尙書右僕射,諡

|曲環方攻濮州,表爲判官。 入 蜀 劉昌裔字光後,太原陽曲人。 楊子琳亂江,昌裔說之。 爲環檄李納,剴曉大誼,環上其稟, 子琳順命,拜瀘州刺史,署昌裔州佐。 幼重遲不好戲,常若有所思度。 德宗異之。 及壯,策說邊將不售,去 子琳死,客河朔間。 環領陳許軍,又

從府遷。

累進營田副使。

安。兵馬使安國寧謀應賊,昌裔以計斬之;召其麾下千人爲饗,人賞二縑,乃伏兵于道,令 不得脩。 況士馬完奮,足支賊。 若堅壁不戰七日,賊氣必衰,我以全制之可也。」脫許諾。 「持縑者斬」,一不能脫,賊聞解去。以功擢況陳許節度使,昌裔陳州刺史。 環卒,上官稅知後務,吳少誠引兵薄城,稅欲遁去,昌裔止曰:「受詔而守,死其職也。 昌裔密造飛棚聯栅,即募突將千人鑿城以出,擊賊走之。比還,栅已立,守陴遂 賊攻堞壞,

不敢至我城下, 君其舍外無恐。」明日, 從十餘騎持牛酒抵全義營勞軍, 全義不自意, 迎拜 韓全義敗于溵水,引軍走陳,求入保,昌裔登陴揖曰:「天子命君討察,何爲來陳?

歎服。

改 少誠吏有來犯者,捕得,縛送使自治之。 陳許 行軍司馬。 **沈卒,軍中推昌裔,** 有詔檢校工部尚書,代節度。 少誠慚, 其軍 亦禁境上暴掠者。 命境上東不得犯 封彭 城

至長樂驛,知帝意,因稱風眩臥第。 惡昌裔自立, 元和八年,大水壞廬舍,溺居人,以檢校尙書左僕射兼左龍武統軍召還京師。 欲召之而 重生 變,宰相李吉甫曰:「陛下乘人心愁苦可召也。」遂以韓皋代之。 歲中卒,贈潞州大都督,諡曰國 始,

戰守 覬覦、安反仄也。 希朝乃止。 神策軍。 '功累 范希朝字致君, 兼 貞元 御史中丞。 。」固讓左金吾衞將軍張獻甫。 四年,以游瓌政無狀,使代之。 河中虞鄉 治軍整毅,游壞畏其才,將伺隙殺之,希朝懼,奔鳳翔。 初從別寧軍爲別將,事 軍中憚戲甫嚴,以兵脅監軍使請於帝,必得 帝朝曰:「始偪而來,終代其任,非所以 節度使韓游瓌。 德宗在奉天,以 帝聞,召寘 防

詔拜寧州刺史、邠寧節度副使,俾佐獻甫

要害置屯保,斥邏嚴密,鄙民以安。 俄 遷振 武節度使。 部有党項、室章雜居、暴掠放肆,日入慝作,謂之「刮城門」。 至小竊取亦殺無赦,虜人憚伏,相謂曰:「是必張光晟給 希朝

列

傳

第

九

+

五

范

希

朝

王 鍔

姓 ·四年,虜保塞不敢橫。 [名來也!] 邊州 每長帥至,必效橐它駿馬,雖甚廉者猶受之,以結其歡 初,單于城地不樹,希朝命蒔柳,數歲成林。 積

用事 ,謂其易制,用爲右神策統軍,充左右神策京西諸城鎮行營節度使,屯奉天,以韓泰爲 貞元末,請朝。 時諸鎭不以事自述職者,希朝而已。 帝悅,拜右 金吾衞大將軍。 王叔 文

副,因欲使泰代之。 憲宗 立, 檢校尙書左僕射, 會不能得神策軍而罷。 復爲右金吾衞大將軍。 俄檢校司空,出爲朔方靈鹽節度

使。 遷河東,率師討王承宗,敗之木刀溝,然老病不能有大功。 還朝,改左龍武統軍

子太保致仕。卒,贈太子太師,諡忠武,改曰宣武。

希朝 3號當世善將,或比之|趙充國。 在朔方時, 招突厥別部沙陀千落衆萬餘有之,其後

用沙陀戰者,所至有功。

王鍔字昆吾,自言太原人。 始隸湖南團練府爲裨將,楊炎道潭,與語,異其才。 嗣曹王

皋爲 團 練使 (),俾鍔 誘降 武 岡 叛將 王國 良,以 功耀邵 州 刺

皋之節度江西也,李希烈南侵,皋與鍔兵三千,使屯潯陽,而皋全軍臨九江,襲蘄州,遂

史。

。 因推以腹心,雖家人燕居或預焉。 表鍔江州刺史兼御史中丞,充都虞侯。 皋攻安州,使伊愼盛兵圍之,而遣鰐入城中約降,使 **鍔小心,善刺軍中情僞,事無細大,皋悉知** 

殺不從者。 翌日城開,愼以賊降乃己功,不下鰐,鍔稱疾避之。

歲集京師者數千人,隨古旣陷,不得歸,皆仰稟鴻臚禮賓,月四萬緡,凡四十年,名田養子孫 神策軍,以酋長署牙將,歲省五十萬緡。 帝嘉其公,擢容管經略使,凡八年,谿落安之。 如編民。至是,鍔悉藉名王以下無慮四千人,畜馬二千,奏皆停給。 用雖不足,而它可試。 皋爲荆南節度使,欲署府少尹,而上佐鄙其人,乃復檄都虞候。 德宗擢爲鴻臚少卿。 先是,天寶末,西域朝貢酋長及安西、北庭校吏 從皋朝京師,皋奏鍔文 宰相李泌盡以隸左右

爲時進,裒其餘悉自入。諸蕃舶至,盡有其稅,於是財蓄不貲,日十餘艘載皆犀象珠琲,與 商買雜出于境。數年,京師權家無不富鍔之財。 遷嶺南節度使。廣人與蠻雜處,地征薄,多牟利於市,鍔租其廛,権所入與常賦埓,以

之,坐必就司馬聽事,不數日,遂代怙。久之,入拜尚書左僕射,又檢校司徒,爲河中節 召爲刑部尚書。 淮南節度使杜佑數請代,乃以鍔檢校兵部尚書爲佑副, 厚事佑以悅

進兼太子太傅,徙河東。 河東自范希朝討鎭無功,兵才三萬,騎六百,府庫殘耗。 鍔能

治。 本,贈太尉,諡 之,即除 乃悉軍迎 補完嗇費 鍔 雖有勞,然愈望不屬,恐天下議以爲宰相可市 官爵所以待 檢 一,廷列 未幾 放司空、同中書門下平章事。 日 一,兵至五 五十里, 功, 魏 功之不圖,何以爲勸?汪播所獻數萬萬,亦可以平章政事乎?」不聽。 |萬,騎五千,財用豐餘。 旗 城代光鮮 犀密。 鳄自見居財多, 回鶻恐,一 會回鶻丼摩尼師入朝,鍔欲示威武傾駭之, 而取。」帝曰:「鍔當太原殘破後,成雄富之 不敢仰視,鍔偃然受其禮。 且懼謗, 納錢二千萬。 李絳奏言: 帝聞嘉

簾壞, 土頗笑之。 異日因小罪, 鍔初附太原王 娜爲從子, 吏將易之, 善任數持下, 井以所告窮驗, 醫 取壞者付船 坊 以 鍼 等。 在淮南時, 以婚閥自高。 示衆以神 管得無名書, 明。 每燕饗, | 栩子弟亦藉鍔多得官。 性纖嗇, 內鞾中, 輒錄其餘賣之以收利。 有所 程作, 俄取它書焚之,人信其無名 雖 又常讀春秋, 碎 瑣無 所遺。 故鰐家錢偏 自稱儒 官 曹

子 長慶二年,用稷爲德州刺史,悉金寶、媵侍以行。 |洞穴,實金錢其中。 歷鴻臚少卿。 鍔在藩,稷常留京師 |鍔卒, ,奴告|稷更遺占,沒所獻,裴度爲言,乃論 視勢高 節度使李全略利其貨,因軍亂殺閥 下輕重以納 貲焉。 嘗 請籍坊 殺 奴 以廣第

,

納其女爲媵。

京師,文宗憫焉,詔授九品官,使奉鍔 開成中 - ,滄州節度使劉約奏櫻子叔泰生五歲,值全略亂,爲郡人匿養,得不死。 祀。 送叔泰

西華屯。 孟元陽,史失其何所人。 盛夏, 屬而立于塗,役休乃就舍,故田輒歲稔,而軍食常足。 起陳許軍中,以嚴整稱。 曲環領節度使,時已爲大將,使董作 環卒,吳少誠來寇,

元陽嬰城守,圍甚急,然終不能傅城。韓全義敗五樓,列將多私去,獨元陽與神策將蘇元策、

宣州將王幹以所部屯澱水,破賊二千,詔拜陳州刺史。

統軍,封趙國公。改右金吾大將軍,復拜統軍。 憲宗立,遷河陽節度使。 五年,盧從史敗,檢校尚書右僕射,徙帥昭義軍。 卒,贈揚州大都督 入爲右羽林

總管。 王 極曜 賊將邢超然守曹州,乘城指顧, ,濮州濮陽人。 安祿山反,尚衡夏義兵討賊,署牙將,徇兗、郿諸縣下之,進牙前 栖曜日:「彼可取也。」一矢殞之,遂拔曹州。 累授試

列傳第九十五 孟元陽 王栖曜

金吾衞將軍。

橫 授常州別 賊蕭 袁 晁 廷蘭 駕 亂浙 、浙西都知兵馬使。 時江介未定,詔內常侍馬日新以汴滑軍五千鎭之。 乘衆怨逐日新,劫其衆。 東,御史中丞袁傪討之,表爲偏將。 栖曜方游弈近郊,賊脅取之,與圍蘇州。 與賊戰,日十餘遇,生禽處,收州縣十六, 極曜乘賊 中人暴

怠,挺身登城,率城中兵出戰,賊衆大敗,遷試金吾大將軍

朥 東略 李 靈曜反汴州 ,次寧陵, 將襲宋州。 浙 西觀察使李涵使提兵四千爲河南掎角, 浙西節度使韓滉使栖曜以彊弩三千涉水夜入寧陵, 有功。 李希烈陷汴州也,乘 希烈不之

貞元 極曜性謹 初,拜左龍武大將 厚 善騎 射。 始將兵時,涉寇境,遇游騎環合,乃規百步立表而射,每射破的, 軍,出爲壓坊節度使。 十九年,卒,贈尙書右僕射,諡曰成。

虜相顧懼,引去。

知

一晨朝,矢集帳前,驚日:「江淮弩士入矣!」遂不敢東。

防禦判官。 子 茂元 一,少好學。 淄青留邸卒謀亂 德宗 時上書自 元膺率兵圍之,士無敢先者,茂元取一人斬之, 篇,擢試校書郎,改太子贊善大夫。 呂元膺留守東都, 衆乃進,賊

资

出奔。

累遷嶺南節度使,蠻落安之。

家 入積財, 交煽權貴。 鄭注用事 ٠, 遷涇原節度使。 注敗, 悉出家貲餉兩軍, 得不誅, 封

濮陽郡侯。召爲將作監,領陳許節度使,又徙河陽。

弓矢陌刀賜之。 會病,以|字兼|河陽行營攻討使。 討 劉碩也,李德裕以茂元兵寡,詔王宰領陳許合義成兵援之,以河陰所貯兵械、內庫甲 卒,贈司徒,諡曰威。

兵,勢必來援。 義 遂城府左果毅。史朝義兵圍宋州,城中食盡且降。昌說刺史李岑曰:「李光弼在河陽,江淮足 (諭賊, 賊不敢攻。 劉昌字公明, 汴州開封人。善騎射。 今廩麴尙多,若屑以食,可支二十日,則救至。」岑聽之,昌乃被鎧登城,以忠 俄而光弼援兵至,賊夜潰。光弼聞其謀,召置軍中,將用之。會光弼 天寶末,從河南防禦使張介然討安祿山,授易州

卒,還爲宋州牙門將。

將 討賊。 李靈曜以汴州反,刺史李僧惠欲應之,昌請見,陳逆順計,且泣。 故 靈 曜失助,不得逞。 汴州平,李忠臣疾僧惠,攻殺之,昌遁去。 僧惠悟, 即馳奏請自

虞候。 劉玄佐領宣武節度使,擢昌左廂兵馬使。 玄佐攻濮州 以昌攝刺史。 李希烈取汴,玄佐別將高翼提精卒守襄邑,城陷,翼赴水 李納反,以偏師收考城,充行營諸軍馬步都

列

傳

第

九

十五

劉

릅

五一七三

賊數敗 死 江 准 一,乃解 大 圍 去。 昌以兵三千守寧陵, 更攻陳州 昌從 玄佐以浙 希烈衆五萬攻之,昌掘塹以遏地道, 西 兵三萬救之。 西 去 陳五 + 相拒 里 凡四 昌 薄 其軍 一十餘 日

戰破之,禽 賊將翟曜 ,希烈奔還蔡州 加檢校工 一部尚 .書,累實封二百戶

赴京師 統之。 里,扼 伏。 南 JII 郡王 貞元三年入朝, 韶以宣武兵八千北出 尋授京西行營節度使。 彈等 昌在邊 ,未行,卒,年六十五 峽。 + 瓦 四年,歸化堡 又西築保定,扞靑石嶺,凡七城二堡, 十五 年 •, 身率士墾田 一,贈 軍亂, 歲餘,改四鎮 司 空 逐大將張 , 三年而軍有羨食,兵械銳新, 、北庭 五原。士卒 國 誠 行營兼 韶昌經略。 有 旬日就。 涇原節度。 逗留沮 昌入堡, 事 以 者,斬三百 功檢校尙書右僕射 七年,城 邊障妥寧。 誅 數百 平凉 人乃行,舉 人, 及感疾, 復使 開 地 國 累 軍 誠 慴 封 百

德宗 葬淺 水 下 初 部哀痛 原, 城平涼 韶翰林學士爲銘識其所。 ,出衣數百稱,官爲賽具,斂以棺槥, , 當劫盟後, 將士 一骸骨 不藏, 昌盛陳兵衛 昌始命瘞之。 , 分建二冢,大將日 具牢醴, 夕夢若詣昌厚謝 率諸將素服臨之, 旌義冢 者 士 昌 日懷忠冢 具 、以聞。

貴 子 後遷太僕卿,給事中韋弘景等封還制書, 士涇 ,尚雲安公主,拜駙馬都尉 , 累遷 少 卿 以士涇交通近倖,不當居九卿。 家 積 財 內結權 近。 善胡琴, 故得幸於 感泣

「昌有功於邊,士涇又尙主,官少卿已十餘年,制書宜下。」」弘景等乃奉詔

收以爲張巡、許遠陷睢陽,其名傳,昌全寧陵而事不得暴于世,寧收未之思邪? 賞罰耳。 守。』因伏地流涕,玄佐亦泣曰:『國家將富貴汝。』」史臣謂不然,且勒兵乘城與賊抗,所賴惟 昌泣曰:『始昌令守陴內顧者斬。昌孤甥張俊守西北,未嘗內顧,捽下斬之,士有死志,故能 贊曰:唐杜牧稱:「寧陵之圍解,劉玄佐召昌問曰:『君以孤城,用一當十,何以能守? 。今無罪而斬其甥,士心且離,不祥莫大焉,寧好事者傅此以益其美?非昌志也。

郎 奇之,復拜安南都護。 詔書至,人相賀,叛兵卽定。 叛 中裴泰代之,入爲國子祭酒。 ,都護高正平以憂死,拜昌安南都護,夷落嚮化毋敢桀。居十年,足疾,請還朝,以兵部 趙昌字洪祚, 天水人。始爲昭義李承昭節度府屬,累遷虔州刺史。 未幾,州將逐奏,德宗召昌問狀,時年逾七十,占對精明,帝 安南

齊杜英翰

尚書、 兼大理卿。 憲宗初立,檢校戶部尙書,遷嶺南節度使。 出爲華州刺史,對麟德殿,趨拜強駃,帝訪其所以頤養。遷太子少保。卒, 降輯陬荒,以勞徙節荆南。 召入,再遷工部

列

第九

+

Ŧī.

趙昌

李

景略

七六

年 八十五 一,贈揚州大都督, 盜曰成。

李景略, 幽州良鄉人。 父承悦, 檀州刺史、 密雲軍使。 景略以蔭補幽州府功曹參軍。

大曆末,客河中,闔門讀書。

覈實, Ш 東渭橋,召幕府計議。 [軍門,慟哭日:「豈意此軍乃陷不義乎!」遂遁歸。 李懷光爲朔方節度使, 論殺之。旣而有若女厲者進謝廷中, 景略曰:「殺失泚,還軍諸道,杖策詣行在,此轉禍爲福也。」不聽。 署巡官。 五原將張光殺其妻, 如光妻云。 遷大理 以貲市獄, 可直。 前後不能決, 懷光屯咸陽, 景 將 略

旣

每 沮索,不敢抗,以父行呼景略。 使者。」乃坐高壠待之。梅錄俯僂前哭,景略卽撫之曰:「可汗棄代,助爾號慕。」於是虜容氣 廣使至,與抗禮。 靈武節度使杜希全表置于府,累轉侍御史、豐州刺史。 時梅錄將軍入朝,景略欲折之,因郊勞,前遣人謂曰:「可汗新沒,欲弔 自此回紇使至者,皆拜于廷,威名顯聞。 豐州當回紀通道,前刺史軟柔, 希全忌之,誣奏,貶

**|希全死,遷左羽林將軍,對德宗||延英殿,論奏衎衎,有大臣風。** 會河東節度使李說病,

袁州

司馬。

以景略爲太原少尹、行軍司馬。 拜曰:「非李豐州邪?」遂就坐。 人心固 屬 景略矣。 會梅錄復入朝,說大會,虜人爭坐,說不敢遏,景略叱之,梅錄識其聲,驚 將吏相顧嚴憚,說愈不平,路中尉竇文場謀毀去之。 時方鎭旣重,故少召還者,惟不幸則司馬代之。 自說有疾,

同甘 卒于屯,年五十五。 刺 史、天德軍西受降城都防禦使。 蓼 歳餘 鑿咸應、永淸二渠,溉田 ,塞下傳言回紇將南寇, 天下惜用景略才有所未盡。 :數百頃,儲稟器械畢具,威令肅然,聲雄北疆, 文場方侍帝傍,卽言豐州當得良將,且舉景略,乃拜豐州 窮塞苦寒,地塉鹵,邊戶勞粹。 贈工部尚書。 景略至,節用約己,與士 回紇畏之。

景略卒 庶子。 然,乃授豐州刺史、天德軍使。 景略用法 任 - , 舉軍 迪簡 嚴, 予請爲帥 迪簡 京兆萬年人。 不忍其死, 、監軍使拘迪簡 擢進士第。 飲爲釂, 由殿中侍御史授兼大夫、散騎常侍。 ,不聽,衆大呼,破戶出之。 徐以它辭請易之, 天德李景略表佐其軍, ,歸衉血,不以聞, 德宗遣使者察變, 具得所以 嘗宴客,而行酒者誤進醯, 入爲太常少卿、太子左 軍中悅其長者。

張茂昭以易定歸,擢迪簡行軍司馬代之。 列 僔 第 九 + 五 任 迪 簡 張 萬 福 大將揚伯玉據牙不納,衆殺之, 五 一七 -L 別將張佐元

給,至 復 级, 以疾入,除工部侍郎。 | 興下同糲食,身居戟戶。 迪簡斬以徇,乃入,以檢校工部尙書爲節度使。承茂昭奢縱後,公私 不能朝,改太子賓客。 踰月,軍中感其公,請安臥內,迪簡乃許。 卒,贈刑部尚書,諡日襄 屈 三年,上下完充。 要, 欲變士, , 無 所

張 海 福 魏州元城人。三世明經, 止縣令、州佐。 萬福以儒業不顯, 乃學騎射, 從

王斛斯以別校征遼東,有功。

准 史,改 計,還其家,不 至潁爲盜 南。 李峘 鴻 圓 臚 所奪 使 伐劉展, 卿 英萬 ,使將千人鎭壽州 ,萬 福 能 攝 自致者,給船車以遣。 扁領輕兵尾襲,賊倉卒不得戰,悉禽之,盡得所亡,并先掠人妻女、財畜萬 署爲部將,效首萬級。累攝壽州刺史、舒廬壽都團練使。 濠州 刺 史。 |杲 ,不以爲恨。 即移戍當塗。 眞拜刺史,兼淮南節度副使。而節度崔圓忌之,失刺 時許杲以平盧行軍司馬將卒三千駐濠州,陰鏡 賊陳莊陷舒州 圓 又令攝舒州 州送租賦詣都 刺

許杲召臣,如河北諸將叛,欲屬何人?」帝笑曰:「始爲我了杲事 大曆 一年召見,代宗曰:「欲 識 卿面, 且將以許杲累卿。」萬福辭謝, ,且當大用。」乃拜和州 因前日:「陛下以 刺

淮

南盜

賊

,窮破

株黨

萬福 宿衞 萬福爲帥,監軍使邀請之,對曰:「我非幸人,勿以此待我。」遂去。以利州刺史鎭咸陽,且留 用三之一。」帝下詔褒美,賜具衣、宮錦十雙。 還所剽於民。 史兼行營防禦使, 追討。 久之, 詔以本鎭兵千五百人防秋<u>京西</u>。 未至,杲爲其將康自勸所逐, 元甫將厚賞士,萬福曰:「官健坐仰衣食,無所事,今一小煩之,不足過賞,請 督盜淮南。 萬福至州 ,自勸循准鈔而東,萬福倍道追殺之,免者十三,盡 ,杲懼,徙屯上元,過楚州,大掠, 萬福詣揚州還所領兵, 會元甫死, 節度使韋元甫使 諸將願得

|泗||州 也。」復賜舊名。 曰:「先帝改爾名正者,所以褒也。 刺史。 李正己反,屯兵埇橋,江淮漕船積千餘不敢踰渦口。 魏州饑,父子相賣,萬福曰:「魏州吾鄉里,安忍其困?」令兄子將米百車饟之, 萬福因馳至渦口,駐馬于岸,悉發漕船相街進,賊兵倚岸熟視不敢動。 **股謂江淮草木亦知爾威名**, 德宗乃以萬福爲濠州刺史, 召謂 ,若從所改,恐賊不曉是卿 改

怒,左右懼不測。 凌烟閣 爲杜亞所忌, ,數賜與,幷敕度支籍口畜給其費。 萬福大言曰:「國有直臣,天下無慮矣。吾年八十,與見盛事。」徧揖城等 召拜右金吾將軍。及見, 陽城等詣延英門論裴延齡事 帝驚日:「亞乃言爾昏耄, , , 伏閣不去, 帝震 何邪?」詔 圖 形

列傳

第

九

+

五

張萬福

髙

固

五一七九

贖魏人自賣者,給資遣之。

勞之,天下益重其名。 以工部尚書致仕,卒,年九十。

反,陳少游悉以部 萬福自始終祿食七十年,未嘗一日言病。 刺史妻子質揚州,萬福獨不遣。 蒞 凡九州, 謂使者:「爲我白公,妻老且醜,不足溷公 皆有惠愛。初,在泗州 遇李希烈

」卒不行,人稱其直。

高 固 不知何許人, 或言四世祖侃, 永徽中爲北庭安撫使, 禽車鼻可汗,以功爲安東

都 護

瑊

突入東壅門,固引銳士長刀殺賊數十人,曳車塞闔,賊不能入。 愛養之,以齊有高固,因以名,以乳媪女女固。 固 生微賤,爲家所賣,轉爲渾瑊童奴,字黃芩。性敏惠,有旅力,善騎射,能讀左氏春秋。 從碱屯朔方。 封渤海 德宗在奉天, 郡王。 固仍從瑊、賊

能聽吾言,乃可。」衆唯唯。 軍,議以李朝宋爲節度,劉南金副之,以詢邠軍,咸曰:「如詔。」數日 檢校右散騎常侍、前軍兵馬使。 李懷光反,使邪寧留後張昕將兵萬人先趣河中,固在行,乃伺間入帳下斬昕首以徇,拜 固徇曰:「毋殺人,毋肆掠!」三軍皆順悅。 貞元十七年,邠寧節度使楊朝晟卒,詔將抖邠寧、朔方爲一 復劫固為帥 帝亦念固功,乃拜 固日:「 然

校 勘 60 五一八一

列

傳第

九

十五

高固

懼,固一釋不問。

邪寧節

i度使。

固本宿將,且寬厚,人皆安之。然久在散位,數爲儕類輕笑。及受命,衆多

憲宗時,檢校尙書右僕射,入爲右羽林統軍。卒,贈陝州大都督。

扼洛口 地。」趾出,或謂)璘曰:「趾言信然。雖然,公所以蒙恩大幸,以邊防未固也。 故厚於公。今若用班言,則邊已安,尙何事爲?」跡遂不聽。 郝玼 ,其川饒衍,利畜牧。其西走戎道,曠數百里皆流沙,無水草。 ,不記其鄉里。 貞元中爲臨涇鎭將,嘗從數百騎出野,還,說節度使馬璘曰:「臨涇 願城之, 爲休養便 上心日夜念此,

自祿山反,西陲盡亡,寰內爲邊郡,每虜入寇,驅井閭父子與馬牛,焚積聚,殘室廬,邊人耗 今若築臨涇以折虜勢,便甚。」佑唯許,請于朝,卒詔城臨涇,爲行原州,以毗爲刺史,成 及段佑代節度,雖又說曰:「天寶時,天下以兵爲防,獨西戎耳。 而塞至京師且萬里。

之,自是虜不敢過臨涇。

令于 名以 ·國曰:「得生班者,以金班償之。」朝廷畏失名將,徙爲慶州刺史,卒。 怖啼見。 玼 在邊積三十年,每討賊,不持糗糧,取之於敵。 遷檢校左散騎常侍、涇原行營節度使,封保定郡王。 獲虜必刳剔而歸其屍, 虜大畏, 道其 贊普常等班身鑄金象,

五一八二

本郭子儀牙將,從征伐有功。貞元末,爲涇原節度使,虜畏憚之。 終右神策大將軍。

皆謂 杜叔 迨萬數。 良,請兵三千,齎一月糧,深入虜地,分賊勢。」叔良以二千兵予之,行十餘日,不聞問 已歿。 史敬奉者, 賜實封五十戶。 敬奉乃由間道繞出虜後,部落奔駭,因大破之,驅其餘衆於瓠蘆河,獲馬牛雜畜 靈州人。 事朔方軍爲牙將。 元和中, 吐蕃數犯塞,十四年, 敬奉白節度使

野詩 姪部 良輔及郝毗皆以名雄邊。 曲二百人,每出輒分其隊爲四五,隨水草,數日不相知,及相遇,已皆有獲。 敬奉遳陋,類不勝衣,其走逐奔馬,挾鞍勒以上,而後羈帶之,矛矢在手,前無彊敵。 與鳳翔將 甥

良輔者,後爲隴州刺史。 朝廷遣使至吐蕃,虜輒言:「唐家稱和好豈妄邪!不爾, 安得

校勘記

任良

輔為隴州

刺

史?

楊 據 子琳 改。 參見本書卷一四三校勘記 各本 原作「楊惠林」。 按本書卷六、舊書卷一一  $\subseteq$ 代宗紀及通鑑卷二二四皆作「楊子琳」,

